






C. 14. 427. 





CAUSA ARNALDINA  
S E U  
ANTONIUS  
ARNALDUS

DOCTOR ET SOCIUS SORBONICUS

A Censura Anno M. DC. LVI. sub nomine Facultatis  
Theologiæ Parisiensis vulgata

VINDICATUS

*Suis Ipsius aliorumque Scriptis, nunc primum in  
unum volumen collectis:*

QUIBUS

S. AUGUSTINI & S. THOMÆ DOCTRINA,  
De Gratiâ efficaci & sufficiente,  
dilucidè explanatur.

REVERTIMINI AD JUDICIUM. Danielis XIII. 49.

P A R S I I.



LEODICI EBURONUM,  
Apud JOANNEM HOYOUN.  
M. DC. IC.

THE UNIVERSITY OF CHICAGO

LIBRARY

1100 EAST 58TH STREET

CHICAGO, ILL. 60637

TEL. 733-4331

1975

1000

1000

1000

1000

1000

1000

1000

1000

1000

1000

XVI.

ANTONII ARNALDI  
DOCTORIS SORBONICI,

*Super illa Propositione SS. Chrysostomi &  
Augustini:*

DEFUIT PETRO TENTATO GRATIA  
SINE QUÀ NIHIL POTERAT,

DISSERTATIO  
THEOLOGICA,

QUADRIPARTITA,

In qua exhibetur NORMA tum loquendi, tum sentiendi, circa possibilitatem Præceptorum, & Gratiæ efficacis necessitatem, ex Scripturis & Patribus, & recentiorum etiam Theologorum placitis, deprompta.

*Ad Clarissimum Doctissimumque Ecclesia Romana Theologum Hilarionem, Abbatem Sanctæ Crucis in Jerusalem.*

*Juxta exemplar editum 1656.*

# CHRISTIANO LECTORI,

**S**criptionem istam, Christiane Lector, quam brevem esse malueram, longiorem necessitas fecit. Multae enim ac variae nobis quaestiones, ex se invicem nexae, pertractandae fuerunt, ut omnia adversariis meis effugia praeccluderem. Ita singulae partes, per se breves, longam tamen summam efficiunt. Hoc autem, ni fallor, omnibus aequis rerum aestimatoribus probabimus, sententiam nostram, non modò in antiquorum Patrum, sed in omnium Thomistarum tum veterum tum recentiorum doctrinâ, nemine excepto, peraeque veram esse. Quaestiones illas de potestate proximâ, de gratiâ actuali, de possibilitate praeceptorum, ita praecidimus, ut nulla in iis ne cavillandi quidê[m] causâ superesse videatur. Quamobrem Censores ipsos, tam mihi, licet sine causâ, insensos, vehementer oro atque obtestor, ut hanc Dissertationem primùm legant, deindè ipsi respondere dignentur. Nam quò magis magisque cogito, eò magis in eam sententiam adducor, non intelligere ipsos quid sentiam. Id mihi ex ipsorum suffragiis conjicere licuit, in quibus tam aliena commenta mihi afficta sunt, ut mirari satis non possim tantam, ut mitissimè dicam, Theologorum indiligentiam, qui ejus, de quo sententiam ferebant, mentem explorare ne curaverint quidê[m]: adeoque, si hæc contentionis & odii flamma resederit, hoc scio, dissentiones istas horæ momento componi posse. Non enim illis modo solida causa non subest, sed planè nulla; nullum, inquam, doctrinæ caput est, quod ipsi adhuc ad fidem pertinere universi contendere ausi sint, quod quidê[m] à me negetur. Itaque, dum maximè fidei coloribus me infectantur, eadem omnia à quibusdam

ex suis propugnari sinunt, in multis etiam ista plausu & gratulatione prosequuntur. Exemplo esse potest Holdenii Epistola, præcipuis, ut ipse dicitur, Censoribus grata & probata; & tamen, nihil illum à me dissidere, edita de hoc argumento scriptiuncula planum fecit.

Sed illustrius adhuc hujus rei exemplum suppeditant Theses, apud Presbyteros Oratorii defensæ, & Illustrissimis Galliæ Episcopis Lutetiæ congregatis nuncupatæ, eorundemque, ut audio, frequentia cohonestatæ. In his enim totum controversæ propositionis sensum his verbis expressum lego: *Sufficiens gratia infallibiliter suo caret effectu: Efficax illum infallibiliter producit, idque in omni statu: unde, absente hac (efficaci) ita non potuit Adam bonus se servare bonum, ex S. Augustino, UTI NEC PETRUS CHRISTUM CONFITERI: infallibiliter enim id non erant volituri: licet utrumque ambo absolute potuerint.* Dissentio quidem ab illius Theses auctore, quisquis est, quod gratiam efficacem ad perseverandum necessariam admittat etiam in statu innocentiae. Sed, hoc in quæstione versari, nemo dicat. At planè ille mecum sentit in eo, quod Petrum sine gratia efficaci, quam certè non habuit, Christum non potuisse confiteri dicat, eundemque potuisse per potentiam, ut ipse explicat postea, *in actu primo constitutam.* Nihil enim affirmat aliud Epistolæ propositio; & quisquis illi alium sensum tribuit, falsum affingit. Quod adversariis meis denunciare idèò necesse est, quia video, nihil aliud eos moliri, nisi ut ambiguum aliquod Decretum ab Ecclesiæ potestatibus eliciant, ut illius specie postmodum Orbem christianum ludificentur. Verùm, post meam hanc contestationem, si quid calumniis suis à quibusvis Ecclesiæ judicibus auferant, in quo meus hic sensus non clarè & apertè damnatus appareat, manifestum vel hoc indicio omnibus erit, iudices fraude & dolo circumventos, nec propositionem verè damnatam dici posse, cum in sensu alieno, fictitio, & per calumniam imposito damnata sit.

Quamobrem, ne sit dubitationi locus, Decreti formant ipse præformabo, quod si impetrent ab ullis Ecclesiæ iudicibus, ab illis quoque propositionem meam damnatam esse, non diffitebor: *Hæretica est illa propositio, quæ asserit, Petro iusto non affuisse gratiam efficacem agendi, id est, confitendi Christum (nam de gratiâ orandi nullus hic sermo) sine quâ nihil poterat, quod ad vincendam temptationem attinet, eâ potestate, quæ complectitur omnia ad agendum necessaria. Sin aliter se gesserint, nihil agent omnino, omnelque veritatis amantes Theologos in calumniam cogent inclamare.*

Sed quod in iisdem, quas dixi, Theſibus legitur: *His verò recentioribus non consentimus, qui, dum potentiam proximam negant cuiquam adesse sine gratiâ efficace Salvatoris, per eam intelligi volunt illam vim voluntatis &c. quâ si careat, adsint licet cætera omnia, nihilo-magis ipsa bonum velte possit, quàm cæcus videre, claudus curriere, beatus peccare: carere autem eâ quotquot nunc efficaci gratiâ carent: Id, inquam, unde didicerit prædictarum Theſium scriptor, & quinam sint isti recentiores, libenter ex ipso quæsierim; neque enim ullos legere me memini, qui sic teneant aut doceant. Ego verò planè non ita me tenere profiteor: modò enim id unum mihi concedatur, quod iste auctor satis luculenter explicat, *Necessariam esse gratiam efficacem, ut potestatem actus primi in actu secundo applicet ac determinet, adeòque nihil omnino boni sine illâ unquam neque cogitando, neque orando, neque agendo, factum esse, potestatem actus primi sine gratia efficaci in omnibus generatim iustis libenter admitto.**

Speciatim verò, in iustis volentibus & conantibus gratias excitantes admittendas, fateor, easque Thomistico sensu sufficientes. Quamobrem, quæcunque demùm sententia Constitutioni Innocentii X. subjiçiat, fateor verum esse illum sensum quo vulgò à Thomistis accipitur, nimirum omnibus iustis volentibus & conantibus adesse gratias excitantes sufficientes Thomistico sensu, neque deesse illis gratiam, quâ possibilia fiant præcepta, tum quia jam habent

habent excitantem quâ possunt sensu prædicto, tum quia si illi gratiæ plenè consenserint (quod possunt si velint: quod si non faciant in culpâ sunt) gratiam efficacem non solum habituri sunt, sed jam habebunt; quia, si quis gratiæ sufficienti consenserit, ut iidem docent, signum est à posteriori, affuisse illi gratiam efficacem. Hæc de justis volentibus & conantibus, de quibus solis loquitur Constitutio Innocentii X. mihi cum Thomistis recentioribus planè conveniunt.

Cæterùm, malè elici ex Constitutione Summi Pontificis alterutram ex sequentibus propositionibus, palàm est: *Justis ignorantibus, incogitantibus, nec volentibus, nec conantibus, adest cognitio, cogitatio, voluntas, conatus, id est, gratia excitans actualis; vel: Nullus unquam justus peccat, ne quidem venialiter, ex ignorantia, ex incogitantia, & sine pia voluntate, pioque conatu ab illo peccato abstinendi.* Qui sic acceperit Summi Pontificis Constitutionem, non ipsam interpretatur, sed novam & planè diversam Constitutionem condit, eamque, ut mihi quidem videtur, manifestè sibi repugnantem. Quare non est credendum, id voluisse Innocentium, donec alterutra ex istis propositionibus in aliquo Summi Pontificis diplomate nominatim legatur expressa, quod ab Apostolicâ Sede, fidenter hoc affirmo, nunquam impetrabunt adversarii; & quamvis impetrarent, quod fieri non potest, sua tamen propositioni Epistolæ veritas constabit, quæ gratiam actualem non dicit Petro defuisse, sed solam efficacem, ut postea explicabitur. Hæc quamquam in hujus Dissertationis serie fusiùs explanentur, tamen in ipso limine prædicta volui, in eorum gratiam quibus totam hanc scriptionem perlegere non vacabit. Ex omnibus autem perspicui poterit, unam quæstionem rectè moveri posse: *Virum gratia efficax, effectum infallibiliter produçens, & ad agendum & ad orandum necessaria sit:* quam doctrinam quoniam adversarii OPTIMAM esse professi sunt, nulla omninò controversia jam superest.

## ANTONII ARNALDI

DOCTORIS SORBONICI

Super illâ Propositione SS. Chrysostomi &amp; Augustini:

DEFUIT PETRO TENTATO GRATIA SINE QUÂ  
NIHIL POTERAT,

## DISSERTATIO THEOLOGICA;

QUADRIPARTITA.

## P R Æ F A T I O.

In qua scriptionis occasio, consilium, & partitio,  
declarantur.

**P**erlata sunt ad me nonnullæ schedulae, in quibus duo magni nominis Theologi amicè inter se concertant super illâ quaestione: An de justo gratiâ efficaci destituto vere dici possit, deesse illi gratiam sine quâ nihil possumus. Disputationem illam commoverat propositio à me ex Chrysostomo & Augustino descripta, quam nonnulli, in me iniquiores, contumeliosis hereseos & blasphemiae notis affecerunt.

Inter illos autem Theologos illud video convenire, gratiam efficacem ad singulos pietatis actus necessariam esse, & sine eâ nihil unquam boni fieri. Imò earum alter, qui nonnihil à me dissentire se putat, pro eâ quâ pollet antiquitatis notitiâ, libenter agnoscit, innumera ex Patribus loca posse congeri, in quibus asserunt, sine gratia efficaci nihil fieri posse, atque illo elogio semper ab Augustino donari gratiam, de quâ cum Pelagio disputat, cum tamen disputet de efficaci. Unde nulli dubium esse potest, quid ille de Censura sentiat, quæ nullâ additâ exceptione eam propositionem proscribit, quam clarissimus ille Theologus, infini-



in penè locis, in Patrum scriptis inveniri fateatur.

*Levis tantum dissensio superest, quòd alter eorum sine gratia efficaci potentiam proximam haberi vult, alter sine ea potentiam proximam haberi negat. Iste eà maximè ratione nititur, quòd potentia proxima nomine intelligatur ea, quæ complectitur omnia ad agendum necessaria, ideòque illi tribui non possit cui gratia efficax ad agendum necessaria desit. Alter verò, qui in ea opinione est, quam hodie multi ex Thomistis profitentur, gratiâ efficaci non dari posse, sed velle & agere, potentia proxima nomine eam intelligit, cui nihil deest ex parte potentia, licet aliquid desit ex parte actus; ideòque etiam in iis potentiam proximam esse contendit, quibus deest gratia efficax; quia, inquit, per illam non fit, ut velle possimus, sed ut velimus.*

*De hâc controversiâ quid ipse sentiam, quia cognoscere studuerunt, impositum mihi munus eò libentius suscepi, quòd illa verborum potius quàm rerum contentio esse mihi visa est, adeòque utriusque sensum & optimè inter se conciliari posse, nec ullo modo cum subjectâ propositioni meæ sententiâ pugnare arbitratus sum. Augustiniana enim illa propositio, quam in Epistolâ meâ retuli, sensum habet omnino segregatum ab omnibus illis questionibus, quæ inter illos Theologos efficaciæ gratia paucos agitantur. Id affirmat quòd inter illos convenit; illud in quo dissident non attingit. Solos illa Molinistas, & alios efficaciæ gratia hostes, invadit; ab illis etiam solum invadi potest: indignissimum verò fuerit, illam à Thomistis non defendi, quorum adversus Molinianos causam agit.*

*Ergò, ne cum dubiis & obscuris questionibus certissima Ecclesiæ fides permisceatur, tria mihi præstanda putavi, & in totidem partes digerenda.*

*Primâ, propositionis meæ & sensum & verba sic tutabor, ut gravissimis Summorum Pontificum, Conciliorum, Patrum testimoniis illam ad fidem pertinere convincam.*

*Alterâ, sic illam ratione confirmabo, ut optimè coherere doceam cum illorum Thomistarum sententiâ, qui gratiam efficacem,*

*ficacem, non ad posse, sed ad velle, non ad actum primum, sed ad secundum, necessariam statuunt; in qua mihi varia de sensu illius verbi posse, & de possibilitatis Thomistica naturâ, inquirenda & disputanda sunt.*

*Tertiâ denique, meum de ipsis illis questionibus scholasticis, & de variarum vocum acceptione sensum, sic exponam, ut tamen meam super illis controversiis sententiam conjungi nullatenus velim cum propositionis mea sensu, quæ Traditionis auctoritate firmata & tuta, periclitare non debet ex iis opinionibus, in quibus, pro humani ingenii infirmitate, errare nonnunquàm citra fidei diffidium Theologi possunt.*

## M O N I T U M.

**Q**uartam Autor non commemorat, quia, ut ad Tertiæ calcem ipse monuit, hanc Dissertationem tres tantum in Partes distribuere initio propositum illi fuerat. Verùm cum Tertia longiùs jam processisset quàm putarat, non alienum visum est, reliquas quæstiones Scholasticæ Theologiæ minùs affines in Quartam potiùs Partem rejicere, ne Tertiæ Partis abnormis magnitudo ab aliarum modo nimium abhorreret.

# DISSERTATIONIS

## PARS PRIMA.

In qua Augustinianæ Propositionis veritas totius Traditionis auctoritate roboratur.

### ARTICULUS I.

*Status quæstionis exponitur, & quædam præmittuntur ad illam rectè intelligendam necessaria.*

**T**otius Controversiæ summa est, Utrùm de justo, gratiâ efficaci destituto, verè & catholicè dici queat, *Deesse illi gratiam sine quâ nihil possumus, vel ad bene agendum, vel ad tentationes vincendas.* Nam, si de aliquo justo id dici potest, utique de Petro, quem in lapsu gratiam efficacem non habuisse, consentiunt omnes. Tota autem illius controversiæ difficultas eò redit, Utrùm verè dicatur, *sine gratia efficaci nihil hominem posse.* Nam hoc concessio, nemo est qui consequens esse non videat, cum, qui caret gratiâ efficaci, ut caruit Petrus, carere utique gratiâ sine quâ nihil possumus. Ergo utrum probes, vel generatim sine gratiâ efficaci nihil hominem posse, vel speciatim justum gratiâ efficaci destitutum nihil posse, nihil omnino ad probationis firmitatem interest.

Antequàm verò quæstionis hujus tractationem aggrediar, taia

præmittenda sunt. Primum est, cum de victoriâ tentationis loquor, eam me victoriam intelligere, quâ pio in Deum affectu tentatio vincitur: neque enim necessaria est gratia efficax ut prava cupiditas aliâ, licet fortasse minùs noxiâ, cupiditate vincatur: eâdemque ratione, cum aio sine gratiâ Dei nihil boni fieri posse, ad præcidendas omnes controversias de eo bono me id accipere, quod ad salutem pertineat.

Alterum est, per gratiam efficacem hîc à me intelligi misericordiam Dei quemcumque in nobis bonæ voluntatis motum, sive perfectum sive imperfectum, efficaciter operantem: non verò eam solam, quæ plenam & integram, vel ad Deum conversionem, vel boni faciendi voluntatem inspirat, quam solam efficacis gratiæ nomine Thomistæ vulgò designare solent. Unde quæstionis sensus est, Utrùm verè & catholicè dici queat, sine gratiâ

gratiâ efficaci nihil boni fieri posse, hoc est, sine illa gratiâ efficaci, quæ ad unumquemque pium voluntatis motum necessaria est, pium illum motum haberi non posse: neminem, exempli causâ, sine illa gratia habere posse ipsam imperfecti boni cupiditatem: neminem orare posse, nisi cui ille Spiritus qui pro nobis interpellat, quia interpellare nos facit, orandi inspiret affectum: neminem posse tentationes superare, nisi cui per efficacem Christi gratiam tentationis victoria concedatur: neminem in bono perseverare posse, nisi cui perseverantia ipsa donetur, ita ut non solum sine isto dono perseverans esse non possit, verum etiam ut per hoc donum non nisi perseverans sit.

Postremum, quod majoris adhuc momenti est, non id quæri: An justis omnibus semper adsit gratia quâ Dei mandata possibilia fiant, & quâ tentationes vinci possint; sed illud solum: Utrum verè & catholicè dicatur, sine gratiâ efficaci, quam justis aliquandò deesse omnes fatentur, nihil boni fieri, & tentationes vinci non posse. Quamvis enim illæ propositiones inter se pugnare videantur, aded tamen non pugnant, ut utraque ad Ecclesiæ doctrinam ex æquo pertineat. Verum & catholicum est, Omnes justos ope gratiæ interioris semper posse mandata servare, ac tentationes vincere, quantum *ad sufficientiam operativæ virtutis*, ut loquitur S. Thomas,

Sed non minùs verum & catholicum, imò longè magis etiam Traditionis auctoritate munitum, Justis eam aliquandò gratiam deesse sine quâ nihil fieri potest, nedum graves tentationes superari.

Ad prius illud dogma stabilendum, quamvis verum & orthodoxum, pauca tamen admodum Patrum testimonia suppetunt. Rarè enim illi de aliâ potestate loquuntur, quàm quæ, vel sit naturæ seclusâ gratiâ, vel gratiæ efficacis, & cum effectu semper conjuncta sit. At postremum illud tot Scripturarium, Conciliorum, Patrum, undique concinentibus testimoniis confirmari potest, ut si quis totam Traditionem commovere velit, innumeris penè locis illud astruere possit, *Sine gratia efficaci nihil nos posse*: quam gratiam justis aliquandò deesse, nemo inficiari queat. Quare, cum multa in his contentionibus mirer, quia inusitata & nova, tum nihil magis, quàm illam sententiam, *Sine gratia efficaci nihil homines posse*, quæ Patrum libros tractantibus undique in oculos incurrit, ab iis qui se Theologos haberi velint, in dubium revocari.

Nec tamen sic illam amplectimur, ut ab alterâ recedamus, quam ut catholicam & orthodoxam semper professi sumus. Novimus enim id catholici esse Theologi, qui fidem, non humanâ ratione, sed divinâ auctoritatè metiatur; eâ quæ inter quasdam Christianæ doctrinæ

sententi-

sententias pugnâ nonnunquam apparet, ab iis pariter amplectendis non deterreri, si ab Ecclesiâ, quam unam fidei suæ normam agnoscit, sibi pariter commendentur.

Illo animo qui non fuerunt, errorum & hæreseum duces adversus Ecclesiam fuerunt. Quorum si quis originem diligenter attendat, non aliam ferè reperiet, nisi quia ita se quibusdam, licet veris alioquin & catholicis, dogmatis addicebant, ut quicquid illis repugnare in speciem videretur continuò velut erroneum soltâ hæreticis temeritate rejicerent. Unitatem divinæ naturæ cum personarum multiplicitate conciliare Sabelliani non potuerunt: ergo unitatem sic confessi sunt, ut Trinitatem personarum negaverint. Ariani contra, quia unitate naturæ destrui personarum pluralitatem putarunt, sic tres personas professi sunt, ut unitatem naturæ dividerint. Personas in Christo duas esse asseruerunt Nestoriani. Fons erroris ex eo est, quod personæ unitatem cum naturarum diversitate conjungere non potuerunt. At Eutychiani simili causâ in oppositam hæresim prolapsi sunt; sic enim unam in Christo personam esse docuerunt, ut duas in unum naturas miscuerint. Denique, ne abeamus ab illâ controversiâ, quæ his temporibus inter Catholicos maxime jactatur, liberi arbitrii cum gratia componendi summam difficultatem esse, faceret Augustinus,

quâ tamen non tardata Ecclesia sic gratiam confitetur, ut liberum non neget arbitrium: sic arbitrium humanum agnoscit, ut gratiæ in illud imperium pariter agnoscat. Pelagiani contra & Calvinistæ, quia hâc animi demissione non fuerunt, in oppositos errores, sed ex eodem fonte profectos, impegere: illi gratiæ necessitatem & imperium negaverunt; hi sub imperio gratiæ liberam manere voluntatem non putaverunt. Utrunque damnat Ecclesia; quia, gratiâ non adimi liberum arbitrium sed liberari, sentit. *Non enim*, ut ait Prosper contra Collat. c. 12. *periculum est libero arbitrio ex gratiâ Dei, nec voluntas aufertur, cum in ipsâ bene velle generatur.*

Sic affecti in iis quæ hodie vigent contentionibus esse debemus. Summorum Pontificum Constitutiones ex æquo revereamur, quia parem omnes auctoritatem obtinuerunt. Sed non ita simus præposterâ in recentiores pietate, ut ab illis convulsum putemus quicquid à Decessoribus suis, quicquid ab antiquis Conciliis, quicquid à perpetuâ Ecclesiæ Traditione definitum ac sancitum est. Qui aliter se gerunt, schisma in ipsam unitatis Sedem inducunt; exitiale contemnendæ Traditionis exemplum invehunt; &, dum unius Pontificis Constitutione totam antiquitatem perversâ ipsius interpretatione damnatam volunt, Calvinistis Ecclesiæ hostibus hanc Facultatem suppeditant ubique,  
ut

ut faciunt, jactandi, Pontificiâ Constitutione antiquam Ecclesiæ fidem esse damnatam.

Nos verò, ut illorum hæreticam audaciam ex animo detestamur, sic illis fortiter resistendum putamus, qui Pontificis Decretò contra ejus mentem abutuntur, ad ea dogmata destruenda, quæ pro certissimis hætenus habita sunt. Quantâ possumus demissione animi Decretum Innocentii X. veneramur & amplectimur; sed non minori veneratione Innocentii I. Cælestini, Gregorii, totius denique Traditionis consensus, nobis colendum esse judicamus. Non illum à suis Decessoribus distrahimus, imò optimè conciliari posse, arbitramur. Et, si nobis illorum concilian-

dorum ratio non satis appareret; religiosius tamen putaremus, etiam quæ pugnare inter se viderentur, amplecti, quàm, dum unum sequimur, reliquos omnes deserere atque damnare. Ergo sinceram animi mei reverentiam in postremi Pontificis Decretum contestatus; & id præterea professus, minimè, ut jam dixi, negare me justis omnibus veram & interiorem adesse gratiam, quâ mandata servare, & tentationes superare posse, verè dicuntur; id unum mihi querendum propono, Num etiam verè dici possit, sine gratiâ efficaci, quâ justus aliquandò destituitur, nihil boni fieri posse, neque tentationes superari.

## A R T I C U L U S II.

*Verus & præcisus Propositionis sensus ostenditur.*

**Q**uestionis autem illius aut sensus spectatur, aut verba: non enim modò rectè sentire debemus, sed etiam catholicè loqui. Verùm, in neutro me ab Ecclesiæ vel doctrinæ vel sermone recessisse, in neutro me cum Thomistis & cum clarissimo Theologo pugnare, faciliè demonstrabo.

Cum de justo gratiâ efficaci destituto dixi, illum tentationem superare non posse, vel Petro defuisse gratiam, sine quâ vinci non poterat tentatio, hoc solùm significare volui, illum à Deo non accepisse quicquid ad vincendam usum

tentationem necessarium est; vel, quod in idem recidit, ipsum aliquo auxilio ad vincendam tentationem necessario caruisse, quod quidem auxilium non ex ipsius nutu, sed ex divinâ misericordiâ, penderet; vel denique, hæc duo stare secum & componi non posse, ut Petrus gratiâ efficaci destitutus fuerit, ut reverà fuit, & tamen tentationem re-ipsâ superaret.

Quamvis autem catholico Theologo, mentem suam aperienti, fides abrogari non debeat; tamen in Apologeticis meis nulum aliud sub propositionis meæ verbis sensum inclusum esse, non modò

modò testatus sum, sed etiam probavi ex aliis Epistolæ meæ locis, quibus eandem sententiam complexus eram. At in isto sensu nihil est, quod omnibus S. Thomæ discipulis non probetur. Sic enim omnes ad unum sentiunt, gratiam efficacem, quæ consensum voluntatis infallibiliter elicit, ad omnia pietatis opera ad bonam voluntatem necessariò requiri; atque ad eam illam esse, quâ solâ, ut ait Augustinus, de Correp. & gr. c. 11. *homines liberantur à malo; & sine quâ nulum prorsus, sive cogitando, sive volendo & amando, faciunt bonum.* Hoc quicumque profitebitur, quemadmodum omnes Thomistæ profitentur, mecum, velit nolit, faciet & sentiet. Hoc enim

unum fidei Christianæ dogma, quo salus hominum, non ex humana, sed ex divinâ voluntate, suspenditur, jam per multos annos adversus Molinianos tuentur Augustini discipuli. Quanquam verò in isto certamine omnibus iniquitatibus & calumniis oppressi sunt; illud tamen perfectum est, ut à cardine questionis dejecti Molinistæ, ad nescio quas argutationes, & alienas planè contentiones, disputationem avertere cogantur, licet in omnibus id unum spectent, ut gratiæ efficaciæ doctrinam, quam apertè aggredi non audent, cuniculis & insidiis evertant: quod se Censuræ suæ ope potissimum perfecturos arbitrantur.

## ARTICULUS III.

*Sensum catholicum superius expositum controversæ propositionis verbis rectè exprimi potuisse, ostenditur primum ex Scripturis.*

Cum igitur illud constet ex omnium Augustini & Thomæ discipulorum mente, imò ex certissimâ Ecclesiæ doctrinâ; verè & catholicè dici 1. *Justis, ut Petro, aliquando deesse gratiam efficacem ad vincendam tentationem necessariam.* 2. *Justis aliquando deesse divinum auxilium ad vincendam tentationem necessariò prærequiritum.* 3. *Fieri non posse, ut hæc duo inter se componantur: Justus gratiâ efficaci caret; & justus vincat tentationem.* His positis, quæritur; utrùm illi sensus; quos

omnibus Thomistis probari, certum est, illis vocibus exprimi possint: *Justis aliquando deest gratia sine quâ tentationes vinci non possunt: vel Justus deest aliquando gratia sine quâ nihil possunt ad vincendam tentationem: vel Justus aliquando non possunt vincere tentationem.* Ecclesiastica autem loquendi ratio ad duas normas exigipotest: primum ad auctoritatem Scripturæ; Patrum, Theologorum, deinde ad humanæ rationis vulgarisque sermonis arbitrium. At, si superius exposita



locutiones ex alterutro metiamur, manifestò parebit omnes tum antiquos tum recentiores Ecclesiæ Scriptores, illis frequentissimè usos, & eo quo diximus sensu; neque aliter loqui debuisse, nisi ab omnium hominum loquendi more discedere vellent. Quæ ad auctoritatem spectant, in hac priori parte tractabimus: quæ ad rationem, humanique sermonis arbitrium, ad alteram rejiciemus. Ex eo enim præcipuè pendet quod in secundâ Dissertationis hujus parte probandum suscepimus, hanc loquendi formulam cum illorum Thomistarum sententiâ minimè pugnare, qui gratiam efficacem non ad posse, sed ad velle tantum exigere, dari contendunt.

Ut Ecclesiæ doctrina, sic ejus sermo fluxit ex Scripturis. Ergò ut exploretur, an illa loquendi ratio, *Sine gratia efficaci nihil fieri potest*, catholica & orthodoxa sit, nulla commodior via est, quàm si expendantur illa Scripturæ loca, in quibus affirmat, sine gratiâ nihil fieri posse. Nam, si pateat, illa loca de gratiâ efficaci semper à Patribus intellecta, catholicis non sit qui de gratiâ efficaci dici posse neget, Sine eâ nos nihil posse.

Hoc posito, facile probari potest, omnia Scripturæ loca, ex quibus ea sententia, *Sine gratia nihil fieri potest*, elicitur, de gratiâ efficaci ab iis Patribus qui de gratiâ scripserunt, semper accepta. Ut singula non percurram, de gratiâ efficaci loquitur Chri-

stus, Joan. 6. cum ait: *Nemo potest venire ad me, nisi Pater, qui misit me, traxerit eum. Trahitur enim homo*, ut ait Augustinus l. 1. ad Bonif. c. 19. *miris modis, ut velit, ab illo qui novit intus in ipsis hominum cordibus operari; non ut homines, quod fieri non potest, nolentes credant, sed ut volentes ex nolentibus fiant.*

De Gratiâ efficaci loquitur Christus, cum ibidem addit: *Sunt quidam ex vobis qui non credunt; propterea dixi vobis, quia nemo potest venire ad me, nisi fuerit ei datum à Patre meo, hoc est interprete Augustino, de præd. sanct. c. 8. nisi donum acceperit à Patre, quo credat in Christum.*

De Gratiâ efficaci loquitur Paulus in illis verbis: *Non quia idonei sumus cogitare aliquid ex nobis, quasi ex nobis, sed sufficientia nostra ex Deo est; de ea enim loquitur gratiâ, quâ ipse ad fidem conversus est, & quâ ex nolente factus est volens, ut testatur Aug. de Præd. SS. c. 2. Aversus quippe, inquit, à fide quam vastabat, eique vehementer adversus, repenti est ad illam gratiâ potentiore conversus, convertente illo, cui hoc ipsum facturo per Prophetam dictum est: Tu convertens vivificabis nos; ut non solum ex nolente fieret volens credere, verum etiam ex persecutore persecutionem, in ejus fidei quam persequabatur defensione, pateretur. Donatum quippe illi erat à Christo, non solum ut crederet in eum, verum etiam ut pateretur pro eo. Et idè commendans istam gratiam, quæ non datur secundum ali-*



quā merita, sed efficit omnia bona merita: Non quia idonei sumus, inquit, cogitare aliquid quasi ex nobis mei-ipsis, sed sufficientia nostra ex Deo est.

De Gratia efficaci loquitur Sapient, cum ait: Cum scirem quia nemo potest esse continens, nisi Deus det; & hoc ipsum erat sapientia scire cujus esset hoc donum: adiū Dominum, & deprecatus sum. Hoc enim loco Pelagianos sæpe compellit Augustinus ad gratiæ efficacis necessitatem agnoscendam. Proprium arbitrium, inquit ep. 143. nisi Dei gratiā juvetur, nec ipsa bona voluntas esse in homine potest. Deus est enim, inquit Apostolus, qui operatur in nobis & velle & operari pro bonā voluntate; non sicut isti sentiunt; tantummodo scientiam revelando, ut novimus quid facere debeamus, sed etiam inspirando charitatem, ut ea quæ discendo novimus, etiam diligendo faciamus. Nam utique novit ille quā magnum bonum esset continentia, qui dicebat: Et cum scirem, quia nemo potest esse continens, nisi Deus det. .... Nec tamen ei scientia suffecit, sed ait: Adiū Dominum, & deprecatus sum illum. Non igitur tantummodo in hoc nos adjuvat Deus, ut sciamus quid agendum sit, verum etiam ut amando agamus, quod discendo jam scimus.

De gratia efficaci loquitur Christus, Joan. 15. cum ait: Sine me nihil potestis facere. Hic enim locus, quo maximè nititur catholicum illud dogma, Sine gratia Dei nos nihil posse, ab omnibus Patribus quos ad gratiæ suæ

defensionem excitavit Deus, de efficaci gratiā semper intellectus est: Quomodo est, inquit Aug. l. 4. ad Bonif. cap. 6. hominis bonum propositum sine misericordiā prius Domino, cum ipsa sit bona voluntas, quæ preparatur à Deo? .... Reluctanti enim prius aditus divini vocationis ipsa Dei gratiā procuratur: ac deinde in illo, jam non reluctante, spiritus virtutis accenditur. Verumtamen in omnibus quæ quisque agit secundum Deum, misericordia ejus prævenit eum. Quod isti nolunt, quia non esse Catholici, sed Pelagiani, voluit.... Ita namque illis tumor ipse aures cordis obstruxit, ut non audiant: Quid habes, quod non accepisti? non audiant: Sine me nihil potestis facere; non audiant: Charitas ex Deo est; non audiant: Deus partitus est mensuram fidei; non audiant Spiritus ubi vult spirat; non audiant: Nemo potest venire ad me, nisi fuerit ei datum à Patre meo; non audiant quod per Jeremiam dicit Dominus: Et timorem meum dabo in cor eorum, ut à me non recedant, & visitabo eos, ut bonos eos faciam. Innumera ex Augustino aliisque Patribus loca proferri possunt, quibus hanc Christi sententiam, Sine me nihil potestis facere, vel de gratiā efficaci apertè intelligunt, vel cum aliis Scripturæ testimoniis connectunt, quæ ad gratiam efficacem procul dubio pertinent. Nullus verò, fidenter hoc assero, locus reperietur, in quo hæc Christi verba de illā gratiā interpretati sint, quæ de solam boni possibiliterem, etiam si nec velit homo, nec agat bene,

ut loquitur Augustinus.

Hæreticæ porro temeritatis est Scripturæ sensus ex ingenio petere, non ex antiquorum Patrum consensione. Convenit enim inter Catholicos, ut Scripturas ipsas, sic Scripturarum sensum ad nos Traditionis alveo deferri; & præcipue ex illorum Patrum scriptis in singulis quibusque fidei capitibus hauriendum esse, quos ad illa explicanda & cælestibus oraculis confirmanda Deus Ecclesiæ suæ concessit, quod egregie à Perronio notatur in Opere posthumo ad Regem Britanniz, obs. 4. c. 5. ubi eximium illum Augustini locum assert, ex serm. 54. Multi, inquit, qui optimè poterant Scripturas cognoscere & pertractare, latebant in populo Dei, nec afferebant solutionem questionum difficultum, cum calumniator nullus instaret. Nunquid enim perfectè de Trinitate tractatum est, antequàm oblatrarent Ariani? Nunquid perfectè de poenitentia tractatum, antequàm obsisterent Novatiani? Sic non perfectè de baptismo tractatum est, antequàm contradicerent foris positi rebaptizatores; nec de ipsa unitate Christi enucleatè dicta erant, quæ dicta sunt, nisi postquàm separatio illa urgere cepit fratres infirmos. Quibus addit Petronius, nec de libero arbitrio perfectè tractatum

esse ante Pelagianos. Cujus rationem idem Augustinus in Psal. 67. his verbis exposuit. *Multi enim sensus Scripturarum sacrarum latent, & paucis intelligentioribus noti sunt, nec asseruntur commodius & acceptabilius, nisi cum respondendi hæreticis cura compellit. Denique quàm multi Scripturarum sensus de Christo Deo asserti sunt contra Photinum; quàm multi de homine Christo contra Manichæum; quàm multi de Trinitate contra Sabellium; quàm multi de unitate Trinitatis contra Arianos, Eunomianos, Macedonianos; quàm multi de Catholica Ecclesiâ adversus Donatistas & Luciferianos?*

Ut ergo hoc argumentum brevius astringam. Scripturæ sensus circa unumquodque Fidei caput ex iis potissimum Patribus repetendus, qui illud adversus hæreticos propugnarunt. At illum Scripturæ locum, *Sine me nihil potestis facere*, & similia, nusquam de aliâ quàm de efficaci gratia interpretantur illi Patres, qui de gratia scripserunt adversus Pelagianos & illorum reliquias. Igitur ex illis invictè probari potest, verè & catholicè dici, *Sine gratia efficaci nos nihil posse*; adeòque, *Iustis, quibus deest gratia efficax, deesse gratiam sine qua nihil possumus.*

#### A R T I C U L U S I V.

*Eadem locutio ex Summis Pontificibus asseritur.*

Certum est, hoc fidei Catholicæ caput ab Ecclesiâ adversus Pelagianos definitum

ac defensum esse. *Sine gratiâ Dei nihil boni fieri posse.* De sensu tantum lis esse inter Catholicos potest.

rest. Jam verò invictè demonstrari posse arbitror, gratiam, scilicet illam sine quâ nihil fieri posse definiunt summi Pontifices & Concilia, non aliam esse quàm efficacem.

## INNOCENTIUS I.

**H**OC dogma fidei primus, si non tempore, at auctoritate, definivit Innocentius I. Quotidiana, inquit ille ad Africanos Patres, præstat ille remedia, quibus nisi freti confisque nitamur, NULLENUS vincere humanos POTERIMUS errores: necesse est enim ut, quo auxiliante vincimus, eodem iterum non adjuvante vincamur. Et paulò superiùs: Quem admodum Pelagius Cælestiusque, sepositâ omni responsione Psalmorum, talique abdicatâ doctrinâ, suasuros se aliquibus esse confidunt, nos adjutorium Dei nec debere querere, nec eo egere, cùm omnes sancti NIHIL SE SINE HOC AGERE POSSE TESTENTUR. Sed quæ tandem illa gratia est, sine qua nihil nos posse definit Innocentius? Illa nempe, quâ auxiliante vincimus; illa, quæ magnis precibus implorata descendit; illa, cuius obtinendæ causâ vir beatus & jam electus ita Dominum deprecatur postulans: Adjutor meus esto, ne derelinquas me, neque despicias me, Deus Salutaris meus. Quæ ad gratiam efficacem pertinere & per se clarum est, & ab Alvarez, Medina, cæterisque Thomistis, agnitum, ut infra ostendemus.

Præterea eandem gratiam intellexit Innocentius, quam ejus Decreto stabiliri petierant Africani Patres. Nihil autem clarius, quàm illos Episcopos non aliam quàm efficacem significasse: *Hæc itaque gestum, inquit, Domine Frater sancte, charitati tuæ intimandum duximus, ut statutis nostræ mediocritatis, etiam Apostolicæ sedis adhæreatur auctoritas, pro tuenda salute multorum, & quorundam perversitate etiam corrigendâ. Id enim agunt isti damnabilibus disputationibus suis, ut non defendendo, sed potius in superbiam sacrilegam extollendo liberum arbitrium, nullum relinquens locum gratiæ Dei. Sed cui gratiæ? An sufficienti, quæ nullum unquam effectum habeat? Vide quid addant: Gratia Dei, quâ Christiani sumus, quâ & ipsum nostræ voluntatis arbitrium verè sit liberum, dum à carnalium concupiscentiarum dominatione liberatur, dicente Domino? Si vos Filium liberaverit, tunc verè liberi eritis; quod auxilium fides impetrat quæ est in Christo Jesu. Illam gratiam prædicant, de quâ intelliguntur hæc Scripturæ loca: Quis me liberabit de corpore mortis hujus? Gratia Dei per Jesum Christum Dominum nostrum, Non est volentis, neque currentis, sed miserentis Dei. Et illud: Habentes dona diversa secundum gratiam, quæ data est nobis; Et: Gratias Deo, qui dedit nobis victoriam per Dominum nostrum Jesum Christum. Denique, ut paucis absolvam, in Epistolis Synodorum Carthaginensis & Milevitaneæ ad*

Innocentium, & Innocentii ad illas Synodos, in quibus maxime commendatur gratia Dei sine qua nihil possumus, nullus est locus qui ad aliam gratiam quam efficacem cum aliqua verisimilitudine referri possit, præsertim à Thomistis, qui fatentur non alterius gratiæ confessionem à Pelagio postulatam, quam illius, quâ Deus facit ut faciamus, hoc est efficacis, ut sæpe docet Alvarez, ac potissimum disp. I. & 99.

### COELESTINUS.

**S**ine gratiâ Dei nihil fieri posse definivit Cælestinus Pontifex in Ep. ad Gall. c. 9. *Quod ita Deus in cordibus hominum, atque in ipso libero operetur arbitrio, ut sancta cogitatio, pium consilium, omnisque motus bonæ voluntatis ex Deo sit; quia per illum aliquid boni possumus, sine quo nihil possumus.* Cui verò dubium esse potest, quin ea gratia efficax sit, per quam Deus in ipso libero arbitrio omnem motum bonæ voluntatis operatur.

Nec verò in illo solum loco, sed in iis omnibus divinis planè de gratiâ capitibus, nullam aliam gratiam præter efficacem statuit Cælestinus. Ad quam enim gratiam nisi efficacem pertinet, quòd omnia studia, & omnia opera ac merita Sanctorum, ad Dei gloriam laudemque referenda sint; quia nemo aliunde eis placeat, nisi ex eo quòd ipse donaverit?

Quam gratiam, nisi efficacem, confirmat ex illis Ecclesiæ

precibus, quibus à Deo postulat, ut infidelibus donetur fides, ut hæretici Catholica fidei perceptione resipiscant: quæ non per suâclorè neque inaniter à Domino peti rerum ipsarum monstrat effectus; quandoquidem ex omni errorum genere plurimos Deus dignatur attrahere?

Quam gratiam, nisi efficacem confirmat sub illius finem egregiis illis verbis: *Omnium bonorum affectuum atque operum, & omnium studiorum, omniumque virtutum, quibus ab initio fidei ad Deum tenditur, Deum profiteamur auctorem, & non dubitemus ab ipsius gratiâ omnia hominis merita præveniri, per quem fit, ut aliquid boni & velle incipiamus & facere.* Tanta est enim erga omnes homines bonitas Dei, ut nostra velit esse merita, quæ sunt ipsius dona, & pro his quæ largitus est, æterna præmia sit donaturus. Agit quippe in nobis, ut quod vult & velimus & agamus.

Igitur, cum de gratiâ efficaci ubique loquatur Cælestinus, manifestum est de eadem gratiâ intelligendum esse, quod de ipsis justis, c. 6. docet, *Neminem, etiam baptismatis gratiâ renovatum, idoneum esse ad superandas diaboli insidias, & ad evincendas carnis concupiscentias, nisi per quotidianum adiutorium Dei perseverantiam bonæ conversationis acceperit.* Quod ad gratiam efficacem referri debere, vel illa locutio satis indicat: per adiutorium Dei perseverantiam bonæ conversationis acceperit. Sine manifestâ enim absur-

absurditate dici non potest, cum qui in bona conversatione non perseveravit, perseverantiam bonæ conversationis à Deo accepisse. Igitur, vel à Cælestino definitum non est, sine gratiâ Dei nos nihil posse, & ad vincendas tentationes minimè idoneos esse; vel illud ab ipso sancitum est de gratiâ efficaci, de quâ unâ loquitur.

### SANCTUS LEO.

**I**nter summos Pontifices, qui gratiam Dei, sine quâ nihil possumus, adversus renascentes Pelagianæ hæreseos frutices asseruerunt, non postremus est S. Leo. Quam verò ille gratiam

intellexit? An quæ dat merum posse, etiamsi nec velimus, nec agamus: an verò quæ facit ut velimus, ipsum velle in nobis operando, id est, efficacem? Optimus ipse suæ mentis erit interpretes; sic enim fideles alloquitur, serm. 8. de Epiph. *Dicens te discipulis suis Domino: Sine me nihil potestis facere; dubium non est, hominem bona agentem à Deo habere & effectum operis, & initium voluntatis. Unde & Apostolus copiosissimus fidelium cohortator: Cum timore, inquit, & tremore vestram salutem operamini: Deus est enim qui operatur in vobis & velle & operari pro bona voluntate.*

### A R T I C U L U S V.

*Quod à Conciliis definitum est, Sine gratiâ nihil boni fieri posse, ab iisdem Conciliis de gratia efficaci intellectum esse.*

**H**oc Catholicæ fidei caput in omnium Christianorum, non solum sermonibus, sed etiam animis, penitus consignatum, sine gratiâ Dei nihil fieri posse, nullis aliis Conciliorum definitionibus constitutum est, quàm Africanorum sub Innocentio & Zozimo, Sardinienfis Africanorum Episcoporum in Sardinia exulum, secundi Arausicani, & Oecumenici Tridentini. In Synodo enim Ephesinâ damnari quidè Pelagianum, sed non expressis eorum erroribus, idcircoque nihil in illâ de gratiâ sancitum est; sed id tantum, quod antè decretum erat, generalis

Concilii auctoritate firmatum. In tertio verò Valentino Concilio multa de prædestinatione præclara, ex quâ tota de efficaci gratiâ doctrina elici potest; sed de ipsâ gratiâ id solum nominatim cautum est, c. 6. *De eâ tenendum esse quod sanctissimi Patres auctoritate sacrarum Scripturarum nobis tenendum reliquerunt, quod Africana Synodus professus est, quod Beatissimi Pontifices Apostolica Sedis Catholicâ fide tenuerunt.* Breviter igitur dispiciendum, quænam sit illa gratia, sine quâ prædicta Concilia nihil fieri posse docuerunt,

AFRICANA CONCILIA SUB  
INNOCENTIO.

**D**UO in gratiæ causâ Concilia sub Innocentiô celebrata sunt. Alterum est Carthaginense Episcoporum Africæ Proconsularis: alterum Milevitanum Episcoporum Numidiæ, inter quos Augustinus. Huic ascribuntur octo canones de gratiâ; sed, quia in alio Carthaginensi Concilio sub Zozimo, si non primum conditos, saltém renovatos, esse constat, ad illud eos reservavimus.

His ergo canonibus nunc omis-  
sis, quid illa duo Concilia sub  
Innocentio habita de gratiâ sen-  
serint, ex tribus ad Innocen-  
tium scriptis Epistolis judican-  
dum est, unâ Carthaginensis  
Synodi, alterâ Milevitanæ, ter-  
tiâ Aurelii totius Africæ Prima-  
tis, Augustini, & trium aliorum  
ad eundem Pontificem, in quâ  
latius explicant quod in Epistolis  
Synodicis brevius erant com-  
plexi. Suprà autem vidimus ex  
Epistolâ Synodicâ Concilii Car-  
thaginensis, gratiam illam sine  
quâ nihil fieri posse contra Pe-  
lagium statuunt, non aliam esse  
quàm efficacem, eam scilicet  
quâ & ipsum nostra voluntatis ar-  
bitrium verè sit liberum, dum à  
carnalium concupiscentiarum domi-  
natione liberatur; eam quâ dicitur:  
*Gratias Deo, qui dedit nobis vi-*  
*ctoriam per Dominum nostrum Je-*  
*sus-Christum: & Non est volentis*  
*neque currentis, sed misereantis est*

*Dei: quod idem ex iisdem locis*  
*erunt Milevitanæ Patres.*

Sed quia uberius Africanæ Ec-  
clesiæ sententiam exponit longior  
illa quinque Episcoporum ad  
eundem Innocentium Epistola,  
idèd uberiora nobis hujus veri-  
tatis argumenta suppeditat. In  
primis enim totam Pelagium in-  
ter & Catholicos controversiam  
in eo ponunt, quòd secundùm  
Pelagium posset homo per libe-  
rum arbitrium cupiditates ten-  
tationesque superare; quod sine  
gratiâ fieri non posse Catholici  
defendebant: *Naturam, inquit, in-*  
*humanam tantum Pelagiani dicunt*  
*valentem, ut... POSSIT per libe-*  
*rum arbitrium, nihil ulterius adju-*  
*vante Dei gratiâ, domare & ex-*  
*tinguere omnes cupiditates, tenta-*  
*ionesque superare.*

Quærendum igitur restat,  
quænam sit illa gratia, sine quâ  
ex Pelagii mente tentationes su-  
perari poterant, ex Catholicorum  
non poterant. Non enim  
ipsum gratiæ nomen generatim  
respuebat Pelagius, non gratiam  
generatim adversus illum asser-  
bat Ecclesiâ; sed certam ille gra-  
tiam oppugnabat, certam illa  
gratiam tutabatur. Nam, cum  
in Concilio Palæstino objectum  
esset, ex illius sententiâ homi-  
nem sine gratiâ justè vivere pos-  
se, respondit ille se Dei gratiam  
confiteri, & ita posse hominem suo  
labore ac voluntate justè vivere, ut  
ad hoc adjuvari Dei gratiâ non ne-  
garet. Quibus auditis, Catholi-  
cus à Palæstinis Episcopis judi-  
catus est; quia Catholici Antisti-  
tes,

*tes*, inquit illa ad Innocentium Epistola, nullam aliam Dei gratiam intelligere potuerunt, nisi quam in libro Dei legere & populis predicare consueverunt. Sed, cum ambiguo gratiæ nomine fucum Palæstinis Episcopis à Pelagio factum esse sagaciores Africaniprehendissent, & gratiæ voce pro verâ Christi gratiâ nihil nisi liberum arbitrium, legem, atque doctrinam, & remissionem peccatorum ab ipso intellectam, ne simili versutiâ Innocentio imponeret vaser hæreticus, gratiam illam sine quâ tentationes superari non possunt, illam, inquam, quâ à Pelagio negari arbitrabantur, certis notis & ut ita loquar, caracteribus circumscripserunt, ut omnem cavillationibus ejus aditum præcluderent. Has notas soli gratiæ efficaci convenire manifestè demonstrabimus. Ex quo illud consequens est, gratiam illam, sine quâ tentationes superari non possent adversus Pelagianos defendit Ecclesia, non aliam esse quâ efficacem.

Imprimis Catholicam illam gratiam eam esse dicunt, quâ justificamur ab iniquitate, & quâ salvamur ab infirmitate. At solâ efficaci gratiâ justificamur & salvamur, &c. Eam esse dicunt, quâ Christiani & filii Dei sumus, non eam quam cum impiis habeamus; quibus verbis summovetur illa gratia sufficiens, quam infidelibus perinde ac fidelibus Molinistæ omnes largiuntur. Illud adiutorium esse volunt, quod per

subministrationem Spiritus Sancti pertinet ad concupiscentias tentationesque vincendas; quod quisque petit dum orat, ut non intret in tentationem. Quibus verbis tamen non orat solum ut possit non peccare, sed orat ut non peccet, hoc est, ne quid faciat mali: quod præstatur solum per efficacem.

Ad hujus gratiæ confessionem adigere Pelagium volunt, quam doctrina Christiana demonstrat & predicat esse propriam Christianorum; quæ non est natura, sed quâ salvatur natura, non auribus sonante doctrinâ, vel aliquo adjumento visibili, sicut plantatur quodammodo & irrigatur extrinsecus, sed subministratione Spiritus, & occultâ misericordiâ, sicut facit ille qui dat incrementum Deus. Sed quænam est illa gratia propria Christianorum, quâ Deus occultâ misericordiâ incrementum dat, nisi efficax, de qua Augustinus, l. 2. operis ultimi, cap. 157. Cum verbis Doctor plantat & rigat, possumus dicere, fortè credit auditor; cum verò dat incrementum Deus, sine dubio credit & proficit.

Hanc esse gratiam dicunt, quâ predestinati vocamur, justificamur, glorificamur. Cui conveniunt ista, nisi efficaci? De hac ergo gratiâ, inquirunt illi, quæstio vertebatur, quando ab iis, quos Pelagius graviter offendeat atque turbabat, dicebatur ei, quòd eam suis disputationibus oppugnaret, quibus assereret non solum ad faciendâ verum etiam ad perficiendâ, mandata divina, per liberum arbitrium humanum



nam sibi sufficere naturam; hanc Apostolica doctrina gratiam isto nomine appellat, quâ salvamur & justificamur ex fide Christi; de hâc scriptum est: Non irritam facio gratiam Dei. Neminem, nisi planè pertinacem, arbitror incitias iturum, quâ totâ illâ Epistolâ non alia quam efficax gratia describatur; adèoque, cum sine hâc gratiâ tentationes vinci non posse Patres Africani statuant, manifestò ab illis definitum esse, sine gratia efficaci tentationes vinci non posse.

### Concilia Africana sub Zozimq.

AD hæc Concilia referimus octo canones, qui vulgò Milevitano tribuuntur; eò quod à Cœlestino sub Carthaginensis Concilii nomine citentur. Nihil verò clarius, quàm illam gratiam, sine quâ definitur adversus Pelagium, mandata Dei servari non posse, non aliam esse quàm efficacem. Quisquis dixerit, inquit Concilium, can. 4. eandem gratiam Dei per Jesum Christum Dominum nostrum propter hoc tantum nos adjuvare ad non peccandum, quia per ipsam nobis revelatur & aperitur intelligentia mandatorum, ut sciamus quid appetere, quid vitare debeamus; non autem per illam nobis præstari ut quod faciendum cognoverimus, etiam facere diligamus & valeamus; anathema sit.

Gratia, quâ nobis præstatur, ut quod faciendum cognoverimus; etiam facere diligamus atque valeamus, efficax proculdu-

bio est; & tamen canone sequenti anathemate feriuntur, qui sine illâ gratiâ, non quidem facile, sed tamen aliquo pacto divina mandata, impleri posse existiment. Item placuit, ut quicumque dixerit ideò nobis gratiam justificationis dari, ut quod facere per liberum iubemur arbitrium, facilius possimus implere per gratiam, tanquam etsi gratia non daretur, non quidem facile, sed tamen possumus etiam sine illâ implere divina mandata: anathema sit. De fructibus enim mandatorum Dominus loquebatur, ubi non ait: Sine me difficilius potestis facere; sed ait: Sine me nihil potestis facere, lidem Patres Africani in Epistola ad Zozimum, referente Prospero, contra Collat. c. 10. utrumque illum canonem his verbis complexi sunt, dum aiunt: Pelagius & Cælestio apertissimâ confessione fatendum esse, gratiâ Dei per Jesum Christum Dominum nostrum, non solum ad cognoscendam, verum etiam ad faciendam justitiam, nos per aclus singulos adjuvari. (En quod Can. 4. definierant nobis præstari per gratiam, non solum ut sciamus quid appetere aut quid vitare debeamus, sed etiam ut facere diligamus atque valeamus) ita ut sine illa nihil vera sanctaque pietatis habere, cogitare, dicere, agere, VALEAMUS. Ergo ex illorum 214. Episcoporum non semel Apostolicæ Sedi probatâ definitione (quam, ut ait Prosper ad Cap. Gall. c. 8. Totus mundus amplexus est) sine illâ gratiâ, per quam præstatur nobis



his, ut quod sciendum cognovimus, etiam facere diligamus. atque VALEAMUS, hoc est efficaci, nihil vere sanctaeque pietatis vel habere, vel cogitare, vel dicere, vel agere, VALEMUS.

*Concilium Sardinienſe ſub initium ſexti ſaeculi.*

**N**Ullum ferè est antiquitatis monumentum, quod apud omnes Ecclesiasticæ veritatis amantes majori pretio esse debeat, quàm insignis illa Africanorum Episcoporum Epistola, quos Ariani Wandalî Africâ potiti in Sardiniam catholicæ fidei causâ relegaverant. Non enim illa nobis exhibet solum quorumvis Episcoporum, sed egregiorum fidei Confessorum sententiam, qui testimonium per tot ærumnas & labores Christi divinitati redditum, christianæ gratiæ confessione cumulare voluerunt.

Tota illorum Epistola, damnandis Semipelagianorum erroribus instituta, quod sine ope gratiæ fieri non posse docebat Ecclesia, de gratiâ efficaci accipiendum esse apertè testatur. Nam, cum illud præmisissent: *De gratiâ Dei non dignè sentire, quisquis eam putat omnibus hominibus dari; Iubet, inquit, Deus homini ut velit; sed Dominus operatur & velle. Iubet ut faciat; sed operatur & facere...* Ac per hoc, quoniam habet homo liberum arbitrium, audit præcepta quæ faciat; sed ad implenda præcepta liberum arbitrium idoneum nullatenus effi-

tur, nisi divinitus adjuvetur. Ita fit, ut se operari debere homo cognoscat, dum præceptum accipit, & Deo se sciat semper omne bonum debere, quod vult ac facit: ... qui suis fidelibus hanc dignatus est gratiam promittere per Prophetam dicens: Spiritum meum dabo in vobis, & faciam ut in justificationibus meis ambuletis, & iudicia mea observetis & faciatis.

Et ad illius gratiæ, sine quâ statuunt liberum arbitrium ad implenda præcepta nullatenus idoneum esse, efficacitatem adhuc uberiùs declarandam: Cum ergo, inquit, Dominus in homine operari cœperit velle, tunc homo ad Dominum convertitur; & eodem in se operante, unde ipsi placeat operatur. De Domino enim dicit Apostolus: Aptet vos in omni bono, ut faciatis voluntatem ejus, faciens in vobis quod placeat coram se. Ad vitam quoque in tantum POTEST homo manum porrigere, in quantum habuerit Dominum protectionem suam, super manum dexteram suam.

Idem verò, sine illâ bonæ voluntatis effectrice gratiâ liberum arbitrium ad nihil posse, appositione luminis comparatione demonstrant. Ante largitatem quippe gratiæ est in homine quidem liberum arbitrium, sed non bonum, quia non illuminatum. Proinde, nisi gratia detur, bonum ipsum arbitrium non habetur: sic namque est liberum hominis arbitrium absque dono gratiæ, sicut est oculus sine luce. Nam & oculus ad videndum factus est, sed nisi lumen acceperit, non videbit.

bit. Sicut ergo corporis oculus semper indiget lumen accipere, ut ipsum POSSIT aspicere, sic & libero arbitrio hominis nulla POTEST gratia suffragari cognitio, nisi detur ipsius gratia spiritalis infusio.

### Concilium Arausicanum II.

**S**ine gratiâ efficaci nihil fieri posse Africana (ut vidimus) Concilia definierunt. Sed, cum huic gratiæ ipsa salutis initia detraherent Semipelagiani, ut salutem hominum ad voluntatis humanæ nutum revocarent, non solum Africani Patres in Sardinia exules, sed & sanctissimi Galliarum Episcopi, in Synodo Arausicanâ congregati, ut exitialem illum errorem penitus suffocarent, de ipsis presertim initiis disertè sanciverunt, neminem sine gratiâ efficaci credere, orare, aut omnino aliquid velle & conari posse. Non enim aliam ab efficaci gratiam illos intellexisse, ex singulis canonibus patet.

Hanc Can. 3. gratiam se statuere significant, *Quæ facit ut Deus invocetur à nobis.* Can. 4. *Quâ fit in nobis, ut purgari velimus per Sancti Spiritus infusionem & operationem.* Can. 5. *Quæ per inspirationem Spiritus Sancti corrigit voluntatem nostram ab infidelitate ad fidem, ab impietate ad pietatem.* Can. 9. *Per quam, quoties bona agimus, Deus in nobis atque nobiscum, ut operemur, operatur.*

Videamus igitur quid de ista gratiâ credi velint: Si quis, inquiunt c. 6. *Sine gratiâ Dei cre-*

*dentibus, volentibus, desiderantibus, conantibus, laborantibus, vigilantibus, studentibus, quærentibus, petentibus, pulsantibus, nobis misericordiam Dei dicit conferri divinitus, non autem, ut credamus, velimus, vel hæc omnia, sicut oportet, agere VALEAMUS, per infusionem & inspirationem Sancti Spiritus in nobis fieri confitetur, & aut humilitati aut obedientia humane subiungit gratiæ adiutorium, nec ut obedientes & humiles simus, ipsius gratiæ donum esse consentit, resistit Apostolo dicenti: Quid habes quod non accepisti? Et: Gratia Dei sum id quod sum. Et Can. seq. Si quis per naturæ vigorem bonum aliquod, quod ad salutem pertinet vitæ æternæ, cogitare ut expedit, aut eligere, sive salutari, id est, Evangelica predicationi consentire posse, confirmat, absque illuminatione & inspiratione Spiritus Sancti, qui dat omnibus suavitatem in consentiendo & credendo veritati, heretico fallitur spiritu, non intelligens vocem Dei in Evangelio dicentis: Si nemo nihil POTESTIS facere. Et illud Apostoli: Non sumus sufficientes cogitare aliquid à nobis, quasi ex nobis; sed sufficientia nostra ex Deo est. Quis ambigere possit, non aliâ gratiâ quàm efficaci dari per Spiritum Sanctum suavitatem in consentiendo & credendo veritati? Ac de illâ pronuntiant Arausicani Patres contra Semipelagianos, neminem sine illâ quidquam quod ad salutem pertineat, cogitare aut eligere posse, &c.*

Idem de iustis fanciunt C. 10.

Ad.

*Adjutorium Dei etiam renatis & sanctis semper est implorandum, ut ad bonum finem pervenire, vel in bono possint OPERARE perdurare. Adjutorium autem, quod sanctis est implorandum, efficax esse satis patet: Non enim, ut egregiè notat Aug. de gr. Ch. cap. 25. oramus ut possimus nihil malifacere, sed ne quid faciamus mali.*

Denique idem repetunt in definitionum suarum clausula his verbis: *Ac sic secundum Scripturas, vel antiquorum Patrum definitiones, hoc Deo propitiante, & predicare debemus & credere, quod per peccatum primi hominis ita inclinatum & attenuatum fuerit liberum arbitrium, ut nullus postea aut diligere Deum, sicut oportet, aut credere in Deum, aut operari propter Deum quod bonum est, POSSIT, nisi gratia eum & misericordia divina prævenerit. Quod multis postea Scripturæ testimoniis probant, quæ omnia ad efficacem gratiam pertinent; quale est illud Pauli: Vobis donatum est pro Christo, non solum ut in eum credatis, sed etiam ut pro illo patiamini. Et illud: Gratia salvi facti estis per fidem, & hoc non ex vobis, sed Dei donum est. Et quod de se ipso ait Apostolus: Misericordiam consecutus sum, ut fidelis essem. Ac demùm ipsi explicane quid sit, gratia & misericordia Dei præveniri, dum aiunt, se salubriter profiteri & credere, quod in omni opere bono non nos incipimus, & postea per Dei misericordiam adjuvamus; sed ipse nobis, nullis præcedentibus bonis meritis,*

*& fidem & amorem Dei prius inspirat. Igitur ex illo Concilio, nisi Deus & fidem & sui amorem inspiret (quod est gratiæ efficacis) nullus aut diligere Deum sicut oportet, aut credere in Deum, aut operari propter Deum, quod bonum est, potest.*

### *Concilium Tridentinum.*

**T**ridentino Concilio, adversus hujus temporis hæreticos congregato, gratiæ divinæ necessitas novis Decretis stabilienda non fuit. Illi enim eam aded non negabant, ut etiam nimium illi tribuere viderentur. Quod ergo quædam de gratiâ definivit, hoc consilio fecit, ne novi hæretici, aliquid ab ipso gratiæ detractum esse arbitrentur.

Ut illam suspensionem amoveret sacra Synodus, non novum aliquod dogma de gratiâ sancivit, sed, quod ab Africanis Conciliis & Arausicanâ Synodo statutum erat, renovandum judicavit; adedque illorum Conciliorum loca, unde canones suos mutuabatur, margini adscribenda curavere, qui illius editioni præfuerunt. Quare, cùm sess. 6. c. 2. anathemate percellit: *Si quis dixerit ad hoc solum divinam gratiam per Jesum-Christum dari, ut facilis homo justè vivere, ac vitam æternam promereri possit, quasi per liberum arbitrium sine gratiâ utrumque, sed egrè tamen & diffusulter possit: & cùm can. 3. idem anathema intorquet in eos, qui*

*diae.*

dixerint, sine praveniente Sancti Spiritus inspiratione atque ejus adiutorio hominem credere, sperare, diligere aut pœnitere posse sicut oportet, ut ei justificationis gratia conferatur; dubium esse nemini potest, quin in illis Canonibus, qui ex Conc. Carthagenensi & Arausicano descripti sunt, eadem gratia intelligatur; quam in antiquis illis Conciliis intellectam esse, demonstravimus, id est, illa gratia efficax, quâ nobis praestatur, ut quod faciendum cognoverimus, etiam facere diligamus atque valeamus.

Sed Tridentini Concilii mens ex Can. 22. illustrius etiam perspicui potest, quo de singulari perseverantiæ dono ita sancivit: *Si quis dixerit, justificatum, vel sine speciali auxilio Dei in acceptâ justitiâ perseverare posse, vel cum eâ non posse, anathema sit.* Auxilium enim illud perseverantiæ efficax esse, docuit ipse Lescotius, Carnotensis Episcopus, in prælectionibus suis de Gratia qu. 4. art. 13. & vox illa specialis quæ communi opponitur, satis indicat, & quod in cap. 13. ejusdem sess. ad quod hic canon refertur, speciale illud auxilium perseverantiæ munus appellatur, de quo scriptum

est: *Qui perseveraverit usque in finem hic salvus erit; & quod aliunde haberi non potest, nisi ab eo qui potens est, cum qui stat statuere ut perseveranter stet, & cum qui cadit resitueret.* Ubi & additur neminem de hoc dono absolutâ certitudine certi quidquam sibi polliceri debere; quod frustra diceretur, si speciale illud auxilium, sine quo justificatus in acceptâ justitiâ perseverare non potest, nemini unquam justo deesset. Quare ex his locis eruditissimus inter recentiores, S. Thomæ discipulos Guilielmus Estius meritò concludit in secundum sentent. dist. 26. n. 43. *ex doctrinâ sacris Conciliorum canonibus illoque præsertim Tridentino definitâ, neminem posse in bono perseverare absque speciali auxilio, quod de novo semper à Deo petendum & expectandum sit, quo nimirum Deus ipsum perseverare in homine operetur.* Id ipsum agnoscit Lescotius, Carnotensis Episcopus, in prælectionibus suis de Gratia, qu. 4. art. 13. & hunc Synodi Tridentinæ locum ad illud perseverantiæ donum, quo reipsâ in bono electi perseverant, referendum esse docet.

## ARTICULUS VI.

*Augustini auctoritate confirmatur, quod fide tenemus Sine gratiâ nihil fieri posse, de gratiâ efficaci esse intelligendum.*

**T**Am crebra, tam aperta sunt eam in rem Augustini testimonia, ut si quis istud ne-

gare audeat, quamlibet multo locorum numero, & tota quasi Augustinianæ doctrinæ mole obui

obruī possit. Unde verè & scienter clarissimus Theologus, cujus maximè gratiā hic nobis libellus susceptus est, profiteretur & agnoscit, innumeris Patrum testimonius probari posse, gratia efficaci rectè aptari posse hanc locutionem, quod sine eā nihil possumus. Et quidem, inquit, Augustinus hoc elogio semper donat gratiam, de quā cum Pelagio disputat; & tamen disputat de efficaci. Quamobrem, si cum illo solo agerem, Augustini ac cæterorum Patrum locis huc congerendis supersedere potueram. Sed, quia hoc scriptum in aliorum manus venire potest, nec ullam præterea fidei caput magis nunc in Ecclesia quorundam temeritate vexatur, non alienum erit pauca de multis ex Augustino afferre.

Universè quidem illud affirmare non vœreor, cum ducentis aut plus etiam locis asserat, sine Christi gratia bonum fieri, aut tentationem vinci non posse, nunquā hoc ab illo de alia, quā de efficaci gratia intellectum esse. Sed quia tam multa proferre & longum & non necessarium est, hunc habeo delectum, ut scia tantum commemorare, in quibus non ut privatus Doctor loquitur, sed ut ejus doctrinæ testis, quam adversus Pelagianos suis temporibus Ecclesia definivit. Quibus in locis, ne ab iis quidem repudiari S. Augustini auctoritas potest, qui eam toties, licet ab Ecclesia consecratam, insigni audacia in cæteris aspernantur. Nam, ut

præclare Perronius in Epist. ad Casaubonum, cum Patres non ut privati Doctores sententiam suam promunt, sed Ecclesia fidem tanquam testes referunt, tunc argumenta eorum auctoritate desumpta non jam probabilia solum, sed planè invicta & necessaria sunt.

Quidquid igitur ex Augustino afferemus, ad hæc tria capita revocabimus. Primò, ostendemus de gratia efficaci ab Augustino intellectas Africanorum Conciliorum & Innocentii definitiones, quibus scitum est, Sine gratia Dei nos nihil posse. 2. Temporibus illis Ecclesiam pro Catholico non habuisse, qui fateretur, uti fatebatur Pelagius, sine gratia Dei nos nihil posse, nisi gratiam illam efficacem esse simul fateretur. 3. Non aliter à Pelagianis catholicam illam doctrinam intellectam esse, nec alio sensu ab Augustino totius Ecclesie nomine propugnatam.

## I.

Quod ad primum caput attinet, huic conficiendo, vel unus locus satis fuerit, ex epist. 106. ad Paulinum, in quo post commemoratas Africanorum Conciliorum ad Apostolicam Sedem Relationes, & Innocentii Responsa, hæc in illis sancita declarat: *Quod gratia Dei per Iesum Christum Dominum nostrum, quod fides vera, & Catholica semper tenet Ecclesia, pusillos cum magnis à morte primi hominis ad vitam secundæ hominis transfert, non solum peccata delendo, verum etiam ad non peccandum, rectèque vivendum eos,*

qui jam uti possunt voluntatis arbitrio; sic adjuvando, ut nisi adjuret, NIHIL pietatis atque justitia, sive in opere, sive etiam in ipsâ voluntate, HABERE POSSIMUS. Deus quippe operatur in nobis & velle & operari. Nam quis hos, nisi qui venit querere & salvare quod perierat, ab illâ perditionis massâ & concretionem discernit? Unde Apostolus interrogat dicens: Quis enim te discernit? Ubi si dixeris homo: discernit me fides mea, voluntas mea, bonum opus meum, respondetur ei: Quid enim habes quod non accepisti; si autem & accepisti, quid gloriaris, quasi non acceperis? Gratiam, quâ Deus operatur in nobis & velle & operari, quæ discernit fidelem ab infideli, quæ dat fidem, quæ dat voluntatem, quæ dat bonum opus, nemo dixerit aliam esse, quàm efficacem. Et tamen hæc illa gratia est, de qua, teste Augustino, fides vera & Catholica tenet semper Ecclesia, ita per illam ad non peccandum relinquitur vivendum homines adjuvant, ut, nisi adjuret, nihil pietatis atque justitia, sive in opere, sive etiam in ipsâ voluntate, habere possint.

## 11.

Cum Pelagius apud Catholicos gratiæ inimicus audiret, quod etiam sine Dei Gratiâ hominem crederet virare posse peccatum, ut admissio in speciem gratiæ vocabulo frangeret invidiam, offensionemque declinaret, sub amli-  
guâ istius verbi generalitate quid sentiret abscondebatur. Quare sæpius

profitebatur, liberum arbitrium in omnibus bonis operibus divino semper adjuvari auxilio; liberum se sic confiteri arbitrium, ut diceret nos indigere Dei semper auxilio: anathematizare se qui diceret, gratiam Dei ad omnes actus nostros non esse necessariam: denique se in Epistola ad Paulinum trecentis fere versibus nihil aliud, quam Dei gratiam & auxilium confiteri, nosque nihil omnino boni facere posse sine Deo.

Integrum igitur librum scripsit Augustinus, qui *De gratia Christi* inscribitur, ut ostenderet hanc Pelagio gratiæ confessionem neutiquam sufficere, ut catholicus haberetur : quia non satis erat generatim confiteri, *Sine gratiâ nihil nos posse*, nisi verbis illis eâ intelligeretur gratia, quam Ecclesiæ catholica profitebatur. *Cernitis*, inquit cap. 31. *hæc ejus verba solvenda non sufficere questioni. Quærimus enim adhuc quo auxilio liberum adjuvari dicat arbitrium.* Et paulò post, cum illa Pelagii verba retulisset : *In illis ( infidelibus ) nudum & inermem est conditionis bonum : in his vero qui ad Christum pertinent, Christi munitur auxilio.* Videtis, inquit Augustinus, adhuc incertum esse quo auxilio, secundum ea quæ diximus.

Certæ igitur gratiæ sine qua nihil possimus confessionem à Pelagio deposcit, quæ nimirum has duas condiciones obtineat; unam, quodd sit inspiratio dilectionis; alteram, quæ ex priori sequitur, quodd non adjuvet tantum ut possit

simus, sed etiam ut velimus & agamus; adedque nunquam eo effectu careat, propter quem à Deo datur. In priori non immoratur, quòd variis locis probari posset; posterior verò nonnullis ex eo libro testimoniis confirmanda est.

Nos, inquit Aug. c. 1. eam gratiam volumus iste aliquando fateatur, quâ futura gloria magnitudo non solum promittitur, verum etiam creditur & speratur; nec solum revelatur sapientia, verum etiam & amatur; nec suadet solum omne quod bonum est, verum & persuadetur. Non enim omnium est fides, qui audiunt per Scripturas Dominum regnum celorum pollicentem; aut omnibus persuadetur quibuscunque suadet, ut veniant ad eum qui dicit: Venite ad me omnes qui laboratis. Quorum autem sit fides, & quibus persuadetur ut ad eum veniant, satis ipse demonstravit, ubi ait: Nemo venit ad me, nisi Pater qui misit me traxerit eum. Et paulò post, cum de non credentibus loqueretur: Dixi, inquit, vobis, quia nemo potest venire ad me, nisi fuerit ei datum à Patre meo. Hanc debet Pelagius gratiam consiteri si vult non solum vocari, verum etiam esse Christianus.

Et cap. 13. Hac gratia, si doctrina dicenda est, certè sic dicatur, ut aliùs & interius eam Deus cum ineffabili suavitatem credatur insundere; nec solum per eos qui plantant & rigant extrinsecus, sed etiam per se ipsum, qui incrementum suum ministrat occultus; ita ut non osten-

dat tantummodo veritatem, verum etiam impertiat charitatem: sic enim docet Deus eos qui secundum propositum vocati sunt, simul donans & quod agant scire, & quod sciant agere. Et quasi omnes Molinistarum cavillationes & prævideret, & elidere voluisset, adjungit: Qui autem novit quid facere debeat & non facit, nondum à Deo didicit secundum gratiam, sed secundum legem; non secundum spiritum, sed secundum litteram. Et infra cap. 14. De isto docendi modo etiam Dominus ait: Omnis qui audit à Patre meo & didicit, venit ad me. Qui ergo non venerit, non de illo rectè dicitur: Auditis quidem & didicit sibi esse veniendum, sed facere non vult quod didicit: prorsus non rectè dicitur de isto docendi modo, quo per gratiam docet Deus. Si enim, sicut veritas loquitur, omnis qui didicit venit, quisquis non venit, profectò non didicit. Videatur totum caput, quod planè divinum est, & ad gratiæ divinx efficacitatem demonstrandam efficacissimum.

Denique c. 47. non aliter pro Catholico Pelagium habitum iri confirmat, nisi gratiam sine quâ fieri nihil posse concedebat, talem esse agnosceret, quâ in nobis fieret ut bene velimus & agamus, hoc est efficacem. Si ergo, inquit, consenserit nobis non solum possibilitatem in homine, etiamsi nec velit, nec agat bene, sed ipsam quoque voluntatem & actionem, id est, ut bene velimus, & bene agamus, que non sunt in homine, nisi quando vult



et bene agit, si, ut dixi, consenserit etiam ipsam voluntatem et actionem divinitus adjuvari, et sic adjuvari, ut sine illo adiutorio nihil bene velimus et agamus, eamque esse gratiam Desper I.C.D.N. in qua nos suâ, non nostrâ, iustitiâ iustos facit, ut ea sit vera nostra iustitia, quæ nobis ab illo est, nihil de adiutorio gratia Dei, quantum arbitror, inter nos controversia relinquatur.

Ecce quid Pelagium ab Ecclesiâ & Augustino dividat: si fateatur illâ gratiâ sine qua nihil possumus, dari velle et operari, catholicus est Augustino; si neget, hæreticus. Hæc est illa gratia, quæ facit ut bene velimus, & bene agamus, & sine qua nec bene velle, nec bene agere possumus; cuius confessionem pro catholica fidei tessera deposcit à Pelagio, c. 26. *Ac per hoc, inquit, gratiam Dei, quâ charitas Dei diffunditur in cordibus nostris per Spiritum Sanctum, qui datus est nobis (hoc est, ut alibi ait, quæ est inspiratio dilectionis, ut cognita sancto amore faciamus) sic consistatur qui vult veraciter confiteri, ut omnino NIHIL boni sine illâ quod ad pietatem pertinet veramque iustitiam, FIERI POSSE non dubitet; non quomodo iste, qui, cum dicit propterea dari gratiam, ut quod à Deo precipitur facilius impleatur, quid de illâ sentiat satis ostendit, scilicet quod etiam sine illâ, etsi minus facile, fieri tamen quod divinitus precipitur POTEST.* Quod jam c. 19. sic expresserat: *Non tantum, ut homo*

*sit arbor bona, sed etiam ut faciat fructus bonos, eadem gratiâ necessarium est ut adjuvetur, sine quâ boni aliquid facere NON POTEST.* Ipse quippe in bonis arboribus cooperatur fructum, qui et forinsecus rigat atque excolit per quemlibet ministrum, et per se dat intrinsecus incrementum: quod ad efficacem gratiam certò pertinere suprâ demonstratum est.

Totus ferè hic liber exscribendus, si omnia velim recensere, quæ invictè probent, non aliam ob causam Pelagium ab Ecclesiâ pro hæretico habitum, nisi quod eam gratiam, *Sine quâ fatebatur nihil boni fieri posse, talem agnoscere detrêctaret, quâ Deus, ut in eodem libro ait August. c. 24. internâ atque occultâ, mirabili ac ineffabili potestate operaretur in cordibus hominum, non solum veras revelationes, sed etiam bonas voluntates: hoc est quod fateri recusaret, sine gratiâ efficaci nihil boni à nobis fieri posse.*

#### II I.

Jam verò, quod postremum restat, hanc ipsam catholicam sententiam, *Sine gratiâ Dei nihil fieri posse*, non aliter quàm de gratiâ efficaci à Pelagianis intellectam, eo sensu ab ipsis impugnatam, catholicis exprobratam, & ab Augustino totius Ecclesiæ nomine defensam; ut omittam alia hujus rei testimonia, unus, ni fallor, locus satis ostendet. Refert S. Doctor lib. 2. ad Bonif. cap. 8 hæc Pelagianorum Episcoporum verba de catholicis: *Sub nomine gratia ita fatum asserunt,*



runt, ut dicant, quia, nisi Deus invito & reluctanti homini inspiraverit boni & ipsam imperfecti cupiditatem, nec a malo declinare, nec bonum POSSIT arripere.

Quid verò ad hanc exprobrationem reponit Augustinus? An eos arguit quod catholicos falsò criminarentur? Imò verò explosà fati columnià, quod illi objiciebant, verum esse agnoscit: id unum explicat, sic invito & reluctanti inspirari boni etiam imperfecti cupiditatem, ut jam non sit reluctans, non sit invitus; sed consentiens bono, & volens bonum: quo nihil validius ad efficacis gratiæ virtutem adstruendam. Omnino toto illo capite probat, sanctum & catholicum esse quod carpebant Pelagiani: sine illà efficacis gratià, quā homo ex reluctanti & invito fit consentiens bono & volens bonum, nunquàm haberi posse ab homine boni non solum perfecti (id enim fateri videbantur Pelagiani) sed ne imperfecti quidem cupiditatem.

Hoc nobis, inquit, objiciendum putarunt, quod invito & reluctanti homini Deum dicamus inspirare, non quancunque boni, sed & ipsius imperfecti cupiditatem. Fortassis ergo ipsi eo modo saltem servant locum gratiæ, ut sine illà putent hominem posse habere boni, sed imperfecti, cupiditatem; perfecti autem, non facilius per illam posse, sed nisi per illam omnino non posse. . . . Dominus autem, ut responderet futuro Pelagio, non ait: Sine me difficile POTESTIS aliquid facere; sed ait: Sine me NIHIL POTES-

TIS facere. Et ut responderet futura etiam istis, in eadem istà Evangelica sententià non ait: Sine me NIHIL POTESTIS perficere, sed facere. Verum audiant & Apostolum. Dominus enim cum ait: Sine me nihil potestis facere, hoc uno verbo initium finemque comprehendit; Apostolus verò, tanquam sententià Dominicæ expositor, apertius utrumque distinxit, dicens: Quoniam qui in vobis opus bonum cepit, perficiet usque in diem Christi Jesu. Quæ ultima Pauli verba de gratiæ efficaci esse intelligenda, nemo inficias erit.

Idem verò Sanctus Doctor capite sequenti ad quædam Scripturæ verba, à Pelagianis objecta, ita respondet, ut in illorum solutione semper significet, gratiam, quā facit Deus ut faciamus, id est, efficacem, eam esse sine quā bonum nec inchoare, nec perficere possumus. Scriptum est, inquebant Pelagiani, Homini est preparare cor, & à Domino responsio linguæ. Quid verò Augustinus? Absit, ut sic intelligant filii promissionis, tanquam cum audierint Dominum dicentem: Sine me NIHIL POTESTIS facere; quasi conviniant eum dicentes: Ecce sine te POSSUMUS cor preparare. Absit, ut sic intelligant, nisi superbi sui arbitrii defensores, & fidei catholica desertores: idè quippe scriptum est: Homini est preparare cor, non tamen sine adjutorio Dei, QUI SI TANGIT COR, HOMO PRÆPARAT COR. Ecce quale sit illud adjutorium, sine quo homo præparare cor non potest, tale nem-

pe quod illud infallibiliter efficiat propter quod datur: nam, si illo tangat cor Deus, homo præparat cor.

Et paulò infra: Sicut dictum est: *Hominis est præparare cor, & à Domino responsio lingua*; ita etiam dictum est: *Aperi os, & implebo illud. Quamvis enim, nisi adjuvante illo SINE QUO NIHIL POSSUMUS FACERE, os NON POSSUMUS aperire, tamen os aperimus illius adjumento & opere nostro; implet autem illud Dominus sine opere nostro. At quale tandem illud adjumentum est quo præparatur cor, & os aperitur, quæ ad orandi donum maximè pertinent? Quid est, inquit, præparare cor & os aperire, nisi voluntatem parare? Et tamen in eisdem litteris legitur: *Præparatur voluntas à Domino; & : Labia mea aperies, & os meum annuntiabit laudem tuam. Ecce Dominus admonet, ut præparemus voluntatem; & tamen, ut hoc faciat homo, adjurat Deus, quia præparatur voluntas à Domino; & aperit os ita jubendo, ut NEMO POSSIT NISI IPSE ID FACIAT ADJUVANDO, cui dicitur: Labia mea aperies. Nemo, nisi in Augustini doctrinâ planè rudis, ignorat hoc maximè loco: Præparatur voluntas à Domino, gratiam efficacem intelligi ab ipso & probari solere; sed ad omnem dubitationem amovendam, idem Augustinus adjungit: *Multa Deus facit in homine bona, quæ non facit homo; nullus verò facit homo, QUÆ NON FACIT DEUS UT FACIAT HOMO.***

Denique sub finem capituli quidquid probaverat in summam colligens, ita loquitur: *Ergo benedictio dulcedinis est gratia Dei, quâ fit in nobis, ut nos deleat, & cupiamus, hoc est, amemus quod præcipit nobis: in quâ, si nos non prævenit Deus, non solum non perficitur, sed nec inchoatur in nobis. Si enim sine illo NIHIL POSSUMUS FACERE, profectò nec incipere, nec perficere; quia, ut incipiamus, dictum est: *Misericordia ejus præveniet me; ut perficiamus, dictum est: *Misericordia ejus subsequetur me.***

Tantum illorum locorum lumen, & tanta vis, ut omnes adversariorum gratiæ tenebras discutiat, conatus frangat, effugia præcludat. Apertè enim pronuntiat Augustinus, hanc Ecclesiæ fidem esse, quam qui negat fidei desertor habendus sit: *Sine gratia quâ homo ex reluclanti & invito fit consentiens bono; quâ bonum opus incipit Deus & perficit in nobis; quâ, si tangit cor, homo præparat cor, & quâ præparatur voluntas à Domino; quâ facit Deus ut bona faciat homo; quâ fit in nobis ut amemus Deum (quæ tantum de gratiâ efficaci dici possunt) sine hac, inquam, gratiâ boni ne quidem imperfecti haberi cupiditatem POSSE; sine hac nec fieri, nec perfici bonum POSSE; sine hac os aperire neminem POSSE; sine hac denique nec perfici bonum in nobis nec inchoari POSSE. Quibus ultimis verbis non modò illorum generatim error eliditur, qui catholicè dici negant, Sine gratiâ*

gratiâ efficaci bona opera fieri & tentationes vinci non posse; sed nominatim exploditur Alphonsi *le Moyne* Sorbonici olim Professoris nuperum, & catholicis antè auribus inauditum commentum, quo gratiam orandi ab agendi gratiâ secernens, illam sufficientem esse tantum, & Moliniano quidem sensu, istam semper efficacem esse vult: addeque sine efficaci gratiâ bona opera fieri non posse concedit; sed cum solâ sufficiente, cujus effectus à nutu voluntatis pendeat, actu & effectivè orari posse & re-ipsa orari contendit. Augustinus enim non modò perfecti boni cupiditatem, sed ne imperfecti quidè sine efficaci gratiâ haberi posse definit.

Hoc qui ad fidem pertinere negaverit, tria in Augustinum gravissima crimina conferat necesse est: primum imperitiæ, quod doctrinam Ecclesiæ, Conciliorumque quibus interfuit mentem ignoraverit, & pravâ interpretatione corruperit; alterum sacrilegæ temeritatis, quod toti Ecclesiæ privatas suas opiniones affingere non dubitarit: tertium denique offensionis & scandalii, quòd Pelagianos ab Ecclesiâ alienarit, dum ab illis non

Ecclesiæ fidei, à quâ fortè non abhorruissent, sed privatæ opinionis suæ, id est, efficaciæ gratiæ, confessionem exigeret, quam, ut faralem necessitatem, ut certum libertatis interitum, ut socordix, ignaviæ, desperationis causam detestabantur; & meritò quidè, si Molinistæ nobis audiendi sint. Horum verò criminum si reus peragatur Augustinus, non jam ille inter Patres in supremo auctoritatis apice locandus, sed infra imperitissimos simul audacissimosque scriptores deturbandus est; nec præstantissimus gratiæ defensor, sed everfor potiùs existimandus. Quod si vel cogitare nefarium sit & impium, ut fateretur ipse Suarez; & non modò in tantî viri memoriam, sed in Apostolicam Sedem, in totam denique Ecclesiam, à quâ toties defensa & consecrata Augustini doctrina, contumeliosum, certum illud & fixum manere debet (quod pro fidei capite ab Augustino traditum est) sine gratiâ efficaci nihil boni fieri posse; nec hanc loquendi rationem sexcenties ab ipso usurpatam sine sacrilegio posse damnari, aut ullius erroris suspectam judicari.

## ARTICULUS VII.

*Idem fidei dogma; Sine gratiâ nihil fieri posse, ab iis Patribus, qui post Augustinum adversus Semipelagianos scripserunt, de gratiâ efficaci semper intellectum esse.*

**P**Ræcipuum inter Semipelagianos & Ecclesiam contro-

versæ caput in hoc situm fuisse, nemo nescit, quòd ex primæve

integritatis reliquiis sine verâ Christi gratiâ aliquod homines bonæ voluntatis initium habere posse Semipelagiani statuerent: Nullius enim ita depravatam vel extinctam putabant esse naturam, teste Hilario in Epist. ad August. ut non debeat vel possit se velle sanari; nec negari gratiam si precedere dicatur talis voluntas, ut tantum medicum querat, non autem quidquam ipsa jam valeat. Omnes verò Theologi consentiunt, catholicos contrâ contendisse, naturam ita peccato esse viciatam, ut sine medicinali Christi gratiâ nequidem posset se velle sanari. Quæritur solum, quænam illa gratia sit, sine quâ ex Ecclesiæ catholicæ sensu non potest homo velle sanari. Unde verò condiscere possumus, in hoc dogmate sciendo, Ecclesiæ mentem & sensum, nisi ex iis Patribus, qui Ecclesiæ causam adversus Semipelagianos egerunt, inter quos præcipui sunt Prosper, Fulgentius, Petrus Diaconus, & Scythæ monachi in causâ fidei Romam missi.

#### S. PROSPER.

**U**Num aut. alterum ex S. Prospero locum asserre satis fuerit. Sic ergo ille in Epistola ad Rufinum Semipelagianorum sententiam exponit: *Dictum, aiunt, libero arbitrio utentibus: Venite ad me omnes qui laboratis, & ego vos reficiam. Quod ad omnes homines volunt pertinere laborantes in incerto huius vite, operatosque peccatis, ut qui voluerint mansuetudinem & humilitatem*

*Salvatoris imitari, & jugum mandatorum ejus subire, inveniant requiem animabus suis in spe vite æternæ; qui autem hac facere voluerint, suâ culpâ careant salute, quam, si voluissent, potuissent obtinere. En Semipelagianam sententiam; quid Prosper respondeat videamus. Sed audiant & dictum à Domino libero arbitrio utentibus: Sine me nihil potestis facere; &: Nemo venit ad me, nisi Pater, qui misit me, attraxerit; &: Nemo potest venire ad me, nisi datum ei fuerit à Patre meo, &c. Quæ omnia cum sint incommutabilia, & nequeant ulla interpretatione in sensum alium detorqueri, quis ambigat tunc liberum arbitrium cohortationi vocantis obedire, cum in illo gratia Dei affectum credendi obediendique generavit? Alioqui sufficeret, moneri hominem, non etiam in ipso novam fieri voluntatem, sicut scriptum est: Preparatur voluntas à Domino; & sicut ait Apostolus: Deus est enim qui operatur in nobis & velle & operari pro bona voluntate. Videmus igitur illam Christi sententiam: Sine me nihil potestis facere, ex quâ præsertim hausit Ecclesia quod fidelibus tenendum tradidit, nos sine Christi gratiâ nihil posse, non minùs adversus Semipelagianos, quàm Pelagianos, de illâ gratiâ intellectum, quæ affectum credendi obediendique in hominibus generat, & quâ ipsa sit in hominibus bona voluntas, ad eoque de efficaci.*

Idem S. Prosper peculiarem Cassiani errorem ab Arausicanâ Synodo Can. 8. damnatum, quo alius

aliis petentibus gratiam tribui, alios invitos ad salutem attrahi assererat, hâc ratione refellit: *Quod non ex toto verum sit quod ait Dominus: Nemo venit ad me, nisi Pater, qui misit me, attraxerit eum; si cujusquam hominis siue Dei illuminatione esset credenda conversio, aut ullo modo se voluntas hominis ad Deum sine Deo POSSET extendere, qui, cum vocatum ad Filium trahit non resistentem, invitumque compellit; sed ex invito volentem facit, & quibuscumque modis infidelitatem resistentis inclinat, ut cor audientis obediendi in se delectatione generatâ ibi surgat ubi premebatur, ibi discat ubi ignorabat, inde fidat unde diffidebat, inde velit unde nolebat. Et enim Dominus dabit suavitatem, & terra nostra dabit fructum suum. Catholica ergo veritas est adversus Cassiani errorem à Prospero asserta, voluntatem hominis nullo modo se ad Deum posse convertere sine illâ gratiâ, per quam Deus ex invito volentem facit, per quam infidelitatem resistentis inclinat, per quam in corde audientis obediendi delectationem generat, per quam ita dat suavitatem, ut terra nostra det fructum suum. Quæ si ad gratiam efficacem non pertineant, nescio quibus illa verbis exprimi possit.*

## S. FULGENTII.

**S**ANCTUS Fulgentius, quem Sirmondus post Ferrandum Diaconum, sui ævi Episcoporum ingenium & linguam, Perronius verò alterum Augustinum, alterum Africane Ecclesiæ oraculum appel-

lat, innumeris in locis gratiam sine quâ nequidem desiderari bonum posse, adversus Pelagianorum reliquias contendebat Ecclesia, efficacem esse demonstrat. Ea verò feligam ex variis S. Fulgentii operibus, in quibus hanc non suam, sed Ecclesiæ adversus Semipelagianos sententiam esse dicit.

In primo igitur libro de verit. præd. & gratiæ, c. 15. *Dignum est, inquit, charissimi fratres, ut in singulis quibusque sententiis, in quibus núbilo cujusdam obscuritatis ambigimus, sanctorum Patrum definitionibus hæreamus, quos præveniens misericordia Dei gratis illuminavit ut crederent, & sequens instruxit spiritualiter ut docerent. Hi enim, Apostolica prædicationis tenentes per omnia veritatem, certissime cognoverunt, cognoscendumque libris & Epistolis reliquerunt, gratiam Dei non omnibus hominibus generaliter dari; gratuitum quippe donum est gratia. Ecce primam veræ gratiæ dotem, non omnibus dari, quia gratuita est.*

*Ista gratia, quam Deus vasis misericordia gratis donat, ab illuminatione cordis incipit, & hominis voluntatem non bonam invenit ipsa, sed facit; atque, ut eligatur, ipsa prius eligit; neque suscipitur aut eligitur, nisi hoc ipsa in corde hominis operetur. Ergo & susceptio, & desiderium gratiæ, opus ipsius est gratiæ. En secundam gratiæ virtutem, omnis bonæ voluntatis in hominibus effectricem esse.*

I STAM gratiam nullus hominum  
T 4 deside-

desiderare vel poscere, sed nec cognoscere POTERIT, nisi eam prius ab illo accipiat, qui eam nullis precedentibus operibus aut voluntatibus bonis ad hoc largitur, ut voluntatem in quâ semper maneat ipsa prepararet, ipsa donet, ipsa illuminet, ipsa excitet, ipsa conservet. En tertiam gratiæ conditionem, sine eâ voluntatem præparante & dante, ne ipsam quidem gratiam desiderari posse.

Quod & in sequentibus uberiorius explicat: Ut ergo, inquit, gratia Dei cognoscatur & diligatur, desideretur & postuletur, prius donatur homini non cognoscenti, non diligenti, non desideranti, non postulanti; ipsaque se facit cognosci, diligi, desiderari, postulari. Quam gratiæ efficaciam postquam apertis Scripturæ testimoniis comprobavit: Sicut ergo, inquit, bonæ voluntatis initium NEMO POTEST habere, nisi fuerit gratiâ præveniente illuminatus, quia preparatur voluntas à Domino; ita eandem voluntatem bonam NEMO usque in finem POTERIT obtinere, nisi fuerit eadem misericordiâ subsequente servatus... Misericordia igitur, quæ gratis hominem prævenit, ut mutet in melius; & ipsa quem bonum facit, subsequendo regit, ne mutetur ipse pejor. Omne igitur bonum voluntatis & operis tunc inesse POTEST homini, si præveniens gratia largitate detur, ejusdemque gratiæ subsequentis opitulatione servetur; quæ malum prævenit, ut bonam, Deo largiente, voluntatem habere incipiat, quam antè, quia per se habere NON PO-

TERAT, non habebat. Subsequitur autem bonum, ut perseveret & proficiat in bonâ voluntate, quam ex se habere NON POTUIT sed gratis accepit. Hinc patet ex S. Fulgentio, bonam voluntatem vel esse in homine, quia per gratiam efficacem data est, vel esse non posse, quia eam non aliter habere homo potest, quam per gratiam efficacem.

Hactenus Fulgentius acceptam ex Sanctis Patribus doctrinam retulit. In libro verò de Incarn. & gratiâ Domini nostri Jesu Christi, qui non tam Fulgentii liber, quam Ecclesiæ Africanæ, cujus nomine loquitur, Semipelagianos contrâ sentientes his verbis retundit: Miramur quosdam dicere, si nolentes Deus facit ut velint credere, cur ergo non facit omnes velle?... Itane verò in nemine hoc facit, quia non in omnibus facit? Deus ergo, qui voluntatem preparat, ipse donat; quam si Deus per suam gratiam homini non dedit, NUNQUAM POTEST homo in Deum velle credere, quia ipsam voluntatem gratiâ non invenit, sed operatur in homine. Contendat qui voluerit, gratiam efficacem ad hoc tantum dari ut velimus, non gravatè fatebimur. Sed ex hoc quod ad volendum necessariò supponitur, inde concludat cum Fulgentio rectè dici, sine gratiâ efficaci nos velle non posse.

Idem sanctissimus Antistes, lib. 1. ad Monim. c. 14. Loquens, inquit, Deus per Prophetas, se ipsum facere confirmat, quod fidei  
lib.

libus donat, ut faciant.... Quid est enim, Faciam ut faciatu, nisi mei erit operis omne bonum quod operati fueritis. Ipse ergo facit ut faciamus, quo in nobis operante fit omne bonum quod facimus, de quo dicitur ad Hebræos: Aptet vos in omni bono; quia quæcunque nobis facienda donat, sicut HABERE NON POSSUMUS, nisi nobis ipse largiatur; sic FACERE NON POSSUMUS, nisi ipse in nobis qua largitus est operetur. Clariora ista sunt, quàm ut ullâ explicatione indigeant.

Mitto alia plurima ejusdem auctoris. Unum tantum adscribam, quo pateat, hanc ipsam sententiam: Sine gratiâ efficaci mandata fervari non posse, ad fidem catholicam ex S. Fulgentio pertinere. In libro enim de fide ad Petrum Diaconum, c. 32. Firmissimè, inquit, crede, & nullatenus dubites, posse quidem hominem, quem nec ignorantia literarum, nec aliqua prohibet imbecillitas vel adversitas, verba sanctæ legis & Evangelii sive legere, si ve ex ore cujusdam prædicatoris audire; sed divinis mandatis obedire NEMINEM POSSE, nisi quem Deus gratiâ suâ prævenierit, ut quod audit corpore, corde etiam percipiat; & acceptâ divinitus bonâ voluntate atque virtute mandata Dei facere & velit & POSSIT. Neque enim qui plantat est aliquid, neque qui rigat, sed qui incrementum dat Deus, qui etiam operatur in nobis & velle & perficere pro bonâ voluntate,

## PETRUS DIACONUS.

Petrus Diaconus, alii que in causâ fidei à Græcis Romam missi, in libro de Incarn. & gratiâ Jesu-Christi, ad Africanos Præsules scripto, ita cap. 6. de gratiâ loquuntur: Ut, inquiunt, falsa libertas fieret Christiana libertas, liberatore indignit, quo POSSET, per ejus gratiam ab occupationibus humanis aversa, ea cogitare & desiderare, quæ pertinent ad vitam æternam. Sine hac igitur gratiâ potest quidem cogitare & desiderare humana; NON autem POTEST cogitare aut velle, seu desiderare divina. Quænam autem hæc gratia? Mox ipsi ita luculenter explicant, ut nemo ad aliam quàm efficacem eorum verba detorquere possit. Frustrà garriunt qui dicunt: Meum est velle credere, Dei autem gratia est adjurare; cum etiam ipsum credere, quod est consensum præbere veritati, nobis à Deo dari testetur Apostolus. Et cap. 8. Sed nos, inquiunt, sequentes eundem Apostolum, omnem bonarum cogitationum originem, earumque confessionem & voluntatem ex Deo, & per Deum, & in Deo, dicimus, qui pravæ hominum voluntates, & terrenis aſlibus implicatas, per infusionem & operationem intrinsecus Sancti Spiritus absolvit & corrigit, sicut scriptum est: Preparatur voluntas à Domino.

## RUPERTUS.

Consultò multa Patrum testimonia omisimus, qui de ipso



ipso Petro Christum negante dicunt, eum à Deo fuisse derelictum, neque potuisse tentationem illam superare, ac se mortis pro Christo subeundæ periculo objicere: plurima enim ex illis in Apologeticis allata sunt, quæ repetere superfluum. Unum tantum illie prætermissum hîc repræsentare visum est, Ruperti scilicet, l. 8. de gloriâ & honore Filii hominis super his Christi verbis: *Nolite timere eos qui occidunt corpus.* Hic reslè, inquit, dicat quis: *Da, Domine, quod ju-*

*bes, & jube quod vis.* Ecce jubes ut non timeamus eos qui occidunt corpus, & ratio consentit, eum potius esse timendum qui potest & animam & corpus perdere in gehennam. Sed quæ caro non timeat occidi? Petrus Apostolorum primus timuit, & mori timens vitam negavit. Cur hoc? Quia nondum illi dederas ut non timeret, cui jusseras ut non timeret. Postquàm illi dedisti, POTUI facere quod jussisti. Esto igitur fortitudo nostra, & fac in nobis quod tu nos facere vis.

## ARTICULUS VIII.

*Sancti Thomæ aliorumque tum veterum tum recentiorum scholæ Doctorem auctoritate eadem veritas confirmatur.*

**A** Patrum sensibus nihil defecerunt præcipui antiquioris scholæ Doctores, præsertimque S. Thomas, & veteres illius discipuli; qui omnes uno ore sine efficaci auxilio nihil fieri posse professi sunt. Ergo in re nihil ab illis novatum est; vocabulum gratiæ ab usitatâ in Patrum scriptis significatione nonnihil defluxum, & ad aliam minùs apud Patres vulgarem notionem translatum; quod, quia magnam antiquiorum Scholasticorum scriptis afferre lucem potest, hîc paucis annotasse non pigebit. Patres enim & antiqui scriptores sic utuntur gratiæ vocabulo, ut semper ferè actualem Dei operationem intelligant, quâ Deus in homine & cum homine voluntatis actum producit. Gratia

verò habituali non simpliciter hoc nomen impertiri solent, nisi quatenùs per actualem ad operandum impellitur & admovetur. Contrà verò veteres Scholastici Doctores voci gratiæ ferè semper habitualis gratiæ notionem subjiciunt; actualem verò gratiam rarò gratiam, sed auxilium Dei moventis, speciale auxilium, motionem Dei, appellant.

Eximius est S. Thomæ eâ de re locus de verit. q. 24. a. 14. *Si gratiam Dei velimus dicere, non aliquod habituale donum, sed ipsam misericordiam Dei, per quam interius motum mentis operatur, & exteriora ordinat ad hominis salutem, sic nec ullum bonum homo potest facere sine gratia Dei; sed communiter loquentes utuntur nomine gratiæ pro aliquo dono habituali justificante.*



*stificante.* Hoc pacto conciliantur non nulla, quæ sibi primâ fronte videantur adversa. Veteres enim Scholastici multa fieri sine gratiâ dicunt, quia nomine gratiæ habitualement intelligunt, sine quâ non à fidelibus, sed à peccatoribus, quos Deus nondum inhabitans adjuvat, multa bene fiunt. Unde eadem illa, ut ex S. Thomâ vidimus, sine auxilio Dei moventis fieri negant. Patres verò generatim docent, sine gratiâ nihil boni fieri posse; quia nomine gratiæ intelligere solent misericordiam Dei, per quam interiùs motum mentis operatur, sine quâ S. Thomas concedit nullum bonum fieri posse. Quare, eùm his verbis gratiam efficacem apertè designet, ut per se clarum est, & lariùs alibi probatum, hic ipse locus ostendit ex mente S. Thomæ, sine gratiâ efficaci nihil boni fieri posse.

Multa alia ex S. Thomâ referri queunt; sed quia id separatim in eo comentariolo præstitimus, in quo totam illius doctrinam accuratè explanavimus, unum adhuc & alterum referre satis erit, ex 1. 2. quæst. 109. a. 6. *NON POTEST* homo per se ipsum preparari ad divinæ gratiæ lumen suscipiendum. Per quid igitur potest? Sed gratuito Dei interiùs moventis, bonumque propositum inspirantis, quæ sine dubio gratia efficax est, auxilio indiget. Et in resp. ad primum adhuc manifestiùs: *Conversio hominis ad Deum fit quidè per liberum arbitrium, & secundùm hoc homini præcipitur*

*quòd se ad Deum convertat. Sed liberum arbitrium ad Deum converti NON POTEST, nisi Deo ipsum ad se convertente, secundum illud Hierem. 31. Convertite me & convertar, quia tu Dominus Deus meus; & Thren. ult. Convertentis, Domine, ad te & convertemur.* Neminem Deus convertit, nisi per gratiam efficacem. At ex S. Thomâ non potest homo converti, nisi Deo ad se-ipsam convertente: non potest igitur converti, nisi per gratiam efficacem.

Porro antiqui scholæ Doctores à Patrum & S. Thomæ vestigiis in hac loquendi formulâ non recesserunt, ex quibus paucos hîc tantùm ad specimèn asseram.

**BRADUARDINUS** Archiepiscopus Cantuariensis, & vulgò Doctor profundus appellatus, in libro de causâ Dei, l. 11 c. 6. cui titulus est: *Quod auxilium Dei speciale est voluntas ejus invicta: Postquàm, inquit, in præcedentibus est ostensum, nullum tentatum solius liberi arbitrii viribus sine gratiâ, nempe habituali, vel cum gratiâ quantacunque, habitualement iterum intellige, absque alio Dei auxilio speciali posse tentationem aliquam superare, restat consequenter inquirere quid sit illud auxilium, quo tentati omnia superant tentamenta, & sine quo in omnibus superantur.... Voluntas ergo divina est illud auxilium; & ea quidè invicta, id est, infalibiliter operans, ut significat in titulo capituli, est illud auxilium sine quo tentatus quilibet superatur,*

Et per quod tentatus quilibet superans efficaciter superat tentamentum. Ubi vides ab insigni illo Theologo, uti & à Patribus disertè doceri, sine illo efficaci auxilio, quo tentati omnia superant tentamenta, & sine quo in omnibus superantur, neminem, licet justum & quantacunque gratiâ habituali præditum, tentationem aliquam superare posse.

GREGORIUS ARIMINENSIS, magni nominis Theologus, S. Augustini Eremitarum quondam Generalis, in 2. senten. dist. 28. q. 11. a. 11. *Ex istis puto satis patere, quòd etiam veri justì, & in gratiâ existentes, ut in tentationibus fortiter resistent, & in peccatum non cadant, indigent adhuc speciali auxilio Dei, & sine illo NON POSSENT resistere quin caderent in peccatum.* Quod probat ex Scripturis, ex Ecclesiæ precibus, ex S. Augustino, & ex illo Innocentii supra allato: *Neceffe est ut quo auxiliante vincimus, eo iterum non adjuvante vincamur.* Ex quo patet per auxilium speciale sine quo non possunt justì tentationibus resistere, non aliam gratiam quàm efficacem à Gregorio Arimineni intellectam esse.

JOANNES CAPREOLUS, S. Thomæ, ut Bellarminus notar, defensor egregius l. 11. sent. dist. 28. q. 1. a. 111. doctissimè disputat de motione divinâ, quam infallibilem esse vult, licet voluntas per illam non necessitetur: *Juratur, inquit, voluntas ita, ut agat ea quæ non sic adjuncta NEQUAQUAM*

AGERE POTUISSET. Et hoc est illud adiutorium speciale sine quo dicimus, nos NIHIL BENE VEL LE AUT FACERE.

CARDINALIS CAJETANUS, in cap. 10. Joan. v. 39. *Si privatio gratiæ fert secum NON POSSE credere, consequens est quod POSSE credere conferatur à gratiâ.* Et hoc superius c. 6. Christus dicit: *Nemo potest venire ad me, nisi Pater qui misit me traxerit eum.* Quomodo verò trahit Pater, nisi per gratiam efficacem?

Tota LOVANIENSIS FACULTAS, in Justificatione suæ Censuræ anni 1588. Aliud est, inquit, posse, in quo tam magna insunt vires per sufficientem gratiæ præparationem, ut satis sit ad agendum: per quam quidè gratiam, non jam solum ipsum posse, verum etiam agere adiuvatur. .... Juxta quem modum, ut superius ait, quidam dicuntur, NON POSSE credere aut sequi Dominum, sicut dictum est Petro: *Non potes me sequi modò.*

Tota itè DUACENSIS FACULTAS, in Censurâ anni 1588, ad Assert. 14. *Neque induratus converti POTEST, nisi per gratiam auferentem cor lapideum, & tribuentem cor carneum, quamdiu induratus est, non habet: neque excæcatus aspicere POTEST lumen veritatis, nisi per gratiam tenebras ejus illuminantem, & velamen de corde ejus auferentem, quam similiter, quamdiu excæcatus est, non habet: Neque infidelis quisquam credere POTEST, nisi per gratiam quæ*

cor ejus ex infidelitate ad fidem mutetur; quam gratiam cum non habere, quamdiu infidelis manet, perspicuum est.

Nihil necesse videatur, post integros Theologorum ordines, privatorum Theologorum suffragia conquirere. Unus ramen promnibus erit Estius, doctissimis in Scripturas & Magistrum sententiarum Commentariis toto orbe celeberrimus. Ex quo hinc annotasse sufficiet, integro illum capite, nimirum in 2. sent. dist. 42. probandum suscipere, NEMINEM in bono perseverare posse, sine gratiâ, non qualicumque, sed quam superiori paragrapho se descripsisse testatur his

verbis: *Intelligendum est donum perseverantia in actuali gratiâ, id est, gratuitâ operatione Dei, quâ facit & prestat ut homo in bonâ & justâ conversatione permaneat, ac perduret usque in finem vitæ, superetque omnes tentationes interioris occurrentes, quibus à cursu bonæ vitæ retrahi poterat. Unde fit ut graviter admoncat, sicuti jam diximus, à Conciliis, & maximè à Tridentino, esse definitum, NEMINEM POSSE in bono perseverare absque speciali Dei auxilio, quod de novo semper à Deo petendum & expectandum sit, quo nimirum ipsum perseverare in homine operetur. Tale enim hujusmodi auxilium esse debere perspicuum est.*

## ARTICULUS IX.

*Eadem locutio recentiorum Thomistarum auctoritate asseritur, quod falsò ipsius insectatores habentur.*

**T**Antis auctoribus nixa sententia facilè quorumvis obrectatorum vuculas contemneret, neque privatorum Theologorum contrariis opinionibus convelleretur; sed illos potiùs Theologos, si qui sint, erroris & temeritatis argueret. Itaque, cum audire adversarios passim tam fidenter jactantes, recentiores Thomistas in eâ damnandâ cum Jesuitis consentire, quamquam videbam illam Thomistarum dissensionem verborum potiùs esse quàm rerum, cum illi cæteroquin de gratiâ efficaci rectè sentirent, tamen nec ipsis falsò tribui putabam hanc opi-

nionem; & illos rectè sentire, malè locutos existimabam. Verùm, postquàm libros ipsorum in manus sumsi, liquidò perspexi non minorem ipsis injuriam fieri, quam mihi, quàm Patribus facta; tantùmque abesse ut ipsi hanc loquendi formulam *Sine gratia efficaci nihil fieri potest*, repudient & proferbant, ut eâ contineri asserant fidei catholicæ caput ab Ecclesiâ definitum adversùs Pelagianos, contrariamque propositionem, nempe *Sine gratia efficaci aliquid fieri potest*, quam ego bono sensu admitto, ipsi falsam esse contendunt. Quamobrem, cum in isto Thomistarum

starum cum Jesuitis consensu præcipuum Censuræ suæ præsidium adversarii mei collocent, operæ pretium erit hîc ostendere, quàm fallaciter & præposterè clarissimorum Theologorum nomine abutantur ad evertendam Ecclesiæ doctrinam.

Recentiorum Thomistarum doctrina ex nullo certiùs aut luculentius perspici, quàm ex Alvaro potest, qui ob excellentem doctrinam ab Ordine suo delectus est, ut Catholicam de gratiâ efficaci fidem coram summis Pontificibus adversùs Molinæ patronos tueretur. Is igitur adeò non damnat hanc propositionem, *Sine gratia efficaci nihil fieri potest*, ut eam à summis Pontificibus, à Conciliis, à Patribus, sancitam velit. Id videre est disput. 88. ubi hanc statuit conclusionem: *In homine justo præter gratiam excitantem & concursum supernaturalem simultaneum, quo Deus unâ cum libero arbitrio & habitibus infusis æctus supernaturales producit, requiritur necessariò ad singulos æctus speciale auxilium gratiæ adjuvantis.* Notum est autem in doctrinâ Alvaris, gratiam excitantem eandem esse ac sufficientem; adjuvantem verò, eandem ac efficacem; quod & alibi passim, ut in disp. 71. n. 2. & in hac ipsa disp. 88. sæpiùs expressè notat, & maxime his verbis n. 10. *Quia per solam gratiam habitualement non adheret justus immobiliter bono, neque ad illud prosequendum & amandum prædeterminatur: idèò ad-*

*huc indiget speciali auxilio adjuvantis gratiæ, quo indeclinabiliter et insuperabiliter ad bonum operandum moveatur.* Videamus nunc quid summat ille ad hoc probandum. Nimirum ea affert loca, quæ nos supra retulimus, in quibus Patres & Concilia definiunt.

„*Sine gratiâ nihil fieri posse*, quæ  
 „ipse de gratiâ efficaci accipien-  
 „da esse contendit: Conclusio,  
 „inquit ille, est contra aucto-  
 „res secundæ sententiæ (id est,  
 „Molinistas) est tamen expressa  
 „S. Aug. 1. de nat. & gr. c. 26.  
 „*Sicut oculus corporis etiam plenif-*  
 „*sime sanus, nisi candore lucis ad-*  
 „*jutus, non potest cernere; sic ho-*  
 „*mo etiam perfectissime iustifica-*  
 „*tus, nisi æternâ luce iustitiæ divi-*  
 „*nitus adjuvetur, rectè NON*  
 „*POTEST vivere.* Sanat ergo  
 „Deus non solum ut deleat quod  
 „peccavimus; sed præstat etiam  
 „ne peccemus. Et lib. de gr. &  
 „lib. arb. cap. 6. idipsum con-  
 „firmat multis testimoniis  
 „Scripturæ; sed præsertim ex  
 „illo Cantic. 8. Quæ est ista quæ  
 „ascendit dealbata, incumbens  
 „super dilectum suum. *Alba*  
 „*facta, inquit, bene amulatur;*  
 „*sed si supra eum à quo dealbata*  
 „*est perseveranter incumbat. Propter*  
 „*quod & ipse Jesus, super quem*  
 „*incumbit dealbata, dixit discipu-*  
 „*lus suis, Sine me NIHIL POTESTIS*  
 „*FACERE.*

Ecce voces illas Scripturæ, *Sine me nihil potestis facere*, & illas Augustini: *Homo etiam perfectissime iustificatus, nisi æternâ lu-*

re iustitia divinitus adjuvetur, re-  
 Elè non potest vivere, de gratiâ  
 efficaci & adjuvante interpreta-  
 tur Alvarez. Sed id adhuc ube-  
 rius & clarius sequentibus ver-  
 bis ostendit.

„Eadem est, inquit, senten-  
 tia S. Thomæ 1. 2. qu. 109. a. 1.  
 „ubi ait, quòd quantumcunque  
 „natura aliqua corporalis vel spiri-  
 „tualis ponatur perfecta, NON  
 „POTEST in suum altum proce-  
 „dere, nisi moveatur à Deo; &  
 „idem docet, art. 9. Nec potest  
 „explicari S. Thomas de solâ  
 „gratiâ excitante, hoc est, suf-  
 „ficiente: nam per illam Deus  
 „non movet physicè liberum ar-  
 „bitrium ad pias operationes;  
 „sed solùm moraliter. .... sed  
 „necessariò debet intelligi DE  
 „GRATIA ADIUVANTE, PER QUAM  
 „LIBERUM ARBITRIUM PRÆMO-  
 „VETUR ET PRÆDETERMINATUR  
 „AD OPERANDUM. Præterea pro-  
 „batur ex definitione illa Con-  
 „cilii Arausici: Quoties bona  
 „agimus, Deus in nobis atque nobis-  
 „cum ut operemur operatur: ubi  
 „universaliter loquitur de ope-  
 „nibus operibus bonis, etiam  
 „hominis jam iustificati: & ad  
 „huiusmodi opera necessarium  
 „esse docet speciale auxilium  
 „gratiæ adjuvantis, quo non  
 „solùm nobiscum simul opere-  
 „tur opus bonum, sed etiam  
 „in nobis efficiendo, videlicet  
 „per idem auxilium, ut nos li-  
 „berè cooperemur Deo: ut ex  
 „supradictis constat. .... Con-  
 „firmatur ex Innocentio I. in Re-  
 „scripto ad Conc. Carthag. ubi

„ait: Omnes sancti sine adiutorio  
 „Dei nihil se agere posse testan-  
 „tur. Et in Rescripto ad Conc.  
 „Milevit. Necessè est, inquit,  
 „ut, restituta nobis pristini status  
 „libertate per gratiam, eam gra-  
 „tiam queramus; quippe qui ne-  
 „que alias Diaboli tentationes &  
 „machinas, nisi gratiâ adjuvante,  
 „possumus evitare. Et Cælest. I.  
 „Epist. ad Episc. Gallix c. 8. &  
 „9. decernit gratiam ad singu-  
 „los actus esse necessariam, &  
 „refert Zozimum Papam asse-  
 „rentem in Epistola ad totius  
 „orbis Episcopos, quòd in bonis  
 „voluntatis humane singulis mo-  
 „tibus magis illius valere non du-  
 „bitamus auxilium, quòdque omnis  
 „sancta cogitatio, omnisque motus  
 „bonæ voluntatis ex Deo sit; quia  
 „per illum aliquid boni possumus,  
 „sine quo nihil possumus. Et lo-  
 „quitur de speciali auxilio gratiæ  
 „adjuvantis, per quam agit Deus  
 „in nobis, ut quod vult & reli-  
 „mus & agamus, ut dicit idem  
 „Cælest. c. 12. ejusdem episto-  
 „læ. Propter hæc testimonia  
 „M. Medina 1. 2. q. 109. a. 9. c.  
 „3. hanc nostram sententiam  
 „adèd veram & certam existi-  
 „mat, ut contrarium docere pu-  
 „tet esse improbabile.

Ubi sunt nunc qui nobis Al-  
 varem tanquàm sententiæ no-  
 stræ hostem, & Molinæ hæc in  
 parte fautorem, opponunt? Ubi  
 sunt qui contendunt ex illius  
 mente falsam hanc propositio-  
 nem esse: Sine gratia efficaci nihil  
 fieri posse? En ille de gratiâ effi-  
 caci interpretatur Innocentii,  
 Zozimi

Zozimi, Cælestini, definitiones, in quibus illi Pontifices, sine gratiâ nihil fieri posse, decernunt. Quàm vehementer igitur ipse illis Censoribus restitisset, qui eam sententiam, quam ipse ab Augustino, à S. Thomâ, à tribus summis Pontificibus definitam censet, blasphemix & hæreseos notis inusserunt?

Nec verò hæc propositio verbis Alvaris congruit, principiis abhorret; imò & principiis & verbis peræquè consentit. Imprimis statuit, disp. 79. ut alibi fusiùs videbimus, ex Cajetano, Ferrariensi, & Medinâ, vocem *posse* ita nonnunquàm usurpari, ut complectatur omnia ad agendum necessaria; & hoc sensu fateatur, sine gratiâ efficaci non haberi *posse*, hoc est, sine gratiâ efficaci nihil fieri posse.

2. Non solum id concedit de voce *posse* in genere, verum etiam de *potentiâ proximâ*, quam uno sensu, qui quidem maximè vulgaris ac ferè unicus est, sine gratiâ efficaci haberi negat, ut in tertiâ parte hujus Dissertationis videbimus.

3. Disput. 22. n. 33. probat & tueretur, sine prædeterminatione divinâ in sensu composito *nihil nos velle posse*; quia non possunt hæc duo simul esse vera, quòd scilicet nos velimus in particulari aliquid, & quod Deus non præordinaverit quod velimus illud.

Nec verò ab Alvare dissentiant hæc in parte cæteri Thomistæ. Vidimus jam Bartholomæum Medinam, ab ipso cita-

tum, eadem Patrum testimonia, in quibus aiunt, sine gratiâ nihil fieri posse, de gratiâ efficaci intelligere, contrariamque sententiam tanquàm improbabilem rejicere. Videre etiam licet alios Thomistas iisdem Patrum locis, uti ad adstruendam prædeterminationem efficacem. Imò ipse Navarreta hanc propositionem, *Sine gratiâ efficaci aliquid fieri potest*, apertè & disertis verbis falsam esse pronunciat, Cont. 19. §. II. *Ad quintum*, inquit, *respondetur*, *has duas propositiones non efficere eundem sensum; scilicet, Homo cum auxilio sufficienti, præscindendo ab efficaci, potest converti ad Deum; & hanc, Homo sine auxilio efficaci, cum solo sufficienti, potest converti ad Deum. Nam in primâ propositione denotatur quedam abstractio præcisiva ex parte auxilii sufficientis, considerata in ratione potentie ad operandum; & cum tale auxilium non participet rationem potentie ab auxilio efficaci, fit ut ex se ipso sit potens operari, Caterum in secundâ propositione denotatur quedam abstractio negativa, & per modum compositionis, denotans quòd operatio potest sequi defa-cto sine auxilio efficaci, quod tamen falsum est.*

Ex illis, ni fallor, ad oculum demonstratur, omnibus Thomistis probari hanc sanctorum Patrum sententiam, quâ toties sine gratiâ efficaci nihil fieri posse professi sunt; adeoque eos omnes, qui in ejus damnationem consenserunt, & sanctos Patres & universam S. Thomæ damnasse familiam.

## ARTICULUS X.

*Ecclesiam in suis precibus id tantum petere quod non possit; neque tamen aliam à Deo gratiam petere quam efficacem.*

**L**egem credendi lex statuat supplicandi, inquit Cælestinus PP. I. in Ep. ad Gallos: nec cum hominibus quisquam sanctius de gratiâ loqui potest, quam illis verbis quibus tota Ecclesia Deum in precibus suis affatur.

Duo verò ex precibus Ecclesiæ apertè colliguntur. Primum est, nunquam Ecclesiam in precibus suis gratiam illam sufficientem, quæ dat bonorum operum possibilitatem ab effectu scjunctam, à Deo postulare. Ut enim sapienter advertit Aug. de gr. Chr. c. 25. *Non ait Apostolus, Oramus ut possitis nihil mali facere, sed, Ne quid faciatis mali; nec, Ut possitis bonum facere, sed, Ut bonum faciat. Quid igitur petimus? Ipsam gratiam efficacem, quâ fit ut velimus, quâ fit ut agamus, ut amemus, ut præcepta impleamus. Poscimus à Deo ut inferat pectoribus nostris amorem sui nominis; ut ad se nostras etiam rebelles compellat propitius voluntates; ut nostræ voluntatis pravitatem frangamus, ut præceptorum relicitudinem in omnibus adimpleamus; ut det nobis velle & posse quod precipit; ut faciat nos suis inhaerere mandatis. Non petit Ecclesia ut infidelis possit credere si voluerit, sed ut velit & credat. Non petit ut quisquam possit non malè facere si velit; sed orat cum Apostolo ne*

*quid mali faciat. Non agit gratias, quòd aliquis præceptum implere potuerit, potestate ab effectu separatâ, sed quòd impleverit: non, quòd converti potuerit, sed, quòd conversus sit: nec unquam se putat exauditam, nisi cum factum fuerit quod oratur, id est, cum ad fidem vel ad pietatem conversi fuerint pro quorum conversione deprecatur. Loquimur, inquit Aug. Ep. 107. de ipsis initiis fidei, cum homines qui erant aversi & adversi, convertuntur ad Deum, & velle incipiunt quod nolent, & habere fidem quam non habebant: quòd ut fiat in eis, oratur pro eis, quamvis non oratur ab eis. Cum verò factum fuerit quod oratur, ei qui fecit aguntur gratia, & pro eis & ab eis.*

Alterum est, qui orant nihil aliud à Deo petere, quam ut possint quod nondum possunt. *Fideles, inquit Aug. de nat. & gr. c. 53. orantes dicunt: Ne nos inferas in tentationem. Si adest possibilitas, ut quid rogant? Quid enim stultius, ut idem ait c. 18. quàm orare ut facias quod in potestate habeas? Et Ep. 105. Impetrando quippe oratio quicquid impetrat evadit Dei donum esse ostendit; ne homo existimet à se ipso sibi esse, quòd si in potestate haberetur, non utique posceretur. Unde libro de dono persever. c. 2. Irrisoria esset peti-*



petitionem dicit, à Deo petere quod ipso non donante sit in hominis potestate. Ex quo Concilium Tridentinum Dei præceptis admoneri nos dicit, ut faciamus quod possumus, & petamus quod non possumus.

Si ergo iustus, in tentatione constitutus, habere tantum gratiam sufficientem supponitur, quæro utrum ille non orare debeat pro obtinendâ gratiâ efficaci. Orare non debere nemo, nisi impius, dicat. Si autem orare debet, nondum ergo adest possibilitas quam petit: si enim adest possibilitas, ut quid orat? Non orat ut faciat quod in potestate habet; id enim stultum est Augustino. Non orat quod Deo non donante in ejus potestate sit, ne hac oratione Deum irrideat. Non petit quod potest, sed quod non potest, ex Concilio Tridentino.

Ex hisce verò duobus catholicæ doctrinæ capitibus manifestò sequitur, esse quidem aliquod posse quod à Deo non postulamus; illud nimirum quod à voluntate sejunctum est, & quod in nobis esse potest, etiamsi nec velimus, nec agamus: esse tamen aliud posse nunquam à voluntate, nunquam ab effectu divulsum, quod Augustinus appellat *possibilitatem cum effectu*; atque hanc possibilitatem esse, quam solemnes Ecclesiæ preces exposcant. In his enim precibus à Deo petit, ut videre possimus quæ agenda sunt, & quæ recta sunt agere valeamus; ut ipsius valeamus implere præcepta; ut peccata nostra plangere valeamus;

ut divina placita majestatis cogitare semper, & ipsum sincerè diligere, valeamus: quam gratiam nisi impetret, se nihil posse testatur. Ex quo Innocentius I. in Epist. ad Carthag. Conc. eo potissimum nomine Pelagii Cælestique doctrinam se detestari, significat, quòd pestiferâ suâ sententiâ everterent orationes Ecclesiæ, quibus illud adjutorium à Deo poscitur, sine quo omnes sancti nihil se agere posse testantur: quod efficax esse & Thomistæ agnoscunt, ut jam vidimus, & satis ipse Innocentius ostendit, cum paulò post addit: *Necesse esse, ut quo auxiliante vivimus, eo iterum non adjuvante vivamus.*

Unde etiam petæpe Augustinus iisdem locis, quibus ostendit ea solùm à Deo posci quæ non possumus, iisdem, inquam, locis gratiam efficacem ad obtinendam illam quæ non habetur possibilitatem, peti testatur. Multa hujus generis proferri possunt: unum hic afferam ex lib. I. op. ultimi in Jul. c. 93. *Ab sit, inquit, ut impediatur ab homine Omnipotentis & cuncta scientis intentio.* Deus enim, sicut homo Dei dixit Ambrosius, quos dignatur vocat, & quem vulg religiosum facit. *Covenit autem Scriptura plerumque hominis voluntatem, ut quod non habet & NON POTEST, admentius sentiat, & ab eo à quo sunt bona omnia, indigens poscat.* Vides ea peti quæ non possumus. Vide nunc quâ gratiâ possibilitas illa danda sit. Si enim exauditus fuerit in eo quod dicere jussi sumus:



Ne nos inferat in tentationem; procul dubio nullâ decipietur infirmitâ, nullâ cupiditate vincetur. Quænam gratia efficax est, si hæc non est, per quam certò & infallibiliter peccatum vitatur? Quisquis enim, ut ait idem Aug. l. de Dono pers. c. 6. in tentationem non infertur, profectò nec in tentationem sua mala voluntatis infertur. Et qui in tentationem sue mala voluntatis non infertur, in nullam prorsus infertur; unusquisque enim tentatur, ut scriptum est, à concupiscentiâ suâ abstractus & illeclus. Ut autem ei non consentiamus, inquit idem, l. 2. de pecc. mer. & rem. cap. 4. deprecamur adiutorium, dicentes: Et ne nos inferat in tentationem. . . ut, si fortè cæperimus tentari à concupiscentiâ nostrâ, adiutorio ejus non deseramus, ut in eo POSSIMUS vincere, ne abstrahamur illecli.

Ut ergo rem in pauca contraham, manifestum est, quamdant esse possibilitatem quæ precibus impetratur, quæ ab ipsâ voluntate nunquàm sejuncta sit, & proindè non à sufficienti gratiâ, sed ab efficaci donetur; & hæc qui careat, ut cavit certè Petrus, de illo rectè dici, *carere eum gra-*

*tiâ sine quâ nihil possumus*; cum eo adiutorio careat, *sine quâ*, ut ait Innocentius I. *omnes Sancti nihil se agere posse testantur.*

Hic Christianæ pietatis sensus sic altè omnium fidelium mentibus impressus est, ut non aliter loqui vel cum Deo, vel cum hominibus, possint, quoties ex affectu potius proprio, quàm ex anticipatis opinionibus, loquuntur. Indicio erunt illi ipsi Jesuitæ, qui gratiæ efficacis doctrinam societatis totius Ordinis viribus oppugnant: è quibus unus nomine San-Jurîus, pietatis famâ inter ipsos non postremus, in libro cui titulus est: *De cognitione Dei, & amore Domini nostri Jesu Christi*, p. 2. l. 3. c. 8. sect. 2. ita de humilitate loquitur: *Cognoscit humilis quàm imbecille sint vires hominum, qui quantumlibet sufficientibus auxiliis instructi sint, NIHIL TAMEN SINE EFFICACIBUS BONI FACERE POSSUNT.* En blasphemias, hæreticas, impias illas voces, in quas passim Jesuitæ debacchantur, à celeberrimo Jesuitâ, in eo libro quem maxime ipsi commendant, disertis verbis expressas.

## A R T I C U L U S X I.

### Prima Partis conclusio.

**L**ongè plura poterant ex Patribus & Scholasticis congeri testimonia, ad illam loquendi rationem, *Sine gratiâ efficaci nihil boni fieri potest*, ab omni erroris suspitione vindicandam.

Nam, si eam quàm potui copiatè confectatus essem, non jam mihi libellus exiguus, ut institui, sed ingens volumen consiciendum fuisset. Illis tamen quæ raptim in hoc scriptum conculi testimo-

niis, ista ni fallor conficiuntur.

1. Sensum hunc catholicum & orthodoxum esse, sine gratiâ efficaci nihil bene fieri, neque hæc duo componi posse; ut qui eâ destitutus sit, bene tamen operetur.

2. De gratiâ efficaci rectè & catholicè dici, sine eâ tentationes vinci & superari non posse, cum ita loquantur Scripturæ, Pontifices, Concilia, Patres, Scholastici, tota denique Ecclesia.

3. Sententiam his verbis intellectam à Patribus, quæcunque tandem illa sit, non modò orthodoxam esse, sed ad fidem planè pertinere, cum in eâ situm esse docuerint catholicum illud dogma adversus Pelagianos ab Ecclesia definitum, sine gratiâ Dei nihil boni fieri posse.

4. Duarum istarum sententiarum, *Sine gratia nihil possumus*; &, *sine gratiâ efficaci nihil possumus*, eundem planè apud Patres sensum esse; nec alteram ad fidem pertinere posse, quin altera quoque pertineat.

De quo si quis adhuc ambigar, illud cogitet infinitis penè locis ab illis Patribus, qui adversus Pelagianos & Semipelagianos scripserunt, dictum esse, Sine gratiâ nihil fieri posse; & tamen illis omnibus locis significatam esse gratiam efficacem. Unde alterutrum consequens est, vel illis locis non probari, sine gratiâ nihil fieri posse, quod impium & nefarium; vel pariter probari, sine gratiâ efficaci nihil fieri pos-

se; cum nomine gratiæ efficacem ab illis intellectam esse, perspicuum sit. Hoc si quis negare sit ausus, proferat ille vel unum Augustini & ejus Discipulorum locum, ubi, in hoc lapsæ naturæ statu *gratia sine quâ nihil possumus* nomine intelligatur ea, quæ det tantum *posse*, non *agere*. Proferat vel unum locum ubi illa Christi verba, *Sine me nihil potestis facere*, ad eam gratiam referantur, quæ det *posse* ab omni actu separatum, & de gratiâ efficaci comodè intelligi non possit. Contrà verò plus quàm sexcenta proferemus, ubi hæc eadem verba, vel similia de gratiâ efficaci, ita manifestè interpretantur Patres, ut aliter intelligenda esse, nulli, non dicam Molinistæ, quid enim illi non audeant? sed Thomistæ possint contendere.

Porro cui constiterit hanc locutionem, *Sine gratiâ efficaci nihil fieri potest*, non modò innoxiam esse, sed etiam sacram, ejusque sensum ex Patrum sententiâ haud dubiè ad fidem pertinere, non opinor inficias ibit, ut minimùm illis verbis significasse Patres hæc tria quibus contineri nostræ propositionis sensum docuimus; nempe sine gratiâ efficaci, quâ Petrus caruit, non haberi omnia ex parte adjutorii divini ad agendum necessaria. 2. Eum qui careat gratiâ efficaci, carere aliquo adjutorio ad agendum necessario, quod non ex ipsius nutu, sed ex divinâ voluntate pendeat. 3. Fieri non posse

posse ut hæc duo inter se componantur: Petrus gratiâ efficaci caret; & tamen bene agit.

Ex illis omnibus duo constare debent. Primum est, Propositionem meam, si verba spectes, veram, catholicam, Theologicam, Patrum & Scripturæ verbis expressam, esse; si sensum, ad ipsa fidei fundamenta pertinere; quippe quæ nihil aliud contineat, quàm capitale illud dogma contra Pelagianos definiturum, Sine gratiâ efficaci nihil bene fieri; sive, quod idem est apud Patres, nihil bene fieri posse.

Alterum est, eos, qui Propositionem illam Chrysostomi & Augustini censurâ inusserunt, & horrenda blasphemix, hæreseos, impietatis nomina in illam contulerunt, utroque nomine Ecclesiæ honorem & fidem gravi injuriâ violasse. Nam, cum ipsi hanc propositionem nullo addito sensu, nullâ exceptione damnarint, manifestum est eo sensu ab illis damnatam esse, qui verbis illis exprimi vulgò solet. Illis autem verbis catholicam sententiam, ad fidem pertinentem, semper à Patribus expressam, docuimus. Quid igitur aliud sequitur, quàm catholicam de gratiâ efficaci fidem esse damnatam?

Nec verò, etiamsi sensum non attigissent, illud leve flagitium est, quodd locutionem à Scripturâ usurpatam, à Pontificibus sancitam, à Conciliis consecratam, à Patribus frequentatam, à Scholasticis tritam, à totâ Ecclesiâ in preces ascitam,

pravâ interpretatione à quoquam corruptam esse nihil causati, hæreticam & blasphemam pronuntiarint. Non enim Scripturæ tantum sensibus honor habendus est, sed etiam verbis, quibus tantum involucris veritas continetur. Atque ut ille planè sceleratus sit & impius, qui Christi corpus sub panis specie venerari se fingens, pedibus ipsas species obterat, & indignis modis habeat; sic non levi Deum injuriâ afficit, qui Scripturæ, id est, Dei verba, quæ *sancta & adorabilia* à Conciliis appellantur, quia, ut sæpe dicit Augustinus, illis veritas continetur, iis notis afficiat, quæ solum in Dæmonis verba meritò conferantur.

Non sum nescius tamen, sub ipsis Scripturæ vel Patrum verbis nonnunquam ab hæreticis nefarios errores occultatos; at tunc Concilia & Patres diligenter Scripturæ sensum ab illorum errore segregarunt, & hæretico tantum dogmate rejecto, suam Scripturæ vel Patrum verbis auctoritatem asseruerunt.

Horum exemplum si sequi potius studuissent nostri Censores, quàm iracundiæ & malevolentix suæ parere, nunquàm voces illas Augustini & Chrysostomi, ex Scripturis & Ecclesiæ perpetuo sermone desumptas, nullo expresso sensu damnaissent. Si enim nefarius ille sensus, quem his verbis à me inclusum suspicabantur, alicubi à me expressus erat, nihil fuit negotii illum potius locum, in quo meus hic er-

ror, quisquis est, tandem clarè & meis verbis enunciatus exstabat, censurâ ferendum objicebat, quàm innoxia Patrum verba contumelioso anathemate percellere.

Sin autem nusquàm erat expressus, sed eum in mente meâ retrusum suspicabantur; quæro quid illis juris fuit in mentem meam, quæ soli Deo patet. Quæro cur eidem mihi affirmanti, & sensum illum ejuranti, non adhibere libuit. Quæro cujus æquitatis fuerit, propter fictitium errorem in unius Theologi animo reconditum, perpetuam, certissimam, constantissimamque Patrum sententiam, Patrum verbis enunciatam, hærescos damnare. Quæro denique cur illum commentitium errorem non aliquo saltè vestigio indicarint, ut à Patrum verbis in erroneum sensum aliquo pacto Censurâ detorqueri posset. Istud illos noluisse nemo credat. Eccui enim verisimile fiet, maximum ab illis Censuræ suæ præsidium sponte neglectum? Cur igitur omiserunt? nisi quia omnino non potuerunt, nec minùs erroneus ille sensus ipsis ignotus fuit, quàm mihi adhuc ignotus est.

Verùm illi quando lubebit, sententiâ nobis suam patefacient; meâ sequentibus punctis continetur, è quibus quodnam anathemate damnandum putaverint, ex ipsis vehemènter scire pervelim.

Qui Petrum, dum Christum prægavit, efficaci gratiâ ad vin-

centam tentationem necessariâ desertum negat, quid dicat non attendit.

Qui sine gratiâ efficaci tentationes utiliter vinci, & aliquod sive cogitando, sive volendo & amando, sive agendo, fieri bonum censet, Christianæ & Catholicæ gratiæ inimicus est.

Qui propositioni Epistolæ meæ, in quâ dixi, *Gratiam sine quâ nihil possumus Petro defuisse*, aliam sententiam affingit ab eâ quam in hoc scripto & apologeticis expressi, *defuisse nimirum Petro gratiam efficacem, sine quâ tentatio nunquàm vincitur, & sine quâ non habetur ea potestas, quæ complectitur omnia ad agendum necessaria*, iniquissimus est fraternæ conscientiæ arbitrer.

Qui sensum illum sic verbis Patrum efferri posse negat: *Defuit Petro gratia sine quâ nihil fieri potest*, in eorum scriptis eundem se proficitur.

Qui vel his verbis, vel huic sententiæ, censuram infligit, in Patres, in totam Ecclesiam, contumeliosus est, quem his Bernardi verbis in Epist. 77. ad Hugonem refellere satis fuerit: *Non quarimus pugnas verborum, novitates quoque vocum juxta Apostolicam doctrinam evitamus. Patrum tantum opponimus sententias ac verba proferimus, & non nostra: nec enim sapientiores sumus quàm Patres nostri. Abundet sanè in suo sensu qui vult, quantum vult, dummodo nos patiatur in Patrum sensibus abundare.*

# DISSERTATIONIS

## SECUNDA PARS

*Quâ conciliatur illa sanctorum Patrum locutio : Sine gratiâ efficaci nihil fieri potest ; cum illorum Thomistarum doctrinâ , qui gratiam efficacem non ad posse , sed ad velle , necessariam statuunt.*

### ARTICULUS I.

*Scopus & concilium Secundæ illius Partis aperitur.*

**H**Ac propositionis meæ defensione, quâ sensum ejus & verba in tuto posui, facile poteram adversus inimicos esse contentus; nihil enim præterea ad me pertinet. Itaque illis merito resistendum putavi, cum disputationem aliò avertere conarentur. Non enim illustrandæ veritatis studio, sed calumniandi libidine dueebantur; qui cum me ad novas quotidie quæstiones pertrahere niterentur, cum alias ex aliis calumnias confingerent, si quando post diuturnam patientiam à me repulsi essent, continuò scribendi me avidum, turbidumquemdam & inquietum, ac penè seditiosum, clamabant; quasi rerum omnium ea conversio facta sit, ut calumniari impunè liceat, calumnias refellere non liceat. Ergo illis malo animo varia quærentibus, aut nihil omnino, aut invitus certè respondi; optimis verò & eruditissimis

Theologis ab omni studio contentionis abhorrentibus, solius veritatis amore incensis, libentissimè me totum aperio, omnesque meos sensus ipsis cupio esse notissimos.

Imprimis illa Theologis omnibus regula figenda est, Ecclesiasticam veritatem à duobus tantum fontibus repetendam, Scripturâ scilicet & Traditione, quâ Pontificum Conciliorumque decreta, & Patrum sensa continentur. Aliorum Theologorum ad hanc normam & sensus & verba expendenda sunt; non autem Scripturæ vel Traditionis sententiæ & voces ad ullius privati Theologi arbitrium revocandæ. Equidem multum tribuo Scholasticis Doctoribus, nec unquam ab hac scientiâ alienus extiti; sed tamen non sine quâdam dedignatione fateor me nonnullos intueri, qui scholasticorum placita Patrum senten-

sententiis opponant, cum omnis recentiorum auctoritas ex antiquitate petenda sit.

Cum igitur illud demonstraverimus, ac fortasse prolatis omnium Ecclesiæ temporum & scriptorum testimoniis latius alibi, si necesse fuerit, demonstraturi simus, hanc in omnium animis & sermonibus impressam sententiam, *Sine gratiâ nihil fieri posse*, non aliter quam de gratiâ efficaci ab omnibus Patribus intellectam; superest ut de eâ omnes Theologi convenire, & sententias suas ac loquendi modum ad illas accommodare, debeant; nec dum ut ipsam, quasi privatis opinionibus suis parum congruentem, damnare vel improbare audeant.

Sed, ut antiquitatis doctrinam inflectere ad scholasticorum sensum æquum non est, sic illud im-

primis pium, ostendere nihil ab antiquis Patribus primarios scholæ Doctores dissidere. Id mihi hæc in parte propositum est: ex quâ, ni fallor, omnes perspicient, in omnium Thomistarum, tum antiquorum, tum recentiorum, sententiâ peræquè verum esse, *Sine gratiâ efficaci nihil nos posse*; nec quicquam interesse ad illius propositionis veritatem, utrum illi gratiam efficacem ad velle solum, an etiam ad posse, necessariam statuunt; ad actum primum vel ad secundum dari fateantur; potentiam proximam Thomistico sensu, sive tantum remotam, non habentibus gratiam efficacem, concedant: quod ut præstem, varix mihi Theologorum de gratiâ efficaci rectè sentientium opiniones referendæ sunt,

## A R T I C U L U S II.

*Consensio & dissensio Thomistarum inter se breviter aperitur.*

**I**mprimis constans & perpetua est omnium Thomistarum doctrina.

1. Gratiam efficacem ad omnia pietatis opera, & ad ipsam orationem, necessariam esse, per modum adjutorii physicè prædeterminantis voluntatem.

2. Certum est, apud illos efficaci gratiæ nunquam ita resisti, ut effectum suum non habeat: quam doctrinam ita nuper adulterare conatus est Pseudo-Thomista Nicolai ex Dominicanâ fa-

miliâ, ut diceret gratiam efficacem dici, non quia semper habet effectum, sed quia semper habere potest: adeò illum non modò sanctorum Patrum Augustini & Thomæ, sed ne sui quidem Ordinis, ne omnium quidem eruditorum iudicii pudeat, quorum nemo ignorat insignem hanc esse gratiæ corruptelam, ante hæc tempora inauditam.

3. Certum est, sine gratia efficaci nihil unquam boni fieri; imò repugnare ut actu aliquid bene

bene fiat; quia repugnat, in-  
quiunt, ut causa secunda bene  
agat, nisi præmoveatur & præ-  
determinetur à Deo.

4. Certum est, illam gratiam  
efficacem gratis à Deo dari, non  
ex meritis humanis, sed ex solâ  
divinâ voluntate.

5. Certum est, etsi omnis gra-  
tia cum effectum habeat quem  
vult Deus, esse tamen nonnul-  
la gratiæ divinæ auxilia, quæ non  
omniñò voluntatem convertant,  
sed bona tantum desideria in ani-  
mâ excitent, quibus non plene  
consentiat.

6. Certum est, illis motibus  
& imperfectis voluntaribus verè  
resisti in eo effectum ad quem ex  
naturâ suâ tendunt, non in eo  
ad quem ex divinâ voluntate de-  
stinantur.

7. Certum est, esse in omni-  
bus justis veram observandi man-  
data potentiam per gratiam in-  
teriorem.

8. Certum est, istam poten-  
tiam non ejusmodi esse ut com-  
plectatur semper omnia ad agen-  
dum prærequisita: non enim sem-  
per habet adjunctam gratiam ef-  
ficacem, sine quâ illam in actum  
prodire repugnat.

9. Certum est, eos qui plu-  
rimum huic potentiæ, cum sola  
est, tribuunt, talem illam cogi-  
tare, qualis est potentia visiva  
in homine cui vigeant oculi,  
sed qui in tenebris constitutus sit;  
certum est, inquam, non minus  
esse necessariam gratiam effica-  
cem justis quâlibet aliâ potentiâ  
instructis, quam necessarium sit

lumen oculis valentibus; nec mi-  
nus repugnare, ut quis sine gra-  
tiâ efficaci bene agat, quàm ut  
sine lumine videat. Ita passim  
Thomistæ recentiores; & illo-  
rum princeps Alvares, ut mox  
videbimus.

Hæc ferè inter Thomistas con-  
stant, & unanimi consensu pro-  
bantur: verum in hoc veluti do-  
ctrinæ trunco inter se conjuncti,  
in minutionibus deinde nascen-  
tium inde controversiarum ramis  
à se invicem disjunguntur.

Ergo de istâ possibilitate, quàm  
justis citra gratiam efficacem in-  
esse certum est, quidam illorum  
ita sentiunt, illam esse perfectam,  
completam, proximam in actu  
primo, non autem in actu se-  
cundo. Alii contrà, ne in actu  
primo quidè omnino perfectam  
& proximam eam potentiam ap-  
pellant. Ita Zumel aliique à Le-  
desmâ citari. Primi consequen-  
ter loquentes, gratiam efficacem  
non ad *posse*, quod completum  
supponit per sufficientem gra-  
tiam, sed ad *velle*, necessariam,  
statuant. Alii verò per gratiam  
efficacem potentiam proximam  
conferri contendunt, licèt in ju-  
stis sit semper alia gratia quæ  
posse remotius conferat.

Rursùm Thomistæ de naturâ  
gratiæ illius quæ dat *posse*, in-  
ter se dissident. Quidam enim  
ex illis eam semper actualem esse  
volunt, ut Alvaris discipuli; alii,  
ut veteres Thomistæ; Capreolus,  
Cajetanus, Ferrariensis, & qui-  
dam etiam è nostris Censoribus,  
putant potestatem illam, quæ  
justis



justis inest, seclusa efficaci gratiâ, per gratiam habitualement ipsi conferri, quamvis sæpe etiam iis moribus roboretur, qui consensum perfectum non eliciant.

3. De ipsis vocibus aliqua est inter gratiæ efficacis patronos disceptatio. Quidam enim, ut Lovanienses & Duacenses in Censuris suis, gratiæ sufficientis nomen nonnisi efficaci tribuunt; adeoque negant, adesse ullis Christi gratiam quæ ad justè vivendum sufficiat, nisi illis in quibus Deus operatur velle, & facit ut in præceptis suis ambulent: *Non operatur autem, inquit, Deus velle in eo qui non vult, nec facit in præceptis suis ambulare eum, qui adhuc bene velle recusit. Non*

*est igitur in eo gratia sufficienter præparans.* Alii verò, sufficientis gratiæ nomen alio sensu accipientes, vel gratiæ habituali illud tribuunt, vel illis gratiæ actualis moribus, qui ad perfectum voluntatis consensum disponunt, sed illum non omninò efficiunt: ita plerique Thomistæ recentiores. His positis quaeritur, utrùm in omnium illorum Theologorum sententiâ verum sit, *Sine gratiâ efficaci nihil fieri posse.* Vehementer enim huic sententiæ repugnare videntur ii, qui citra gratiam efficacem posse perfectum voluntari tribuunt, nec gratiam efficacem ad posse necessariam ducunt, sed tantùm ad velle: de quo quid sentiendum sit, sequentibus articulis inquiremus.

### A R T I C U L U S I I I.

*Exponitur & solvitur quaestio, ex duplici acceptione vocis posse ab Alvare traditâ.*

**I**Nter omnes Theologos gratiæ efficacis assertores constat, ut jam vidimus, illam ad omnem bonam voluntatem ita necessariam esse, ut nisi adsit, hoc est, nisi bonam voluntatem in corde hominis operetur, nullus unquam sit in homine bonæ voluntatis morus. Idque ab Apostolo his verbis traditum: *Deus est qui operatur in vobis & velle & operari.*

Dum ergo nonnulli ex iis docent, gratiam efficacem non ad posse, sed tantùm ad velle, necessariam esse, sive dare tantùm velle, non autem posse, eo tan-

tùm sensu id intelligere possunt, quòd gratia efficax non det aliquam volendi virtutem antecedentem ad ipsum velle, & ab ipso distinctam: ut qui securim ad secandum impellit, non dat securi novam secandi virtutem, quam ante non haberet, sed eam, quæ securi jam inerat, ad opus applicat. At verò nunquam illorum Theologorum mens fuit, ante gratiam efficacem inesse omnia ad volendum & agendum necessaria, cum id contrà expressè negent, ut videre est apud Alvarem, disp. 79. n. 1. & 2.



& Navarretam, Tom. 2. contr. 19. §. 1. ac ceteros Thomistas. Neque aliter sentire possunt, cum gratiam efficacem ad volendum & agendum necessariam statuunt.

Sic ergo vox illa, *posse*, non pro sola interna agendi virtute sumatur, sed pro complexu omnium tum causarum tum conditionum, quæ ad agendum necessarium prærequiruntur, tunc nihil repugnabit, ut sine aliquo habeatur *posse* primo sensu (quia habetur agendi virtus). sine quo tamen non habetur *posse* secundo sensu, quia non habentur omnia ad agendum necessarium prærequisita: ut cui vigent oculi, potest utique videre propter internam videndi potentiam; idem tamen dicitur non posse videre, propter absentiam luminis ad videndum, necessarii.

Nec verò nobis ad arbitrium excogitata est duplex illa vocis *posse* significatio; sed ab ipsis Thomistis cognita & explanata. Quæ de re locus illustris est apud Alvarem, disp. 79. n. 2. *Supponendum est*, inquit, cum Cajetano, Ferrariensi & Medina, quod dupliciter intelligitur liberum arbitrium *posse* per aliquod auxilium producere aliquem actum. Primo modo absolute & simpliciter, hoc est, sine addito, sicut cum asserimus hominem per potentiam visivam *posse* videre; quia videlicet, quantum est ex parte potentie, per quam constituitur in actu primo ad videndum, non requiritur ut verè dicatur *posse* videre, quod superaddatur illi ali-

qua alia potentia aut virtus, tribuens in actu primo ipsum *posse* videre; quamvis ultra potentiam visivam alia plura requirantur, ut quis actu videat. Unde ex sola potentia non potest inferri usus, seu operatio illius in actu exercito. Et in hoc sensu asserendum est, per auxilium sufficiens verè *posse* hominem operari actum illum, comparatione cuius dicitur sufficiens, etiamsi nunquam sit operaturus, nisi Deus auxilio efficaci efficiat, ut illud *posse* reducatur ad actum secundum. Secundo modo id potest intelligi de principio, sive auxilio, quo potest complete operari, ita videlicet, ut non solum habeat quis principium quo verè possit operari, sed etiam habeat complementum, quo in ipso exercitio operetur & velit.

Non hic unus Alvares loquitur, sed præcipui quique Thomisticæ scholæ Doctores. Sententiæ suæ auctorem habet Cardinalem Cajetanum in 1. 2. qu. 109. a. 10. à quo illam ipsam luminis comparationem mutuatus est. Auctorem item habet Franciscum Ferrariensem illustrissimum S. Thomæ interpretem, in lib. 3. cont. Gent. c. 155. Habet Bartholomæum Medinam in eundem ac Cajetanus locum. Alvarem verò sequuntur quicumque deinceps scripserunt, & summo consensu definiunt sine gratiæ efficaci non haberi omnia ad agendum necessaria. Hinc verò quæstio nostra planè solvitur: neque ulli, posthac dubium esse potest, quin Thomistæ, etiam illi quos hæcenus maximè nobis abversari jactatum

statum est, nobiscum faciant.

Fatentur enim, duplicem esse vocis *posse* acceptionem : unam, cum sumitur ex parte potentiae & actus primi, id est, pro interna virtute; alteram, cum sumitur pro *posse* completo, & pro complexu omnium quæ necessaria sunt ad agendum. Fatentur per solam sufficientem gratiam, id est, sine efficaci, non haberi *posse*, nisi primo sensu. Fatentur, ut docet Alvares initio numeri sequentis, per solam gratiam efficacem haberi *posse* secundo sensu, & in hoc omnes utriusque partis auctores convenire. Ex quo consequens est, eum, qui sine efficaci gratiâ nihil fieri *posse* dicere, si vocem illam *posse* secundo illo sensu sumat, nullo modo ab Alvare, nec ab ullis Thomistis dissentire. Nam, si affirmant, quod non ita frequenter apud illos invenias, imò aliqui falsum putant, *Sine gratiâ efficaci homines aliquid posse*, vocem *posse* pro virtute agendi usurpant; non autem pro complexione omnium causarum. At cum affirmavi in hoc scripto, & in epistolâ, *Sine gratiâ efficaci nihil nos posse*, vocem illam accepi pro complexu omnium causarum & conditionum, quæ necessariz sunt ad agendum, ut testor, & sæpe aliâs testatus sum.

Ira Thomistarum sententiam nihil omnino læsi : manet ipsis defendendæ illius plena & integra libertas. Quod inter ipsos

convenit, non haberi completum illud *posse*, quod completur omnia prærequisita ad agendum sine gratiâ efficaci, id asserui : quod dubium inter ipsos, utrum sine gratiâ efficaci habeatur interna virtus perfecta, primus actus immediatus & proximus, omnino non attigi.

Superesse tantum potest levior contentio, uter illius vocis *posse* sensus usitator, & rationi congruentior. Cum enim clarum sit ex jam dictis, hominem, verbi gratia, qui sanos oculos habeat, sed careat lumine, verè dici *posse* videre, propter facultatem videndi quam habet; & non *posse*, propter absentiam luminis : quaeritur, utrum usitatus & rationi congruentius dicatur non *posse* videre, quàm *posse*. Quam quaestionem à nullo Theologo, quod sciam, ex professo disputatam, etsi rectè poteram omittere, tamen ut clariùs adhuc appareat, quàm verè toties dixerint Patres, sine gratiâ efficaci nihil fieri *posse*, non abs re erit, & ratione, & communi omnium sermone, & Traditionis perpetuo loquendi modo confirmare usitatissimè sumi vocem illam *posse* pro conjunctione omnium causarum & conditionum; ita ut si aliqua conditio, licet non ad virtutem agendi, sed ad ipsam actionem pertinens, deesse supponatur, sæpiùs negetur *posse*, quàm affirmetur. Hoc sequentibus articulis præstabimus.

## ARTICULUS IV.

*Usitatus de eo cui deest aliquid necessarium dici non posse, quam posse; etiamsi illud quod deest ad potentiam non pertineat.*

*Varia observationes circa illorum verborum usum.*

**R**ationis in rebus Theologicis minus est pondus, imò nullum est adversus apertam auctoritatem; valet tamen ipsa permultum ubi auctoritati non repugnat, sed concinit: quod in præsenti negotio cernere est. Est enim illud in omnium mentibus insitum & impressum, atque inde in omnium sermonem translatum, si quid ad actionem necessarium desit, actionem illam fieri non posse; si quid ad perfectionem rei necessarium non adsit, rem confici nullo modo posse. Ex quo manavit illa necessarii definitio toties à S. Thomâ repetita: *Necessarium id est, sine quo res esse non potest.*

Neque verò necessarii nomine id solum intelligi debet, quod requiritur ad agendum, tanquam causa agens & efficiens, tanquam virtus agentis indita; sed etiam illud omne, sine quo res non fit, sive sit instrumentum, ut cum penicillus dicitur necessarius ad pingendum; sive tantum conditio sine qua non, ut vulgò in scholis loquuntur, ut ad morio ligni ad focum. Horum enim omnium si quid desit, rectè dicitur rem fieri non posse, actionem esse non posse.

Verùm ut istius rei ratio penitus perspiciatur, illud dili-

genter attendendum est, duobus modis quæri, utrum aliqua causa agere possit: 1. absolute, omnibus ad agendum necessariis nec expressis nec exclusis, ut cum quæritur, utrum homo possit videre: 2. exclusâ aliquâ conditione ad agendum necessaria, ut cum quæritur, utrum aliquis possit videre sine lumine.

Quod ad primam quæstionem pertinet, illud modo spectare solent homines, dum huic respondent, utrum res, de quâ quæritur an possit aliquid facere, habeat internam agendi virtutem: si habet, respondent *posse*; si non habet, *non posse*. Aliæ enim conditiones, cum non sine exclusâ, supponi solent. Verbi gratiâ, si de illo à nativitate cæco, cui Christus visum restituit, quæsitum à Judæis fuisset, utrum videre posset: qui eum sanatum noverant, posse videre respondiissent; qui istud ignorabant, non posse. Quâ in responsione neutri eorum attendissent luceret-ne, an non luceret, sed utrum haberet videnti potentiam, an non haberet.

Ad posteriorem verò quæstionem, in quâ negatur aliquid ad agendum necessarium, omnes vulgò homines, ipsâ duce ac magistra natura, negativè respondent,

dent, sive illud quod deest ad potentiam pertineat, sive non pertineat, sed tantum sit conditio ad agendum prærequisita, & sine quâ non agitur. Ita si quærat ab aliquo, utrum videre possit in tenebris, nemo est qui non respondeat, se non posse; & si quis affirmetur noctu videre posse, prodigii loco res habebitur, neque alio sensu id intelligitur, quàm quomodò feles, nocturæ, & similia animantia, noctu dicuntur videre. Similiter, si de pictore absolutè quærat an possit pingere, posse dicent omnes qui ejus in pingendo peritiam noverint: si verò quærat, an sine penicillo possit pingere, iidem ipsi posse negabunt. Roget quis, an ignis possit lignum comburere; quis non affirmet? Adde hypothesim, si non admoveatur foco, sed toto milliari ab igne distitum sit, quis tunc non neget comburi posse? Nec tamen vel admotio ligni ad focum, vel penicillus, vel lumen, ad internam comburendi, pingendi, videndique potentiam pertinent.

Ergo ut ejusmodi exempla, nam innumera proferri possent, ad nostrum institutum transferamus; si de justo absolutè quærat, an possit observare mandata Dei, proculdubio posse respondendum est, quia tum attenditur ad internam bene agendi virtutem, quam in sanctificatione accepit; & ipsa auxilia gratiæ cum non excludantur, affore supponuntur, ut re-verâ adesse omnibus justis qui piè vivunt à posteriori

rectè concluditur. Unde si quis absolutè diceret, justos non posse servare mandata, vel illud dicere censeretur, nullam in ipsis esse per gratiam servandi mandata facultatem, quod erroneum; vel cum Calvinistis sentire putaretur, nunquàm adesse justis ea gratiæ auxilia quibus re-vera mandata impleantur.

Sin verò de aliquo justo, cui gratia efficax in aliquâ tentatione desit, quærat, an sine gratia efficaci ad vincendam tentationem necessariâ, quam supponimus ipsi defuisse, tentationem vincere potuerit; tunc ex communi omnium loquendi ratione respondebitur, non quidè absolutè, sed in illa hypothesi, si ne hac gratiâ non potuisse. Quod si quis rectè dici neget, neget etiam oportet rectè dici hominem non posse videre sine lumine, pictorem non posse pingere sine penicillo, ignem non posse comburere lignum milliari distitum. Sin verò istas loquendi rationes, omnium sermonibus tritas, nemo mendacii & erroris arguat, quin in omnium risum incurrat, quantumvis clamitet etiam in tenebris integram esse videndi potentiam, pingendi artem totam esse in pictore, qui penicillum non habeat, vim urendi esse in igne, à quo lignum distet; quis non videat non minùs absurdum esse, qui præfractè neget rectè dici hominem justum sine gratiâ efficaci tentationem superare non posse, quantumvis existimet, sine gratiâ efficaci haberi plenam, proxi-

proximam, integram, tentationis vincendæ potentiam, modò fateatur, ut omnes Thomistæ fateantur, gratiam efficacem esse non minùs necessariam ad velle, & ad tentationem re ipsâ superandam, quàm lumen ad videndum, penicillum ad pingendum, admotionem ligni ad comburendum?

Ex iisdem exemplis intelligi licet, quàm falsò quidam, præposterè subtiles, sibi persuaserint, ideò non rectè dici, sine gratiâ efficaci justum bene agere non posse, quia, ut aiunt, hæc propositio, cùm sit negativa, & ideò malignantis naturæ, totam perimit potentiam. Magnifica verba, sed sensus inania! Quasi verò idem sit dicere, aliquem in tenebris videre non posse, & illum cæcum esse: quasi verò eadem Raphaëli Urbinati fieret injuria, si dicatur ipsum pingere non potuisse sine penicillo, ac si diceretur eum omninò pingere non potuisse, nec ullam pingendi artem ac virtutem habuisse.

Quod totum contrà est ac illi existimant. Ex certissimo enim & pervulgatissimo axiomate, Bonum ex integrâ causâ, malum ex minimo defectu: *posse* autem ad bonum pertinet, *non posse* ad malum, nisi cùm *causæ æquevalens* usurpatur; ut cùm Deus dicitur non posse mori, non posse seipsum negare; quod non impotentia est, sed potestatis. Quare propriè loquendo, longè plura requirit *posse*, quàm non *posse*. Etsi enim, cùm ad solam agendi virtutem attenditur, rectè dicatur

agere posse qui eâ pollet; ferè tamen in animo sic loquentis tacita inest hæc conditio, si cætera omnia ad agendum necessaria adsint. Bonum enim, quale est *posse*, ex integrâ causâ; at verò ad *non posse*, quilibet rei necessarii ad agendum defectus sufficit; malum enim, quale est *non posse*, ex minimo defectu.

Quamobrem ut justus dicatur posse observare mandata, prout vulgò homines vocem illam *posse* usurpant, requiritur non solum ut habeat internam potentiam, sed ut præterea tacitè supponantur affore aliæ conditiones ad agendum necessariae; at verò ut negetur posse, satis est si desit aliqua conditio ad agendum necessaria, qualis est ex omnium Thomistarum consensu gratia efficax.

Non nego tamen, quin bono sensu dici possit, justum sine gratiâ efficaci bene agere posse, propter ipsam internam potentiam, & ut loquitur S. Thomas, *quantum ad sufficientiam operative virtutis*; sed illud solum contendo, significationem illam verbi istius *posse*, cùm usurpatur pro solâ potentia, etiamsi desit aliqua conditio ad agendum necessaria, esse minùs vulgarem & tritam. At verò cum sumitur pro complexione omnium tum causarum tum conditionum, quæ ad agendum requiruntur, esse & magis propriam, & in usu ita frequentem, ut nunquàm ferè aliter homines loquantur. Viderunt hoc illi Thomistæ, qui eam ob causam hanc proposu-  
erunt: *Potest homo bene agere sine gratiâ*

*gratia efficaci*, falsam esse pronuntiarunt. Non enim, (inquit Navarreta jam à nobis citatus, Cont. 19. in 1. part. qu. 19.) *hæ duæ propositiones eundem sensum efficiunt; scilicet: Homo cum auxilio sufficienti, præscindendo ab efficaci, potest converti ad Deum; Et hæ: Homo sine auxilio efficaci, cum solo sufficienti, potest converti ad Deum.* Prior vera est ex illo auctore; quia præscinditur tantum à gratia efficaci, non autem illa negatur. Posterior falsa, quia denotat quod operatio potest sequi de facto sine auxilio efficaci; QUOD TAMEN FALSUM EST. Nonne id ipsum est, quod hoc toto articulo probavimus, multum differre, an absolute & simpliciter de justo qua-

ratur, utrum possit tentationes vincere; an verò quæreretur, utrum id possit sine gratia efficaci? Ad priorrem enim questionem meritò responderi eum id posse per gratiam in justificatione acceptam, à quâ præscinditur tantum in illâ propositione, non excluditur gratia efficax. Ad posteriorem verò, in quâ illa disertè abesse dicitur, longè rationi congruentius loqui, qui non posse responderit.

Sed quoniam à vulgari sermone nonnunquam Ecclesiastica loquendi ratio discrepat, operæ pretium erit hic ostendere notiones illas verborum quas attulimus antiquorum Patrum menti planè consentaneas esse.

## ARTICULUS V.

*Idem probatur ex præclaro Sancti Anselmi loco.*

NON hic consilium est ea congerere, quæ jam attulimus in prima parte, ut illud probaremus, *Sine gratiâ efficaci nihil fieri posse*; sed aliquot tantum Patrum locis ostendere, communem apud ipsos esse vocis posse notionem, ut, quamvis aliundè potestas agendi non desit, dicatur tamen non posse, cui deest aliquid ad agendum necessarium.

Insignis ea de re locus S. Anselmi in Dial. de lib. arb. c. 3. in quo luculenter ostendit: primum quidem posse nos habere agendi potestatem, etiamsi ea desint sine quibus ad actum potestas illa minime perducitur. 2. Si illa desint,

nos agere non posse, quamvis alioqui non desit agendi potestas: Nullam, inquit, potestatem habemus, ut puto, quæ sola sibi sufficiat ad actum; & tamen cum ea desunt sine quibus ad actum minime perducuntur nostræ potestates, non minus eas, quantum in nobis est, habere dicimur: sicut nullum instrumentum solum sufficit ad operandum; & tamen, cum desunt illa sine quibus instrumento uti nequimus, instrumentum nos cujuscumque operis habere sine difficultate fatemur. Quod ut in multis advertas in uno tibi monstrabo. Nullus visum habens dicitur nulloatenus videre posse mentem: cui discipulus respondet: Qui men-

tem videre non potest, propterea nulum habet visum.

En quod superiori articulo diximus, cum de eo qui cæcus non est, absolute quaeritur utrum videre possit, sine dubio responderi debere, videre eum posse. Dispiciendum verò, utrum idem responderi debeat, cum aliquid abesse supponitur eorum quæ ad videndum necessaria sunt. Sic igitur pergit Anselmus: *Habet ergo potestatem & instrumentum videndi montem qui visum habet, & tamen si mons abest, & dicis ei; Vide montem, respondet tibi; NON POSSUM quia abest; si adesset, possem videre. Item si mons adesset & lux abesset, responderet se montem NON POSSE videre, quia non posset absente luce; sed si lux adesset, tunc posset. Rursum si visum habenti lux & mons præsens est, & aliquid visui obstat, velut si aliquis illi oculos claudat, dicet se NON POSSE videre montem; sed si nihil visui ejus obsteret, tunc sine dubio*

montem videndi potestatem haberet, plenam scilicet & expeditam. Ante enim dixerat, etiamsi illa deessent sine quibus non agitur, nos tamen habere agendi potestatem.

Sed quod attinet ad vocem *posse*, de quâ solâ hic quaestio est, ubicunque deesse supponitur aliquid ad videndum necessarium, semper affirmat S. Anselmus videre non posse etiam qui perspicacissimos oculos & internam videndi facultatem omnino integram habet. Quid autem ad hæc discipulus? *Hoc totum*, inquit, *omnibus notum est. Ut mira planè videri possit nostrorum temporum malè feriata subtilitas, quæ in iis locutionibus hæreses, blasphemias, impietates, quaerit, quas qui neget, ex Patrum mente comuni omnium sensui bellum indicat necesse est, vel contentionis studio ed abripiatur, ut ignorare se fingat quod omnibus notum est.*

## A R T I C U L U S VI.

*Usitatiùs dici non posse videre qui lumine carere supponitur, quàm posse, probatur ex variis locis Patrum: Justius autem sine gratiâ efficaci est sicut oculus sine luce, ex omnibus Thomistis.*

**H**oc loco Anselmi admonemur, ut argumentum illud ex lumine desumptum paulò uberiùs prosequamur. Eò enim validius est, quòd omnes Thomistæ farentur, gratiam efficacem non minùs necessariam esse ad bonam voluntatem eliciendam, quàm lumen ad visionem exercendam;

eamque potestatem quæ gratiâ efficacem antecedit, à gratiâ sufficiente profectam, talem esse, qualis est potestas visiva lumine destituta. Unde, quemadmodum apud ipsos gratia sufficiens est verè sufficiens, verbi gratia ad credendum, licet requirat ad credendum actum auxilium efficax: sic



visiva facultas est principium sufficiens ad videndum, licet lumine indigeat ad actu videndum: sicut gratia sufficiens dat posse bene agere, ita facultas visiva dat posse videre. *Potentia visiva*, inquit Alvares disp. 79. n. 3. est sufficiens principium ad videndum, etiamsi actualis visio nunquam fiat nisi accedente lumine, & causâ universali eam movente. Ergo similiter auxilium sufficiens ad credendum est verè sufficiens in suo genere, quamvis ultra illud sit simpliciter necessarium auxilium efficax quo Deus efficit ut homo credat. Et n. 2. in loco jam suprà citato vidimus Alvarum ex primariorum Thomistarum sententiâ docentem, eodem tantum modo bene agere nos posse per gratiam sufficientem sine efficaci, quo modo possumus videre per visivam potentiam sine lumine.

Ut ergo illud exploretur, utrum Patrum sermoni congruentius loquantur, qui aiunt hominem sine gratiâ efficaci posse bene agere, an qui dicunt, non posse, videndum est quo pacto loquantur Patres de oculo sano, sed lumine destituto. Nam, si crebrius dicant eum posse videre sine lumine, quam non posse, consequens erit rectius dici, *justum sine gratiâ efficaci bene agere posse*, quam non posse; sin autem contrâ, contrarium certè colligendum erit.

Jam verò libenter quæsierim, non à Thomistis, nam illi quidem parùm hâc de re sensum suum aperuerunt, sed à quibusdam Theologis, quibus hæc lo-

quendi ratio, *Sine gratiâ efficaci aliquid fieri potest*, (quam Navarretta falsam esse contendit) sic propria & usitata videtur, ubinam apud sanctos Patres legerint, *Oculum sanum sine lumine videre posse*, quod profectò in illorum scriptis non memini me reperire. Contrâ verò sæpissimè in illis legi, *oculum quantumvis sanum sine lumine videre non posse*: non repetam quem ex Anselmo jam retuli locum, ubi disertè ait absente luce montem videre non posse qui videndi facultate præditus est; aliquot hîc adjungam tantum ex Augustino loca, plura prolaturus si opus sit.

Augustinus igitur lib. 2. de pecc. meritis & rem. c. 5. sic loquitur. *Sicut enim corporis oculus non adjuvatur à luce; ut ab eadem luce clausus averfusque discedat; ut autem videat, adjuvatur ab eâ; NEQUE HOC OMNINO, nisi illa adjuverit, POTEST: ita Deus, qui lux est hominis interioris, adjuvat nostram mentis obtutum, ut non secundum nostram, sed secundum ejus justitiam boni aliquid operemur.* Et de nat. & gr. c. 26. *Sicut oculus corporis etiam plenissime sanus, nisi candore lucis adjutus, non potest cernere; sic homo, etiam perfectissime justificatus, nisi aternâ luce justitiæ divinitus adjuvetur, rellè NON POTEST vivere.* Et ep. 106. *Sicut sanos oculos firmos dicimus ad videndum, quod tamen NULO MODO FACERE POSSUNT, si desit lucis auxilium.* Denique l. de gestis Pelagii c. 3. *SUFFICIT sibi oculus AD NON VIDENDUM, hoc est, ad tene-*



tenebras; ad videndum verò lumine suo non sibi sufficit, nisi illi extrinsecus adiutorium clari luminis præbeat.

Idem habes in Epistola synodali Conc. Sardinienſis loco jam à nobis citato. Sic namque est, inquit, liberum hominis arbitrium absque dono gratiæ, sicut est oculus sine luce: sicut ergo corporis oculus semper indiget lumine accipere, ut ipsum possit aspicere, sic & libero arbitrio hominis nulla potest gratiæ suffragari cognitio, nisi detur ipsius gratiæ spiritualis infusio. Plura referre nihil necesse est. Facile enim, credo, impetrabimus ab illis Theologis, ut si nullum proferre locum potuerint ubi sine luce videri posse Patres affirmant, multa nos afferamus quibus id negent, liceat nobis eandem, quam utique profiteamur de gratiæ efficaci necessitate sententiam, sic efferre quemadmodum Patres extulerunt. Sed obiter hic lectores monitos volo, ut vix ullam similitudinem invenire est undequaque perfectam, sic in illâ

lucis comparatione, licet aptissima, & ab Augustino sæpe usurpatâ, nonnullam tamen diversitatem inesse. Exprimit illa quidem necessitatem gratiæ efficaci: nec enim minùs necessaria est illa gratia ad bene agendum vel orandum, quàm lumen ad videndum; sed in eo discrepat, quòd qui lumine caret videre non potest, etiam si velit. At verò qui caret gratiâ efficaci bene ageret & oraret utique, si vellet. Totum enim illud bene agere & orare in ipsâ voluntate situm est: & idèd sit cum volumus. Quamobrem semper est hoc sensu in potestate voluntatis, nec unquam possibile esse potest, ut plenè velimus bene agere, nec ramen bene agamus, si de interioribus virtutum actibus sermo sit. Verùm quia aliundè non fit ut quis velit aut bene agere, aut orare, quàm per gratiam efficacem, rectè à Patribus & Scholasticis dictum est: Ut nemo potest sine luce videre, ita sine gratia efficaci nihil bene fieri posse.

## A R T I C U L U S VII.

*Idem ostenditur ex adiutoriorum divisione ab Augustino traditâ libro de gestis Pelagii.*

**P**udet me profectò in his probandis diutius immorari. Non dubito enim quin si honestis & intelligentibus sæculi hominibus innotesceret, illam, quæ inter Theologos tantâ animorum contentione agitur, controversiam eò denique redigi, utrùm verè

dicti queat aliquem sine luce videre non posse; non dubito, inquam, quin tota res merum illis ludibrium videretur, & quin stultos arbitrarentur qui id negarent; ridiculos, qui probare laborarent. Parendum tamen miserum necessitati; & ne certissima

fidei dogmata impietatis & hæreseos arguantur, illud operose probandum, de quo post homines natos ante istas contentionem nemo unquam sanæ mentis dubitaverat.

Ergo invictum hujus rei argumentum poti potest ex distinctione duplicis adjutorii apud S. Aug. l. de gest. Pel. c. i. Cum, inquit, videamus (exempli gratia) & sine tritulis arcam tritulari, quamvis adjurent si adsint; & sine pedagogis posse pueros pergere, in scholam, quamvis ad hoc non sint inutilia pedagogorum adjumenta; & multos sine medicis ab ægitudine convalescere, quamvis manifesta sint adjutoria medicorum; & alia multa quæ nobis tacentibus cogitant facile occurrunt, profecto admonemur adjutoriorum genera esse duo. Alia quippe sunt sine quibus illud ad quod adjuvant effici NON POTEST, sicut sine navis navigat nemo, nemo sine voce loquitur, nemo sine pedibus graditur, nemo sine luce intuetur. Unde est etiam illud, quod nemo sine Dei gratiâ rectè vivit. Alia verò sunt adjutoria quibus sic adjuvamur, ut, etiamsi desint, possit alio modo fieri propter quod ea requirimus: sicut sunt illa quæ commemoravi, tribula ad fuges terendas, pedagogus ad puerum ducendum, medicamentum humanâ arte confectum ad recipiendam salutem, & cetera talia.

Multa ex hoc loco elici possunt. Primum, adjutoria adæquatè dividi in hæc duo genera, id est, vel ejusmodi esse ut sine illis illud ad quod adjuvant effici non possit; vel hujusmodi ut, etiamsi

desint, possit alio modo fieri propter quod ea requirimus. Illam verò distinctionem esse adæquatam, ex eo satis intelligitur, quod Augustinus statim subjungit: *Quærendum igitur ex quo duorum istorum generum sit legis scientia, id est, quomodo adjuret ad non peccandum.* Quod omnino ineptè quæreret, si præter illa duo esset etiam tertium genus ad quod referri posset.

2. Efficitur, ● adjutoria sine quibus non fit, ut navis sine quâ nemo navigat, lucis sine quâ nemo videt, gratiæ sine quâ nemo rectè vivit, ad prius illud genus adjutorii, sine quo illud ad quod adjuvat effici non potest, pertinere; ac proinde & lucem sine quâ nemo videt, & gratiam sine quâ nemo rectè vivit, esse adjutoria sine quibus non potest res fieri.

3. Colligitur, secundum illud genus adjutorii sine quo res esse potest, ea tantum complecti sine quibus res aliquando est, ut pater ex omnibus exemplis, tribulatum, sine quibus, inquit Augustinus, videmus arcam tritulari; medicorum, sine quibus multi convalescunt; &c. adeoque ad illud adjutorii genus gratiam efficacem referri non posse, sine quâ fatentibus omnibus Thomistis nemo rectè vivit.

Ex quo generatim concluditur, eo ipso quod adjutorium tale est, ut sine eo res nunquam fit, ad illud adjutorii genus pertinere, sine quo illud ad quod adjuvat effici non potest; & proinde rectissime

Assimè dici, sine eo rem fieri non posse. Quate cum ex omnium Thomistarum sententiâ sine gratiâ efficaci nemo rectè vivat, quemadmodum nemo sine luce inuictur, sequitur & lucem &

gratiam efficacem esse adjutoria sine quibus res esse non potest, & proinde rectè dici, sine gratiâ efficaci nihil fieri posse; sicut rectè dicitur, sine luce videri non posse.

## ARTICULUS VIII.

*Explicatur alia adjutoriorum divisio ab eodem Augustino tradita; & ostenditur omne adjutorium sine quo aliquid non fit, esse adjutorium sine quo non potest fieri.*

**I**dem ostendi & illustrari potest ex aliâ adjutoriorum divisione ab Augustino tradita lib. de corr. & gr. c. 12. Ipsa adjutoria, inquit, distinguenda sunt. Aliud est adjutorium sine quo aliquid non fit, & aliud adjutorium quo aliquid fit. Nam sine alimentis non possumus vivere, nec tamen cum affuerint alimenta, eis fit ut vivat qui mori voluerit. Ergo adjutorium alimentorum est sine quo non fit, non quo fit, ut vivamus. At verò beatitudo quam non habet homo, cum data fuerit continuò fit beatus. Adjutorium est enim non solum sine quo non fit, verum etiam quo fit propter quod datur. Quapropter hoc adjutorium, & quo fit est, & sine quo non fit.

Ad hanc divisionem rectè intelligendam quedam notanda sunt. Ac primum illam non esse ejusdem generis divisionem, atque eam quam superiori articulo attulimus ex libro De gestis Pelagii, sed esse potius speciei partitionem, quàm generis. Communiter enim adjutorium dividitur in adjutorium sine quo res

fieri non potest, & sine quo fieri potest. Prior autem illa species rursus dividitur in has duas species adjutoriorum, nimirum illius sine quo non fit, & illius quo fit.

Notandum 2. adjutorium quo fit, retinere semper naturam sui generis, & esse etiam adjutorium sine quo non fit. Disertè enim Augustinus de beatitudine, quam in exemplum adducit adjutorii quo: Adjutorium est, inquit, non solum sine quo non fit, sed etiam quo fit propter quod datur. Quapropter hoc adjutorium, & quo fit est, & sine quo non fit. Quamobrem, ut non includatur adjutorium sine quo non fit, in adjutorio quo fit, addenda est negatio oppositæ speciei hoc modo, adjutorium sine quo non fit, non quo fit. Et sic, cum illa species simpliciter dicitur adjutorium sine quo non fit, id ex illâ Logicæ regulâ intelligi debet, quæ monet speciem ignobiliorem nonnunquam sumere nomen generis; ut cum gratia gratis data opponitur gratiæ gratum facienti, licet

licet utraque gratis detur, Sed prior species, inquit S. Thomas in 1. 2. qu. 111. a. 1. retinet sibi nomen commune, sicut in plu-

ribus aliu contingit. Et sic opponuntur due partes divisionis, sicut gratum faciens, & non faciens gratum.

*Sed omni illa adjutoriorum distinctio planius subjectâ tabellâ demonstrabitur.*

*Adjutorium in genere duplex, ex Aug. De gest. Pel. c. 1.*

Quo sic adjuvamus, ut etiam si desit possit alio modo fieri propter quod id requirimus, ut panis ad vivendum, medicamentum humanâ arte confectum ad recipiendam sanitatem, equus ad iter faciendum, &c. Hoc adjutorium vocatur à S. Thomâ secundum quid necessarium, seu utile.

Sine quo illud ad quod adjuvat effici non potest. Quod rursum duplex ex eodem Augustino De corr. & gr. c. 12. Hoc adjutorium vocatur à S. Thomâ simpliciter necessarium.

Sine quo non fit, non quo fit: Ut alimenta, sine quibus non possumus vivere, quibus tamen non fit ut vivat qui mori voluerit.

Sine quo non fit, & quo fit, ut donum perseverantiz, sine quo, ut inquit Augustinus, nunc sancti perseverantes esse non possunt, & per quod non nisi perseverantes sunt.

Dubitari verò non potest quin illæ duæ adjutoriorum species, quas distinguit Augustinus, lib. De corr. & gr. pertineant ad prius membrum divisionis, quam Augustinus tradit libro De gestis Pelagii, hoc est, ad illud adjutorii genus, *Sine quo illud ad quod adjuvat effici non potest.* Utrumque enim adjutorii genus, & sine quo non fit, & quo fit, sic explicat, ut sine utroque fieri non posse significet illud ad quod adjuvant. In adjutorii *Sine quo non fit* exemplum affert alimenta. Quid verò de alimentis? *Nam sine alimentis*, inquit, *NON POSSUMUS*

*vivere:* in exemplum verò adjutorii quo fit, donum perseverantiz. Quid autem de illo? *Non solum*, inquit, *sine isto dono Sancti perseverantes esse NON POSSUNT*, verum etiam *per hoc donum non nisi perseverantes sunt.*

Atque hinc ni fallor perspicitur ex Augustini mente, quoriscunque sine aliquo adjutorio res non fit, toties rectè dici *Sine illa rem fieri non posse.* Cujus rei non alia ratio est, quàm quia vox *posse* usurpatur vulgò & ferè semper pro complexu omnium tum causarum tum conditionum, quæ ad confectionem rei requiruntur.

& sine quibus non fit. Unde si aliquod adiutorium, sine quo res non fit, defuerit, non solum dicitur non fieri sine illo, sed etiam *fieri non posse*. Hinc est quod Augustinus sine discrimine usurpat eas locutiones: Nemo sine luce intuetur; nemo sine luce intueri potest: nemo sine gratia Dei rectè vivit; Nemo sine gratia Dei rectè vivere potest: & sæpe in eadem periodo alteram alterius loco summutat. Quin & eundem Scripturæ locum nunc isto nunc illo modo profert, ut quod Christus ait, Joan. 6. *Nemo potest venire ad me, nisi Pater qui misit me traxerit eum*, aliquando sic effert prout habetur in Evangelio; aliquando istis verbis, *Nemo venit ad me*.

Et quoniam his temporibus bene multi gravissimas fidei questiones philosophicis tricis expendi volunt; admonendi sunt qui negant rectè dici, *Sine gratia efficaci nihil boni fieri posse*, cum rectè dici fateantur, nunquam contingere ut sine eâ quidquam boni fiat; ut meminerint has quatuor propositiones, quas

vulgò modales appellant, apud Logicos æquivalentes esse: Non contingit hominem sine luce videre: Non est possibile hominem sine luce videre: Impossibile est hominem sine luce videre: Necessè est hominem sine luce non videre; ad quarum exemplum illæ quatuor formari possunt: Non contingit justum sine gratia efficaci tentatione superare: Non est possibile justum sine gratia efficaci tentationem superare: Impossibile est justum sine gratia efficaci tentationem superare: Necessè est justum sine gratia efficaci tentationem non superare. Quam ultimam propositionem omnium durissimam disertè Innocentius I. expressit Epistolâ ad Concil. Carth. *Necessè est, inquit, ut quo auxiliante vincimus, eo interum non adjuvante vincamur*. Quibus tamen locutionibus non negatur virtus in causâ; sed illud tantum significatur, gratiam efficacem esse principium necessario prærequisitum ad omnem bonam voluntatem & opus bonum; ita ut sine illâ hominem bene velle & bene agere repugnet.

## ARTICULUS IX.

*Affertur necessarij definitio ex S. Thomâ, & demonstratur ex illâ, sine gratia efficaci nihil fieri posse: quam demonstrationem non convelli responsione clarissimi Theologi, quamvis subtilissimâ, declaratur.*

**E**Andem adiutoriorum divisionem, quam, ut suprà vidimus, affert Augustinus lib. De gētis Pelagii, in illud *Sine quo*

*id ad quod adiuvat fieri non potest, & illud sine quo fieri potest*, variis etiam locis attulit S. Thomas, sed aliis verbis expressam.

Quod enim Augustinus appellat adiutorium *sine quo res fieri non potest*, illud S. Thomas *necessarium simpliciter* nominat; quod verò Augustinus adiutorium *sine quo fieri potest id ad quod adjuvat*, id S. Thomas *necessarium non simpliciter, sed tantum secundum quid*. Dicendum, inquit 3. p. q. 65. a. 4. quòd *necessarium respectu finis de quo num. loquimur, dicitur aliquid dupliciter: uno modo, sine quo non potest haberi finis, vel ut antè dixerat q. 1. a. 2. Sine quo aliquid esse non potest, sicut cibus est necessarius vite humane: Et hoc est simpliciter necessarium ad finem. Alio modo dicitur necessarium, id sine quo non habetur finis ita convenienter; sicut equus est necessarius ad iter: hoc autem non est simpliciter necessarium ad finem; quia, ut inquit 1. parte qu. 15. a. 3. sine equo possumus ire. Unde ejusmodi adiutoria, quæ non sunt simpliciter necessaria, inter ea reponit *Sine quibus finis esse potest*.*

Cùm ergo necessarium simpliciter ubique à Sancto Thomà definiatur, id *sine quo aliquid esse non potest*, vel finis haberi non potest; manifestum est vocem *posse* non sumi apud illum pro solâ virtute internâ, sed eo quo diximus sensu, nimirum pro complexione omnium causarum & conditionum quæ ad confectiorem rei requiruntur: alioquin & vitiosa esset definitio, quia non omnia quæ necessaria sunt ad finem, comprehenderet, cùm pleraque ad virtutem agendi non pertineant: & alienissima essent

exempla, cùm tibi ad vivendi potentiam internam non pertineant, & tamen in exemplum afferantur à Sancto Thomà eorum quæ sunt necessaria simpliciter, & sine quibus res esse non potest. Hinc colligitur nullam Geometriæ demonstrationem illâ vel clariorem vel certiorē esse, quæ ex hac necessarij definitione conficitur, quam nullus Thomista negaverit, utpote toties à Sancto Thomà traditam, & omnium hominum mentibus à naturâ inditam.

*Sine eo quod necessarium est, res esse non potest, ex definitione necessarij. Sed gratia efficax est necessaria ad omnem voluntatem bonam, ad omne opus pium, ad omnem tentationem superandam, ex omnium Thomistarum, imò totius Traditionis consensu. Ergo sine gratiâ efficaci non potest esse bona voluntas, non potest esse opus pium, non potest tentatio superari.*

Patietur credo, imò boni confulet Vir Clarissimus, cujus gratiâ hæc nobis Dissertatio suscipitur, ut breviter ostendam hæcenus mentem meam ipsi minùs innotuisse. Renuntiatum est enim mihi demonstrationem propositionis meæ, geometricâ methodo compositam, sic illum accepisse, quasi hic esset argumentationis contextus: *Gratia efficax necessaria est ex parte principis ad faciendum opus: sed necessarium ex parte principis pertinet ad posse: ergo gratia efficax pertinet ad posse*. Quod argumentum ita ille enucleatè distinguit,

*Distin-*

*Distinctio majoris. Gratia efficax est necessaria ad hoc ut adsit potentia, nego: ad hoc ut adsit volentia, concedo. Distinctio minoris: Necessarium ex parte principii pertinet ad posse, si sit necessarium ut adsit potentia, concedo; si ut adsit volentia, nego. Ergo gratia efficax pertinet ad posse. Negatur consequentia.*

Si sic argumentum in illâ demonstratione contextum esset, nihil certè subtilius responderi potuit; sed illius planè aliam mens, alius scopus. Non enim probandum id suscipit, gratiam efficacem ad posse pertinere, sed

illud tantùm rectè dici, *sine gratiâ efficaci nihil nos boni velle posse.* Ad hoc autem planè sufficit gratiam efficacem esse necessariam *ut adsit volentia*, quod Theologus ille concedit, etiamsi necessaria non sit *ut adsit potentia.* Hinc enim istud argumentum confici potest, quod viri doctissimi responsione nullatenus infirmatur. Id necessarium est ad aliquid, ex S. Thomâ, sine quod illud esse non potest. Sed gratia efficax necessaria est *ad volentiam*, ut fatetur ipse. Ergo sine gratiâ efficaci *volentia* esse non potest.

## A R T I C U L U S X.

*Colliguntur in summam quæ hac secunda parte confecta sunt, & suppositâ gratiæ efficacis necessitate reliquas de propositione meâ contentiones planè absurdas & ridiculas esse ostenditur.*

**U**T ergo hîc illa omnia, quæ totâ hâc secundâ parte confecimus, in summam collecta repræsentem, vidimus primò omnes gratiæ efficacis assertores in eo convenire, quòd gratiam efficacem ad omnem bonæ voluntatis motum necessariam statuunt, & repugnare fateantur ut quis à Deo motus non sit, & tamen bene velit aut bene agat.

Vidimus secundò, eos ipsos Thomistas qui gratiam aliam ab efficaci dari posse cōtendunt, efficacem verò dare tantùm velle & agere, fateri tamen esse aliam quam vocis *posse* significationem, secundum quam ante auxilium efficax non habeatur *posse*, cūm

scilicet sumitur vox illa pro complexione eorum omnium, quæ ad re ipsâ agendum requiruntur, & præter quæ nullum aliud adiutorium ad agendum necessarium est.

Vidimus tertio, secundum potestatem illam significationem vocis *posse* rectissime dici, *Sine gratiâ efficaci nihil nos posse:* quia; cūm gratia efficax sit necessaria ad rectè agendum, manifestum est sine illâ non haberi illud *posse* quod complectitur omnia ad agendum necessaria.

Vidimus quartò, hanc propositionem, *Sine gratiâ efficaci nihil fieri potest*, nullatenus adversari Thomistarum sententiæ, qui  
ajunt



aiunt per aliam gratiam quàm efficacem bonum fieri posse, quia vox posse sumitur in priore pro complexione omnium necessariorum ad agendum; in posteriore verò, pro solâ virtute internâ. At nihil repugnat, ut aliquis habeat virtutem agendi, eâque ratione dicatur *posse agere*, ut cùm visu præditus dicitur posse videre, & tamen non habeat omnia ad agendum necessaria, eâque ratione dicatur *non posse agere*, ut cùm quis visu præditus, sed in tenebris constitutus, dicitur non posse videre.

Vidimus quintò, rationi & communi omnium sermoni longè congruentius esse, ut cui deest aliquid ad agendum necessarium, quamvis aliàs habeat agendipotentiam, dicatur *non posse agere*, propter defectum illius rei necessariæ, quàm ut dicatur *posse* propter solam agendi potentiam.

Vidimus sextò, id ipsum Patrum sermone longè magis frequentatum. Cujus rei etsi alia nulla argumenta protulissem, id unum tamen satis esse potuisset, quòd illâ locutione, Sine gratiâ quâ facit Deus ut velimus, quâ præparatur voluntas à Domino, & per quam Deus operatur in nobis velle, hoc est, sine gratiâ efficaci, bonum fieri non posse, sexcenties utantur antiqui Patres. Gratissimum verò mihi fecerit, qui mihi in illorum scriptis ostenderit hanc locutionem, quam tamen falsi non arguo, imò eo quo diximus sensu veram esse concedo, Sine gratiâ quæ dat

velle & operari bene velle aut bene agere possumus. Fateor quidem sæpe à Patribus dici, posse justos, imò & omnes homines, mandata servare si velint; de quorum verborum sensu alibi agemus; sed illud in eorum scriptis non reperi, posse homines vel etiam justos mandata servare, etiamsi non præparetur voluntas à Domino, etiamsi Deus non faciat ut in præceptis suis ambulent.

Vidimus septimò, ex sancto Augustino idem planè esse adiutorum sine quo aliquid non fit, & sine quo id ad quod adjuvat effici non potest; & ex S. Thomâ, idem esse quod necessarium est ad aliquid, & sine quo aliquid esse non potest.

Ex quibus omnibus manifestò sequitur, qui unus nostræ disputationis scopus est, ad illius propositionis, *Sine gratiâ efficaci nihil boni possumus*, veritatem tuendam, superfluum esse curiosè vestigare, utrùm gratia efficax det posse Thomistico sensu, an solùm velle & agere; actum primum, an secundum: an supponat potentiam completam, an tantùm incompletam. Quidquid enim de his quæstionibus Theologi sentiant, hoc ipso quo gratia efficax necessaria statuitur ad velle & ad agere, sequitur rectè dici, voluntatem illam & actionem ad quas necessaria statuitur, sine eâ esse non posse: quibus tamen verbis non illud *posse* negatur, quod vulgò Thomistæ intelligere solent, ad solam internam



nam agendi potentiam pertinens, sed illud tantum quod ceteri vulgè homines intelligunt, quod complectitur omnia ad volendum & ad agendum necessaria.

Quare si vel vulgarem omnium passim hominum, vel Ecclesiasticum & à Patribus usurpatum loquendi modum attendas, non diversam sed eandem planè notionem in omnium mentibus habere comperies tres illas propositiones: *Iustus aliquando deest gratia efficax necessaria ad vincendam tentationem: Iustus adiquando deest gratia sine quâ tentatio nunquam vincitur: Iustus aliquando deest gratia sine quâ vinci non potest tentatio*; adeoque qui duas ex illis catholicas fateantur, tertiam hæreticam pronuncient, non minus absurdè se gerant, quàm si eandem sententiam gallicè & latinè catholicam, græcè hæreticam dicerent. Illarum enim in auribus nostris diversus sonus, in animis eadem penitus notio, idem sensus, qui certè simul & hæreticus & catholicus esse non potest.

Denique illud ex omnibus istis exstat & eminet, ingens illud crimen in quod omnes Ecclesiæ sc-

culique potestates armare student Molinistæ, in quod in concionibus suis ubique debacchantur, propter quod extruduntur ex familiis suis viri de Ecclesia bene meriti, ad quod cavendum veræ in Ecclesiam hæreses invenhuntur, antiqua gratiæ efficacis fides destruitur, tota Patrum doctrina repudiatur, hæreticorum ludibrio catholica Ecclesia obicitur; propter quod omnis severioris vitæ institutio, antiquitatis amor, sæculi fuga, secessus consecratio, penitentiae studium, eleemosynarum largitio, in hæreseos suspicionem vocantur; illud, inquam, crimen tam detestandum, illam hæresim, illam blasphemiam, illam impietatem, illam labem, illam pestem diris omnibus anathematis dignissimam, ad hoc demùm caput referri, quod nonnulli sunt qui affirmare non verentur bono sensu dici, hominem visu præditum sine lumine videre non posse: quâ contentione tam absurdâ tamque ridiculâ concussam esse Ecclesiæ pacem boni gemunt, hæretici rident, posterius indignabuntur.

# DISSERTATIONIS

## TERTIA PARS.

In quâ incidentes quæstiones, & à propositionis veritate disjunctæ breviter explicantur.

### ARTICULUS I.

*Prima quæstio : Utrûm gratia efficax det actum primum, an secundum; posse, an tantum velle & agere. Explanatur quæstio & dividitur.*

**H**ACTENUS plus aliquantò præstitimus, quàm jure à nobis potuit postulari. Non enim modò propositionis nostræ veritatem totius Traditionis consensione munivimus; sed præterea, ne quis præcipuos Scholæ Doctores infestos nobis esse, falsò licet, sibi tamen persuaderet, etiam cum ipsis nullum nobis certamen esse docuimus. Reliquum est ut de ipsis controversiis scholasticis quid sentiam, quàm maximâ potero & fide & brevitate demonstrem. Minus necessarium illud quidèmm adversùs inimicos; adversùs veritatis amantes Theologos, qui nonnullas attigerunt in scriptis ad me missis, officiosum & pium. Ut planius tota res perspiciatur, dubia à non dubiis, certa ab incertis discernenda sunt.

Primum quidèmm fatentur omnes gratiæ efficacis assertores (nam Molinianos in hæc tota

controversia nihil moror) per gratiam efficacem dari nobis & velle & facere. Certum est, inquit Aug. De gr. & lib. arb. c. 16. nos velle cum volumus, sed ille facit ut velimus bonum, de quo dictum est: Preparatur voluntas à Domino; de quo dictum est: A Domino gressus hominis diriguntur, & viam ejus vult; de quo dictum est: Deus est qui operatur in vobis & velle. Certum est nos facere cum facimus, sed ille facit ut faciamus prelando vires efficacissimas voluntati, qui dixit: Faciam ut in justificationibus meis ambuletis, & judicia mea observetis & faciat.

Cum ergo quæritur utrûm gratia efficax det posse, an solum velle & agere, non ambigitur utrûm det velle & agere: neque utrûm sit necessaria ad utrumque; hæc enim constant; sed utrûm det aliquod posse antecedenter ad ipsum velle & agere, quod se habeat tanquàm actus pri-  
mus

mus ad secundum.

Notandum porrò quæstionem illam, utrum gratia efficax det actum primum, sive *posse*, intelligi vel respectu voluntatis ipsius seu volitionis, vel respectu ipsius actionis, hoc est, bonorum operum, & observationis

mandatorum; quæ duo diversa esse patebit ex iis quæ dicentur. Prius igitur dispendendum, utrum gratia efficax det *posse* respectu ipsius bonæ voluntatis (seu volitionis) ab ipsâ voluntate distinctum tanquàm actum primum à secundo.

## ARTICULUS II.

*Gratiam efficacem, quatenus est principium bonæ voluntatis, ab aliis in misericordia Dei & formâ inherente constitui, ab aliis in solâ misericordia Dei, quæ interius motum mentis operatur.*

**I**N hæc quæstione solvendâ non unum, ut quidam putant, sed duplicem video esse Theologorum sensum. Quidam gratiam efficacem ad actum primum pertinere sentiunt, & sine eâ non haberi actum primum omnino completum: deesse enim saltem complementum actus primi. In hac sententiâ est Zumel, to. 3. ad 1. 2. disp. 4. sect. 1. & multi à Ledesma citari, tr. de Aux. q. unicâ, a. 3. Alii autem, ut Ledesma ipse, gratiam efficacem nullo modo ad actum primum, sed tantum ad actum secundum, pertinere volunt: quæ videtur esse sententia clarissimi Theologi, cujus scriptum ad me perlatum est. Harum sententiarum utra sit probabilior, judicari non posse existimo, nisi prius expendatur quâ ratione secundum varias Theologorum opiniones Deus in homine efficaciter bonam voluntatem operetur.

Certum est quidem apud omnes Thomistas, divinæ illius ope-

rationis efficaciam ex præscientiâ conditionatâ eventus futuri minimè pendere, ut nuper Molina commentus est, sed ex illius nutu qui magis habet in potestate suâ voluntates hominum, quàm ipse facit.

Certum est præterea voluntatem divinam ita operari in homine bonum ipsum voluntatis motum, ut tamen ipsa voluntas humana etiam operetur, & quidem liberè; quia, ut ait S. Thomas in Opus. 2. c. 140. ad efficaciam divinæ voluntatis pertinet, ut non solum fiat quod Deus vult, sed ut hoc modo fiat quo illud fieri vult; ac proinde ut infallibiliter & tamen liberè fiat, quod ab homine liberè fieri vult.

Verum in hoc inter se discrepant, quod nonnulli præcipuè ex recentioribus Thomistis, præter voluntatem divinam, quæ liberam voluntatem ipsâ etiam in iustis habituali gratiâ instructam ad opus applicat, requiri volunt vel qualitatem quandam trans-

transcuntem, vel saltem motionem quandam virtuosam, quæ sit instrumentum Dei ad producendum in libero arbitrio pium voluntatis motum. Alii autem mediam illam vel qualitatem vel motionem virtuosam omnino repudiant, & ipsam gratiam efficacem, pro-ut est principium bonæ voluntatis, nihil aliud esse volunt, quàm gratuitum Dei favorem, misericordiam, & ipsam divinam operationem (illa autem non est aliud re-ipsâ quàm Deus operans) quæ simul cum libero arbitrio, prius tamen ordine causalitatis quàm liberum arbitrium, bonam voluntatem in nobis producit.

Hanc sententiam, præter alios è veteribus scholasticis, apertissimè docuit Thomas Bradwardinus, qui speciale illud auxilium quo præter gratiam habitualement justis indigent, nihil aliud esse vult, quàm voluntatem Dei semper invitam. Inger recentiores verò docti illam & explicat & confirmat eruditissimus Estius. Et propterea in 2. sent. dist. 26. §. 1. Gratiam intelligi posse, ait, vel ex parte Dei, vel ex parte nostrâ: ex parte Dei, significare gratuitum Dei favorem, misericordiam, liberalitatem, & omnino quamcunque gratuitam & beneficam Dei operationem. Quod postquàm multis Scripturæ testimoniis ostendit, adjungit: Loquitur ad hunc modum de gratiâ Augustinus, ep. 106. ad Paulinum, & alibi cum dicit gratiam præcedere voluntatem hominis, quia nimirum prior est Dei vo-

luntas quâ homini bene vult, quàm voluntas hominis accipiens Dei beneficium, juxta illud Psal. Misericordia Dei præveniet me. Consimili sensu dicit, libro de grat. & lib. arb. c. 6. Gratiam se interdum subtrahere; quia videlicet Deus suam gratuitam operationem interdum subtrahit. Sic in Conc. Araus. c. 3. dicitur, gratiam Dei facere ut Deus invocetur à nobis, id est, Deum gratiâ in nobis operari hoc bonum, ut eum invocemus. Et alia quàm plurima secundum hanc acceptionem de gratiâ dicuntur. Gratia igitur hoc modo accepta, re-ipsâ non est aliquid à Deo, divinæque essentia diversum. Est autem hac acceptio gratia frequens etiam apud scholasticos, ut quoties dicunt gratiam Dei hæc aut illa bona in nobis operari. De ea S. Thom. de verit. q. 24. a. 14. dicit: Quamvis communiter loquentes utuntur nomine gratia pro dono habituali justificante, generalius tamen gratiam intelligi posse misericordiam Dei, per quam interior motus mentis operatur & exteriora ordinat ad hominû salutem: & sic nullum bonum facere posse hominem sine gratiâ Dei. De eadem sic scribit 3. p. q. 86. a. 2. Gratia Dei causat bonitatem in homine grato, eò quòd bona voluntas Dei, qua nomine gratia intelligitur, est causa omnis boni creati: Hactenus Estius.

Idem Duacensis Facultatis Cancellarius, cum gratiam habitualement ab habitu charitatis minimè distinguendam esse docuisset, sic ejusdem dist. §. 5. solvit argumentum ex illo Augustini loco repeti-

reperitum, Gratia praevenit charitatem. Gratia, inquit, quae secundum Augustinum, praevenit charitatem, non est gratia habitualis, sed ea quae secundum eundem praevenit omnia nostra bona opera, id est, benevolentia Dei, quae non est aliud quam ipse Deus, quatenus haec omnia nobis gratuito largitur. Hoc igitur modo etiam verè dicere possumus, quòd gratia praevenit gratiam, id est, benevolentia Dei gratiam nobis inherentem, scilicet ut causa suum effectum. Et eodem sensu charitas praevenit charitatem; nimirum charitas quae Deus diligit nos, charitatem quae nos eum vicissim diligimus.

Denique §. 19. celeberrimam illam Conciliorum sententiam, gratiam ad singulos actus dari, primum quidem non de gratia habituali, sed de gratia actuali intelligendam esse docet. Deinde verò non de creatà, sed de increatà. Respondeo, inquit, in hac sententià, Gratia ad singulos actus datur, gratiam intelligi increatam, id est, divinam operationem (quae non est aliud re ipsa quam Deus operans) gratuito producentem in nobis effectus salutare. Datur autem hac gratia ad singulos actus, quomodo Scriptura saepe numero dicit, Spiritum sanctum, qui utique Deus est, dari hominibus ad hac aut illa opera, dum scilicet ea in illis operatur; & quomodo dictum est: Mittere auxilium de sancto; & Misi Deus misericordiam suam; cum tamen auxi-

lium illud & misericordia, non sint aliud secundum rem, quam Deus ipse. Sensus igitur sententiae clarus & facilis hic est: Deus gratuito per Christum in nobis operatur singulos actus bonos ad pietatem pertinentes.

Eandem sententiam aliquot ab hinc annis propugnavit in Gallia in ipsa Jesuitarum scholà Tiphanius scientiae medicae impugnator, & efficaciae Dei operationis propugnator acerrimus. Multis ille in lib. de Ordine contendit, Deum efficaciter praedeterminare voluntatem, sed sine ulla op. ullius forma inherentis, vel qualitatis realis, sive physica, sive intentionalis ipsi voluntati à Deo impressae: idque sensisse S. Thomam ultimo capite ejus libri probat. Harum sententiarum utra sit verior, nihil hic definitio: duo tantum dico; primum quidem illam quae qualitates vel motiones virtuosas rejicit, Molinistis displicere non posse, cum ipsi vulgò sentiant gratiam actualem non esse qualitatem fluentem (Le- scotii Carnotensis Episcopi verba sunt tr. de gr. qu. 2. art. 9. sed ipsamet mentis nostra actiones, prout à Deo pendentes: deinde qui ex duabus illis sententiis hanc vel illam amplectuntur, si consequenter philosophari velint, non idem de proposita questione, utrum gratia efficax pertineat ad actum primum vel secundum, sentire debere, ut distinctis articulis explicabimus.

## ARTICULUS III.

*Qui gratiam efficacem formam inharèntem esse volunt, quæ sit principium bonæ voluntatis, consequenter dicere debere, Gratiâ efficaci non dari tantum actum secundum, sed etiam primum; sive, quod idem est, complementum actus primi.*

**N**ON hîc attendo quid quisque dicat, sed quid cuique dicendum sit, si constanter loqui & sentire voluerit. Non sum enim nescius, inter illos Theologos qui gratiam efficacem esse formam inharèntem volunt, sive qualitatem illam appellent, sive motionem virtuosam, non unum esse de propositâ questione iudicium. Verùm hâc in parte immeritò dissentire videntur, etsi verbis potius quàm re dissentiant. Hoc ipso enim quo statuunt, gratiam efficacem esse formam inharèntem, ab ipso voluntatis motu quem producit distinctam, hoc ipso concedunt illam ad actum primum pertinere. Nullam enim aliam actus primi notionem habemus, quam ut sit forma aliqua inharèns quæ sit principium actus secundi. Ex quo patet eos, qui gratiam efficacem in forma inharènte vel motione virtuosa constituunt, quæ sit principium actuum voluntatis, & tamen ipsam ad actum primum pertinere negant, idem reverà

& affirmare & negare; quia esse actum primum nihil aliud esse videtur, quàm esse principium actus secundi; aut certè, si sibi non repugnant, aliam notionem habere actus primi ab obviâ & vulgari longè diversam: quâ explicatâ patebit eos aliter quàm cæteros loqui, non aliter sentire.

Itaque omnes illi Thomistæ cum Zumel dicere deberent, gratiam efficacem ad actum primum pertinere, & sine eâ non haberi actum primum completum & adæquatum. Quod idem aliis verbis agnoscunt Alvares & Navarreta, dum aiunt, sine gratiâ efficaci haberi quidem actum primum, non autem complementum; quod idem est ac si dicerent, sine illâ actum primum non esse completum. Unde idem Alvares, de Auxiliis Disp. 18. sæpius agnoscit, *causas omnes tam naturales quàm liberas per efficacem Dei motionem in suâ operativâ virtute COM-  
PLERI.*

## ARTICULUS IV.

*Gratiam efficacem non pertinere ad actum primum, sed ad secundum, in eorum sententia, qui illam, quatenus est principium bonæ voluntatis, in misericordia Dei, non in forma inbærente constituunt.*

**A**T verò qui supra explicatam Braduardini, Estii, Tiphani, aliorumque multorum, sententiam sequuntur, à quâ me non alienum esse fateor; & qui cum eodem Estio in lib. 2. Tent. dist. 28. §. 1. gratiam efficacem constituunt in gratuità & benignâ Dei operatione, quâ propriè in libero hominis arbitrio operatur ipsam conversionem, seu alium quemcunque actum veræ pietatis, scilicet ipsum voluntatis motum efficienter attingendo, hoc est, voluntatem ipsam applicando & determinando ad volendum & eligendum, ita ut fieri non possit quin gratia ista habeat suum effectum; quoniam fieri nequit ut Deus voluntatem determinet, & non ipsa voluntas determinetur, agatque id ad quod tanquam secundæ causæ applicatur à Deo: qui, inquam, ita sentiunt, consequenter loquuntur, cum gratiam efficacem non ad actum primum, sed ad secundum; non ad posse, sed ad velle, necessariam statuunt. Non enim potest pertinere ad actum primum, cum operatio divina non aliquam formam transeuntem imprimat in voluntate, sed immediatè ipsum actum secundum simul cum voluntate, vel solâ, vel etiam habitualibus donis instructâ, producat.

Quamvis autem rectè & suis principiis congruenter illi Theologi gratiam efficacem ad solum actum secundum pertinere existiment, atque ita non dare posse, sed velle; rectè nihilominus iidem cum Patribus agnoscunt, sine gratiâ efficaci nihil nos posse. Sic Estius eâdem distinctione §. 19. Sine divinâ operatione seu cooperatione (quibus verbis efficacem gratiam semper intelligit) nullum actum veræ pietatis à nobis exerceri posse, quasi certissimum statuit.

Sic etiam (quod in priori parte jam attulimus) negat justum in bono perseverare posse sine speciali Dei auxilio, hoc est, ut ipse explicat, sine gratuitâ Dei operatione, quâ fuit ut homo in bonâ & justâ conversatione permaneat.

Sic denique idem Estius, qui gratiam efficacem ad velle non ad posse requirit, negat tamen eâdem dist. §. 21. sine eâ in cuiusquam esse potestate ne in peccatum prolabor; quod eorum exemplo probat qui reverà labuntur. Quoties enim aliquos, qui magnâ cum alacritate & facilitate currunt viam mandatorum Dei, contingit ex illo sanctitatis gradu prolabi in aliquod grande peccatum, suis ipsâ re manifestum fit, non



fuisse in illorum potestate ut absque continuo Dei auxilio & cooperatione in bonorum operum exercitio permanerent. Quod postquam Davidis exemplo comprobasset, adjungit: Unde ipse in Ps. 118. ita loquitur, *Viam mandatorum tuorum cucurri cum dilatasti cor meum.* Et iterum: *Deduc me in semitam mandatorum tuorum;* quasi dicat: *Nisi te deducente & continuo dilatante cor meum, per semitam mandatorum tuorum incedere, & currere NON POSSUM.*

In quo Estius accuratè S. Augustini vestigia persecutus est. Cum enim Pelagius tria distinxisset, *posse, velle, agere;* & gratiæ adiutorium ad *posse* tantum requireret: duo simul adversus illum statuit Augustinus, quæ pugnare inter se videntur, neque tamen ullo modo pugnant, ut in secunda parte ostendimus: primum quidem, gratiam Christi non dare nobis possibilitatem ab effectu sejunctam, per quam *posse* dicamur, etiam si nec velimus, nec agamus: alterum est, sine illâ gratiâ, quâ Deus facit ut bonum velimus & faciamus, adeoque sine efficaci, de quâ solum hoc libro agit, nihil omninò boni, quod ad pietatem pertinet veramque justitiam, quemquam aut facere aut omninò velle posse. Quod ad primum enim pertinet: *Quomodo,* inquit, de grat. Chr. c. 25. quod possumus bene agere, Dei est; quod autem agimus, nostrum est? cum dicat Apostolus, orare se ad Deum pro iis ad quos scribebat, ne quid mali faciant, & ut quod

bonum est faciant. Non enim ait, *Oramus ut possitis nihil mali facere, sed, Ne quid faciatis mali; nec, Ut possitis bonum facere, sed, Ut bonum faciatis.* Et quomodo dicit Pelagius: Quod bene loquimur nostrum est? cum dicat Dominus: Spiritus Patris vestri est qui vobis dat vel dedit posse bene loqui, sed ait, *Qui loquitur in vobis:* non significans possibilitatis profectum, sed exprimens cooperationis effectum. Hoc loco & multis aliis confirmat Augustinus, gratiam Christi non dare posse à voluntate distinctum, sed ipsum velle & facere largiri. Et tamen id non impedit quin capite sequenti, ut innumeris aliis locis, disertè tradat, illam eandem Dei gratiam sic esse confitentem ab eo qui vult veraciter confiteri, ut omninò NIHIL BONI sine illâ, quod ad pietatem pertinet veramque justitiam, FIERI POSSE non dubitet.

Nec modò docet sine gratia efficaci hominem bonum facere non posse, sed etiam velle non posse. Ita enim lib. 4. contra Jul. c. 8. *Omnes qui salvi fiunt & in agnitionem veniunt veritatis, eo volente salvi fiunt, eo volente veniunt. Qui enim jam utuntur voluntatis arbitrio, nisi eo volente & subveniente VELLE NON POSSUNT.* Ubi si dixeris mihi: Cur ergo non convertit omnium nolentium voluntates? Respondebo, Cur non omnes morituros adoptat lavacro regenerationis infantes? Si hoc profundius esse perspicis, quàm ut abs te valeat inveniri; utrumque utrique no-

stram



*Itum profundum sit, cur & in majoribus & in minoribus Deus velit alteri, & nolit alteri subvenire.*

Et Ep. 143. *Proprium arbitrium nisi Dei gratiâ juvetur, NEC IPSA BONA VOLUNTAS ESSE IN HOMINE POTEST: Deus est enim qui operatur in nobis & velle & operari pro bonâ voluntate. Et in ult. op. contra Jul. c. 97. CUM displicet tibi hominem non posse bonum velle, nisi adiuvetur ab eo qui malum non potest velle, nonne respicis ei te contradicere qui dixit: Sine me NIHIL POTESTIS FACERE; & Scripturæ ubi legitur: Paratur voluntas à*

*Domino; & ubi legitur: Deus est qui operatur in vobis & velle. Ubi videmus ab Augustino non aliud gratiæ efficaci tribui, quàm ut det velle. Sed quia ad hoc necessaria est, rectè concludit, nos sine ea velle non posse. Quod brevius etiam exprimit Fulg. de Inc. & gr. c. 21. Deus, qui voluntatem præparat, ipse donat; quam si Deus per gratiam suam homini non dederit, NUNQUAM POTEST homo in Deum VELLE credere; quia ipsam voluntatem gratia non invenit, sed operatur in homine.*

## ARTICULUS V.

*Gratiam efficacem respectu bonorum operum dare posse, etsi non ab ipso velle distinctum.*

**H**Actenus de efficaci gratiâ cum ipsâ bonâ voluntate comparatâ: ubi ostendimus probabilius esse, efficacem gratiam non dare possibilitatem ab ipsâ bonâ voluntate separatam, quæ illius principium sit; idèoque ad actum secundum potiùs pertinere quàm ad primum; sed tamen hoc ipso quo necessaria est, rectè dici hominem sine eâ velle non posse. Nunc de eadem gratiâ efficaci agendum est cum bonis operibus ac victoriâ tentationum collatâ, de quâ tunc aliter paulò sentiendum viderur. Non enim solùm velle dat, sed etiam posse, non quidem ab ipsâ voluntate, sed à bonis operibus aliquo modo distinctum; quia ipsa bona voluntas, quam efficax gratia dat,

est potentia respectu bonorum operum, cum ab illâ velut à radice procedant. Sic Aug. de gr. Christi, c. 18. cum duas arbores bonam & malam, de quibus in Evangelio loquitur Christus, duas voluntates esse dixisset; bonam, quæ charitas est; malam, quæ cupiditas. *Fructus autem, inquit, harum radicum atque arborum, facti sunt, dicti sunt, cogitata sunt, quæ bona de bonâ voluntate procedunt, & mala de malâ.*

Hujus rei ratio ex illâ Moralis disciplinæ certissima regula petenda est, intentionem finis causam esse electionis mediorum. Bona autem voluntas, quæ nihil aliud est quàm charitas, ut sæpe ait Augustinus, est amor finis, & quidem ultimi; ex quo amore

deinde nascitur quidquid ad consequendum ultimum finem ab homine suscipitur. Unde sæpe dicit Augustinus, *nullum esse fructum bonum qui de charitatis radice non surgat*; & tum solum victu vitia deputari debere, cum Dei amore vivuntur.

Ex hac doctrina apud Augustinum certissima, manifestum est bonam voluntatem, id est, charitatem, dilectionem, amorem Dei, & quidem actualem, fontem, principium, radicem esse bonorum operum, & proinde ad illa faciendâ potestatem esse. Vera autem Christi gratia ex ipso Augustino l. 4. ad Bonif. c. 5. nihil aliud est, quàm *inspiratio dilectionis, ut cognita sancto amore faciamus*. Unde lib. de gr. Chr. c. 35. gratiam de qua cum Pelagio disputat, his verbis describit: *Adjutorium bene agendi ad junctum nature atque doctrina, per inspirationem flagrantissima ac luminosissima charitatis*. Ex quo colligitur, gratiam efficacem dare potentiam ad bona opera faciendâ & tentationes vincendas, in quantum dat bonam voluntatem & amorem. Et propterea idem Aug. op. ult. in Jul. l. 1. n. 131. *Gratia prævenit hominem, ut diligat Deum, quâ dilectione operetur bona*. Et in Exposit. quarundam propos. ad Rom. *Nisi Deus det dilectionem, nemo potest esse misericors*.

Sed quemadmodum omnis ignis urendi virtutem & potestatem habet, non tamen quidvis urendi, verbi gratia, auri lique-

faciendi, vel lapidis in calcem redigendi, ita ut si de igne generatum quærat, an possit urere, absolutè respondendum sit posse; sed si quærat utrum exiguus ignis possit lapidem in calcem redigere, vulgò non posse respondebunt: sic omnis charitas vel exigua, potestas est bonorum operum; & si quærat, utrum qui bonam voluntatem habet, possit bene agere, posse procul dubio respondendum est. Non tamen omnis bona voluntas ad quidvis efficiendum ita sufficit, ut non aliquando plenior voluntatem requirat; quia ut egregiè Aug. l. 2. de pecc. mer. & rem. c. 5. *Ad nonnulla superanda vel quæ male cupiuntur, vel quæ male merentur, magnis aliquando & totis viribus opus est voluntatis*. Et Ser. 3. de verb. Apostoli c. 10. *Volo, inquit, ut velis; sed non sufficit ut velis; adjuvandus es, ut plenè velis, & impleas quod velis*. Et in Ep. 143. ad Julianum, de eo qui continentiam à Deo poscit, quam nemo potest habere nisi Deus det, ita loquitur: *Utique tantas voluntatis vires, tantum dilectionis ardorem volebat accipere spiritu sapientiæ, qui sufficeret ad implendam magnitudinem continentie*.

Igitur qui bonam voluntatem habet, sed imperfectam & invalidam, certorum bonorum operum potestatem illam nondum habere dicitur, cui nihil deest ad re-ipsa agendum; quia non nisi per voluntatem magnam atque perfectam actu impleri possunt.

Nihil

Nihil hac doctrina in Augustino frequentius. Sed nusquam illustrius ab eo explicatur, quam lib. de gr. & lib. arb. c. 15. & sequentibus: *Gratia Dei*, inquit, *semper est bona*; & per hanc fit ut fit homo *bona voluntatis*, qui prius fuit *voluntatis malæ*. Per hanc etiam fit, ut ipsa *bona voluntas*, quæ jam esse cœpit, augeatur, & tam magna fiat ut POSSIT implere divina mandata quæ voluerit, cum valde perfectæque voluerit. Ad hoc enim valet quod scriptum est: Si volueris, conservabis mandata; ut homo qui voluerit, & NON POTUERIT, nondum se plenè velle cognoscat, & oret ut habeat tantam voluntatem, quanta sufficit ad implenda mandata; sic quippe adiuvatur ut faciat quod jubetur. Et ibid. c. 17. Qui ergo vult facere Dei mandatum & NON POTEST, jam quidem ha-

bet voluntatem bonam, sed adhuc parvam & invalidam: POTERIT autem cum magnam habuerit & robustam. Quando enim Martyres magna illa mandata fecerunt, magnâ utique voluntate, hoc est, magnâ charitate fecerunt. Ipsam Charitatem (hoc est, magnam voluntatem, sive ut infra ait, divino amore ardentissimam voluntatem) Apostolus Petrus nondum habuit, quando timore Dominum ter negavit; & tamen quamvis parva & imperfecta non deerat, quando dicebat Domino: Animam meam pro te ponam; putabat enim se POSSÊ quod se velle sentiebat.

In eandem sententiam dicie lib. 1. Retr. c. 22. Cum fortis & potens preparatur voluntas à Domino, facile fit opus pietatis, etiam quod difficile atque impossibile fuit.

## ARTICULUS VI.

*Superioris Doctrinæ quedam maximi momenti consellaria.*

EX superius expositâ doctrinâ ista consequuntur.

1. Bonam voluntatem esse potestatem respectu bonorum operum, cum sit illorum principium & radix. 2. Non omnem bonam voluntatem, sed tantum magnam & robustam, esse potestatem sufficientem, quæ nullam aliam desideret respectu cuiusvis boni operis, verbi gratiâ, ardui & difficilis.

3. Ei cui deest magna charitas & magna voluntas, deesse potestatem illam integram & om-

nia necessaria complectentem, quâ magna & ardua opera actu impleri possunt. 4. Petro nominatim defuisse potestatem illam vincendæ tentationis, quia defuit magna charitas & magna voluntas, sine quâ non poterat quod se velle sentiebat, ut ait Augustinus.

5. Duplici nomine verè dici, justos quibus gratia efficax deest mandata servare non posse: primò, quia sine gratia efficaci, quæ necessaria est ad bene volendum, ex communi omnium Patrum

locutione verè dicuntur velle non posse, quamvis ipsa gratia non det potentiam volendi ab ipsa volitione sejunctam: secundò etiam magis propriè, quia sine gratia efficaci non habetur magna illa charitas, & robusta voluntas, quæ potestas est quâ implentur mandata; & pròinde propositionem meam, in quâ post Augustinum & Chrysostomum dixi, *Petro defuisse gratiam sine quâ nihil possumus*, dupliciter veram esse: tum quia Petro defuit gratia efficax, sine quâ plenè velle non poterat ex sensu Patrum; tum quia defuit magna voluntas, ut ait Augustinus, sine quâ graves tentationes vinci actu non possunt.

6. Et si de justo qui gratia efficaci destitutus à tentatione vincitur, rectè dicatur ipsum in illa hypothesi tentationem superare non potuisse, actu scilicet & eff. ctivè; si tamen queratur quare non superaverit, malè responderi quia non potuit; sed omninò respondendum esse, quia noluit, seu quia non tantùm voluit, quantum necesse erat ad illam tentationem superandam: nam si voluisset, utique potuisset. Si autem queratur quare noluit, respondendum est, quia vel ignorantia cæcatur ipsius mentis acies, vel pravà aliquà cupiditate quasi visco retinebatur & deprimebatur voluntas, ne ad ardua illa præcepta sese erigeret. Viscus autem ille pravæ cupiditatis nihil aliud est, quàm ipsa car-

nalis & mala voluntas temporalium rerum amore implicata, cujus nulla alia causa querenda est præter ipsam voluntatem deficientem. Et qui illuc pervenit, ad primam causam pervenit, ultra quam nulla sit: malæ enim voluntatis una causa est voluntas ipsa deficiens. Quare si de Petro queratur, quare non confessus sit Christum, neutiquàm respondendum est, quia non potuit, sed, quia noluit. Querentibus autem quare noluit, respondendum, quia timuit mori, quia ignavus fuit. At si ultra interrogas, quare ignavus & timidus fuit, prompta adhuc responsio est, quia nimis amavit vitam. Verùm si interrogare pergas, quare nimis amavit vitam, primæ causæ causam queris, & idè viriosè queris.

7. Qua ratione ostenditur, omnia bona opera Deo ascribenda esse, quia bonæ voluntatis est auctor, ex qua bona opera profluunt. eadem ostendi nunquàm mala opera Deo ascribi debere, quia malæ voluntatis, ex qua nascuntur, nunquàm est auctor. Potest quidè Deus malam voluntatem omnipotentissima facilitate in bonam convertere, & inspirare pro concupiscentia mala concupiscentiam bonam: Potest utique; sed cum facit, misericordià facit; & cum non facit, iudicio non facit. Et qui dicit illi: Quid fecisti, cuius misericordia & iudicium pia sanctorum mente cantatur? ut inquit Aug. l. 2. de pec. mer. & rem. 6, 19.

## ARTICULUS VII.

*Secunda quæstio: An potentia quæ iustis inest ante gratiam efficacem, debeat dici proxima, completa, & expedita?*

**Q**uid de prima quæstione, Utrùm gratia efficax det actum primum, an secundum, probabilius dicatur, secundum varia Theologorum placita dilucidè, ni fallor, & perspicuè ostendimus. Sequitur altera, Utrùm potentia bene agendi, quæ habetur ante gratiam efficacem, sit proxima, an remota; completa, an incompleta; expedita, an impedita?

Huic quæstioni dissolvendæ magnam lucem asseret tradita ab Alvare distinctio duplicis sensus, quo voces illæ *potentie proxima* accipiuntur. Sic enim ille de Aux. disp. 117. n. 11. *Ad tertium respondetur, quòd potentia potest dupliciter dici proxima & expedita ad operandum. Primò, quia nihil aliud requiritur ex parte ipsius potentie, quo in actu primo constituatur ad actualiter operandum, sive ad volendum & nolendum; & hoc modo liberum arbitrium, positis omnibus requisitis ad operandum, potest potentia proxima & expedita operari & non operari, velle & nolle. Unde S. Thomas 1. p. q. 83. ar. 2. ad secundum ait, Quòd facultas nominat quandoque potentiam expeditam ad operandum, & sic ponitur in definitione liberi arbitrii. Secundo modo potest dici facultas vel potentia proxima & expedita ad operandum, quia in sua operatione non de-*

*ab alia priori causa efficienter & tribuente ipsum cooperari, vel actualiter concurrere: ET IN HOC SENSU NULLA CAUSA SECUNDA, QUANTUMVIS PONATUR PERFECTA, EST SECUNDUM SE, ET SECLUSA PRÆMOTIONE DIVINA, EXPEDITA AD OPERANDUM; quia, ut supra dictum est ex S. Thoma, nulla causa secunda, quantumvis perfecta, potest in suum actum prodire nisi virtute motionis divine.*

Ex hac Alvaris doctrinâ liquet juxta postremum illum sensum *proxima potestatis*, cum scilicet sumitur pro eâ quæ in suâ operatione non dependet ab aliâ priori causâ efficiente ei tribuente ipsum cooperari & actualiter concurrere, potestatem proximam haberi non posse sine gratiâ efficaci, & præmotione divinâ, ut Alvares agnoscit. Et quia potestatem proximam nunquàm alio sensu Molinistæ accipiunt, nunquàm alio sensu accepi, sequitur rectè me in Apologeticis meis adversus illos contendisse, sine gratiâ efficaci non haberi potestatem proximam; quia vulgò huic voci non illa prior sed hæc posterior notio subjicitur. Unde quamvis potestatem proximam sine gratiâ efficaci haberi negaverim, non ideò ullis Thomistis contradixi. Eâ enim notione negavi, quâ negandum ipsi asserunt,

tunt, & nominatim ipse Alvares.

Verùm si quis ulteriùs quære-  
re pergat, quid de proxima po-  
tentia priori sensu accepta, id  
est, in actu primo, quam admit-  
tit Alvares, sentiendum putem,  
distinctione utendum hinc existi-  
mo. Nam omnes illi Theologi  
qui gratiam non in qualitate ali-  
quâ creatâ, vel in motione vir-  
tuosâ constituunt, sed in effica-  
ci Dei operatione, quâ ipsum  
velle in homine operatur, ut  
consequenter dicere debent gra-  
tiam efficacem non esse necessa-  
riam ad posse, sed ad velle; non  
ad actum primum, sed ad secun-  
dum: ita rectè possunt admitte-  
re potentiam proximam in actu  
primo sine gratiâ efficaci in illo  
priori Alvaris sensu. Nam, ut  
ait idem Alvares L. 3. Resp. c. 5.  
n. 27. *Ut aliqua potentia & fa-  
cultas verè dicatur hoc sensu proxi-  
ma & expedita ad producendum ali-  
quem actum, solum requiritur quòd  
inter ipsam potentiam & talem a-  
ctum nihil mediet tribuens subiecto  
potestatem seu virtutem in actu pri-  
mo, quâ possit operari talem actum;  
non autem requiritur ut nihil mediet  
tribuens ultimum complementum,  
quo actus primus redigatur ad se-  
cundum.* At verò illi Theologi  
omne id quod ad potentiam  
proximam Alvares requirit, lon-  
gè prolixiùs quam ipse conce-  
dunt. Fatentur enim inter poten-  
tiam & actum volendi nihil me-  
diare quòd det actum primum; imò  
nec illud complementum actus  
primi inter potentiam & actum  
secundum inserunt. Ergo in illo-

rum sententiâ rectè admitti po-  
teit potentia proxima in hoc sen-  
su, qui non adversatur gratiæ  
efficacis necessitati.

At si cum ipso Alvare & aliis  
recentioribus Thomistis sentias,  
gratiam efficacem esse qualitatem  
aliquam vel motionem virtuo-  
sam *qua mediet inter potentiam &  
actum*, & sit complementum actus  
primi; incommodiùs planè &  
minùs consequenter proximam  
potestatem sine gratiâ efficaci ad-  
miseris. Quocunque enim illam  
nomine afficias, modò fatearis  
illam esse principium actus secun-  
di voluntati inhærens; hoc ipso  
fateris, illam ad actum primum  
pertinere; & idèò sine illâ non  
esse potentiam omninò perfe-  
ctam, proximam, & complearam.  
Indiget enim alio auxilio quod  
ad actum primum pertineat, &  
ipsum compleat. Unde cum Al-  
vares negat, gratiam efficacem  
ad actum primum pertinere, &  
tamen concedit, illam esse prin-  
cipium necessarium & inhærens  
actus secundi, non satis constare  
sibi videtur. Esse enim actum  
primum, ut jam diximus, nihil  
est aliud, quam esse principium  
inhærens actus secundi.

Quapropter, quod valdè in  
hoc negotio mirari licet, Estius &  
Tiphanius, qui de proximâ po-  
tentia nunquàm loquuntur, rectè  
in suâ sententiâ possunt proxi-  
mam potestatem Alvarisiano sen-  
su defendere; & quia ab illorum  
opinionem non sum alienus, cur  
proximam potestatem hoc eodem  
sensu non admittam, nulla causa

est

est. At verò ipse Alvares, & qui ab ejus disciplinâ sunt, vix satis commodè illam possunt admittere, magnamque inconstantiz suspicionem præbent. Non enim satis cohærere videtur quod illi docent, sine motione divinâ efficaci haberi potentiam proximam & completam, & quod animosè tuentur, *causas omnes per motionem divinam*, quam formam inherentem esse volunt, *in sua virtute operativa compleri*. Quod ipse Alvares de Aux. disp. 18. n. 12. 18. 19. sæpiùs repetit. Quomodò enim causa aliqua potentiam ad operandum oninindò completam jam haber, si adhuc illam ulteriùs *compleri necesse est in sua operativa virtute*. Quapropter constantius & rationi congruentius Zumel, multique alii à Lcd:isma citati, sine gratiâ efficaci potestatem proximam haberi negant. Ad quos allusisse videtur Lescotius, dum agnoscit qu. 2. art. 10. quosdam Theologos ita sentire potentiam, quam dat gratia sufficiens, non esse omnino completam & adæquaram.

Eadem ferè de expeditâ potentia ratio est. Video enim duplicem hujus vocis acceptionem à clarissimo Theologo traditam, ut potentia dicatur expedita, vel

quia *expedita est ab omni impedimento impotentia, vel quia etiam expedita est ab omni impedimento operationis sive nolentia*. Quare nulla hic difficultas in concilianda doctissimi illius viri sententia cum nostræ propositionis explicatione. Admittit enim ille potentiam bene agendi non esse semper in iusto expeditam ab impedimento operationis, quod unum asserui; contendit verò esse expeditam ab omni impedimento impotentia, quod nunquàm negavi. Imò si impotentia sumatur pro defectu virtutis agendi ab ipsa bona voluntate distinctæ, ut sumit ille Theologus, verum esse concedo. At si de vocum illarum usû quid sentiam liberè dicendum sit, illum magis proprium existimo, ut potentia expedita dicatur, quæ ab omni impedimento actionis libera est. Nam si quis oculos quamlibet sanos aliquo velo obductos habeat, & de illo quærat, utrùm habeat potentiam expeditam ad videndum, vix invenietur qui aliter respondeat, quàm ejusmodi hominem visum impeditum habere, licet potentiam habeat expeditam ab omni impedimento impotentia, & impeditam tantum impedimento actionis.

## A R T I C U L U S V I I I.

*Tertia quæstio de gratiâ sufficiente; sufficientis nomen variè usurpari posse.*

Cum tota ferè de gratiâ sufficiente disputatio à nominis

intelligentiâ pendeat, operæ pretium erit, ut ante omnia veram illius

illius vocis, *sufficiens*, notionem & varios usus investigemus.

Sufficiens igitur generatim dicitur id præter quod non requiritur aliud; dividiturque in id quod est sufficiens in certo genere tantum, & illud quod dicitur absolute sufficiens.

Sufficiens in certo genere est, cum nihil aliud ex isto genere requiritur ad id cuius respectu dicitur sufficiens. Isto modo dicitur panis sufficiens ad conservationem vitæ, non quia nihil aliud ad conservationem vitæ requiratur; sed quia nihil aliud requiritur absolute in genere cibi. Sic sufficiens lumen dicitur ad videndum, cum nullum aliud lumen requiritur, etsi præterea sanitas oculorum requiratur, & multa alia. Sic Alvares disp. 76. nu. 3. agnoscit gratiam exterius excitantem dici nonnunquam posse sufficentem ad salutem in suo genere, videlicet in ratione predicationis, vel alterius suasionis & excitationis æternæ, quia talis esse potest, ut ex parte illius nihil amplius requiratur ad credendum, vel pie operandum, & vitam æternam consequendam.

Sufficiens autem absolute est, cum nihil omnino aliud requiritur. Sic solis præsentia sufficit ad illuminandam terram, quia nihil aliud requiritur.

Has notiones si ad gratiam transtuleris, primo liquebit, cum gratia dicitur sufficiens, vel ad posse, vel ad agere, id intelligendum in genere gratiæ, & significari præter illam gratiam quam sufficientem dicimus, nullam aliam ne-

cessariam esse vel ad potestatem agendi, vel ad re ipsam agendum.

Ergo si gratia sufficiens comparatur cum ipsa actione vel motu voluntatis, nulla est gratia verè sufficiens præter efficacem; quia nulla est gratia nisi efficax, de quâ dici possit, nullam aliam præter ipsam ad re ipsam agendum requiri.

Sed si comparatur gratia sufficiens non cum ipsa actione, sed cum sola interna agendi potestate, sic præter gratiam efficacem est alia gratia, quæ tribuit potestatem illam internam agendi, & quæ hoc respectu verè dicitur sufficiens; quia nulla alia gratia requiritur ad tribuendam virtutem & potentiam internam, licet alia requiratur ad movendam & applicandam ad actum potentiam. Sufficit ergo illa gratia ad posse, non sufficit ad agere; sive dat omnia necessaria ut possis virtute internâ, non dat omnia necessaria ut agas; quemadmodum sanitas oculi est principium sufficiens ut possis videre, non tamen sufficit ut actu videas, quia lumen est necessarium.

De his omnibus mihi cum recentioribus Thomistis convenit, quorum non postremus Alvares disp. 79. duplicem sufficientis auxilii acceptionem agnoscit: unam, quâ significatur illud auxilium ultra quod nullum est absolute necessarium, ut illa operatio actu producat, quod soli gratiæ efficaci competere agnoscit: alteram, quâ auxilium sufficiens dicitur, quod tribuit tantum



tum posse, & ultra quod nullum aliud absolutè necessarium est, ut homo dicatur posse illam operationem producere; hoc tantum

sensu sufficientis gratiæ nomen alii gratiæ quàm efficaci tribui posse docet.

# ARTICULUS IX.

*Sufficientis nomen in alio sensu à Patribus acceptum, quàm à recentioribus Thomistis vulgò usurpetur.*

**S**ed cum illud inter Thomistas & me conveniat, duplicem hanc tribui significationem posse gratiæ sufficientis voci, in quam potissimum usurpari debeat, alia quæstio est, quæ præcipuè ex duabus animadversionibus judicanda.

Prima est, recentioribus Theologis valdè cavendum esse, non modò ne à Patrum sensibus, sed etiam ne à Patrum verbis temerè discedant. Retinetur enim fides & eadem in sæculorum labentium decursu perseverat, dum iisdem verbis inclusa ad posteros propagatur. At si novandi in verbis licentia serpat, metuendum est ne in ipsam Ecclesiæ doctrinam multa novitas invehatur. Hoc consilio Ecclesia ne quidem solemnes, quæ Deo adhibentur preces, vulgari & patriâ linguâ fieri finit, ne sermone vernaculo, cujus penes vulgus lex & arbitrium est, immutato, aliquid in Dei cultu novetur & immutetur. Ergo ut gratiæ sufficientis nomen in scholas catholicas introduceretur, dispendium fortasse fuerat quis illius usus apud Patres: quod si satis attendissent qui primi hoc verbo usi sunt, nunquàm illud alii gra-

tiæ quàm efficaci tribuissent. Illud enim certum existimo, hoc verbo, *sufficit*, ita semper usum Augustinum & alios Patres gratiæ defensores, ut referatur non ad potentiam, sed ad actionem, significetque illud auxilium, præter quod nullum aliud necessarium est ut actu operemur; & idèd nunquàm id nomen alteri gratiæ tributum videas præter quàm efficaci.

Hinc est 1. quòd apud Augustinum non nisi magna voluntas, magna charitas, plena & perfecta voluntas, quæ per gratiam efficacem & adjuvantem confertur, sufficere dicitur. *Qui volueris*, inquit ille l. de gr. & lib. arb. c. 15. *& non potueris, nondum se plenè velle cognoscat, & oret ut habeat tantam voluntatem, quanta SUFFICIT ad implenda mandata.* Et c. 16. *Certum est nos mandata servare, si volumus; sed quia preparatur voluntas à Domino, ab illo petendum est ut tantum velimus, quantum SUFFICIT ut volendo faciamus.* Et Ep. 143. in loco jam citato de eo qui continentiam à Deo poscit: *Utique tantas voluntatis vires, tantum dilectionis ardorem volebat accipere spiritu sapientiæ, qui SUFFI-*

CERET

CERET ad implendam magnitudinem continentia. Et lib. de sp. & lit. c. 35. Fieret enim perfecta iustitia, si tanta voluntas adhiberetur, quantum SUFFICIAT tanta rei.

Hinc 2. idem Augustinus infirmam voluntatem, quæ per gratiam excitantem, quam Thomistæ sufficientem vocant, à Deo confortatur, sæpe negat ad bene agendum sufficere, nunquam dicit sufficere. Propterea Ep. 208. Oras ut non intres in tentationem; & utique si homo sibi prestare posset volendo, non posceretur orando. Quapropter ut non intremus in tentationem, si voluntas SUFFICERET, non oravimus, quæ tamen si deesset, nec orare possemus. Adfit ergo ut velimus; oremus autem ut valeamus. Et serm. 3. de verb. Apost. Volo ut velis; sed NON SUFFICIT ut velis, hoc est, non satis est te velle per gratiam excitantem, adiuvandus es ut plenè velis; hoc est, impetranda tibi gratia efficax. Et in Expositione quarundam propositionum ex Epist. ad Rom. Cum voluerimus NON SUFFICIT voluntas nostra, & cursus noster, nisi Deus vires currentibus praebeat. Denique lib. 2. de pecc. mer. & rem. c. 19. Idcirco etiam sanctos & fideles suos in aliquibus virtutibus servat, ut in his eos minus quam implenda omni ex parte iustitia SUFFICIT, deleat bonum.

3. Oculum sanum, qui solet à Thomistis in exemplum atferri sufficientis potestatis, negat Augustinus ad videndum sufficere sine lumine; & ait tantum ad non videndum sufficere, Suffi-

CIT sibi, inquit ille de gestis Pelagii c. 3. oculus ad non videndum, hoc est, ad tenebras: ad videndum verò lumine suo non sibi SUFFICIT, nisi illi extrinsecus adiutorium clari luminis praebeatur.

Hinc 4. liberum arbitrium ad malum faciendum sibi dicit sufficere, quia nullum requirit auxilium, ut actu malum operetur. Sic enim l. de corr. & gr. c. 11. Liberum arbitrium ad malum sufficit, ad bonum autem nihil est, nisi adjuvetur ab omnipotenti bono.

Ex his perspicuè constare arbitror verbum, sufficit, apud Augustinum illud significare, quod sine alio auxilio satis est ad actu & effectivè operandum; & idè Augustinianò sensu tantum efficaci gratiæ tribuendum.

Neque verò aliter ab aliis Patribus gratiæ defensoribus usurpatum est; è quibus unum proferam Fulgentium, qui lib. 2. de verit. prædest. & gr. c. 4. negat sine gratiâ efficaci voluntatem sibi sufficere: Voluntas, inquit, non suâ virtute, sed Dei prævenientis operatione confurgit, & postquam surrexerit, ut non cadat sola sibi non potest SUFFICERE; sed sicut ad surgendum beneficio misericordiæ prævenientis erigitur, sic ad perseverandum misericordiæ subsequenti iuvamine custoditur. Gratiam autem quâ juvamus ad perseverandum, esse apud illum efficacem, nemo doctrinæ Fulgentianæ gnarus negaverit. Et ib. c. 7. Ut deficiat voluntas, potest sibi sola SUFFICERE; ut proficiat verò, indiget semper divine miserationis auxilio. Quo in loco

loco planum est, idè Fulgentium asserere voluntatem sibi sufficere ut deficiat, quia nihil ei aliud necessarium est ut deficiat.

Pluribus locis commemorandis supersedeo. Satis erit eos, qui aliam hujus verbi significationem apud Patres esse vellent, hinc com-

pellare, ut vel unum locum proferant, ubi ea gratia sufficere dicatur ad agendum, quæ nunquam in actum prodeat sine alterius gratiæ auxilio; denique ubi eadem gratia, quæ negetur sufficere ad agere, dicatur sufficere ad *peffi*.

## ARTICULUS X.

*Cavendum esse ne gratiæ sufficientis voce ad gratiæ efficaciam necessitatem avertendam abutantur Molinistæ.*

**A**ltera observatio est, catholicis Theologis valde providendum esse, ne vocibus utantur, quarum popularis significatio fideles in errorem possit inducere. Barbarè mavult loqui Augustinus, ut nonnunquam testatur in expositione Psalmorum, quàm à populo non intelligi; quanto studio idem eas voces devitasset, quæ non modo à populo non intelligerentur, sed etiam pravo & erroneo sensu acciperentur. Certum est autem vocem *sufficientis gratiæ* vulgò à mulieribus, ab imperitis viris, imò ab omnibus ferè, accipi pro eâ gratiâ, quæ nullam aliam requirat ad agendum, & necessitatem alterius auxilii excludat. Quæ una ratio Theologos deterere debuerat, ne istud verbum alteri gratiæ quàm efficaci tribuerent, & ne passim apud populos sufficientem aliquam gratiam quæ non sit efficax venditarent. Hoc enim imperiti, (quorum salus non minori nobis curæ esse debet, quàm creditorum, sa-

pientibus enim & insipientibus debitores sumus) hoc, inquam, imperiti sic accipiunt, quasi sit quædam gratia, quâ Deo ipsum velle & operari in nobis efficaciter non operante, nonnunquam tamen & velimus & operemur. Quamobrem si res integra nunc esset, nullo modo fuerim auctor, ut verbum illud nunquam à S. Patribus & ipso S. Thoma alii gratiæ tributum quàm vel efficaci, aut habituali, sed cum aliquâ exceptione, velut *in suo genere, quantum est de se*, passim nunc ita excitanti gratiæ tribuatur, ut etiam gratia sufficiens ipso nomine ab efficaci distinguatur.

Et sanè quantum mali secum hoc vocabulum in scholas Christianas invexerit, facile animadverti potest. Quo enim alio furo in populi animos irrepunt gratiæ efficacis adversarii, quàm fallaci sufficientis gratiæ æquivocatione? Nam cum rudes à concionatoribus audiunt gratiam sufficientem prædicari, hanc accipiunt utique quæ nullo alio superad-

peraddito auxilio in actum nonnunquam prodit; atque ira in eum errorem inducuntur, sine gratiâ efficaci nonnunquam aliquid bene fieri, neque illam ad piè agendum necessariam esse. Hâc arte tantas sibi vires conflavit Molinismus, hoc uno sufficientis gratiæ nomine incautiùs sibi à Thomistis concessio, ipsos apud populum deridiculo habet, pro Calvinistis & Manichæis traducit; & efficacem gratiam, quam unam sufficientem Patres vocant, passim eliminat. Tolle præjudicium illud ex nomine sufficientis gratiæ petitum, Molinam funditis sustuleris. Aliunde enim Traditionis auctoritate ita nudus & inermis est, ut in Theologorum confessum, in Doctorum disputationem prodire non audeat; aut si audeat, continuò antiquitatis pondere suffocetur.

Quare meritò non modò SS. Patres, sed hoc sæculo tota Lovaniensis Facultas sufficientis gratiæ nomen soli tribuit efficaci, & quamcunque aliam sufficere negavit. *Dicimus*, inquiunt doctissimi illi Theologi de gratiâ Christi optimè meriti in Just. Censuræ c. 13. non esse gratiam sufficienter preparantem voluntatem, nisi quæ faciat ut velimus, & consentiamus. *Quandiu enim voluntas nondum sic affecta est ut velit, sed adhuc resistit & contradicit, NONDUM SUFFICIENTER est à Domino preparata.* Et ibid. c. 12. *Addimus, & hoc qualecunque subsidium quod aliquando subministrari dicitur iis qui neque credunt neque convertuntur ad*

*Dominum, NON FUISSE SUFFICIENTENS ad fidem aut conversionem; quippe gratia ad conversionem SUFFICIENTES ipsa convertit; quæ verò non convertit, NON SUFFICIT.*

Eodem modo Duacensis Facultas locuta est, cum illam Jesuiticam propositionem damnet: *Omnes infideles semper & ubique habent sufficiens auxilium ad salutem ex parte Dei.* Neque infidelis, inquit in censuræ assertionem, quicquam credere potest, nisi per gratiam quâ cor ejus ex infidelitate ad fidem mutetur, quam gratiam cum non habere quandiu infidelis manet, perspicuum est. Si ergo donum fidei nondum habet infidelis, quemodò dicendus est habere SUFFICIENTES auxilium ad salutem ex parte Dei, cum absque dono Dei non possit esse fidelis.

Sic etiam Duacensis Facultatis insigne lumen Guillelmus Estius ex his Scripturæ locis: *Orane quod dat mihi Pater ad me veniet; & infra: Nemo potest venire ad me, nisi Pater qui misit me; traxerit eum; & similibus, colligit, non omnibus dari auxilium simpliciter ex parte Dei sufficiens ad hoc ut veniat ad Christum; quia non omnes ad Christum veniunt, neque omnes à Patre trahuntur, & quicumque non veniunt non trahuntur efficaciter.* Quibus locis perspicuum est sufficientis gratiæ nomen eo quo diximus sensu usurpari. Ab illis verò Theologis non multum recedunt celeberrimi S. Thomæ discipuli, qui licet gratiæ sufficientis nomen non respuant, agnoscunt tamen so-

lam efficacem esse simpliciter & absolutè sufficientem. Sic Medina ex Cajetano in 1. 2. q. 109. ar. 10. *Ad hoc*, inquit, *argumentum optimè respondet Cajetanus*, quòd dupliciter aliqua res potest esse sufficiens ad aliquem actum exercendum; uno modo, simpliciter sufficiens, quod accidit quando ipsa res sola sine adminiculo alterius potest absolutè operationem producere. Alio modo potest dici sufficiens, non simpliciter, sed in suo genere. Verbi gratia visus in genere potentia est sufficiens ad videndum; & qui visum habet, dicitur posse videre. Est tamen sufficiens ut potentia, non tamen simpliciter; nam sine objecto atque lumine non potest videre: Ita habens gratiam & habitus virtutum potens est perseverare, tametsi egeat auxilio gratie tum ad operandum, tum ad perseverandum; quod auxilium efficax esse vel hinc satis patet, quod loquitur de auxilio non quo perseverari potest, sed quo perseveratur, quod apertè infrà appellat auxilium efficax.

Cùm igitur sufficientis gratiæ ab efficaci distinctæ nomen nec Patres, nec Concilia, nec Summi Pontifices ulli, commemorarent; improbant & rejiciant duæ celeberrimæ Theologicæ Facultates, repudiet doctissimus Estius, cujus scripta in omnium catholicorum manibus cum laude versantur, minùs proprium esse fateantur etiam qui illud usurpant, illius vocis in Ecclesiam introducendæ nulla necessitas existit, multò minùs verò ulla causa sub-

est, cur illa vox quasi catholicæ fidei tessera à quoquam exigatur, cum in suo notissimo significato, id est Moliniano, erroneum sensum habeat, ut omnes Thomistæ contendunt: in Thomistico autem sensum meo quidè judicio rectum, in Molinistarum verò mentibus & auribus intolerandam absurditatem contineat. Non satis autem Ecclesiæ honori consulere videatur, qui ab eâ præcipi velit illius vocis usum, quæ cum duos tantum significatus habere possit; altero erroneum sensum, ut Thomistis videtur, altero ridiculum, ut Molinistis placet, complectatur.

Verùm, ut meo quidem judicio providentius fuisset illud nomen neutiquàm initio in scholas catholicas admittere, sic jam receptum per vim abigere & præfractiùs de voce contendere, durius & ab Ecclesiæ pace alienius videri potest. Ergo cum Thomistis nunquàm de illâ voce litigabimus; rogabimus tantùm, dum apud imperitos verba facient, ut vel ab illâ voce abstineant, vel saltem admoneant, illam à se usurpari in eo significato qui à Moliniano longè disjunctus sit. Ita nullum mihi cum ipsis certamen est, nec de nomine, quia non rejicio; nec de sensu, quia sensum illius vocis Thomisticum admitto. Admitto quippe in justis gratiam quæ det posse, ultra quod nulla virtus interna requiratur, sed tantùm applicatio, motio, prædeterminatio, impulsio

hio illius virtutis, quæ sit per nans ex omnium Thomistarum  
auxilium efficaciter prædetermi- sententia.

## A R T I C U L U S XI.

*Sufficientis gratiæ nomen Thomistico sensu usurpatum habituali gratiæ rectius tribui quàm actuali.*

**S**UPPONAMUS igitur, esse aliquam gratiam ab efficaci distinctam, quæ conferat illud posse cui desit sola applicatio & motus; quod concedo & profiteor. Supponamus 2. illam gratiam rectè sufficientem vocari Thomistico sensu, quod non aspernor, modò à Moliniano errore sejungetur. Una quæstio superesse poterit de natura illius gratiæ sufficientis quæ det posse, utrùm scilicet sit, vel habitualis vel actualis; sive utrùm sit aliquid in anima permanens, etiamsi minimè de eà cogitemus; an potius pius intellectus & voluntatis motus, de quo non video inter ipsos Thomistas constare.

Veteres enim Thomistæ ut Capreolus, Ferrariensis, Cajetanus, & nonnulli ex recentioribus, ut Lovaniensis Facultas, & Estius, *posse* illud quod gratiam efficacem antecedit, habituali gratiæ tribuunt, non autem actuali. Ita sentiunt adhuc aliqui Hispanienses Theologi; imò hæc sententia plerique Parisiensibus Doctoribus probatur, nec ingrata est ipsis Centoribus, dummodò ab amicis suis, non à me, propugnetur.

Testis est Censuræ subscriptor Holdenus, qui gratiam actualem

non semper dari vult, sed tantùm sæpe; qui cum sancto Thoma dicit, gratiam habitalem & sanctificantem dare posse, & sufficere ad illud efficiendum quod re ipsa nunquàm sola efficit: & tamen in Epistola quâdam ad me scriptâ sic loquitur: *A nemine siquidem accepi Magistrorum nostrorum quemquam scriptunculæ meæ doctrinam tamquam scholis catholicis indignam reprobasse; & certissimè novi, cum quædam serunt te minorum tuorum coryphæam habere, hanc meam efficacis gratiæ explanationem velut legitimam approbasse.* Nuperrimè verò venit in manus meas non ignobilis Thomista Conradus Koelin, Cajetani auct equalis aut suppar, de gratiâ habituali sic loquutus in quæst. 109. art. 9. *Homo primò indiget ipsâ gratiâ habituali, quæ faciat eum potentem ad operandum meritorie, quæ est actus primus constituens hominem in potentia ad illam SUFFICIENTI ad operandum meritorie. Quia autem supra art. 1. dictum est quod quantumcumque res habeat principium operandi sufficiens, indigeat auxilio & motione divinâ; idèò habitâ gratia adhuc opus est motione Dei, & ut patet, speciali.* Admisit quidem, & merito, Conradus motionem Dei supra gratiam

tiam habitualement ad operandum necessariam: Verum eam specialem esse vult, & non omnibus dari; nec ideo tamen excusari à peccato qui eam caruerint. Sic enim art. 6. *Iusti moventur in Deum ut specialem finem motione speciali. Quod ex eo patet: QUIA UNUS MOVETUR, ALIUS NON; unus sufficienter & non efficaciter, alius utroque modo. Et ibid. An si non à Deo preparatur & disponitur, sit à peccato non habitationis gratiæ tempore debito excusatus. De hoc vide quartum contra Gentiles, c. 159. Quia non est excusatus: quia per se ipsum potest prestare & prestat impedimenta. Et, ut supra tactum est, impotentia quæ est ex concursu primi agentis non excusat, tum sit semper propter aliquam culpam ad minus originalem.*

Contrà verò plerique recentiores Thomistæ gratiam illam, quæ dat iustis posse, actualem esse volunt, & eandem cum illâ, quæ alio nomine dicitur excitans, de quâ mox uberius agemus.

In illâ Theologorum dissensione non diffiteor, in eorum me Thomistarum partes concedere, qui posse illud, antecedens gratiam efficacem, per gratiam habitualement tribui docent; & ideo illam potius quàm actualem sufficientis gratiæ appellatione afficiunt. In eam sententiam his rationibus adducor. Primò, quia S. Thomas, quem in scholasticâ Theologiâ ducem sequor, omnino istius mihi videtur esse sententiæ. Sic enim loquitur q. 110. a. 2. *In eo, qui dicitur gratiam Dei ha-*

*bere, significatur esse quidam effectus gratuita Dei voluntatis. Dilectum est autem supra, quod dupliciter ex gratuita Dei voluntate homo adjuvatur; & uno modo in quantum anima hominis movetur à Deo ad aliquid cognoscendum, vel volendum, vel agendum. Et hoc modo ipse gratuitus effectus in homine non est qualitas, sed motus quidam anime: actus enim movens in moto est motus, ut dicitur in 3. Physicæ. Alio modo adjuvatur homo ex gratuita Dei voluntate, secundum quod aliquod habituale donum à Deo anime infunditur. Et hoc ideo quod non est conveniens, quod Deus minus provideat his quos diligit ad supernaturale bonum habendum, quàm creaturis quas diligit ad bonum naturale habendum. Creaturis autem naturalibus sic providet, ut non solum moveat eas ad actus naturales, sed etiam largiatur eis formas & virtutes quasdam, quæ sunt principia actuum, ut secundum se ipsas inclinentur ad huiusmodi motus; & sic motus, quibus à Deo moventur, sunt creaturis connaturales & faciles, secundum illud Sap. 8. Et disponit omnia suaviter. Multò igitur magis illis quæ movet ad consequendum bonum supernaturale, æternum infundit aliquas formas seu qualitates, secundum quas suavitèr & promtè ab ipso moveantur ad bonum æternum consequendum; & sic donum gratiæ qualitas quedam est. Ex hoc loco elici potest, idem prestare in rebus supernaturalibus gratiam habitualement ad actus supernaturales, quod formæ naturales præstant in naturalibus.*



ad actus naturales. Sed illæ formæ naturales tribuunt illam potentiam, quæ antecedit motionem Dei præmouentem & prædeterminantem, ex omnibus Thomistis. Igitur formæ seu qualitates supernaturales debent etiam præstare potentiam illam, quæ antecedit prædeterminantem & præmouentem gratiam.

2. S. Thomas nullam agnoscit motionem generalem Dei per gratiam. Sic enim loquitur 1. 2. q. 9. a. 6. *Dicendum quòd Deus movet voluntatem hominis sicut universalis motor ad universale obiectum voluntatis quod est bonum; & sine hac universali motione homo non potest bonum velle; sed homo per rationem determinat se ad volendum hoc vel illud quod est verè bonum & apparens bonum. Sed tamen interdum specialiter Deus movet aliquos ad aliquid determinatè volendum quod est bonum, sicut in his quos movet per GRATIAM.* Ex quo colligi licet motionem per gratiam non esse communem omnibus, nec semper adesse. Dissertè enim S. Thomas, motionem per gratiam non communem, sed specialem; non semper adesse, sed interdum tantum; non omnibus, sed quibusdam tantum, tribui dicit. At verò, cum quæritur potestas in justis gratia efficaci destitutis, ferè quæritur ejusmodi potestas quæ semper adsit, quæ proinde repeti non potest ex motione Dei, quæ non semper adest.

3. Gratiam habitualement S. Thomas expressè asserit dare, quan-

tum est de se, sufficiens auxilium ad non peccandum. De ea enim, ut alibi probavimus, intelligitur locus ille qui exstat 1. 2. q. 106. a. 2. *Nec tamen propter hoc dicitur quod lex nova iram operatur; quia, quantum est de se, sufficiens auxilium dat ad non peccandum.* Jam verò nunquàm de illa motione actuali quæ movet ad bonum imperfectum, in qua Thomistæ recentiores gratiam suam sufficientem constituunt, dixit S. Thomas, illam, quantum est de se, dare sufficiens auxilium ad bonum perfectum.

4. Thomistæ illi qui gratiæ sufficientis nomen actuali gratiæ concedere solent, iidem nihilominus quidquid gratiæ sufficienti competit habituali convenire ultrò agnoscunt. Quid enim amplius habere potest gratia sufficiens ab efficaci distincta, quæcunque tandem illa sit, quàm ut det homini sufficientem virtutem in actu primo, quò possit servare omnia mandata & perseverare in finem si velit? Id verò ipse Alvares, qui inter præcipuos gratiæ sufficientis actualis patronos vulgò censetur, per gratiam habitualement justo confertur proficetur, eamque esse S. Thomæ sententiam. Sic enim ille Resp. 1. 3. c. 5. n. 20. *Ex doctrinâ, inquit, S. Thomæ 1. 2. q. 109. per gratiam habitualement & virtutes infusas habet homo sufficientem virtutem in actu primo, quò possit servare omnia mandata & perseverare usque in finem si velit; & tamen de facili cum solâ gratiâ habituali & virtu-*

virtutibus infusis, secluso quocunque auxilio actuali prævenientis gratiæ, nunquam servabit eadem mandata, nec perseverabit usque in finem, ut ostendit sanctus Doctor, a. 9. & 10. ejusdem questionis. Ex hoc autem non sequitur, QUOD GRATIA HABITUALIS NON SIT SUFFICIENS AD OPERANDUM BONUM. Fallaciam enim hujus consequentia detegit S. Thomas, a. 9. citato ad primum argumentum, ubi objectionem factam dissolvit. Frustrâ ergo requiritur gratia actualis ab efficaci distincta, tanquàm necessaria ut habeat justus sufficientem virtutem in actu primo ad mandata servanda, & tentationes vincendas, cum id jam habeat ex S. Thoma, fatente ipso Alvare per gratiam habitualement & virtutes infusas.

5. Id-ipsum docet Bartholomæus Medina in 1. 2. q. 109. a. 10. super illo S. Thomæ loco: *Nunc autem per gratiam Christi multi accipiunt, & donum gratiæ quo perseverare possunt, & ulterius eis datur quo perseverent. Ex quo evidens est, inquit, esse distinctum donum posse perseverare ab eo quod est perseverare. Hoc ultimum, nimirum actu perseverare, gratiæ efficacis esse nemo non videt. Dispiciamus igitur ad quam gratiam posse referat, actualem an habitualement. Posse, inquit, perseverare habet homo ex eo quod habet gratiam justificantem, per quam natus est ex Deo, & efficitur particeps divina naturæ; ex quo fit potens operari omne bonum, & vitare omne malum. Et infra: licet*

gratia habitualis de se sufficiens sit ad omne peccatum vincendum, & ad omne opus bonum præstandum; nihilominus ratione subiecti in quo residet, & ratione pugne, quæ semper est à Carne, Damone, Mundo, eget homo dono perseverantiæ, ut victor evadat.

6. Auxilium gratiæ quod ejusmodi est, ut possit esse, & frequenter sit piæ operationis principium physicum, licet non sine gratiâ efficaci, longè potiori jure dicitur gratia sufficiens in actu primo ad illam piæ operationem, quàm quod ejus generis est, ut etiam cum gratiâ efficaci piæ operationis principium esse non possit, nisi morale. Ex omnibus enim Thomistis causa moralis non est propriæ causa, sed metaphoricè, ut docet S. Thomas de malo, q. 3. a. 3. Certum est verò, gratiam habitualement esse piarum operationum principium physicum; non item gratiam illam excitantem, quam sufficientem Thomistæ recentiores appellant. Ipsi enim docent teste Alvare, Resp. l. 3. c. 4. n. 6. *Auxilium præveniens gratiæ excitantis non habere physicum influxum in consensum, seu piæ operationem liberam, sed tantum morale, etiam cum illi adjungitur gratia efficax. Quod multis ille rationibus probat, quarum præcipua est quam affert n. 7. Motus gratiæ excitantis, quæ ipsi gratia sufficiens, solet esse minus perfectus, quàm actus supernaturalis ad quem movet. Solet enim Deus vivâ quâdam mortis representatione, aut*

timore gelenna, excitare & movere ad actum contritionis, aut dilectionis Dei super omnia, qui actus & accidentaliter & specificè sunt præstantiores motibus excitantis gratia. Ergo huiusmodi gratia excitans non erit physico influxu causa efficiens horum actuum. Probatur consequentia. Nam causa efficiens debet esse ad minus aque perfecta, sicut est ejus effectus, cum tota perfectio effectus virtute contineatur in causâ. Unde sic concluditur, n. 17. Duen- dum, gratiam prævenientem adjuvantem (hoc est efficacem) vires efficaces tribuere voluntati ad consensum eliciendum, & physicum influxum habere in eundem consensum, ut dictum est. Gratia autem excitans, licet tribuat libero vires sufficientes, quibus possit pie operari si velit, non tamen concurrat efficienter ad piam operationem, quia movet voluntatem ex parte finis alliciendo, invitando, & suadendo. Quantò igitur magis gratia habitualis dici potest sufficiens Thomistico sensu ad bene agendum & mandata servanda, de qua sic ipse Alvarez in Resp. ad 8. objectionem, quæ erat ejusmodi: *Auxilium præveniens gratia excitantis non minus trahit & inclinat voluntatem ad opus bonum, quàm habitus; sed multo magis: Atqui habitus, præsertim infusus, cooperantur physico influxu cum libero arbitrio in opus pium seu consensum: Ergo simul cooperabitur gratia excitans præveniens. Ad obiectum, inquit, respondetur, quòd gratia excitans in-*

*clinat moraliter voluntatem ad opus bonum, eam movendo ex parte objecti, alliciendo, invitando, & suadendo. Habitus verò supernaturalis inclinat eam habitualiter ex parte potentia per modum principii effectivi. Auxilium autem efficace præveniens gratia adjuvantis inclinat voluntatem, id est, inclinare eam facit actualiter & infallibiliter. Nulla ergo gratia omnibus modis ad opus bonum sufficiens, nisi quæ ipsum in nobis atque nobiscum efficaciter operatur, ut alibi fatetur ipse Alvarez. Sed si inter gratiam excitantem respectu actus perfecti ad quem disponit, & gratiam habitualement comparatur instituat, hæc perfectio quæ ex parte potentia per modum principii effectivi ad opus bonum voluntatem inclinat, sufficientis gratiæ nomen magis mereatur, quàm quæ illam tantum moraliter inclinat ex parte objecti, neque unquam boni operis principium verum & physicum esse potest.*

7. Gratia habitualis nullam aliam requirit habitualement ad agendum actu, & idè est verè sufficiens in genere gratiæ habitualis. At minus propriè gratia excitans actualis dicitur sufficiens, quia ad ipsam actionem actu producendam requirit aliam gratiam actualement, nempe efficacem. His rationibus moveor, ut melius habituali, quàm excitanti actuali, sufficientis gratiæ nomen dari existimem.

## ARTICULUS XII.

*Bono etiam sensu gratiam excitantem dici posse sufficientem.*

**A**TTAMEN si quis pertinaciùs obtinere nitatur, gratiam excitantem sufficientem appellari posse, dummodo Molinianam hujus verbi significationem excludat, & alterius gratiæ efficacis necessitatem ad ipsam actionem admittat, faciles nos præstabimus; nec enim de nominis quæstione, in quo vel faciundo vel abrogando nulla Ecclesiæ auctoritas intercessit, libenter certaverimus. Quam volent igitur excitantem gratiam sufficientem appellent recentiores Thomistæ, nos omninò repugnantem non habebunt, dummodò, ut faciunt, eo tantum sensu sufficientem dicant, quòd in nobis initia bonæ voluntatis producat atque adeò quandam bene agendi potentiam & virtutem largiatur: quòd talis sit, ut nisi validior ei concupiscentia resisteret, non modò boni operis desiderium fructu vacuum, sed ipsum bonum opus re-ipsa produceret: quòd talis sit, ut qui illi resistit in eo sit culpandus: quòd talis sit, ut nisi prava voluntas in nobis inesset, ad bene vivendum sola sufficeret: denique quòd talis sit, ut ei homo plenè consentiat, si voluerit; quòd autem nolit, ex ejus vitio & pravitae nascatur.

His, inquam, omnibus sensibus rectè excitantem gratiam sufficientem dici tacitè concedi po-

test. Hæc enim omnia de gratiâ excitante, quæ imperfectam voluntatem largitur, verè dicuntur; stent modò illa duo, de quibus nulla cum Thomistis contentio est. Primò gratiam illam excitantem, quæ imperfectos actus producit, semper eum effectum habere ad quem absolutà Dei voluntate ordinatur, quod omnes Thomistæ unanimi consensu docent, ut ait Alvar. dist. 80. & alibi passim.

Alterum est, illi gratiæ excitanti, quæ movet hominem ad imperfectum bonum & ad actus imperfectos, neminem unquam sine amplioris gratiæ præsidio ad actum perfectum consensisse, imò repugnare ut re-ipsa consentiat, nec illam gratiam complecti omnia ad agendum necessaria: quæ pervulgata item est omnium Thomistarum doctrina. Sic enim Navarretta contr. 24. n. 56. & cont. 19. n. 1. Alvar. disp. 76. n. 1. & 91. n. 14. Silv. in 1. 2. q. 111. art. 3.

Quibus addi potest quod ait Alvares, disp. 99. n. 2. Gratiam sufficientem, quâ sufficiens est, & quatenus tribuit tantum homini posse piè operari si velit, non autem facit ut velit, ethi detur ex meritis Christi, non esse tamen propriam Christi gratiam; quia propria Christi gratia est gratia adjuvans, quâ Deus

facit ut velimus. Ergo in his omnibus, quia de re-ipsâ convenimus, in verborum usu faciles esse possumus.

Sed cum in eo quidam è Centoribus præcipuum sententiæ suæ fundamentum locarint, quòd Pe-

tro omnem gratiam actualem à me negari dicerent, paulò accuratius explananda est excitantis illius gratiæ natura, ut ex ejus explicatione clareat, quandò adsit, quandò non adsit.

## A R T I C U L U S X I I I.

*Quarta questio : Utrum semper adsit gratia excitans, quam Thomisticè sufficientem vocant. Accuratius explicatur illius gratiæ natura.*

**I**mprimis constans est Thomistarum doctrina, gratiam sufficientem actualem, & gratiam excitantem, eandem prorsus esse gratiam duobus affectam vocabulis. Sic Alvarez, disp. 76. n. 5. *Gratia excitans, ut complectitur non solum illuminationem externam & internum intellectus, sed etiam motionem supernaturalem receptam in voluntate, idem est realiter quòd gratia sufficiens, ita ut omnis gratia prædicto modo excitans sit gratia sufficiens comparatione effectus ad quem excitat: ut si excitet ad credendum, erit gratia sufficiens comparatione actus fidei; & si excitet ad diligendum Deum super omnia, erit gratia sufficiens respectu actus dilectionis Dei.*

2. Etsi disputent inter se Theologi, utrum gratia excitans sive sufficiens sit actus intellectus & voluntatis, quatenus à Deo productus, ut quidam existimant; an verò eorum causa, ut Alvarez & plerique Thomistæ: convenit tamen inter illos nullam esse gratiam sufficientem sive ex-

citantem, ubi nulla est cogitatio, nulla voluntas. Quamobrem excitantem gratiam vel constituunt vel semper comitantur piæ cogitationes, piæ voluntates; quas ita explicat Alvarez, disp. 73. *Dicendum est enim, inquit, Deum per gratiam excitantem efficere ut homo erigilet, & attendat ad illa quæ ad amplectendum bonum & respuendum malum conducere possunt, ut, verbi gratiâ, cum per peccatum est à Deo aversus, gratiâ excitante intellectum ejus Deus illustrat, ut videat quàm malum & quàm amarum est reliquisse Dominum. Per eandem gratiam causat Deus quosdam actus supernaturales, licet imperfectos, quibus remotè disponit hominem ad justificationis gratiam consequendam; vel si est justificatus, per eosdem actus imperfectos lilerum ejus arbitrium inclinât, ut Deo excitante & vocante consentiat & coopere-*

*tur.* Similiter Lescotius olim Theologiæ Professor, nunc Carnotensis Episcopus, in scriptis suis gra-

tiam

tiam excitantem sufficientem explicat, qu. 2. art. 8. *Excitans, inquit, est per quam saepe rebus humanis, fortè etiam malis occupati, sentimus nos derepente inspirari & quasi de somno excitari, partim illustratione quâdam & bona cogitatione, quam intellectui nostro Deus immittit, partim piâ affectione, quam voluntati.*

Notandum porrò, nomine gratiæ sufficientis & excitantis non contineri solùm actus indeliberatos, sed etiam actus liberos & deliberatos imperfectiores, quatenus ad perfectiores disponunt; verbi gratiâ, actus fidei, spei, & charitatis imperfectæ, quatenus per ipsos disponimur ad observationem mandatorum; licet isti actus non solùm per excitantem, sed etiam per adjuvantem conferantur, & sic sub diversâ consideratione ad excitantem gratiam pertinent, quia disponunt & excitant ad perfectiores actus: ad adjuvantem, quia consensum deliberatum involvunt, quem Deus in homine efficaciter operatus est. Sic Alvarez, disp. 75. n. 4. Imò ex eâdem Thomistarum

scholâ Navarretta contr. 17. in 1. p. qu. 19. art. 8. multis probat, *auxilium excitans, quatenus denotat actum voluntatis, per se loquendo esse actum liberum eidem voluntati.*

Sed quoniam ex doctrinâ Apostoli non sumus sufficientes cogitare aliquid ex nobis tanquàm ex nobis, sed sufficientia nostra ex Deo est; multò minùs autem desiderare & piâ ullam affectionem habere; sequitur hæc duo inter se retrò commicare, ut quisquis piâ cogitationem habet, piâ affectionem, pium conatum, habeat etiam gratiam excitantem; & rursus, ut quisquis habet gratiam excitantem, habeat etiam pios motus, piâ desideria, piâ cogitationes. Ex quo sequitur, quicumque piâ cogitationem, piâ voluntatem, de peccato vitando non habet, non habere gratiam excitantem sufficientem; & rursus, quicumque non habet gratiam excitantem ad peccatum vitandum, non habere piâ cogitationem, & piâ affectionem.

#### A R T I C U L U S XIV.

*Quando admittenda sit excitans illa gratia.*

CONSTITUTÂ gratiæ excitantis sufficientis Thomistico sensu naturâ, diluescere potest, an admittenda sit illa, & quibus & quando concedenda.

Primum enim certum est, illam gratiam repudiari in totum

& negari non posse. Quàm multi enim experiuntur istiusmodi piâ cogitationes, piâ affectiones? Quàm multos subit nonnunquàm timor inferni, cura & sollicitudo suæ salutis? Quàm multos allicit cœlestis quædam sua-

vitae, quâ ad amorem rerum cœlestium quasi furtim rapiuntur? Quâm multi denique à peccato se dererreri, ad bona opera allici ejusmodi motibus quotidie sentiunt?

2. Certum est, illam excitantem gratiam omnibus piè cogitantibus, volentibus & conantibus, adesse. Unde enim piè cogitarent, unde vellent, unde conarentur, nisi per excitantem gratiam illos in animo motus operaretur Deus? Quamobrem nihil verius, quàm justis volentibus & conantibus non deesse gratiam excitantem seu sufficientem Thomistico sensu: neque enim sine illâ gratiâ vellent & conarentur. Nihil verius, quàm illis justis volentibus & conantibus adesse possibilitatem illam in actu primo, quæ non complectitur omnia ad agendum prærequisita. Habent enim & actualement & habitualment gratiam, quarum alterutra ad id præstandum satis esse posset. Sed quoniam gratiæ excitanti, quâ volunt & conantur justis, non semper adjungit Deus gratiam efficacem, quâ plenè velint & plenè conentur, nec ullus tamen gratiæ sufficienti ad illum effectum consentit, comparatione cujus dicitur sufficiens, sine efficacis auxilio; idèò deest sæpe justis volentibus & conantibus per gratiam excitantem efficax gratia, quæ una complectitur omnia ad agendum necessaria; adeoque illis justis gratiam sufficientem habentibus, sed non plenè consentientibus, manda-

Dei non sunt possibilia, eâ possibilitate quæ complectatur omnia ad agendum necessaria; licet alio possibilitatis genere, Thomistico scilicet, possibilia semper sint.

Ex his colligi licet, attulisse Petrum cum præsumsit gratiam illam excitantem ad mortem pro Christo subeundam. Tunc enim Petrus & volebat & conabatur; *Nec defuit ipsi*, ut ait Aug. de gr. & lib. arb. c. 17. *parva & imperfecta charitas, quando dicebat Dominus: Animam meam pro te ponam; putabat enim se posse quod se velle sentiebat. Et quis istam, etsi parvam, dare cõperat charitatem, nisi ille qui præparat voluntatem, & cooperando perficit, quod operando incipit?* Quamvis autem parva illa charitas, quæ Petro non defuit, non esset sufficiens Moliniano sensu ad mortem pro Christo subeundam, quia fieri non potuit ut cum illâ solâ mortem pro Christo re-ipsâ subiret, ac propterea Petrum tunc Augustinus infirmum fuisse, & mori pro Christo non potuisse, pronuntiet; nihilominus tamen rectè sufficiens dici potest Thomistico sensu. Omnis enim gratia excitans in voluntate recepta, qualis illa fuit, sufficiens est apud illos, ut testatur Alvares loco jam citato. Et reverà illa Petri charitas, quamvis infirma, satis fuisset ad mortem pro Christo oppetendam, nisi proprio vitio Petrus vitæ cupidior, timidior, ignavior, sui amantior fuisset, ut supra notavimus.

Quòd si quis quærat an infirmam



mam illam charitatem tum habuerit Petrus, cum Christum negavit: respondeo id liquidò sciri non posse, cum nec ex Scripturâ, nec ex Patribus satis certa habeamus argumenta, ut præcisè definiamus quid tum in mente Petri sit actum. Quare nihil absurdius fieri potest iis, qui quod in Epistolâ meâ post Chrysostomum & Augustinum dixi, Magnam esse veritatem, Scripturarum & Patrum auctoritate sancitam, Petro justo defuisse gratiam sine quâ nihil possumus, ita contra mentem meam interpretantur, quasi Petro defuisse dixerim omnem omninò actualem gratiam, sive sufficientem, sive efficacem.

Ego: ne magnam esse veritatem

dicerem, Scripturarum & Patrum auctoritate definitam, Petro omnem gratiam actualem defuisse, cum eo nihil incertius esse, nihil in Patribus, in Scripturis obscurius & ignotius judicem? Affuit planè, si voluit & conatus est; sed an voluerit & conatus sit mihi quidem planè dubium est. Dubia verò pro certis affirmare à Theologi officio alienum censeo. Quamobrem id de quo mihi non constabat non dixi: illud dixi, Petro gratiam sine quâ nihil possumus defuisse, quia defuit gratia efficax, de qua verè dicitur, sine illa nihil boni fieri posse, ut Conciliorum & Patrum continentibus testimoniis in priori hujus Dissertationis Parte ostendimus.

## A R T I C U L U S X V.

*Utrum adsit in omnibus generatim peccatis gratia excitans, sive sufficiens Thomistica sensu.*

Cum quaeritur utrum adsit gratia sufficiens actualis in omnibus peccatis, id quaeritur utrum adsint in omnibus peccatis mortalibus & venialibus piæ cogitationes quibus peccatum innotescat, pia desideria quibus ad illud fugiendum voluntas excite- tur: de quo quid sentiamus, duabus conclusionibus aperiemus; quarum hæc prima sit.

Hominibus ignorantibus, errantibus, incogitantibus, nec volentibus, nec conantibus evitare peccatum, non adest cognitio, scientia, cogitatio de pec-

cato divinitus immissa; non adest voluntas & desiderium fugiendi peccati; non adest conatus ad abstinendum à peccato, id est, non adest gratia excitans, sive sufficiens actualis.

Non arbitror argumentis opus esse ad illam conclusionem stabilendam. Quid enim per se manifestius, quàm non adesse cognitionem ignorantibus, scientiam errantibus, cogitationem incogitantibus, voluntatem nolentibus, conatum non conantibus?

Hinc habes quàm absurdè nonnulli

nulli ex summi Pontificis Innocentii X. Constitutione gratiam actualem in omnibus peccatis semper præsentem eliciant. Quid enim? Damnavit summus Pontifex hanc propositionem: *Quædam Dei præcepta hominibus justis volentibus & conantibus secundum præsentem quas habent vires, sunt impossibilia; deest quoque gratia quâ possibilia fiant.* Quid inde? Ut liberalissimi simus in adversarios: ut non urgeamus verbum, iustis, de omnibus iustis intelligendum, cum propositiones indelinitæ in materiâ dogmaticâ pro universabilibus accipiuntur; adeoque eam doctrinam à Pontifice esse damnatam, quæ legem Dei ita omnibus nunc hominibus impossibilem esse contendit, ut nulli prorsus ei observandæ pares sint, utcumque spiritu Dei adjuventur. Ut demus gratiæ nomen in hac Propositione de actuali, non de habituali, accipi debere. Quamquam ne cogitavit quidem Pontifex de eo definiendo, utrum per gratiam habitualement, an per actualem mandata Dei sint possibilia. Quid inde tandem efficiunt? Nimirum iustis volentibus & conantibus adesse gratiam actualem. Si hoc unum postulant, ultro concedimus. Sin autem volunt, ut etiam nec volentibus nec conantibus adsit: non vident, primum quidem propositionem à Pontifice damnatam *de volentibus & conantibus* esse, adeoque ad nolentes & non conantes ridiculè detorqueri. Deinde pugnantia se loqui, & intestinum dillidium in

summi Pontificis verba intrudere. Ut enim nec volentibus nec conantibus adsit gratia actualis, tam repugnat, quàm adesse voluntatem non volentibus, conatum non conantibus. Quid est enim gratia actualis, nisi voluntas, nisi conatus? Adest ergo volentibus & conantibus; fatemur. Ergo etiam nec volentibus nec conantibus. Quis tam ineptam, tam sibi adversantem consecutionem non irrideat, non aspernetur, non summi Pontificis Constitutioni contumeliosam judicet?

Altera conclusio est, quosdam etiam iustos peccare per ignorantiam, id est, carere cognitione peccati quod committunt; peccare per errorem, id est, approbare falsa pro veris; peccare per incogitantiam, id est, non cogitare de peccato quod admittunt; denique non habere semper boni faciendi desiderium, nec conatum, siue quia latet an iustum sit, siue quia non delectat.

Quis enim de se spondere audeat, nunquàm ullum sibi subrepisse peccatum per improvisas fratrum offensiones, per tacitas libidinis illecebras, per occultas sensuum insidias, per ignorantiam, per errorem, per subitos æstus, per linguæ intemperantiam, quin præcesserit in animo per piam cogitationem peccati illius cognitio, infirmitatis suæ notitia, excitatio ad orandum, piuum desiderium voluntatem à peccato retrahens?

Quid causæ superesset Sanctis,  
ut

ut ad Deum assidue clamarent:  
*Ab occultis meis munda me, Domine, & ab alienis parce servo tuo,*  
si nullum unquam peccatum occultè sese in animum insinueret?  
Quid causæ esset, cur ita Dominum deprecarentur? Et ignorantias meas ne memineris; si nulla per ignorantiam culpa posset admitti? Cur vigilarent adversus Diaboli insidias, si peccare non possent, quin priùs illa pervigili cogitatione excitarentur?

Quis sibi in mentem possit inducere nunquam sibi cognitionem peccati defuisse, qui præclarum illum Augustini locum meminerit, cujus veritatem omnes Sancti ex intimo sensu pietatis agnoscunt. *In multis*, inquit, *ille de sp. & litt. c. 36. offendimus omnes, dum putamus Deo, quem diligimus, placere vel non displicere quod facimus, & postea per Scripturam ejus sive certâ & perspicuâ ratione commoniti, cum didicerimus quod ei non placeat, pœnitendo deprecamur ut ignoscat. Plena humana vita est documentis talibus.*

Qui potest illa doctrina præviarum cogitationum in omnibus peccatis à peccato retrahentium consistere cum illâ Concilii Palæstini definitione, quâ proscritur propositio illa Cælestii: *Oblivionem & ignorantiam non subiacere peccato, quoniam non secundum voluntatem eveniunt, sed secundum necessitatem?*

Potèd & ignorantia sæpe peccari, & tamen illa peccata voluntate fieri, præclare explicat

Aug. lib. 1. Retr. c. 15. *Nam & qui nesciens peccavit, non incongruenter nolens peccasse dici potest, quamvis & ipse quod nesciens fecit, volens tamen fecit. Ita nec ipsius esse potuit sine voluntate peccatum.... Quia voluit ergo, fecit; etiamsi non quia voluit, peccavit.... Ita nec tale peccatum sine voluntate esse potuit, sed voluntate facti, non voluntate peccati. Quod tamen factum, peccatum fuit: hoc enim factum est, quod fieri non debuit.*

Quamlibet multa hîc conferre possem Patrum testimonia, quibus disertè docent, sæpe sine præviâ peccati cognitione peccari: sed in re tam perspicuâ satis erit unumquemque hîc admonere, ut adeat conscientiam suam, ut vitam suam vel per unum diem diligenter exploret; nec ullum fore puto, qui affirmare audeat de omnibus culpis venialibus, quæ innumeræ subrepunt vel sanctissimis viris, illis se cogitationibus semper admonitum fuisse. Imò verò longè plurima sunt in quibus omnes delinquimus, quæ nobis nunquam detegentur, nisi cum Deus revelabit operata tenebrarum, & manifestabit consilia cordium. Quò quisque puriorem conscientiam habet, eò plures ejusmodi detegit nævos, sicut in solis lumine volitantes pulveris minutæ deprehenduntur. In communi verò vitâ latent hæc omnia, & à nescientibus ferè committuntur.

Pœnaliter peccare se fatetur Augustinus, si quando plus illum cantantis sonus, quam psalmi sen-

sensus delectaret, Religioni ducebat purissimus aniquus vel lucem ipsam aspicere alicujus confectione voluptatis; itemque oculos in araneam, in leporem transeuntem, subitâ quâdam curiositatē conjicere, culpam esse putabat. Idem ut adversus Pelagium probaret, non idcō credendum esse Abelem omnis peccati expertem fuisse, quod nulla ejus peccata Scriptura commemorat: *Quasi verò*, inquit lib. de nat. & gr. c. 37. *commemorandum fuerit, si Abel, quamvis meritis justus appellatus est, paulò immoderatiùs aliquando risit, vel animi remissione jocus est, vel vidit aliquid ad concupiscendum, vel aliquando immoderatiùs poma decerpit, vel plusculo cibocrudior fuit, vel cum oraret cogitavit aliquid unde ejus in aliud advocaretur intentio, & quoties illi ista ac similia multa subreperint.*

Interrogentur nunc plurimi christianæ licet ac probatæ vitæ, num ex illis multa inter culpas, unquam habuerint; nunquam vel cogitasse respondebunt. Quid officiosa vel jocosa mendacia loquar, quid verba otiosa, otiosas cogitationes, otiosas actiones, quam multi in peccatis non habent, & per totam ferè vitam in illis levibus culpis sine ullo conscientie morsu perseverant? Quis porro confidat omnia se suæ professionis officia nosse, nec ulli se unquam per ignorantiam defuisse? Magnus ille est quisquis illud de se polliceri cum veritate potest. Sed metuo, ne qui spondeat, ob id-ipsam magnis non

sic; quia istud de se profiteri audeat, nec profundas humanæ mentis tenebras satis cognitās habet.

Repugnat igitur Patrum auctoritati, repugnat Christianorum omnium sensibus illa præviarum peccati cogitationum in omnibus culpis sententia; nec minùs abhorret à veritate, ut adsit semper pius voluntaris morus, qui nullus esse potest, si desit cogitatio. Omitto innumera Patrum loca, in quibus asserunt, liberum arbitrium solum nonnunquam esse cum peccat, & nullatenus gratiæ auxilio, cum peccat, adjutum. Unus sufficiet in præsens Augustini locus, qui exat l. 6. op. ult. contra Jul. c. 41. *Nec hujus, inquit, concupiscentiæ reatus nisi in renascentibus solvitur, ut eo post absolutionem non inquinetur, nisi qui ei ad perpetrandum opus malum spiritu adversus eam vel non concupiscente, vel non fortius concupiscente consentit.*

Nec verò, prævias illas pias cogitationes & pios motus divinitus immisos in omnibus peccatis præsentēs à me negari, quicquam mirari debet, cum ab adversariis meis vulgò negentur. Negavit in scriptis suis Illustrissimus Carnotensis Episcopus, gratiam actualem semper adesse, cum ad multas tentationes superandas, ad multa peccata mortalia vitanda, gratiam habitualement fati esse contendat. Sic enim illo tr. de gr. qu. 4. a. 10. *Ut nunc se res habent, ad naturæ totam le-*

gem, tum diu, tum verò usque ad finem vitæ, implendam, præter habitualem requiritur actualis. Non tamen auxilia ista requiruntur ad vincendas singulas tentationes (nisi fortè aliqua sit vehementissima) sed ad multas; quia Concilia & Patres loquuntur de auxiliis ad perseverandum, ad persistendum & perdurandum necessariis. In quo quidem homo iustus, ET SI FORTE OMNIBUS ACTUALIBUS AUXILIIS DESTITUTUS, adhuc differret ab eo, qui nullam gratiam haberet, neque actualem, neque habituales, quòd homo iustus beneficio gratiæ habitualis possit aliquas saltem tentationes vincere, etiam graves; alter verò nullas posset, nisi fortè leves. Item si sermo sit de aliquibus solum peccatis mortalibus, ad hoc sufficere potest habitualis gratia re-ipsa per se & sine actuali, ubi nulla est vehementissima tentatio.

Hanc doctrinam duo ex Censoribus, nimirum P. Nicolai, & Alphonsus le Moine, catholicam esse & orthodoxam gravi auctoritate pronuntiarunt. Locus Alphonsi habetur in manuscripto ejus suffragio: Nicolai verò eandem sententiam sic expressit in suo nuper edito: Dicant hoc ii qui ad aliquos actus habituales illum statum se-ipso sufficere sine concursu actuali sentiunt: quia non propterea quidquam putant quod ex parte divinæ requiratur ad id agendum quod occurrit, ut in præstis lectionibus à se traditum, & præpostero sensu à quibusdam detortum, vel inauritus intellectum, nitidissime his commissis explicatis Illustrissimis Car-

netensis. Ego, quid de ipsa sentiendum sit, hoc loco non dico. Tantum illud colligo, apud adversarios meos pro certo non haberi, gratiam actualem in omnibus peccatis etiam mortalibus adesse, eamque possibilitatem, quâ iusti semper possunt evitare peccata, semper ipsis conferri per gratiam actualem. Quare, si ipsis non consentientibus modò, sed etiam approbantibus, licet defendere tantam vim esse gratiæ habitualis, ut nonnunquam ejus unius ope habeatur illa Moliniana potestas cui nihil desit ad agendum necessarium; quid est quod ægrè ferant eidem habituali gratiæ tribui nonnunquam eam potentiam Thomisticam, quæ non contempletur omnia necessaria ad agendum, & quæ nunquam in actum prodeat sine efficacis gratiæ præsidio? Nam si hoc contendant, Molinisticam potestatem rectè tribui habituali gratiæ, Thomisticam non posse, quis illos non videat non considerare, sed quasi sortiri quid dicant: nec sic tamen vim istius argumenti declinabunt. Consequens enim semper erit, gratiam actualem non semper in omnibus peccatis & tentationibus adesse.

Negant etiam illas prævias cogitationes quicunque sufficere dicunt, affuisse aliquandò in peccato veniali piam cogitationem & pium motum, cui si non consenserimus, meritò in aliis actuali gratiâ privemur. Ejus sententiæ videtur esse Nicolai, qui in Censorio Suffragio illa Chrysostomi verba

verba de Petro: *Nullo fuitus est auxilio*, sic explicat: *Quod enim Petrum nullo fuitum auxilio adstruit Chrysostomus ne caderet, ad hoc momentum spectat, quo negavit; quia illo se privaverat cum presumpsit.* Negant quicunque prævias illas cogitationes & pios motus tantum in gravibus tentationibus requirunt, quæ sententia nunc inter Molinistas, prioris opinionis absurditate commotos, serpere incipit. Negant quicunque contendunt istiusmodi motus in iis tantum culpis semper reperiri, quæ neque per errorem, neque per ignorantiam, committuntur; quam sententiam nonnullis ex ipsorum numero probari video. Negant denique universi Molinistæ, qui libenter numero suo aggregarunt unum ex doctoribus qui gratiam habitualement sufficiens esse Thomistice sensu, actualementque gratiam sæpe dari, non semper, publicè professus est.

Soli ergo Jesuitæ nunc urgent illud præviarum cogitationum in omnibus peccatis commentum: verum illud ipsi pessimè tumentur. In eas enim angustias redacti sunt, ut gratiam actualement sitam doceant in cogitationibus de quibus non cogitur; in pijs motibus quos non sentiamus: quasi vel fieri possit ut aliquis incogitans cogitet, vel eâ cogitatione ad non peccandum adjuvetur, quam ipse non advertat; & idè reus sit apud Deum, quia piæ cogitationi quam non advertit non consenserit. Quo quidem nihil absurdius dici posse arbi-

tror; & idè Cardinali Bellarmino meritò illud exploditur 1. 2. de gr. & lib. arb. c. 6. Non potest, inquit, ullus converti sine gratiâ præveniente. Gratia verò ista præveniens non semper adest, ut vel experientia ipsa testatur: non enim sentimus assidue nos illuminari à Deo, aut immitti bona desideria quibus excitemur ad conversionem. Non igitur semper habemus auxilium sufficiens ad conversionem. Dicunt aliqui, Deum quidem perpetuò pulsare ad ostium cordis, & peccatores vocare; sed eos alius rebus intentos non percipere vocacionem Dei. Sed hæc responsio cum ipso experimento apertissime pugnat. Nam cum vocatio, pulsus, tractus, excitatio illa Dei, sit actio nostra, quamvis non libera, nempe bona cogitatio bonumque desiderium repente ac divinitus immissum, quomodo potest fieri ut non sentiat in nobis, si sit non solum in nobis, sed etiam à nobis.

Exploditur item ab Illustrissimo Lescotio tr. de gr. q. 2. a. 11. ubi cum sibi objecisset, peccatores non sentire in se-ipsis singulis momentis vel horis divinas motiones vel inspirationes, non ergo eos habere gratiam sufficientem: non respondet cogitationes illas tales esse, ut sæpe non advertantur; verum consequentiam negat. Nam, inquit, ut gratia dicatur sufficiens, necesse non est eam dari singulis momentis vel horis, sed satis est quod detur certis temporibus: sicut etiam rectè dicimur amicum sufficienter admonere officii sui, etsi eum quidem non perpetuò admoneamus.

Qui-

Quibus ex verbis intelligi licet, primum ex Lectorii sensu non adesse gratiam actualem in singulis tentationibus; aliàs singulis horis adesset, quod ab ipso negatur: vix enim fieri potest ut non singulis horis aliquà peccati tentatione sollicitemur: deinde ex eodem non adesse gratiam actualem, cum nullæ divinæ motiones vel inspirationes sentiuntur.

Nec movere quemquàm debet, quòd nonnumquàm Augustinus asserit, Deum miris & occultis modis agere ut velimus, & oc-

culto ac ineffabili modo pias cogitationes immittere. Modum enim operationis istius arcanum esse dicit Augustinus, non ipsam operationem. Itaque sæpe fieri potest, ut bonam aliquis cogitationem habeat, & tamen unde habeat nesciat: vel omnino ignoret, aut saltem dubitet an bona sit. Sed illud fieri nullo modo potest, ut aliquis cogitet, & se tamen cogitare omnino nesciat, ut illud peccatum ignoret de quo per illas cogitationes se excities sit admonitus.

## A R T I C U L U S X V I.

### *De peccatis mortalibus accuratius.*

**P**Lura non dicam ad refellendum nuperum illud Molinistarum commentum: unum tantum admonebo. Cum hic dixi audiendos non esse qui in omnibus peccatorum tentationibus bonas illas cogitationes & pias affectiones tam liberaliter largiuntur, id me de omnibus generatim peccatis intelligere, quatenus hoc nomine & venialia & mortalia comprehenduntur.

De venialibus certa res est & frequentissima; de mortalibus certè longè infrequentior. Non video tamen quibus rationibus adductus quisquam certò definire possit, nemini unquam, dum in peccatum morale prolapsus est, defuisse illius peccati cognitionem, ejusque vitandi desiderium divinitus immissum. Equis e-

nim spondeat propter aggesta multa venialia peccata, propter vitam negligenter actam, propter occultam superbiam, tamen venialem, divinum lumen non se penitus aliquandò menti in gravi tentatione subtrahere? Quis spondeat pueris illis baptizatis quidem, sed apud hæreticos educatis, cum in primà ad hæresim adhæsione peccant mortaliter, semper adesse illius peccati cognitionem cœlitus inspiratam? Quis solidà ratione decernat malè institutos pueros nunquàm baptismi innocentiam amittere violatà lege naturæ, quin illius criminis cognitionem à Deo prius acceperint?

Quid illi qui Ecclesiæ bona & dignitates vel capessunt vel ambiunt, vel ad hæreses & propin-

quos



quos carnali affectu sæpe transmittunt? An illos semper hos conscientia morsus experiri, & illius flagitii notitia per gratiam illustrari pronuntiare velles? Quid porro de illis dicemus, qui falsâ illâ persuasione imbuti sunt, licitum illud & tutum in moribus esse, quod alicujus Doctoris Theologi auctoritate nitatur? An quoties illi vel cæcis cæci ducatum præstant, toties vel ipsi à peccato immunes erunt, vel de eo divinitus admonebuntur? Quid illi quos Bernardus mirificè describit, *serm. 2. de Assumpt. Vis videre, inquit, mundatam, ornatam, & vacantem domum? Hominem intrare qui confessus est & deseruit manifesta peccata precedentia ad iudicium, & nunc solas movet manus ad opera mandatorum, corde penitus arido, ductus consuetudine quâdam, planè quasi vitula Ephraim docta diligere trituram: exteriorum videlicet, quæ ad modicum valent, nec unum jota præterit; sed camelum glutit, dum culicem liquat. In corde enim servus est propria voluntatis, cultor avaritiæ, gloriæ cupidus, ambitionis amator, aut hæc omnia, aut singula intus vitia fovens, & mentitur iniquitas sibi. Videas enim interdum sic palliatum hominem, ut seducat etiam semet-ipsam, non attendens vermem, qui interiora depascitur: manet enim superficies, & salva sibi omnia arbitratur.*

In hunc statum utinam non multi imprudentes prolaberentur! Sed quis illos semper de casu suo admonitos afficeret, cum se

cecidisse ad mortem usque frequenter ignorent? Nonne propter occultos ejusmodi lapsus, de quibus nemo potest esse securus, dicebat Apostolus: *Nihil mihi confisus sum, sed non in hoc justificatus sum?* Alioqui, si semper quisque dum cadit advertit, quid est quod se quisquam cecidisse nesciat, aut se stare certò non confidat? Magis perspicua sunt quæ per corpus committuntur peccata; sed illa quæ in intimis animi recessibus peraguntur, quàm obscura nonnunquam, quàm soli sæpe Deo nota sunt?

Aliquos ad infernum viventes descendere dicit Augustinus, quia scientes & prudentes peccant: *Cum scis, inquit Psal. 54. malum esse quod facis, & tamen facis, nonne virus descendis ad inferos?* Sed ibidem quosdam esse tradit, qui non nisi mortui descendant; quia quod agunt malum ignorant.

Definiam ergo qui volet; neminem unquam lethale flagitium sine præviâ illius cognitione committere; mihi satius videtur divinæ justitiæ profundum non scrutari, sed pertimescere. *Neque enim frustra dictum est, inquit; Aug. de pecc. mer. & rem. lib. 1. c. 21. Judicia tua sicut abyssus multa. Cujus abyssus altitudinis velox expavescentis exclamat Apostolus: O Altitudo &c. Valde ergo parvum sensum habemus ad discutendam justitiâ judiciorum Dei, ad discutendam gratiam gratuitam, nullis meritis præcedentibus non iniquam, quæ non tam moveat cum præstatur indignis, quàm cum aequè indignis*

aliis denegatur. Nihil autem in divinis judiciis inscrutabilius, ut idem ait de dono pers. c. 9. quàm cur ex duobus piis illi donetur perseverantia usque in finem, huic autem non donetur; quamvis illud fidelibus debeat esse certissimum, hunc esse ex predestinatiis, illum non esse.

Ab hac mente non abhorret Holdenus in quâdam schedulâ satis scitâ, quam inscripsit, Unionis & consensionis media, etiam cum à me dissentire se putar. Statuit enim: Neminem demonstrare posse, iustum aliquem in quâcunque gravi tentatione positum; destitutum esse omni gratiâ actuali. Quò satis indicat, demonstrari etiam non posse, gratiam actua-lem in omni gravi tentatione semper adesse: quod unum tamen hoc loco contendo. Non enim mihi propositum est, id quasi pro certo dogmate constituere, quibusdam iustis, tum cum in peccatum mortale cadunt, aliquandò gratiam actualem deesse; sed id tantum declarare, nullam mihi in mentem venire rationem, cur id non aliquandò possit contingere: idèòque super eâ re malle me Ecclesiæ definitionem expectare, quàm id definire, cuius mihi ratio non constet.

Interim tamen totam hanc de peccatis ignorantie disputationem libet egregio Bernardi loco ad Hugonem concludere; quo illa omnia quæ hîc dicimus in summam colligit. Veritatis, inquit ille adversus nescio quem, quî per ignorantiam peccari ne-

gabat, testimoniis paucis & manifestis manifestum mendacium confutetur. Is forsitan, qui asserit non posse peccari per ignorantiam, nunquàm pro sui ignorantii deprecatur, sed potius Prophetam irridet deprecantem & dicentem: Delicta juventutis mee & ignorantias meas ne memineris. Forsitan & reprehendet Deum exigentem pro peccato ignorantie satisfactionem. Si ignorantia nunquàm peccatum est, cur dictum est in Epistola ad Hebræos, quia in secundo Tabernaculo semel in anno solus Pontifex intraret, non sine sanguine, quem offerret pro sui & populi ignorantia? Si peccatum ignorantie nullum est, non ergo peccavit Saulus, cum persecutus est Ecclesiam Dei; quoniam quidem ignorans hoc fecit, manens in incredulitate. Bene itaque faciebat quod erat blasphemus, & persecutor, & contumeliosus, quod erat spirans minarum & cadis in discipulos Domini; in hoc quippe abundanter emulatores existens paternarum suarum traditionum. Non ergo debuit dicere: Misericordiam consecutus sum, sed mercedem recepi; quippe quem ignorantia à peccato reddebat immunem, insuper & emulatio remunerabilem indicabat? Si, inquam, ignorantia nunquàm peccatur; quid causamur adversus occisores Apostolorum? Quoniam quidem non solum malum esse nescierunt interficere illos, sed insuper quoque id faciendo arbitrati sunt obsequium se præstare Deo.

Verum quidquid tandem de præviis illis cogitationibus statuatur, nihil hoc prorsus Epistolæ

meæ propositionem attingit, quæ negat, sed tantum efficacem, ut omnem actualem gratiam non supra ostendimus.

## ARTICULUS XVII.

*Nullam gratiam necessariam esse ut homini peccatum imputetur.*

**E**X hoc capite sequitur alterum, nimirum gratiam Dei necessariam non esse, ut ei qui legem Dei violarit, peccatum imputetur. Integrum volumen de hoc uno argumento facile confici potest; quædam hinc tantum mihi breviter indicasse satis erit.

1. Ex Augustini mente infideles Judæi excæcati, omni prorsus gratiâ caruerunt; ut innumeris locis probari potest, quam non dubiam esse S. Augustini doctrinam Vasquesius agnoscit; & tamen & infideles, & Judæi, & excæcati, à peccato non excusantur.

2. Ut vidimus articulo præcedenti, multis saltem in peccatis venialibus deest pia cogitatio, & pius motus, id est, gratia actualis: & tamen isti venialiter peccant.

3. Plusquam vigesies Augustino à Pelagianis objectum est, in ipsius sententiâ injustè hominibus peccata imputari, & mandata esse impossibilia; & tamen nunquam idèd possibilia dixit mandata, idèd justè imputari peccata, quia nunquam deest gratia actualis.

4. Negat disertè Augustinus gratiæ defectum à peccato excusare; sic Ep. 105. *Sed excusabunt se, inquit, homines qui nolunt rellè*

*& fideliter vivere, dicentes: Quid nos fecimus, qui malè vivimus; quandoquidem gratiam unde bene viveremus non accepimus? Et paulò post: Quòd de nobis sit querela, quòd Deum offendamus malè vivendo, cum illius voluntati nemo possit resistere, qui nos obduravit misericordiam non præstando? Quid ad hoc respondet Augustinus? An illos accepisse gratiam actualem & pias cogitationes? Si ergo, inquit, illos non pudet hâc excusatione non nobis, sed Apostolo contradicere, cur nos pigeat eis quod dixit Apostolus idem atque identidem dicere: O homo, tu quis es qui respondeas Deo? Idem verò qu. super Deuteronom. q. 50. adhuc luculentius: Simul ostendit Moyses, & sine adjutorio Dei homines intelligere & obedire NON POSSE oculis cordis & auribus cordis; & tamen, si adjutorium Dei desit, non idèd excusabile esse hominis vitium: quoniam judicia Dei, quamvis occulta, tamen justa sunt. Eodem modo Prosper eam excusationem refellit in Carm. de Ingr. c. 32.*

*Non autem rellè nec verè dicitur, illos*

*Qui sunt exortes divini muneris, & quos*

*Gratia neglexit, degentes mortis in umbra,*

*Pecca-*

Peccati non esse reos, quia recta  
gerendi

Non data sit virtus.

Denique sic retundit illam excusationem Fulg. de ver. præd. l. 2. c. 26. Solent homines in tenebris propria cecitate exstantes, cum audiunt gratiâ Dei præveniri atque immutari hominum voluntates, videntque se pro tenebroso cordis perveritate culpâri, excusationi suæ de justâ Dei voluntate injustum captare suffragium, ut exinde majus recipiant punitionis augmentum. Accusant enim Deum à quo gratiam non accipiunt; & seipsos excusant, quos Deum justum vitio suæ iniquitatis offendunt: ipsi suis manibus inferunt plagas, & medico non dubitant irrogare calumniam. Quod toto deinde capite persequitur, ostenditque peccatores idèò justè culpâri, non quia semper pias cogitationes & pia desideria accipiunt, sed quia suâ voluntate peccant.

5. Si nemo peccaret, nisi qui gratiam actualem à Deo accepisset, falsum planè esset quod S. Augustinus post Apostolum sexcenties docuit: *Litteram sine spiritu occidere: Legem sine gratiâ fuisse magis reos: Legem apud eos, quos non adjuvat gratia, esse virtutem peccati: Legem iis intulisse mortem, quos Dei gratia non adjuvit.* Sed contrâ dicendum erit: Legem sine gratiâ reos facere non posse, sed cum gratiâ sufficiente semper facere: Legem sine gratiâ neminem occidere, sed cum gratiâ sufficiente semper occidere: Legem iis, quos non adjuvit

gratia, mortem non intulisse, sed illis semper inferre mortem, quos gratia sufficiens adjuvat.

6. Falsum erit quod ait Aug. de spir. & lit. c. 3. *Neque liberum arbitrium quidquam nisi ad peccandum valet, si lateat veritatis via.* Sed contrâ Augustino reponendum erit: Liberum arbitrium nihil ad peccandum valet, si lateat veritatis via.

7. Falsum erit quod ait Aug. l. 3. ad Bonif. c. 8. *Liberum arbitrium captivatum, non nisi ad peccatum valet; ad justitiam verò, nisi divinitus liberatum adjutumque, non valet.* Sed contrâ adversus Augustinum statuendum erit, liberum arbitrium ad peccandum nihil valere, nec peccare posse, nisi divinitus adjutum.

Denique, ut alia innumera prætermittam, qui gratiam actualem sufficientem ad peccandum necessariam statuunt, in hanc incurrunt horribilem planè consequentiam, Christum idèò pro reprobis mortuum, ut illis promereretur gratiam, sine quâ peccare non possent, & quâ acceptâ infallibiliter peccant. Verùm ad alienandos ab hac doctrinâ Theologos, sufficit quòd Patrum auribus prorsus inaudita sit, nec illius apud ipsos ullum omninò vestigium reperiat.

Quæres verò, an hominibus omni prorsus gratiâ destitutis mandata Dei impossibilia fuerint? Respondeo neutiquàm. Nam ex Augustino illud est in potestate nostrâ quod fit cum volumus, non fit cum nolumus. Eiusmodi

semper est observantia mandatorum; servat ea quicumque servare vult, cum ista observantia nihil aliud sit, quam firma voluntas observandi mandata. Quare quæ voluntate constant, nunquam impossibilia dici possunt: sunt enim semper cum volumus. Hinc fit ut de hominibus à gratiâ planè desertis verè dicatur, peccare illos, non quia bene agere non possunt, sed quia nolunt. Possent enim non peccare, si vellet; totaque illorum impotentia nihil aliud est, quam mala voluntas, mala cupiditas, & animus terrenis rebus constanter affixus. Id vidit Cardinalis Bellarminus, l. de gr. & lib. arb. c. 15. qui cum sibi objecisset, *Conversionem hominis non fore in ipsius potestate, si semper requiratur excitatio præveniens, cum excitatio illa non sit in hominis potestate;* respondet, *Conversionem semper esse in potestate liberi arbitrii, quoniam potest semper converti quando voluerit. Id enim dicitur esse in potestate, ut Aug. definit, l. l. de sp. & litt. c. 31. & l. 5. de civ. Dei c. 10. quod adest quando volumus, & quando nolumus non adest. Quo sensu admittit Augustinus ibid. fidem esse in potestate liberi arbitrii, quia credit homo si vult, & si vult non credit. Caterum ipsum velle credere aut converti non potest homo habere, nisi per gratiam prævenientem acceperit ut possit.*

Quare Doctores illi, quos ad admittendum in infidelibus sufficientem gratiam actualem compulit istius argumenti quasi ter-

riculum, quod alioquin mandata ipsis forent impossibilia, non satis distinxisse videntur duplex impotentiae genus; quorum alterum excusat à peccato, alterum adeò non excusat, ut etiam augear. Alia est enim impotentia à voluntate planè sejuncta, quæ manet etiamsi nolis, quam pro voluntate non exuas, quam odisse, nec tamen deponere, valeas. Ejusmodi est impotentia ambulandi in homine cui fractæ sint tibie, impotentia scribendi in homine cui præcisæ sint manus, denique impotentia non moriendi in homine mortali. Non enim, etiamsi velit homo, non morietur, nec ambulabit ille cui crura contracta sunt, nec scribet ille cui præcisæ manus, etiamsi maximè id optent ac velint. Hæc impotentia planè excusat à peccato. At verò longè dissimilis est illa impotentia, quâ peccatores ab observandis Dei mandatis præpediuntur: in ipsâ enim voluntate posita est, imò nihil aliud est quàm constans peccandi voluntas; nihil aliud est quàm depravatus cordis affectus, terrenis rebus penitus addictus. Itaque non hæc impotentia est, sed pravitatis. Non potest in hoc statu homo divinis obsequi mandatis: utique, sed quia non vult, quia totus ad se conversus est, quia totus à Deo alienus est. Amare Deum non potest, sed quia creaturam amat & amare vult, & in hoc amore ita pertinax est, ut ab eo nolit desistere, nolit avelli. Absurdum autem planè fuerit, ut

ut idèd quis à criminibus sit immunis, quia toto voluntatis impetu incumbit in crimina.

Postremam hanc impotentiam à peccato non excusare, Bernardus mirabiliter ostendit. *Nam quod surgere, inquit ille in Cantica Serm. 81. anima per se jam non potest, quæ per se cadere potuit, voluntas in causa est; quæ corrupti corporis vitioso ac vitioso amore languescens & jacens, amorem pariter justitiæ non admittit. Ita, nescio quo pravo & miro modo, ipsa sibi voluntas peccato quidem in deterius mutata necessitatem facit, ut nec necessitas, cum voluntaria sit, excusare valeat voluntatem; nec voluntas, cum sit illecebra, excludere necessitatem. Et iterum: Premebatur jugo non alio quàm voluntarie cujusdam servitutis: & erat pro servitute quidem miserabilis, sed pro voluntate inexcusabilis. Ubi nam, queso, hanc necessitatem sentis, nonne in voluntate? Non ergo parùm firmiter vis quod & necessario vis. Multùm vis quod nolle nequeas, nec multum oblectans. Porro ubi voluntas, ibi libertas. Atque utinam prohibitio hæc & hæc compulsio ita esset violenta, ut non esset voluntaria! Forsitan enim sic possem excusari; aut certè ita esset voluntaria, ut non esset violenta. Profeclo enim sic possem corrigi. Nunc verò nusquam exitus misero patet, quem & voluntas, ut dixi, inexcusabilem, & incorrigibilem necessitas facit.*

Nemo difficile id in Adamo percipiat, postquam ab amore

Creatoris in sui defluxit amorem. Nam si in suo amore contumaciter hærens, idèd converti non poterat, quia se nimis amabat; quis illum idèd à peccato liberet, quis non eam impotentiam ad augendum ejus peccatum, potiùs quàm ad minuendum, valere fateatur? Difficiliùs id in ejus posteris intelligimus, quia peccatum originale ferè tanquàm ab illis alienum cogitamus. At si attendimus per originis labem ad ipsos pertinacem illum sui & creaturarum amorem simul esse transmissum, justoque licèt arcano Dei judicio etiam in illis pravam & vitiosum esse, faciliùs intelligemus, si quid ex illo corrupto fonte profluat, non idèd innoxium esse, quia aliquo modo necessarium; sed idèd culpandum, quia voluntarium: istam enim necessitatem nihil aliud efficit, quàm corrupta & depravata voluntas. Atque hæc in præsens de isto argumento sufficient, quod uberiùs prosequi non est hujus loci.

Hanc Dissertationem tres tantùm in partes distribuere initio nobis propositum fuerat, verùm cum tertia longiùs jam processisset quàm putaramus, non alienum visum est reliquas questiones, Scholasticæ Theologiæ minùs affines, in Quartam potiùs partem rejicere, ne hujus Tertiz Partis abnormis magnitudo ab aliarum modo nimium abhorreret.

# DISSERTATIONIS

## QUARTA PARS.

In quâ variæ quæstiones de mandatorum possibilitate explicantur.

### ARTICULUS I.

*Quam gratiam intellexerit Augustinus, sufficientem an efficacem, cum in lib. 2. de pecc. mer. & rem. dicit, voluntate humanâ, gratiâ adjuvante divinâ, posse homines in hac vitâ esse sine peccato?*

CUM in hanc partem rejecimus varias de possibilitate mandatorum quæstiones, quæ magis ad Sanctorum Patrum intelligentiam, quàm ad Scholasticam Theologiam pertinent, commodissimè illam ordiemur ab eâ disputatione, quam doctissimus Theologus movit de celeberrimo Augustini loco lib. 2. de pecc. mer. & rem. ubi ait: *Voluntate humanâ, gratiâ adjuvante divinâ, hominem in hac vitâ posse esse sine peccato: neminem tamen esse, vel fuisse, vel futurum esse, qui vitam hanc peragat sine peccato.* Ex quo Vir ille clarissimus concludi posse existimat, duplicem ab Augustino gratiam agnosci; alteram sufficientem, quæ dat hominibus posse vitare peccatum, neque tamen faciat ut re-ipsâ vitent: alteram efficacem, quæ facit ut actu à peccato abstineant; quæ quia non semper datur, hinc fit ut homines non sint sine peccato,

licèt alterius gratiæ ope, quàm sufficientem appellat, tales esse potuerint.

Ego verò multis & gravissimis, nisi fallor, rationum momentis adducor ut credam, de nullâ aliâ quàm efficaci gratiâ in hoc toto libro Augustinum disputare, & ubicunque ait, homines gratiâ adjuvante divinâ esse posse sine peccato, aliam non esse illorum verborum sententiam, quàm illam, fieri quidem posse ut sit homo sine peccato, si illum gratia divina tantùm adjuvet, quantum necesse est, ut nihil eorum quæ pertinet ad justitiam cum lateat, & ea sic delecent animum, ut quidquid aliud voluptas sive dolor impedit deleclatio illa superet, sicut loquitur Aug. de sp. & lit. c. 35. Neminem tamen in hâc vitâ esse sine peccato; quia Deo pro summa suâ sapientiâ visum non est, eam semper homini gratiam conferre, quâ adjuvante posset actu



& re-ipsâ omni ex parte vitare peccatum. Itaque non loqui Augustinum de sufficienti aliqua gratia quæ semper adfit, sed de efficaci quæ semper adesse posset, si Deus vellet; nec semper adest, quia Deus non vult.

Quâ in re mecum sentiunt præstantissimi ex schola sancti Thomæ Theologi, qui hunc Augustini locum de gratia efficaci interpretantur, ut Alvares de aux. disp. 102. n. 9. Et Barth. Medina in 1. 2. qu. 109. art. 8. ubi ex hoc loco colligit, secundum Augustinum hominem esse posse sine peccato,

sed per gratiam Dei. Nam aliàs, inquit, derogaretur evidenter libero arbitrio, & gratia Dei EFFICACI. Hanc ergo sententiam aliquot argumentis, ut mihi videntur, longè validissimis confirmabo & uberius paulò prosequar, quod ex câ pendeat gravioris quæstionis explicatio, quo sensu scilicet dixerint Patres gratiæ divinæ adversus Pelagianos defensores, mandata Dei non esse impossibilia, etsi fieri nequeat ut à nobis serventur, nisi cum Deus in nobis atque nobiscum ut operemur, operatur.

## A R T I C U L U S II.

*Augustinum hic agere de vitando per totam vitam omni peccato, etiam veniali, quod justum omnem posse per gratiam sufficientem sibi collatam, Tridentina Synodus dici vetat.*

**P**rimum argumentum ex eo repeti potest quod in toto libro 2. de pecc. mer. & rem. sibi tractandum proponit Augustinus. Illud enim tale est, ut ad gratiam sufficientem à Deo homini datam & ab homine acceptam nullo modo referri queat. Nemo enim dicat, omnibus etiam justis tantam gratiam à Deo collatam esse, quanta sufficit ad vitanda omnia omnino peccata etiam venialia. At de hoc uno agit Augustinus, ut ipse initio libri proficitur: De baptismo, inquit, parrulorum, Marcelline charissime, priori libro satis disputatum est. In hoc autem, vivat-ne aliquis in hoc seculo, vel nixerit, vulturusne sit, sine ullo omnino peccato... quantâ ipse do-

nat diligentia vel facilitate differendum enodandumque suscepi. Ecce totius libri argumentum: An sit aliquis in hac vitâ sine ullo omnino peccato. Unde constat, non de solis lethalibus culpis, quæ crimina vocant Patres, sermonem esse; sed præsertim de venialibus: Multi quippe, inquit idem Aug. ad Bonif. l. 1. c. 14. baptizati fideles sunt sine crimine, (hoc est, sine mortali peccato.) Sine peccato autem in hac vitâ neminem dixerim, quantâlibet Pelagiani, quia hæc dicimus, adversum nos insistentur & dirumpantur insaniâ.

Hæc igitur quæstio ab Augustino tractanda suscipitur, An sit ullus justus qui vitam hanc agat

sine ullo omnino peccato, etiam veniali, sicut ipse ubertius, c. 2. his verbis explicat: *Hujus autem, inquit, questionis solutio, de hominis vitâ sine ullâ subreptione vel præoccupatione peccati, propter quotidianas nostras orationes maxime necessaria est. Sunt enim quidam tantum præsumentes de libero humane voluntatis arbitrio, ut ad non peccandum, nec adjuvandos nos divinitus opinentur, semel concessio libertæ voluntatis arbitrio: unde sit consequens, ut nec orare debeamus, ne intremus in tentationem, hoc est, ne tentatione vincamur, vel cum fallit & præoccupat nescientes, vel cum premit atque urget infirmos. Hinc etiam cap. 16. Neque negandum est, inquit, hoc Deum jubere, ita nos in facienda justitia esse debere perfectos, ut nullum habeamus omnino peccatum: nam neque peccatum erit, si quid erit, si non divinitus jubeatur ut non sit. Cum igitur in hoc libro Augustinus asserit, posse hominem in hac vitâ esse sine peccato gratiâ adjuvante divinâ, & dum hoc homini præcepit Deus, nihil illi præcepisse quod esset humane impossibile voluntati, non de alicujus seorsim peccati fugâ, nec de aliquo particulari præcepto, & in aliquâ tantum singulari occasione, servando agit; sed de illo generali præcepto, quo jubet Deus ne peccemus, & vitam istam ægamus sine ullâ subreptione vel præoccupatione peccati. Atqui non solum nemo justo-*

*rum in hac vita sine peccato est, verum etiam sine errore dici non potest, tantam cuilibet justo gratiam à Deo conferri, quanta sufficit ad vincendum omni ex parte peccatum, & implendam omni ex parte justitiam. Id enim præter Christum soli B. Virgini concessum fuisse prædicat Aug. de nat. & gr. c. 36. & Tridentino anathemate percellitur, sess. 6. c. 23. Si quis dixerit hominem semel justificatum posse in tota vitâ peccata omnia etiam venialia vitare, nisi ex speciali privilegio, quemadmodum de B. Virgine tenet Ecclesia.*

Dum ergo ait Augustinus, posse hominem in hac vitâ esse sine ullo omnino peccato gratiâ adjuvante divinâ, de eâ gratiâ intelligi nequit, quæ detur omnibus justis, ita ut per eam sibi à Deo collatam possint in totâ vitâ peccata omnia etiam venialia vitare, quod Canon Tridentinus hæreticum esse docet; sed obvius & planus propositionis Augustinianæ sensus est quem diximus, posse hominem per totam vitam esse sine ullo omnino peccato gratiâ adjuvante divinâ; quia reverâ esset homo sine peccato, si gratiâ adjuvante divinâ, (& eâ quidem efficaci, imò efficacissimâ) nihil unquam eorum quæ pertinent ad justitiam eum lateret, & ea sic deleclarent animum, ut quidquid aliud voluptas, sive dolor impedit, deleclatio illa superaret, ut inquit Aug. de sp. & litte. cap. 35.

## ARTICULUS III.

*Gratiam, quâ adjuvante ait Augustinus hominem esse posse sine peccato, efficacem esse, & quâ non semper homines adjuventur.*

**A**lterum argumentum est, quod ita Augustinus affirmat, hominem esse posse sine peccato gratiâ adjuvante divinâ, ut simul doceat & illam gratiam esse efficacem, & non semper ab illa justum adjuvari. Unde sit eatenus solum verum esse, hominem esse posse sine peccato gratiâ adjuvante divinâ, quatenus recipiâ fieret ut esset sine peccato, si semper & ubique quantum sufficit ad vitandum peccatum à gratiâ divina juvaretur. Primum quidem id patet quod cap. 2. ut jam vidimus, *hujus questionis solutionem de hominis vitâ sine ullâ subreptione vel præoccupatione peccati, propter quotidianas etiam nostras orationes maximè necessariam esse dicit: ne scilicet quis opinetur, nos ad non peccandum divinitus non adjuvandos; unde sit consequens, ut nec orare debeamus ne intremus in tentationem, hoc est, ne tentatione vincamur, vel cum fallit & præoccupat nescientes, vel cum premit atque urget infirmos.* Et c. 3. ex concupiscentiâ fieri docet, ut homo in hac vitâ non sit sine peccato. *Ut autem ei, inquit, non consentiamus, deprecamur adiutorium, dicentes: Et ne nos inferas in tentationem; ut si fortè tentari caperimus à concupiscentiâ nostrâ, adiutorio ejus non deseramus, ut in eo possumus vivere ne abstrahamur illecebrâ*

Quænam autem illa gratia quam Sancti postulant ne tentatione vincantur, nisi illa per quam re-ipsâ fiat ut non vincantur, hoc est, efficax, ut in primâ hujus Dissertationis Parte luculenter ostensum est: nisi illa quâ, ut ait sanctus Doctor, de sp. & litt. c. 29. petimus à Deo ut det quod jubet, atque inspiratâ gratiæ suavitate faciat plûs delectare quod præcipit, quàm delectat quod impedit: nisi illa, quâ deprecamur certam scientiam, ut aperiat quod latebat; & victricem delectationem, ut suave faciat quod non delectabat, ut ait idem de pecc. mer. & rem. c. 17. & c. 19.

Sed longè adhuc luculentiora quæ addit c. 5. *Ad peccandum namque non adjuvatur à Deo; iusta autem agere, vel iustitia præceptum omni ex parte implere non possumus, nisi adjuvemur à Deo.* Sicut enim corporis oculus non adjuvatur à luce, ut ab eadem luce clausus avertensque discedat; ut autem videat, adjuvatur ab eâ, neque hoc omninò, nisi illa adjuverit, potest: ita Deus, qui lux est hominis interioris, adjuvat nostræ mentis obtutum, ut non secundum nostram, sed secundum ejus iustitiam boni aliquid operemur. Si autem ab illo avertimur, nostrum est, & tunc secundum carnem sapiamus; tunc concupiscentiæ carnis ad illi-

*illicita consentimus. Conversos ergo Deus adjuvat, aversos deserit; sed etiam ut convertamur ipse adjuvat, quod certè oculis corporis lux ista non præstat.*

Præclara hic omnia. Primò enim gratia efficax est, quâ Deus nos adjuvat ut boni aliquid operemur; quâ Deus nos adjuvat ut ad ipsum convertamur. At ex August. nisi per illam gratiam adjuvemur, iusta agere vel iustitiæ præceptum omni ex parte implere non possumus. Gratia ergo illa, quâ adjuvante potest homo esse sine peccato, & sine qua non potest esse sine peccato, quia non potest iustitiæ præceptum omni ex parte implere, efficax est, non sufficiens. Deindè adjuvamus à Deo cum ad Deum nos convertimur, cum boni aliquid operamur; non adjuvamus autem, cum à Deo nos avertimus, cum concupiscentiæ carnis ad illicita consentimus. Ergo agnoscit Augustinus per gratiam illam, quâ adjuvante possunt homines esse sine peccato, non semper homines adjuvari: non enim per illam adjuvantur ex Augustino, cum concupiscentiæ carnis illicita consentiunt. Jam verò in eodem c. 5. multis Scripturarum testimoniis docet, nihil Deum jubere ut faciamus, quin ipsi continuo dicamus: *Da quod jubes*; quòd cum per solam gratiam efficacem præstetur, per quam Deus dat quod jubet, faciendo ut faciamus, dum operatur in nobis velle & perficere pro bona voluntate, & aptat nos in omni bono,

*faciens in nobis quod placeat coram se*, manifestum est per illam gratiam, quâ adjuvante potest homo esse sine peccato, & sine qua non potest, non aliam ab Augustino intelligi quàm efficacem, per quam Deus in nobis atque nobiscum ut operemur operatur, ut in 2. Synodo Arausica c. 9. ex Augustino definitum est.

Hinc autem manifestò sequitur, divinam illam gratiam adjuvantem & efficacem, sine quâ iusta, vel iustitiæ præceptum, implere omni ex parte non possumus, ne omnibus quidem iustis semper dari. Neque hoc nobis divinandum reliquit Augustinus. Ut enim apertè docet, posse iustum in hac vita esse sine peccato gratiâ adjuvante divinâ, non posse verò nisi adjuvetur: ita non minùs apertè declarat, eum à Deo adjuvari, illum non adjuvari, pro solo nutu & arbitrio divinæ voluntatis. *Cur illum, inquit, Deus adjuvet, illum non adjuvet; illum tantum, illum autem non tantum; istum illo, illum isto modo, penes ipsum est & æquitatis tam secreta ratio, & excellentia potestatis.*

Denique totum illud opusculum de peccatorum mer. & rem. sic concludit, ut non obscurè significet, idèò iustos, qui Deo adjuvante sine peccato esse possunt, non esse tamen in hac vita sine peccato; quia cœlestis ille Medicus, qui ordinem sanandi non accipit ab egroto ad perficiendam iustitiam in quibusdam eos non adjuvat, ut gratiarum actionem

semper indulgentiæ ejus debeant, & à tumore superbiæ sanctâ humilitate sanentur. Novit, inquit lib. 3. Cap. ult. ille Medicus qui non est opus sanis, sed egrotantibus, quemadmodum nos curando perficiat in eternam salutem, qui... & in quibusdam etiam justos suos, quoniam adhuc extolli possunt, NON ADJUVAT ad perficiendam justitiam, ut dum non justificatur in conspectu ejus omnis vivens, actionem gratiarum semper indulgentiæ ipsius debeamus; & sic ab illâ prima causa omnium vitiorum, hoc est, à tumore super-

biæ, sanctâ humilitate sanemur. Quis post hæc sibi persuadere queat, ad gratiam sufficientem, quæ semper omnibus justis adsit, pertinere quod ait Augustinus, justos esse posse sine peccato gratiâ adjuvante divinâ; cum ipse contrâ disertè statuat, posse quidem eos esse sine peccato gratiâ adjuvante divinâ, non tamen esse; quia ne in superbiam extollantur, in quibusdam eos ad perficiendam justitiam gratia illa divina non adjuvat?

#### A R T I C U L U S I V.

*Idem esse Augustino, Posse hominem esse sine peccato, & Fieri posse ut homo sit sine peccato; quod postremum ad gratiam efficacem sine dubio pertinet.*

**T**ERTIUM argumentum est, quo pro eodem sumit Augustinus, Hominem esse posse sine peccato, & Fieri posse ut homo sit sine peccato. Sic enim ipse se explicat c. 35. l. de sp. & lit. qui ad illam sententiam explanandam & confirmandam conscriptus est. Tu autem, inquit, quid mihi proposueris adverte. Moveret te certè quemadmodum dictum fuerit, FIERI POSSE UT SIT HOMO SINE PECCATO, si voluntas ejus non desit, ope adjuvante divinâ; quamvis nemo tam perfecta justitia in hac vitâ fuerit, vel sit, vel futurus sit. Sic enim hoc ipsum in illis prius ad te conscriptis libris proposui. Si à me queratur, inquam, utrum HOMO SINE PECCATO ESSE

POSSIT in hac vitâ, confitebor posse per Dei gratiam & liberum ejus arbitrium, ipsum quoque liberum arbitrium ad Dei dona pertinere non ambigens; nec tantum ut sit, verum ut bonum sit; id est, ad facienda mandata Domini convertatur; atque ita Dei gratia non solum ostendat quid faciendum sit; sed adjuvet etiam ut fieri possit quod ostenderit. Tibi autem absurdum visum est sine exemplo rem esse qua fieri potest. Videmus idem esse Augustino, Hominem esse posse sine peccato, & Fieri posse ut homo sit sine peccato. At istud ultimum ad gratiam sufficientem referri non potest, sed solum ad efficacem: ergo nec primum. Nemo enim, qui gratiam efficacem ad non pec-

peccandum necessariam arbitretur, unquam dixerit, fieri posse ut sit homo sine peccato per solam gratiam sufficientem ab efficaci distinctam. Fatentur enim omnes Thomistæ, ut videre est apud Alvarem Resp. l. 3. c. 5. n. 8. & 10, has propositiones: *Nemo potest converti sine auxilio efficaci; Nemo potest salvari sine dono perseverantia*, verissimas esse si in illo sensu accipiantur: *Fieri non potest ut quis convertatur, & tamen non habeat auxilium efficax: Fieri non potest ut quis salvetur, & tamen non habeat donum perseverantia*.

Cum igitur Augustinus hujus suæ propositionis, *Potest homo esse sine peccato gratiâ adjuvante divinâ*,

in libro eâ de re conscripto hunc sensum esse significet, *Fieri potest ut homo sit sine peccato gratiâ adjuvante divinâ*, manifestum est de alia gratiâ quàm efficaci id intelligi non posse, cum ex omnium Thomistarum sententia certissimum sit, fieri non posse ut homo sit sine peccato cujuscunque gratiæ ope quæ efficax non sit. Quare D. Augustinus satis se ipse de gratiâ efficaci loqui significat, dum ad illam gratiam, per quam homo potest esse sine peccato, pertinere ait, non solum ut sit liberum arbitrium, verum etiam ut bonum sit, id est, ad facienda mandata Domini convertatur. Quâ enim, quæso, gratiâ id efficitur, nisi efficaci?

## ARTICULUS V.

*Hominem vivere sine peccato opus esse divinum, ideoque possibile, quia omnia possible sunt Deo.*

**Q**UARTUM argumentum est, quod Augustinus sæpe se ipse luculenter interpretatur, neque aliter intellexisse se significat, fieri posse ut homo sit sine peccato gratiâ adjuvante divinâ, quàm quia Deo possibilitas non deest sic per gratiam suam hominem adjuvandi, ut tanta semper ab homine voluntas adhibeatur, quanta sufficit tantæ rei. Omnino id Augustinus possibile esse statuit, sed possibile Deo, non homini, nisi quantum ei Dominus donare voluerit, quem nemini justorum in hac vita tantam gratiam conferre voluisse, Scrip-

turarum oraculis discimus. Cap. enim 6. l. 2. de pecc. mer. & rem. in quo primum hanc quæstionem sibi proponit, utrum possit homo esse sine peccato; postquam concessit, fieri id posse per illam Dei gratiam *ad quam pertinet ut liberum arbitrium bonum sit & ad mandata Domini convertatur*, quæ sine dubio efficax est, ut jam diximus, multis Scripturæ testimoniis efficaciis illius gratiæ, quam iusti ipsi à Deo continuis gemitibus postulant, necessitatem probat. Tum verò ita concludit: *Hic atque hujusmodi alii innumerabilibus testimoniis dubitare*

non possum, nec Deum impossibile aliquid homini præcepisse, dum ei præcepit ut esset sine ullo omnino peccato, nec Deo ad opitulandum & adjuvandum quò fiat quod jubetur, impossibile aliquid esse. Ac per hoc potest homo, si velit, esse sine peccato adjunctus à Deo; hoc est, si divinà adjuvante gratià tantum velir, quantum sufficit & necesse est, ut volendo semper faciat quidquid faciendum est, & semper vitet quidquid vitandum. En clarè ab Augustino explicatum, idèd posse esse hominem sine peccato, quia Deo ad opitulandum quò fiat quod jubet (quod gratiæ efficacis est) impossibile aliquid non est.

Sed ne quis de ejus mente dubitaret, librum ipse integrum de hoc argumento composuit; in quo declarat, idèd se in libris de pecc. mer. & rem. negare noluisse, justitiæ perfectionem, per quam homo sit sine ullo omnino peccato, in hac vita esse possibilem, quia omnia possibilia sunt Deo. Is est, ut jam diximus, liber de spir. & litt. quem in Retract. l. 2. c. 37. ad eam sententiam explicandam à se scriptum fuisse testatur. Rescripserat enim Marcellinus eo se fuisse permotum, quod dixerat Augustinus, fieri posse ut sit homo sine peccato, si voluntas ejus non desit ope adjuvante divinà, quamvis nemo tam perfectæ justitiæ in hac vita vel fuerit, vel sit, vel futurus sit. Quærebat enim quomodò id diceretur fieri posse, cujus rei desset exemplum. Prop-

ter hanc ejus inquisitionem, inquit Augustinus, scripsi librum, cujus est titulus De spiritu & littera.

Cum ergo Augustinus optimus sit sui interpretes, ipsum se in hoc libro interpretantem audiamus: Absurdum, inquit c. 1. tibi videtur, dici aliquid fieri posse, cujus desit exemplum, cum, sicut credo, non dubites nunquam esse factum, ut per foramen auri camelus transiret; & tamen ille hoc quoque dixit Deo esse possibile: legas etiam 12. millia legiones Angelorum pro Christo, ne pateretur, pugnare potuisse, nec tamen factum: legas fieri potuisse ut semel gentes exterminarentur à terra quæ dabatur filiis Israël; Deum tamen id paulatim fieri voluisse. Jam illa exempla satis ostendunt, quo pacto Augustinus intellexit quod dixerat, fieri posse ut sit homo sine peccato, quia scilicet id Deo possibile, & utique fieret si Deo ita videretur. Sed quam ipse sibi objectionem proponat audiamus, cum ex ejus solutione mira tum huic difficultati explanandæ, tum universæ de gratià Christi doctrinæ lux affulgeat. Hic fortasse respondeas, inquit c. 3. ista quæ commemoravi facta non esse, & fieri potuisse, opera esse divina; ut autem sit homo sine peccato, ad opus ipsius hominis pertinere, idque opus esse optimum, quo fiat plena & perfectæ, & ex omni prorsus parte absoluta justitiæ; & idèd non esse credendum, neminem, vel fuisse, vel esse, vel fore in hac vita, qui hoc opus impleverit, si ab homine impleri potest. Sed cogitare debes, quantum ad hominem



id agere pertineat, HOC QUOQUE MUNUS ESSE DIVINUM; atque ideo non dubitare opus esse divinum. Deus est enim qui operatur in vobis, ait Apostolus, & velle & operari pro bona voluntate. En quâ gratia adjuvante potest homo esse sine peccato; eâ scilicet quâ Deus operatur in nobis & velle & operari pro bona voluntate, ac proinde efficaci. En quomodo id fieri potest, nec tamen fit; quomodo scilicet multa à Deo fieri possunt quæ non fiunt, quia Deus non vult. En cur de hac re, sicut de iis quæ Deo nolente non fiunt, licet à Deo fieri possint, judicandum sit; quia, quamvis ad hominem id agere pertineat, opus tamen divinum est, quod in hominis voluntate, & per hominis voluntatem Deus operatur. Unde statim Augustinus non errari perniciosè ait, si quisquam sine peccato vixisse existimetur: sed illis acerrimè resistendum esse, qui putant sine adjutorio Dei per se ipsam vim voluntatis humana vel iustitiam posse perficere, vel ad eam tendendo proficere. Verùm, quia Pelagiani negabant se asserere id fieri posse sine ope divina, sed opis divinæ nomine, quo se occultabant, vel liberum arbitrium, vel legem atque doctrinam intelligebant, quid contrà Augustinus adversus eos intelligendum esse dicat per illud adiutorium, cum quo potest homo esse sine peccato, & sine quo non potest, egregia illa & planè divina capitis tertii verba demonstrabunt: Nos autem dicimus humanam volunta-

tem sic divinitus adjuvari ad faciendam iustitiam (notandum hæc dici ab Augustino ut explicet quæ ratione dixerit, hominem esse posse sine peccato gratiâ adjuvante divinâ) ut præter quod creatus est homo cum libero arbitrio voluntatis, præterque doctrinam quâ ei præcipitur quemadmodum vivere debeat, accipiat Spiritum Sanctum, quo fiat in animo ejus delectatio, dilectioque summi illius atque incommutabilis boni quod Deus est.... Nam neque liberum arbitrium quidquam nisi ad peccandum valet, si lateat veritatis via; & cum id quod agendum est, & quo nitendum est, cæperit non latere, nisi etiam delectet & ametur, non agitur, non suscipitur, non bene vivitur. Ut autem diligatur, Charitas Dei diffunditur in cordibus nostris, non per liberum arbitrium, quod surgit à nobis, sed per Spiritum Sanctum, qui datus est nobis.

Quid de gratia efficaci, per quam solam bene vivitur, manifestius dici possit profectò non video. At illa ipsa gratia est quâ adjuvante dixit Augustinus, hominem esse posse sine peccato. Non ergo de aliâ gratiâ quàm de efficaci id intelligi potest; neque alio sensu id accipi, quàm quia Deo possibile est, per gratiam suam efficacem sic in omnibus hominem adjuvare, ut sit sine peccato. De quo si quis adhuc dubitet, en verba sole clariora ex cap. 5. deprompta, quæ omnem ipsi dubitationem eximant. Cum apparueris, inquit, bene vivere donum esse divinum, vide.



*videlicet, ut existimo, frustrà dici, illa tantum esse possibilis sine exemplo, quæ Dei opera sunt, sicut de cameli transitu per foramen acus commemoravimus, & quæcunque alia sunt apud nos impossibilia, apud Deum autem facilia. Hoc ergo frustrà diu satis apparebit, eum & ipsam humanam justitiam operationi Dei tribuendam esse clauerit, quamvis non fiat sine hominis voluntate; & idè ejus perfectionem, etiam in hac vita, esse possibilem negare non possumus, quia omnia possibilia sunt Deo, siue quæ facit solâ suâ voluntate, siue quæ cooperantibus creatura suæ voluntatibus à se fieri posse constituit. Ac per hoc quidquid eorum non facit, siue exemplo quidem est in operibus factis, sed apud Deum & in ejus virtute habet causam quâ fieri possit, & in ejus sapientia quare non factum sit; quæ causa etiam si lateat hominem, non se obliviscatur esse hominem, nec propterea Deo det insipientiam, quia non plenè capit ejus sapientiam.*

Si judex in hac controversia federet Augustinus, quibus verbis vel clarioribus vel diviniorebus litem hanc posset dirimere? Dixit ipse, hominem posse esse sine peccato gratiâ adjuvante divinâ; verborum illorum sensum quærimus. Eum esse nonnulli sentiunt, nulli non adesse gratiam sufficientem, non per quam sit ut sit sine peccato, sed per quam esse possit. Ego sic sentio, posse hominem esse sine peccato gratiâ adjuvante divinâ; quia possibile est Deo ita hominem per gratiam suam adjuvare, ut re-ipsa sit sine

peccato; & cur hoc non faciat Deus, penes ipsum esse æquitatis tam secretæ rationem. Quid verò Augustinus pronuntiat, eadem de re à Marcellino interrogatus? Multa à Deo fieri posse quæ non sunt; perfectionem humanæ justitiæ inter illa esse numerandam, quia & ipsa opus divinum est, quamvis non fiat sine hominis voluntate; negari itaque non debere, eam esse possibilem, quia omnia possibilia sunt Deo; habere ergo illam, non in homine per gratiam sufficientem sibi collatam, sed apud Deum & in virtute ejus, causam quâ fieri possit; & in ejus sapientia, quare factum non sit. Idem repetit in duobus postremis hujus libri capitibus, ubi in summam colligit quod universo opere tractaverat. Tibi, inquit, absurdum visum est, sine exemplo esse rem quæ fieri potest. Hinc exorta est hujus libri questio; ac per hoc ad nos persinebat ostendere, fieri posse aliquid, quamvis desit exemplum. Hinc ex Evangelio & ex lege quadam posuimus in sermonis hujus exordio... quæ possibilia Deo negare non possumus, quamvis eorum desit exemplum, sed quia diu potest illa opera esse divina, justè autem vivere ad nostra opera pertinere; suscepi ostendere etiam hoc opus esse divinum; & hoc egi libro isto loquaciùs fortasse quàm sat est; sed contrà inimicos gratiæ Dei etiam parum dixisse mihi videor... Nam si propterea non est opus Dei quia per nos agitur, vel quia illo donante nos agimus, nec illud est opus Dei ut mons transferatur in mare, quia  
per

per fidem hominum fieri posse Dominus dixit, & hoc ipsorum operi attribuit. . . . Et tamen hoc nullo modo facit homo, nisi illo donante & operante. Ecce quemadmodum sine exemplo est in hominibus perfecta iustitia, & tamen impossibilis non est (Deo scilicet, ut antè dixerat, atque etiam homini, sed cum Deus eam illi donare voluerit.) Fieret enim, si tanta voluntas adhiberetur, quanta sufficit tanta rei. Esset autem tanta, si & nihil eorum quæ pertinent ad iustitiam nos lateret, & ea sic delectarent animum, ut quidquid aliud voluptas sive dolor impedit, delectatio illa superaret. Quod ut non sit, non ad impossibilitatem, sed ad iudicium Dei pertinet: quia scilicet, ut jam vidimus in loco suprâ citato ex cap. ult. lib. 3. de pecc. mer. & rem. consultius supremo illi & iustissimo Judici Medicoque visum est, etiam sanctos suos, quoniam adhuc extolli possunt, in quibusdam non adjuvare ad perficiendam iustitiam, ita ut in his eos minus quàm implenda omni ex parte iustitia sufficit, delectet bonum, sive cum latet, sive cum manifestum est, ut dum non justificatur in conspectu ejus omnis vivens, actionem gratiarum semper indulgentia ipsius debeamus, & sic ab ipsâ primâ causâ omnium vitiorum, hoc est, à tumore superbia sanctâ humilitate sanemur.

Ni locorum & testimoniorum copîa odiosus vereretur esse lectoribus, hic exferberem tria libri secundi de pecc. mer. & rem. integra capita planè divina, nimi-

rùm 17. 18. & 19. quibus evolutis & paraphrasticè declaratis perspicere liceret, duabus ex causis pendere quoddam homo possit esse sine peccato, nimirum voluntate humanâ, & gratiâ divinâ, quarum neutra semper adsit. Non adest semper voluntas, quia lateat aliquandò an iustum sit, aliquandò non delectat. Ignorantia verò quâ fit ut lateat, & infirmitas quâ fit ut non delectet, vitia sunt quæ impediunt voluntatem ne moveatur ad faciendum opus bonum, vel ab opere malo abstinendum. Non adest gratia, quia, ut innotescat quod latebat, & suare fiat quod non delectabat, gratia Dei est, quæ hominum adjuvat voluntates, quâ gratiâ tamen non omnes ne quidem Sancti adjuvantur, licet ut non adjuventur, in ipsis causa sit, non in Deo; quod toto deinceps capite & sequentibus probat: sed cui minùs hæc quæ jam attulimus sufficient, vix quidquam satis futurum puto. Hoc unum tamen addam, S. Hieronymum adversus Pelagianos scribentem non alio sensu intellexisse, posse hominem in hac vita esse sine peccato, quàm quo, ut ostendimus, D. Augustinus id intellexit; quia scilicet id Deo possibile est: Sic enim ille l. 1. Dial. Neque homo potest esse sine peccato, quod habet tua sententia, sed potest, si voluerit Deus, hominem servare sine peccato, & immaculatum suâ misericordiâ custodire. Hoc & ego dico, quod Deo cuncta possibilia sunt; homini autem non quidquid voluerit possibile est. Ubi vides Hieronymum Pelagio non

non concedere quod ipsi non negandum existimavit Augustinus, hominem scilicet posse esse sine peccato. Neque tamen inter se reverà dissentiunt. Uterque enim

agnoscit *negandum non esse quin homo possit in hac vita esse sine peccato, si Deus velit, apud quem sunt omnia possibilia*, ut inquit Augustinus, de nat. & gr. c. 48.

## ARTICULUS VI.

*Illustrantur varia Augustini loca de possibilitate præceptorum.*

**F**ustus aliquantò hujus loci expositionem persecuti sumus, quòd ejus intelligentia latius manet, & ad varias Augustini sententias, quibus nihil homini impossibile præcipi docet, explanandas aditum aperiat.

Imprimis dilucescit, quo sensu in libro de perfectione justitiæ Cælestio sæpe concedit Augustinus, peccatum non esse quod vitari nullo modo possit. Idèd enim concedit, quia omne peccatum vitari potest per gratiam, non qualemcumque, sed efficacem. *Respondemus*, inquit c. 2. *vitari posse peccatum, si natura vitata sanetur gratiâ Dei. In tantum enim sana non est, in quantum id quod faciendum est aut cecitate non videt, aut infirmitate non implet.* Hanc gratiam, quâ unâ peccatum ait vitari posse, qui semper in omnibus tentationibus adesse velit, contendat oportet omnium naturam ita sanam esse, ut nunquàm contingat aliquem cæcitate non videre quod faciendum sit, aut infirmitate non implere.

Verùm illam opinionem satis refellit, tum illa locutio, *si natura sanetur*, conditionalis, non absolu-

ta; tum quod passim docet, hanc gratiam, quâ impleri possunt præcepta, precibus impetrandam esse: ex quo invictè conficitur, illam & efficacem esse, & nonnunquàm abesse. Nemo enim petit, ex Augustino, nisi quo destituitur. Nemo aliud à Deo petit, nisi *ut det quod jubet, & inspiratâ gratia suavitatem faciat plus delectare quod præcipit, quàm delectat quod impedit*: tum denique quia hoc loco & in toto illo opere agit de vitando omni ex parte peccato, quod præceptum quidèd hominibus agnoscit, impossibile autem esse negat, non quia semper est in hominis potestate, non quia omnibus datur gratia quâ possit impleri (utrumque enim rejicit Augustinus) sed quia Deo ad opitulandum nihil est impossibile, ut ait idem lib. 2. de peccat. mer. & rem. c. 6.

Dilucescit quo sensu Augustinus in lib. de nat. & grat. c. 43. dicat: *Non igitur Deus impossibilia jubet, sed jubendo monet & facere quod possis, & petere quod non possis.* Itemque cap. 69. *Eo quippe ipso quo firmissimè creditur, Deum justum & bonum impossibilia non potuisse præcipere, hinc admonemur*

*Et in facilibus quid agamus, & in difficilibus quid petamus.*

Non enim idèd dicit, præcepta non esse impossibilia, quia semper adest gratia: quem sensum manifestè excludunt illa verba, *petere quod non possis* (nemo enim petit nisi quod abest, cum gratia jam data non precibus evocanda sit, sed gratiarum actione in Deum refundenda) sed quia per illam gratiam quam petere debemus, impleri possunt: quam efficacem esse passim docet, nec omnibus adesse, ut cum paulò superiùs nimirum c. 42. dicit: *Neque de ipsà possibilitate contendo, cum sanata & adjuncta hominis voluntate possibilitas ipsa simul cum effectu in sanctis proveniat.* Et post illum locum c. 69. cum explicaret, quænam essent illa difficilia in quibus opem Dei implorare debeamus: *Omnia, inquit, sunt facilia charitati, cui uni Christi sarcina levis est.... secundum hoc dictum est: Præcepta ejus gravia non sunt; ut cui gravia sunt, consideret, non potuisse divinitus dici, gravia non sunt, nisi quia potest esse cordis affectus cui gravia non sunt, & petat quo destituitur, ut impleat quod jubetur.*

Ex quo loco colligas 1. aliquandò homines destitui illo cordis affectu cui mandata Dei gravia non sunt, & quo quod jubetur impleretur.

2. Cùm ille cordis affectus sit magna charitas, efficacem procul dubio esse: nihil enim aliud est efficax gratia, quàm victrix delectatio, seu amor Dei quo sit

ut plus delectet quod præcipit Deus, quàm delectat quod impedit.

Omitto dicere, his item locis Augustinum agere de vitando omni ex parte peccato, cujus rei potestatem nemini unquam, præter Christum & beatam Virginem, concessam esse, constans est ipsius, imò totius Ecclesiæ doctrina.

Dilucescit etiam quo sensu Augustinus, lib. de grat. & lib. arb. c. 16. ita loquatur: *Magnum aliquid Pelagiani se scire putant, quando dicunt, Non juberet Deus quod fieret non posse ab homine fieri. Quis hoc nesciat? Videamus quare hoc nemo nesciat, an quia hæc gratia semper adest: an verò quia adesse potest. Sed idèd, inquit, jubet aliqua quæ non possumus, ut noverimus quid ab illo petere debeamus.* Ergo illa potestas non semper adest; aliàs nihil unquam juberet Deus quod non possemus.

Nusquam verò illustriùs quàm in isto libro docet Augustinus, gratiam illam, quæ præcepta impleri possunt, esse efficacem. Certum est, inquit ille cap. 16. *nos velle cùm volumus, sed ille facit ut velimus bonum, de quo dictum est quod paulò antè posui: Præparatur voluntas à Domino; de quo dictum est: A Domino gressus hominis dirigentur, & viam ejus volens; de quo dictum est: Deus est qui operatur in nobis & velle. Certum est nos facere cùm facimus, sed ille facit ut faciamus, præbendò vires efficacissimas voluntati, qui dixit: Faciam*

etiam ut in justificationibus meis ambuletis, & judicia mea observetis & faciatis. *Cum dicit, Faciam ut faciatis, quid aliud dicit, nisi, Auferam à vobis cor lapideum, unde non faciebatis; & dabo cor carneum, unde faciatis? Et hoc quid est, nisi, Auferam cor durum unde non faciebatis, & dabo cor obediens unde faciatis?*

Ex illo Augustini loco discere est alium sensum, quo semper mandata homini possibilia sunt; quia scilicet implet ea qui voluerit, quamvis ut velit divinitus voluntas præparanda sit. Sufficit autem, ex Augustino, ut aliquid esse in potestate dicatur, quod fiat quando volumus, non fiat quando nolumus. Propterea in libro de spir. & litt. fidei, quam non omnium esse docet Apostolus, quam toties quibusdam dari, quibusdam non dari, occulto Dei judicio, asserit Augustinus, semper tamen in potestate hominis esse docet. Quod solerter vidit Cardinalis Bellarminus, ut jam diximus, & hâc ratione affirmavit, semper in hominis potestate esse conversionem.

Verum ne cætera testimonia de possibilitate mandatorum frustrâ recenseam, ut omnia quæ hinc petuntur argumenta ad suf-

ficientem gratiam astruendam semel præcitantur, unum mone-re satis fuerit, sententiam illam Augustinianam toties ab ipso repetitam; *Deus impossibilia non jubet*: de omnibus generatim hominibus intelligi, ut ex locis jam suprâ citatis constare potest, & ex ipsorum adversariorum consensu. Quare non potest inde gratia sufficiens actualis elici respectu justorum, quin etiam eadem respectu infidelium eliciatur. At verò, ipsorum Censorum judicio, non potest ex illis locis certò demonstrari, gratiam actualem sufficientem infidelibus adesse, cum eam opinionem, quæ negat infidelibus gratias actuales & sufficientes, problematicam esse dixerint. Igitur nec ex illis locis certò elici potest, gratiam sufficientem actualem nunquam iustis deesse. Sive, ut brevius astringam argumentum: Possibilitas illa præceptorum, quam his locis tradit Augustinus, peræquè ad infideles ac iustos pertinet: Sed in infidelibus non requirit gratias actuales: Ergo nec in iustis. Hujus argumenti solutionem in ipsis comitiis Facultatis à Censoribus flagitarunt eruditissimi Doctores, nec tamen impetrare potuerunt:

## A R T I C U L U S VII.

DE GRATIA ORANDI. *Explicatur nuperum Alphonsi le Moyne super illâ commentum: & ad Propositionem controversam minimè pertinere ostenditur.*

EX iis quæ superius disseruimus manifestum est, præ-

cepta divina ex Augustini doctrinâ impleri non posse, nisi per

eam gratiam, quæ magnis, ut ait Innocentius, *precibus implorata descendit*, adeoque illam non semper adesse; nec consequenter proximam illam potestatem Molinianam, quæ nihil aliud requirit ad agendum: *Non enim*, ut ait Augustinus, *à Deo petimus, nisi quo destituimur.*

Non sum autem nescius, esse quosdam Theologos, qui sibi pulcherrimam horum locorum solutionem invenisse videntur, cum gratiam agendi ab orandi gratia secernentes, illam agendi & semper efficacem esse, & nonnunquam deesse, & idè precibus impetrandam dixerint: hanc autem orandi & libero arbitrio subjici, & semper præsto esse. Quod significatum ab Augustino voluit, dum ait sæpe, *Deum jubendo monere & facere quod possis, & petere quod non possis*, quasi Deus nihil unquam jubeat, quin homini vel ipsam agendi gratiam, quam efficacem esse concedunt, largiatur; vel saltem orandi gratiam, quâ impetrari possit.

Hujus commenti, quo gratia orandi ab agendi gratia hoc duplici discrimine sejungitur, quod illa sit tantum sufficiens, hæc semper efficax; illa semper adlit ubi præceptum observare convenit, hæc autem non semper, sed tantum cum oratione impetratur, parens & propagator hoc sæculo fuit Alphonsus le Moine, qui licet sub eorum, quæ contra illam de hoc argumento edita sunt, voluminum mole jacuerit oppressus, multi

tamen ex ipsis Censoribus ad illam distinctionem confugerunt, & nihil aliud in propositione mea criminari sunt, nisi quod Petro, non solum agendi, sed etiam orandi, gratiam subtraheret; quod contrarium putant huic Augustini sententiæ à Concilio Tridentino consecratæ: *Deus jubendo monet, & facere quod possis, & petere quod non possis*: ex quo eliciunt semper adesse justis, si non agendi gratiam, saltem orandi. Verum istius & criminationis & consecutionis inanitatem operæ pretium fuerit hic breviter ostendere.

Primum, cum fatentur, non adesse semper gratiam agendi quâ proximè possumus implere præceptum, adeoque multa Deum præcipere quæ non possumus secundum præsentis vires, cum ampliores nobis impetrandæ sint; hoc ipso sensum omnem probant quem sub propositione controversa complexus sum. Concedunt enim, Petro defuisse gratiam efficacem sine qua proximè præceptum implere & tentationem vincere *non possumus*, quod unum illâ quam invaserunt propositione continetur. Utrum autem habuerit gratiam actualem orandi, an non habuerit, alia quaestio est ab Epistolæ propositione plane diversa, de quâ nihil mihi affirmandum aut negandum fuit, cum ea res inter Annatum & me non ageretur.

Contendebat ille, utpote Molinista merus & simplex, nec illâ novâ temperatione mitigatus,

rus, adesse semper hominibus proximam & expeditam servandorum mandatorum potestatem: hoc enim ab Innocentio X. definitum, & fide ab omnibus credendum, assererat Cavillorum p. 29. Eum qui liberè transgreditur præcepta, habere PROXIMAM & expeditam potentiam ad ea servanda. Ego adversus illum proximam potestatem agendi & servandi mandata non semper adesse defendi: de gratiâ orandi nihil dixi, quod abhorreret ab ea quæstione quæ tum inter nos versabatur. Ne quis igitur aliorum propositionem Epistolæ meæ accipiat, atque ego scribens intellexi, iterum hic profiteor, solam me efficacem gratiam, non orandi, sed confitendi Christum, à Petro removisse; de gratia illa orandi aut affirmanda aut neganda ne quidem cogitasse.

Ne quis tamen suspicetur, aliquid me de illa sentire quod proferre non audeam, brevibus conclusivè sententiam meam explicabo, ne Censoribus necesse sit divinationibus indulgere.

Sic igitur existimo. 1. Gratiam per se efficacem, & effectum suum infallibiliter sortientem, non minùs ad orandum necessariam esse, quàm ad agendum. Na cum Patribus omnes Thomistæ,

2. Quibuscunque defuit fides, nullam omninò gratiam orandi adfuisse. Quomodò enim invocabunt in quem non crediderunt, ut ex Paulo docent Patres & Concilia?

3. Justos aliquando in tentationibus carere gratiâ efficaci, ad orandum sicut oportet necessariâ. Aliter enim & orarent semper & impetrarent.

4. Omnibus justis conantibus & volentibus orare, non deesse gratiam actuali ad orandum Thomistico sensu sufficientem. Neque enim sine ea orare vellent & conarentur.

5. Justis nec volentibus orare nec conantibus nullam orandi gratiam actualem adesse. Nulla enim actualis gratia sine voluntate quadam atque conatu.

6. Non omnes justos in omnibus tentationibus orare velle & conari; quod in peccatis ignorantia manifestum est. Quis enim Deum deprecetur pro vitando illo peccato, quod esse peccatum non credat?

7. Etiam illis justis qui nec orare volunt neque conantur, adesse tamen potestatem orandi in actu primo Thomistico sensu sufficientem, sed per gratiam habitualem tantum, non per actualem.

8. Utrùm Petro assuerit actualis orandi gratia hoc quo dixi sensu sufficiens, id est, utrùm habuerit aliquas excitationes internas ad orandum, nescire me ingenuè fateor. Habuit quidem, si voluit & conatus est; sed utrùm voluerit & conatus sit, id omninò mihi non liquet, malimque super eo aliorum audire sententias, quàm meam expromere.

Habent Censores meam de gratia orandi mentem meis verbis



enunciata: invadant illam si voluerint, & suas illi blasphemiz & hærescos notas inurant. Quod si non audeant, fateantur necesse est, novum hoc & antea inauditum genus hærescos esse, quod

claris & distinctis verbis expressum, catholicū sit & orthodoxum; in Augustini autem verbis à me allatis nec expressum nec intellectum, sed per vim & calumniam intrusum, hæreticum fiat.

## A R T I C U L U S V I I I.

*Gratiam orandi omnibus semper præsentem malè elici ex illis Augustini verbis; Deus jubendo monet & facere quod possis, & petere quod non possis.*

**H**Æc de criminationis vanitate: consecutionem nunc expendamus. His, inquiunt, Augustini vocibus: *Deus jubendo monet petere quod non possis*, significat adesse semper gratiam orandi, cum gratia agendi deest. Ita ne idem est admonere, quod gratiam dare? Idem est lex jubens & spiritus adjuvans? Si hoc dicere voluit Augustinus, non poterat clarius exprimere? Saltem aliquo loco indicasset tam insolentis metaphoræ sensum. Saltem alicubi sine metaphora apertè elocutus esset, semper legi adjunctam esse orationis gratiam. Quòd si nusquam fecisse reperitur, eccei verisimile fiet tam absurdum Augustinum fuisse, ut gravissimam doctrinæ suæ sententiam tam inusitatà & à communi sensu alienà translatione semper efficeret?

Quid quod multis locis & ipse, & ejus discipuli Prosper & Fulgentius, postquam admoneri homines legi dixerunt ut petant auxilium, gratiam orandi non semper adesse, nec minùs effica-

cem esse, quàm illam agendi, apertè significant. Qui ergo, inquit Augustinus de corr. & grat. c. 1. legitimè lege utitur, discit in eà malum & bonum, & non confidens in virtute suà confugit ad gratiam, quâ præstante declinet à malo & faciat bonum. Quis autem confugit ad gratiam, nisi cum à Domino gressus hominis diriguntur, & viam ejus volet; ac per hoc desiderare auxilium gratiæ, initium gratiæ est, de quo ille: Et dixi nunc capi, hæc mutatio dextera excelsi. Quis dicere ausit, aut illam gratiam quâ diriguntur gressus hominum, & de qua dicitur: *Hæc mutatio dextera excelsi*, efficacem non esse; aut illam gratiam omnibus dari?

Et apertius adhuc sanctus Prosper cont. Collat. c. 23. non semper legi adjunctam esse orandi gratiam docet: Imperantur, inquit, ista homini, ut ex ipso præcepto Dei, quo ei hoc quod accepit indicitur, agnoscat id se suo vitio perdidisse, & non idèò iniquam esse excusationem, quia ad reddendum quod debet idoneus non est; sed à Littera occidente confugiat ad Spiritum



vivificantem. Quod si facit, magna est misericordia Domini: si non facit, justa est pœna peccati.

Nec minùs apertè Fulgentius lib. 2. de verit. prædest. & grat. c. 4. Dum præcipitur nobis ut velimus, ostenditur quid habere debeamus;

sed quia id ex nobis habere non possumus, admonemur ut à quo nobis datur præceptum, ab ipso petamus auxilium; quod tamen non possumus petere, nisi Deus in vobis operetur & velle.

## ARTICULUS IX.

*Absurda quedam Moliniana istius orandi gratiæ consecraria.*

**V**ersatilem illam & se in omnibus tentationibus ingrentem orationis gratiam ita disturbavit Apologia Parrum, ut illius ruinas nemo adhuc erigere sit ausus. Quare nihil necesse est de integro hoc argumentum persequi, quod in illo quæm indicamus libro peroratum videtur: nonnulla tantùm absurda, quæ ex illo figmento necessariò consequuntur, ad specimen hîc afferemus.

Imprimis ingens nobis videtur absurditas, quòd illius gratiæ ope Augustino longè peritiores & intelligentiores Molinistæ probantur. Quod enim ille ignoravit, quod neminem scire putavit, hoc ipsi & sciunt & ita dilucidè exponunt, ut nulli nunc non reseratum sit, quod Augustino clausum fuit.

Nescire se fatetur Augustinus, cur illi detur gratia fidei, illi non detur. Fides igitur, inquit ille, de prædest. Sanctior. c. 9. & inchoata & perfecta, donum Dei est; & hoc donum quibusdam dari, quibusdam non dari, omnino indubitet, qui non vult manifestissimis sa-

cris litteris repugnare..... Cur autem istum potius, quàm illum liberet (per fidei gratiam) inscrutabilia sunt iudicia ejus, & investigabiles via ejus. Melius enim & hîc audimus, aut dicimus: O homo! tu quis es, qui respondeas Deo, quàm dicere audeamus, quasi noverimus, quod occultum esse voluit, qui tamen aliquid injusti velle non potuit.

Verùm quòd Augustinus nescit, novit Alphonsus. Fides, inquit, & inchoata & perfecta in Christum, datur orantibus per fidem in Deum, cujus semper adest potestas; negatur autem non orantibus. Quid facilius aut promptius, aut quæ tandem Augustino causa fuit, cur in re perspicua tot clamores excitaret?

Nescire se fatetur Augustinus, imò neminem scire asserit, cur illi detur perseverantia; illi non detur. Ex duobus, inquit, lib. de dono pers. c. 9. parvulus originali peccato pariter obstrictis cur iste assumatur, ille relinquatur; & ex duobus etate jam grandibus impiis, cur iste ita vocetur, ut vocem sequatur; ille autem aut non vocetur, aut non ita vocetur, in-

scrutabilia sunt iudicia Dei : ex duobus autem piis, cur huic donetur perseverantia usque in finem, illi autem non detur, inscrutabilia sunt iudicia Dei. Idem verò, lib. de dono pers. c. 16. Deum ait alia etiam non orantibus, sicut initium fidei; alia non nisi orantibus preparasse, sicut usque in finem perseverantiam.

Certum igitur Augustino fuit, perseverantiam orantibus sicut oportet concedi, negari non orantibus. Quamobrem ergo inscrutabile dicit esse, cur huic donetur perseverantia, illi non detur? nisi quia nondum detexerat arcanum illud hoc demùm sæculo inventum, ipsam gratiam orationis omnibus adesse: quo reserato patent subito quæ involuta & inaccessa Augustino fuerunt. Quis enim tam iners Alphonsi discipulus, qui non facilè videat illis dari perseverantiam qui gratià orandi benè usi sunt, illis negari qui malè. Itaque huius opinionis præsidio non aliter quàm ab evigilantibus somnia, sic illarum difficultatum, quibus impeditus hæsit Augustinus, ludibria momento evanescent.

Denique clausum ipsi Apostolo mysterium esse docet Augustinus, cur ex eadem massa alii eligantur ad vitam, alii in debitâ sibi damnatione relinquuntur. *Unversa*, inquit ille, Ep. 105. *ista massa meritò damnata est: contumeliam delitam reddidit iustitia, honorem donat indebitum gratia, non meriti prerogativâ, non satiæ necessitate, non temeritate fortuna*

*sed altitudine divitiarum sapientia & scientia Dei, quam non aperit, sed clausam miratur Apostolus; & ibidem: Cur autem illum potius quàm illum liberet, aut non liberet, scrutetur qui potest iudiciorum ejus tam magnum profundum; verumtamen caveat præcipitium.*

Irrideri se putarent Alphonsi discipuli, si quis hæc ipsis tacito Augustini nomine proponeret. Quodnam enim, dicerent, ibi profundum? quod præcipitium? Omnibus datur orationis gratia. Hæc quidam benè utuntur, quidam malè. Illi eliguntur ad regnum, hi reprobantur ad supplicium. Quid magis expeditum & obvium? Nonne qui in rebus ita planis profunda & scopulos extumescat, illo insanæ genere laborare videatur, quod festivè pœta Venusinus sic expressit:

*Est genus unum  
Sulcitia nihilum metuenda timentis,  
ut ignes  
Ut rupes, fluviosque in campo ob-  
stare queratur.*

Ab hoc certè stultitiæ genere non aliter vindicari poterit Augustinus, nisi repudiatis illis humanæ rationis commentis, rejectaque Molinianâ orandi gratiâ, quam omnibus tam liberaliter largiuntur, id ipsum cur unus oret, alter non oret, ad inscrutabilia Dei iudicia pertinere fateamur. Siquidem, cum propter perseverandum orare oporteat & non desicere, ut ait Augustinus de dono persev. c. 14. *audiunt bæ & faciunt quibus datum est; non autem faciunt, sive audiant, sive non*

*audiant, quibus non datum est.*

Id verò luculentius adhuc perspici licet ex iis libris quibus Adrumetinorum & Massiliensium objectis respondet Augustinus. Nam si quis eâ se opinione imbuat, gratiam orandi omnibus semper præsto esse, atque ita sensisse Augustinum, affirmanti credat Alphonso, tantum ineptiarum in illorum querelis, & in Augustini responsis, offendet, ut hæc à sanis profecta arbitrari non possit.

Quid enim sibi volebant Adrumetini illi Monachi, qui se corripere ægrè patiebantur. *Apostolus*, inquiunt apud Augustinum de corr. & grat. c. 6. ait, Quis enim te discernit? Quid autem habes quod non accepisti? Si autem accepisti, quid gloriaris quasi non acceperis? *Cur ergo corripimur, arguimur, reprehendimur, accusamur? Quid facimus qui non accepimus? Etc. 3. Precipiant tantum nobis quid facere debeamus qui nolis præsumere, & ut faciamus orent pro nobis, non autem nos corripiant & arguant.*

Objiciat hoc quisquam Alphonso. Quàm graviter ille ejusmodi querelarum retundet insaniam. Te-ne, homo ignavissime, non arguam, non corripiam, qui semper auxilium ad orandum in manibus habeas, quo cætera consequi possis? Non potes præcepta servare, nisi gratiam efficacem à Deo acceperis: audio; at ut accipias in te situm est. An non quotiescunque te titillat concupiscentia, aut quocunque modo subrepat tentatio, toties animum tuum piis cogitationibus

illustrari, piis affectibus accendi sentis, toties ad Dei opem implorandam excitari? Quid tu igitur inopiam aut infirmitatem tuam lamentaris? Quasi verò meritò ille de victus queratur penuriâ, qui cibum paratum præ socordiâ deposcere gravetur.

Nunquàm aliter respondeat Alphonsus, & rectè. Neque enim aliter in ejus sententiâ responderi potest. Quid igitur Augustino nunquàm in mentem venit tam expedita responsio? Cur multis frustra capitibus sudat, ut eos ostendat meritò corripere, qui perseverantiam non acceperint? Cur ad primam parentis culpam omnia revocat? Cur illâ orationis gratiâ non continuò Adrumetinis Monachis os opprimit?

Quam verò in Massiliensium querimoniis sensus communis venam reperiatis, si quandam orandi gratiam nusquàm absentem ab Augustino admissam putes. Fatum illi ex Augustinianâ doctrinâ, & libertatis interitum sequi queruntur, ignaviam aut desperationem hominibus per illam asferri, exhortationes & correptiones tolli, orationes extinguere, duas massas cum Manichæis induci, omnes hominum conatus obtundi, personarum acceptione divinam justiciam pollui. Quis hoc unquàm objecit Alphonso? Aut si quis fecit, non ille potius risu explosus, quàm responsione repulsus est?

At quo pacto hæc objecta diluit Augustinus. De orationis gratiâ nusquàm absente ne verbum

bum quidem : sufficientis & ex libero arbitrio pendulæ gratiæ meminit quidem ; sed illam ad Adami statum pertinere docet , non ad nostrum : vocationem secundum propositum ubique confirmat. Nusquam quoritur , malè suam doctrinam à Massiliensibus intelligi ; ad inscrutabilia Dei judicia ubique confugit. Postremo tam insulè respondet , si gra-

tiam orandi semper præsentem ab illo admissam statuas , ut ille , cui sanctorum Patrum principatum tota detulit antiquitas , omnium quotquot fuerunt scriptorum imperitissimus appareat , omniumque minimè dignus qui divina mysteria tractaret ; cum in apertis & obviis rebus cæcutirer , nec obscura scriptis illustraret , sed perspicuis tenebras offunderet.

## A R T I C U L U S X.

*Inferuntur alia quedam non minùs absurda.*

**S**equitur primò , illis Ethnicis quibus fides non est annuntiata , multoties in die Deum sese manifestasse , non per creaturas , sed quâdam internâ revelatione. Illos enim sæpius quoque die peccasse , certum est. Porro peccare non potuerunt , nisi saltèm impetrare non peccandi potestatem potuerint : impetrare autem non potuerunt nisi orando , nec orare nisi credendo : sed credere nemo potest nisi vel divinâ revelatione , vel humanâ prædicatione , fides proponatur : caruerunt autem externâ prædicatione multi gentiles : igitur illis quotidie fides divinitus revelata est ; atque ita revelata , ut à Deo sibi eam revelari cognoscerent ; aliter enim nec credere , nec orare , & idè nec peccare potuissent. Accervatim ista congesimus ; sed ea latè pertractata videre potes in Apologia SS. Patrum , lib. 6. c. 14.

Sequitur , Caligulam , Nero-

nem , Heliogabalum , & alia ejusmodi hominum monstra , tum cum in omnium sordium & flagitiorum cæno se volutarent , sexcenties in die piis illis cogitationibus & affectionibus ad orandum Deum excitatos esse.

Sequitur , Philosophos illos , qui mundum negabant providentiâ regi , qui pro virtute neminem unquam Deo supplicasse sentiebant , sæpius tamen de orando pro virtutibus Deo divinitus admonitos.

Sequitur Pelagianos , qui gratiam divinam ad peccata vitanda necessariam non habebant , sæpius quotidie de eâdem gratiâ implorandâ commonitos fuisse.

Sequitur Atheos illos , qui in corde dixerunt Deum non esse , de illo tamen orando sæpius in die cogitare.

Sequitur bonos Christianos nullum in se peccatum ignorantiâ , cupiditate , subreptione , incogitantia suscipere , ad quod cav-

cavendum illâ præviâ orandi cogitatione non exstimulentur: imò sequitur, neminem jam per ignorantiam peccare; neque enim illud peccatum ignorari potest, de quo vitando & piis cogitationibus, & ejusmodi orandi desideriis moneamur; adeoque planè falsum est quod ait Augustinus, lib. de pecc. mer. c. 17. cum omnium peccatorum causas enumerat; *Nolle homines facere quod justum, sive quia latet an justum sit, sive quia non delectat.* Nullus est enim quem lateat, aut quem non delectet, quod justum est, saltem quantum sufficit ad fu-

giendum peccatum. Quare Augustinus, dum peccata omnia vel ad ignorantiam revocat, vel ad delectationis defectum, alienas planè, imò falsas, peccatorum causas recenser. Nihil hîc amplius de illâ commentitiâ orandi gratiâ à me disputabitur: tantum dicam, neminem pejùs de Christianâ religione mereri, quàm eos qui ejusmodi opiniones, Traditionis auctoritate planè nudas, pro fidei dogmatibus venditant, quas ipsi nec ab argumentis validissimis, quibus impugnantur, imò nec à risu quo jure excipiuntur, defendere valeant.

# ARTICULUS XI.

*De Concilii Tridentini circa præceptorum possibilitatem mente, non una, sed triplex Catholicorum Theologorum opinio.*

**N**ON aliud frequentius jactaverunt Doctores illi, qui propositionem Augustini & Chrysostomi hæreticam pronunciarunt, quàm illam Concilio Tridentino adversari, & ab ipso sessione 6. c. 11. his verbis esse damnatam: *Deus impossibilia non jubet, sed jubendo movet & facere quod possis, & petere quod non possis, & adjuvat ut possis*: quàm falsò & immeritò, hîc excutiendum.

Statuendum est imprimis, non ferendam in privatis Theologis remeritatem esse, aliquam Conciliorum sanctionem, de cujus sensu varîe sint apud Theologos opiniones, ita suo jure ad certum sensum alligare, ut hæreticos habeant eos omnes qui il-

lam aliter interpretentur. Possunt illi quidem, si quo valeant acumine, canonum sententiam indagare; possunt rationibus convincere veram se illorum mentem assecutos; at illum sensum toti Ecclesiæ fide tenendum imponere sine manifestâ injuriâ & tyrannide non possunt.

Hoc posito, Tridentinam illam sententiam tripliciter à catholicis Theologis acceptam reperio.

Primò, illam de sufficiente gratiâ & possibilitate Thomistica intelligendam esse docet Alvarez, disp. 71. n. 6. Ita ex illius Theologi mente, quem plerique ex S. Thomæ Scholâ sequuntur, hoc definivit Concilium: Justis nunquàm deesse possibilitatem illam suffi-

sufficientem, quæ auxilii uberioris & efficacis necessitatem non excludat.

Secunda interpretatio est eorum Molinistarum, qui gratiam agendi non semper adesse fatentur, siue illam efficacem esse velint, siue nolint. Illi Concilium sic accipiunt quasi definierit, semper in iustorum esse potestate (& quidem Moliniana, quæ omnia complectatur ad agendum necessaria) ut Dei mandatis pareant: vel enim hoc eos proximè posse per gratiam agendi, vel saltem remotè per gratiam orandi.

Huic adjungenda est alia veterum Molinistarum interpretatio, qui gratiam agendi nunquam deesse volunt, idque à Concilio definitum illis verbis: *Et adjuvat ut possis*. Quanquam non video quo pacto illorum sententia consistere possit cum istis Concilii verbis: *Et petere quod non possis*. Nam si semper adest illa potestas, falsum est nos à Deo petere quod non possumus. Sed tamen quia utraque sententia in eo convenit, quòd gratiam quandam sufficientem & Molinianam à Concilio significatam velit, non incommode ambæ conjunguntur, ut conjunctim quoque repellantur.

Tertia interpretatio est Bellarmini & Estii, qui hoc tantum definitum à Concilio adversus hæreticos contendunt, præcepta Dei à iustis observari posse, imò semper observari, dum in iustitia perseverant, adeoque non esse

impossibilia simpliciter. Quod ex adverso Lutheranorum errori opponitur, qui omnibus iustis, etiam dum Spiritu Dei aguntur, Dei mandata impossibilia esse sentiebant; quia concupiscentiæ veneno singulas illorum actiones vitari credebant.

Sic intellectum à Bellarmino Concilium Tridentinum latè in secundo Apologerico probavimus. Et quoniam iis quæ protulimus testimoniis nullus ex Censoribus respondere tentavit, nihil hic attinet vel repetere, vel operosius confirmare, quod invictè jam comprobaturum adversarii, si non voce, ac certè silentio suo confessi sunt.

Eodem modo & sanctos Patres & Concilium Tridentinum interpretatus est Estius, magnum Duacensis Academiæ, imò rotius Belgii lumen. is enim in 3. sent. dist. 27. §. 6. multis probat nihil homini impossibile præcipi. Ac primò hæreticorum errorem sic exponit: *Que questio*, inquit, *edè diligentius tractanda est, quò magis circa eam hodie à seclariis erratur, docentibus neminem posse in hoc corruptionis statu legem Dei implere, ac neminem operatione virtutum justum esse coram Deo.*

Quo sensu autem nihil homini impossibile præcipiat Deus, his verbis explicat: *Dicimus autem impossibile, non quod homo propriis natura viribus facere nequit, quomodo sine dubio impossibilia sunt homini præcepta Dei, quemadmodum ostendimus ad dist. 26. lib. 2. sed quòd secundum modum gratiæ, quam*

quam in hac vitâ iustificatus communicat Deus, fieri ab homine non potest. Talem enim impossibilitatem præceptorum Dei, contra doctrinam catholicam, defendunt huius temporis heretici.

At quibus locis hunc hæreticorum errorem revincit Estius? Non aliis ferè quàm Augustini testimoniis, "quibus Calviniani, nos & Lutheranos tantò antè damnatos esse contendit. Quos (hæreticos) post Scripturam, inquit ille, maximè refellit auctoritas Augustini compluribus locis. Nam lib. 2. Retr. c. 10. proferens ex lib. 1. de gen. contra Manich. c. 3. verba quædam, quibus dixerat posse omnes homines præcepta Dei impleri si velint, omninò verum id esse confirmat: sed, inquit, preparatur voluntas à Domino, & tantum augetur munere charitatis ut possint. Et lib. de grat. & lib. arb. per gratiam fieri dicit, ut bona voluntas augetur, & tam magna fiat, ut possit implere divina præcepta. Unde proximo capite approbat illud quod Catholicis objiciebant Pelagiani: Non juberet Deus, quod sciret non posse ab homine fieri." Deindè percurrit alia vulgaria Augustini testimonia ex libro de nat. & grat. ex opere in psal. & ex variis sermonibus, quibus expositis subjungit: Idèò porrò eam sententiam, quâ dicitur impossibile aliquid à Deo præceptum, Pelagiani Catholicis odiosè impingebant, & Catholici studiosè à se repellabant, quòd ea ad hæresim Manichæorum pertineret, ponentium

hominem, propter naturam malam ex quâ compositus esset, non posse peccatum vitare. Hoc autem ita damnant Catholici, ut non tantum ex malo principio, cujuscmodi reverà nullum est, verum etiam ex corruptione nature factâ per Adam negent homini simpliciter impossibile esse ut Dei legem impleat; quod enim natura & legi impossibile est, possibile facit, imò et præstat, ut proximo capite ostendetur, GRATIA DEI per Christum.

Illam verò possibilitatem præceptorum, cum effectu conjunctam, hæreticis oppositam, à Tridentino Concilio definitam vult: Hujus, inquit, dogmatis definitionem & claram explicationem videre licet in Synodo Tridentinâ, sess. 6. cap. 11. & can. 18.

Obiter hic duo animadvertas velim. Primum, eodem planè modo ab Estio, quàm à nobis, accipi Patrum loca de possibilitate præceptorum; idèòque ex ipso mandata Dei negari à Patribus impossibilia, quia non sunt simpliciter impossibilia, sed per gratiam impleri possunt, imò & implentur. Proptereà autem mandata dici possibilia; quia semper adest gratia ad non peccandum necessaria, alienissimum est ab Estii mente, ut vel hoc uno loco satis perspicui potest: Objicies, inquit dist. 26. §. 41. auxilium illud (quo videlicet uno impleri præcepta posse superius definit) non esse in potestate hominis, præsertim ejus qui de gratiâ Dei nihil unquam audivit, sed tantum ducitur lumine rationis humane, & proin-



proinde totius legis observationem tali homini esse simpliciter impossibile. Quid ad hoc Estius? Quidam, inquit, respondent nullum esse hominem, cui non semper adsit obvium & paratum à Deo auxilium gratia, per quam possit totam legem servare & vitare peccata, modo velit, ut potest, eo auxilio uti per liberum suum arbitrium. Sed hæc responsio, neque Scripturis sacris, neque doctrina sanctorum Patrum consonat, neque cum efficaci operatione Dei consistit: ac neque Augustinus, tametsi vehementer hoc argumento pressus à Pelagianis, unquam istiusmodi responsionem adhibuit, quod specialiter observare est in toto libro de perfectione justitiæ, ut alia ejus loca, quibus contrarium docet, taceamus.

Secundo loco adverti potest, quàm infirmo nitantur argumento, qui nolunt sententias Patrum de possibilitate præceptorum summi in sensu Calvinianis opposito, & hujus rei præclaram illam asserunt rationem: Quia, inquiunt, sanctus Augustinus nihil cogitavit de Calvino. Quasi verò damnari error non possit, antequàm defensores habuerit! Quasi Augustinus non omnes penè hæreses, quæ post ipsum exortæ sunt, in scriptis suis antè confutavit! Quasi non ille Calvinum in quæstione de Ecclesiâ validissimè fre-

gerit, quamvis de eo nunquàm cogitarit! Stabilita enim veritas non modò præsenribus erroribus adversatur, sed etiam futuris; id agente Spiritu Veritatis, qui Patribus scribentibus affuit, ut in illorum scriptis existeret quidquid ad futuras hæreses coarguendas necesse est. Verùm est igitur, Augustinum non cogitasse de Calvino: falsum est tamen, impossibilitatem præceptorum non ab eo damnatam in Calviniano sensu. Cogitavit ille quidem de solis Manichæis, qui præcepta Dei idè observatu impossibilia dicebant, quia naturale peccandi principium hominibus inerat; sed dum hos refelleret, docuit præcepta Dei nullâ ex causâ ita esse impossibilia, ut gratiâ adjuvante impleri non possint, adeoque illa ab omnibus piis impleri.

Demiror verò eos qui in egregiâ illâ ratione sibi placent, non animadvertere pugnantia se loqui, Nam si Calvinianum sensum non damnatum esse ab Augustino volunt, quia de Calvino non cogitavit; quomodò iidem his Augustini verbis quorundam hujus temporis Theologorum sensum contendunt esse damnatum? Non enim magis, credo, de illis Augustinus, quàm de Calvino, cogitavit.

## A R T I C U L U S XII.

*Alvaresianus sensus nihil officit controversæ propositioni: rejicitur tamen ut alienus; Molinisticus autem, ut falsus.*

**Q**uemadmodum Alvaresiana doctrina nihil omnino istam de quâ nunc agitur propositionem labefactat,



factat, sed potius confirmat, ut latè antèà demonstravimus; sic illa explicatio, quam Tridentino decreto subjicit, omnino causæ nostræ nihil obest. Contendit enim, possibilitatem præceptorum Thomistico sensu à Concilio Tridentino definitam; sed eam nos libenter injustis admittimus, adeoque in ipso Petro, qui justus fuit antecausam. Vult ille quidem, possibilitatem illam semper conferri per gratiam actualem; nos gratiam actualem tantum volentibus & concipientibus concedimus, nec omnes velle & conari arbitramur. Verum de gratiæ naturâ, quâ possibilitas confertur, nihil habet Concilium, nec tam absurdus fuit Alvarez ut id vellet, à Concilio hoc loco sancitum.

Ergo si hujus Theologi explanationem sequi me profitear, ultra progredi adversarii non poterunt; nisi fortè mecum & illum & totam sancti Thomæ scholam hæreseos ream peragere instituant. Verum diffiteri non possum minùs illam mihi arridere: non quòd quidquam falsi contineat, sed quia à Concilii mente alienior videtur. Nam, cum hoc loco Tridentini Patres Calvinum & Lutherum damnare proposuerint, si solam possibilitatem Thomisticam, quæ suo effectu in perpetuum carere potest, sanciverunt, intactum videntur illorum hæreticorum errorem reliquisse. Fieri enim posset, ut omnes justis possibilitatem Thomisticam haberent, nec ullus tamen mandatis

Dei obtemperaret, si nulli eorum gratiâ efficacem à Deo acciperent.

Sequitur Moliniana explicatio, quæ ex Concilio hoc dogma elicit, semper justis adesse gratiam actualem, quâ re ipsa & effectivè mandata Dei possint observare.

Libenter hîc primò ab adversariis quæsierim, utrum hanc explanationem Concilii Tridentini de fide esse censeant. Si dixerint, jam apertè Thomistas omnes, quibus illa minimè probatur, imò erronea judicatur, hæreticos faciunt. Si negent, quæro quid rationis & æquitatis habeat, propositionem Epistolæ meæ propterea hæreseos damnare, quòd Tridentino Concilio adversetur eò sensu accepto quem de fide non esse fateantur.

Deindè, vel definitum à Concilio volunt, omnibus justis immediatam agendi gratiam semper adesse; vel disjunctim, aut agendi gratiam aut saltem orandi quâ impetretur. Si primum statuunt, manifestè repugnant Concilii verbis, quibus monentur justis petere quod non possint. Ex quo invictè probatur, quædam illos non posse, ac proindè non semper agendi gratiam præsto esse: ut quid enim orarent, ut acciperent quod jam acceperint? Sin autem à Concilio Tridentino definitum dicant, omnibus justis vel agendi gratiam adesse, vel saltem orandi; cogitent, quæso, quantam absurditatem adscribant sacratissimæ Synodo, quæ nobis fidem tam obiculis & alienis me-

taphoris exposuerit? Quis enim sanæ mentis hanc sententiam: Deus omnibus iustis dat, vel gratiam actualem agendi & observandi præceptum, vel saltem gratiam orandi, sic expresserit: *Deus jubendo monet & facere quod possis, & petere quod non possis, & adjuvat ut possis?* Illis enim verbis: *adjuvat ut possis*, planum est significari eam gratiam quæ impetratur orando, id est, agendi gratiam. At illa orandi semper præfens gratia unde eruetur? Eritne qui contendat, duas illas propositiones: *Deus jubendo monet petere quod non possis: & Deus jubendo dat gratiam petendi quod non possis*, eundem planè sensum habere? Quod per se absurdum, idè omnem absurditatem superat, quòd qui id existimet, illarum propositionum synonymiam & æquivalentiam non modò veram esse & certam, sed etiam ad fidem pertinere, contendere debeat: adeoque præclarum illum canonem sancire: *Si quis dixerit alium esse sensum istius propositionis: DEUS JUBENDO MONET PETERE QUOD NON POSSIS, quàm illius: DEUS JUBENDO DAT GRATIAM UT PETAS QUOD NON POSSIS, anathema sit.*

Postremò, si hæc Moliniana

Concilii Tridentini explicatio necessariò esset admittenda, sequeretur, Concilium Tridentinum à maximâ Ecclesiæ parte rejectum esse, imò ne ipsos quidem Tridentinos Patres id sensisse quod definierunt. Certum est enim, ante & post exortum Molinam gravissimos Ecclesiæ Theologos sancti Thomæ de gratiâ efficaci doctrinam amplexos, à quibus illam interpretationem improbari necesse est. Quod argumentum eò gravius videri debet, quòd ex historiâ constat, nunquàm Concilii Tridentini mentem fuisse, videntes hoc tempore inter Catholicos damnare sententias, imò Marcellum Cer vinum hæc ipsa de gratiâ decreta variè sententibus Theologis, antequàm confirmarentur, permisisse ut ex iis detraherent quidquid adversum putarent sententiæ suæ. Sapienter enim sacro-sancta Synodus de Catholicorum controversiis pronunciare, alienum ab his temporibus esse judicavit, & antiquam adversus hæreticos fidem retinere satis habuit. Eccui ergo verisimile fiet, his de gratia decretis, quæ Thomistis, qui multi aderant, permessa sunt, ipsam Thomistarum doctrinam esse damnatam?

### A R T I C U L U S XIII.

*Bellarmini & Estii interpretatio quatuor rationibus confirmatur.*

**C**onfutatis alijs, Bellarmini & Estii interpretatio satis confirmata videri potest. Ne tamen sola alienarum explicationum re-

jectione niti videatur, quibusdam hîc rationibus ostendendum est, quàm illam meritò & Alvarezianæ & Molinisticæ ante-tulerimus.

I. Signi-

I. Significat, Tridentinum Concilium damnatam se jam à Patribus sententiam damnare: *Nemo, inquit, temerariâ illa & à Patribus damnatâ voce utatur.* Imò decreti sui verba mutuatur ex Augustino: *Deus impossibilia non jubet, sed jubendo monet & facere quod possis, & petere quod non possis.* Non igitur existimandum est, aliam præceptorum impossibilitatem à Concilio Tridentino damnatam, aliam à Patribus: &, quod gravius est, eandem sententiam & eadem verba, à Concilio ex Augustino descripta, alium in Augustino sensum habere, alium in Concilio. Sed, ut ostendimus, hæc verba in Augustino nihil aliud significant, nisi mandata Dei non esse absolutè & simpliciter impossibilia sensu Manichæorum, quia possunt impleri per gratiam efficacem: non igitur alia istorum verborum mens est in Concilio Tridentino.

Hoc solum supra Augustinum addit Concilium, quod non modò mandata Dei esse possibilia dicit, si detur gratia efficax; sed illam gratiam affirmat aliquandò conferri: *Et adjuvat, inquit, ut possis; dixi, aliquandò, non semper, quia patet ex Concilio, gratiam illam quæ his significatur verbis, Et adjuvat ut possis, non semper dari, nec omnibus, sed tantum petentibus; quod non omnes facere palàm est: Jubendo, inquit, monet & facere quod possis, & petere quod non possis, & adjuvat ut possis.*

II. Germana illa & vera Concilii explicatio habenda est, quæ

directè & precisè illum damnat errorem, de quo in Concilio agebatur, & nihil præterea. Nam, ut antea notavimus, non fuit Concilio propositum novas movere quæstiones, nec controversias Catholicorum disceptare; sed tantum hæreticorum, Lutheranorum, Calvinistarum, & Pelagianorum, hæreses à catholicâ fide se jungere. Sed illa nota tantum Bellarmini & Estii interpretationi convenit, nec in Alvarisianam aut Molinianam cadit. Quid igitur mirum, si huic illæ à nobis posthabentur?

Non cadit, inquam, in Alvarisianam; quia, ut jam diximus, hæreticorum errorem ne attingit quidem. Nec dissimili vitio Moliniana explicatio, sed in contrariam partem, tenetur. Id enim à Concilio statutum definitum, quod in Concilio ne quidem tractatum est. Nunquam enim in Tridentinâ Synodo quæsitum, An alicui justo gratia nonnunquam deesset; sive, An mandata Dei impossibilia essent non habentibus gratiam: sed illud solum, Utrum justis gratiâ instructis essent impossibilia, quod assercebant hæretici. Unde in Canone 18. nominatim addit: *Homini justificato & sub gratiâ constituto;* quod Ecclesiasticâ loquendi consuetudine significat hominem sub actuali Spiritus Sancti motionē constitutum. Siquidem, esse sub gratia, & esse sub lege, opponuntur apud Augustinum. Esse sub lege, excludit potestatem proximam implendæ legis: esse sub gratia, illam

includit ab actuali gratia profectam. Unde de eo qui sub lege est, disertè ait, serm. 18. de divers. *Qui sub lege est, legem implere non potest. Qui autem sub gratiâ est, ut ibidem subdit, non sub lege, IPSÆ IMPLET LEGEM : quia non est ei pondus, sed decus : nectimenti tormentum, sed amanti ornamentum ; Spiritu enim dilectionis accensus est.* Et de spit. & lit. c. 19. *Illâ lex, sine adjuvante Spiritu, procul dubio littera est occidens. Cum verò adest vivificans Spiritus, hoc ipsum intus conscriptum facit diligere, quod foris posita lex faciebat timeri.*

Non igitur verisimile, imò planè falsum est, id definiisse Concilium, quod ne in disputationem quidem adductum erat, atque ita definivisse, ut omnium Patrum sententias damnaret. At verò Bellarmini & Estii interpretatio hæreticorum errorem, possibilitatem præceptorum in hac vitâ cum quâlibet gratiâ negantium, directè perit, & præcisè condemnat, nec alienas ac dubias quæstiones attingit. Neutro igitur vitio laborat, quo superiores duz.

III. Quæ Concilii interpretatio certam & constantem inter Catholicos omnes sententiam complectitur, ea meritò præferatur iis quæ dubiam & minimè in totâ Ecclesiâ receptam continent. Alienum enim à Tridentinæ Synodi dignitate esse videtur, ut aliquid definiverit, de quo non omnes Catholici inter se consentiant. De Thomisticâ verò possibilitate, quam hoc loco à Concilio definitam contendit Alvares,

Molinistæ planè dissentiant, & eam in scriptis suis passim ineptiæ accusant. Rursus Molinisticam possibilitatem, quæ nihil aliud requirit ad agendum, penitus Thomistæ rejiciunt. Neutram igitur hoc loco à Concilio sanctam dicere præstat. At illud in Bellarmini interpretatione vitii non est; quam enim sententiam Concilio tribuit, de ea omnes omnino Catholici idem sentiunt, solis hæreticis adversantibus. Quis enim non profiteatur, *mandata Dei per gratiam esse possibilis?*

IV. Postrema ratio, eaque omnium gravissima, ex illa regula petitur, ad omnium scriptorum, maximèque sacrorum mentem intelligendam opportunissimâ, scilicet non ex uno quodam loco sententiam scriptoris investigandam, sed ex omnium locorum ad eam rem pertinentium consensione, quod maximè in Conciliorum decretis locum habet, in quibus cum unum spiritum loqui credamus, nullam utique in illa sensuum varietatem & discrepantiam conferte sine flagitio possumus. Quare verus & legitimus sensus hanc habere notam debet, ut cum omnibus Concilii locis consentiat. Ad cuiuslibet autem sensus falsitatem demonstrandam sufficit, ut cum aliquo Concilii loco pugnet.

Hoc constituto faciliè demonstratur, Molinisticum sensum de gratiâ semper præsentem adversari multis Concilii locis. Repugnat enim primùm doctrinæ Concilii de perseverantiâ. Nam, si ea gra-

tia,

tia, quæ nihil aliud requirat, semper homini, ut illi volunt, præsto est, falsum esset quod Concilium ait: *Neminem sibi quidquam absolutâ certitudine de perseverantiâ suâ sibi polliceri posse.* Quid enim temeritatis est, de eo quod in suâ quisque potestate semper futurum esse fide tenet, aliquid sibi absolutâ certitudine polliceri?

Repugnat etiam Canoni 22: *Si quis dixerit justificatum vel sine speciali auxilio Dei in acceptâ justitiâ perseverare posse, vel cum eo non posse, anathema sit.* Nam, cum auxilium ad non peccandum, idem sit quod auxilium ad perseverandum, quia perseverat ille qui non peccat, si auxilium illud Molinianum ad non peccandum omnibus præsto est, falsò auxilium perseverantiz speciale vocatur: non enim speciale est quod omnibus datur.

Deinde, quemadmodum ex eo quod Concilium statuit, cum auxilio perseverantiz perseverari posse, rectè concluditur, gratiam illam non semper abesse, ne de eâ hypothesi loquatur Concilium quæ nunquam contigerit; cur similiter ex eo quod Concilium statuit, sine perseverandi auxilio perseverari non posse, non colligatur, illud auxilium non semper adesse, ne frustrâ de hypothesi impossibili Concilium sanctiones ediderit? Nam, si nullum esse credidit cui deesset illud auxilium ad non peccandum, sive ad perseverandum, quantò clariùs ira Canonem expressisset: Si quis dixit auxilium ad perseveran-

dum alicui justificato deesse, anathema sit.

Repugnat denique rationi, quam subjungit Concilium post illa verba: *Deus impossibilia non jubet, sed jubendo monet & facere quod possis, & petere quod non possis.... qui enim sunt filii Dei, Christum diligunt; qui autem diligunt eum, ut ipsemet testatur, servant sermones ejus, quod utique cum divino auxilio præstare possunt.* Hâc enim ratione prorsus ineptè probatur, gratiam semper adesse. At ex illâ Concilii ratione mirificè confirmatur Bellarmini expositio. Nam, si Filii Dei Christum diligunt, si qui Christum diligunt servant mandata, si mandata non servantur sine gratiâ, sequitur falsum & hæreticum esse, quod Calvinistæ docent, Præcepta à nemine observari etiam cum gratiâ. Servantur enim ab omnibus qui Christum diligunt: diligunt autem Christum omnes filii Dei, dum filii Dei sunt.

Ex his omnibus liquidò per nosci potest, quàm immeritò Censores hunc Concilii Tridentini locum propositioni contrarsæ adversâ fronte oppositum passim venditaverint. Ostendimus enim, illum quem asserunt sensum, etiam ipsorum judicio nonnisi si probabilem esse, cum à Thomistis improbetur, & erroneus judicetur, quos illi non damnant. Ostendimus ne probabilem quidem esse, quia planè falsus, & à mente Concilii alienus est.

Denique, etiamsi verus esset, sua tamen propositioni veritas

maneret, quæ nihil aliud asserit, nisi gratiam vincendæ tentationis sive agendi aliquandò deesse: de gratiâ orandi nihil affirmat aut negat. At verò, quidquid tandem de gratiâ illâ orandi ineptis consecutionibus ex Concilii verbis eliciant, plurimi certè ex ipsis non negabunt, semper præsentem agendi gratiam his verbis damnatam esse: *Jubet Deus petere quod non possis*: ex quo sequitur aliqua non posse homines cum jubentur, ac proindè falsum esse quod pro fidei articulo toti Ecclesiæ obtrudit Annatus: *Enim qui liberè transgreditur præceptum, habere semper proximam & expeditam ejus observandi potestatem*: non enim habet illam quam precibus impetrare neglexit. Et contrà, verum esse, quod unum docet Epistolæ propositio, *Gratiam illam, quâ immediate tentationes vinci possunt, quibusdam justis aliquandò deesse*.

Hactenus de Concilij sensu, ex quo Constitutionis Innocentii X. intelligentia pendet, ipsis adversariis fatentibus, qui illâ ipsius verba (*antè damnatam declaramus*) ad Concilium Tridentinum referunt. Sed, quoniam de hoc argumento plura in Apologeticis jam diximus, ea hoc loco iterare superfluum est. Tantùm monebo, quod alibi dictum est, quocunque demum modo exponatur illa Constitutio, non posse ex eâ elici nisi gratiam sufficientem Thomisticam, idque respectu volentium & conantium, quibus eam libenter concedimus. Ut verò nec vo-

lentibus nec conantibus tribuatur, manifesta in re pugna est. Nec ineptius quidquam cogitari potest, quàm si quis ex eâ propositione: *Justis volentibus & conantibus non deest gratia sufficiens Thomistico sensu*; duas illas derivet planè diversas & alienas: *Justis nec volentibus nec conantibus adest gratia sufficiens*; quod contradictione implicatur: vel, *Justi omnes volunt atque conantur*, quod à sensu communi, imò à fide penitus abhorret.

Falsum est ergo hominibus justis volentibus & conantibus aliqua Dei præcepta esse impossibilia secundum præsentem vitem, & deesse illis gratiam excitantem & sufficientem Thomistico sensu, quâ possibilia fiant eâ potestate, quæ non complectatur omnia ad agendum necessaria. Et qui hoc damnatum à summo Pontifice velit, adversus illum minimè pugnabimus.

Falsum est item, justis volentibus & conantibus deesse gratiam actualem: sed nihilominus verum, catholicum & orthodoxum est, omnibusque generatim Thomistis probatum, quosdam justos per gratiam excitantem & sufficientem conantes & volentes imperfectè, id est, ei non plenè consentientes, non habere eam potestatem implendi mandata, quæ complectatur omnia ad agendum necessaria, & carere efficaci gratiâ, quæ una talem possibilitatem asserit.

Verum est item ignorantibus, nec volentibus, nec conantibus implere mandata, deesse cogni-

tionem, voluntatem, conatum, id est, gratiam actualem. In quibus duobus capitibus, quam-

vis tota quæstio residet, nemo tamen Cenforum audeat alterutrum erroris arguere.

## ARTICULUS XIV.

*Totius operis conclusio, in qua turbarum istarum origo, & intoleranda Censuræ iniquitas paucis aperitur.*

**H**Abent eruditi Theologi, quorum scripta ad me perlata sunt, meam de tota hac controversia sententiam sincerè & idèò enucleatè explicatam: verùm non satis ipse totum illis animum meum aperirem, nisi de miserrimâ horum temporum conditione apud ipsos liberè conquerer.

Diu est, cùm Molinæ sequacibus Augustini doctrinam invadentibus necessariò resistimus. Sed quamquàm odiosa illa pugnandi necessitas esset adversus homines factione validos, erat tamen idèò tolerabilis, quòd interim ex ipsâ contentione gravissimis quæstionibus lux afferebatur. Nunc verò eorum fautores, alio post aliud munimento depulsi, eò rem redegerunt, ut planè nesciam quæ res agatur. Incredibile videatur, & tamen verum est, penitùs mihi ignotum esse, quid in eâ propositione, quam tot horrendis notis inuulerunt, communi eorum iudicio reprehensum sit. Sed illud adhuc incredibile, nec minùs tamen certum, ipsos accusatores meos, ipsos Cenfores, ipsos totius factionis duces, quid in commune acculaverint, quid damnaverint, penitùs nescire; ut hæc mira planè & ante hunc diem inaudita iudicii forma fuerit, in quâ accu-

satores quid ipsi objecerint nesciant, reus quid sibi objectum sit ignoret; denique quid iudicatum sit à iudicibus, à reo, ab omnibus pariter ignoretur. Id, quoniam ad ostendendam Censuræ iniquitatem mirificè pertinet, paucis hoc loco declarandum.

Animadvertendum est enim adversarios meos, etsi in odio mei & malevolentia consentiant, non minùs tamen à se invicem quàm à me dissidere, non modò in aliis quæstionibus, sed in eâ ipsâ quæ nunc agitur controversiâ, & in ipso controversæ propositionis sensu. Quidam illorum, & quidem præcipui duces, Molinisticis partibus jamdiu juncti, id unum in propositione meâ reprehendunt, quòd gratiam sufficientem Molinianam semper adesse omnibus iustis in tentatione positis neget, sive ad agendum, sive saltem ad orandum: omnia enim sua consilia conferunt ad gratiæ efficacis necessitatem evitendam. Pudit tamen illos hoc præ se ferre; & idèò ad putidam de præceptorum impossibilitate calumniam in sententiâ suâ confugerunt.

Alii verò, qui Thomistæ haberi volunt, gratiam Molinianam omninò repudiant; aliam astruunt,



actualem quidem, sed quæ illo semper careat effectu, comparatione cujus dicitur sufficiens, nisi Deus illi gratiam efficacem adjungat. Hæc tamen sufficiente gratiâ conferri volunt proximam & completam agendi potestatem, in quo se putant à me diversos. Verùm ipsis primùm de gratiâ actuali semper præsentē multi resistunt, qui ad certos pietatis actus solam gratiam habitualement sufficere arbitrantur; repugnant alii, qui sufficere aiunt, gratiam actualē aliquandò in aliquo veniali peccato multò ante commissio præstò fuisse.

De potentiâ proximâ ipsi Molinistæ, non illi veteres & horridi, sed hi novi & temperati, cum Thomistis illis non consentiunt; nam sine efficaci gratiâ, quam ad operandum necessariam statuunt, negant proximam operandi potentiâ haberi, licet ex ipsorum sententiâ per gratiam sufficientem habeatur orandi integra & plena facultas.

Ergò, cum de sensu damnando convenire non possent, licet de damnatione præcipiti factionis impetu consensissent, illa fuit necessariò inunda via quam ingressi sunt, ut propositionem nullo expresso sensu damnarent; ut sic suam quisque sententiam intactam esse privatim contendere, in me unum fucatæ consensionis obtentu impetum universi facerent. Necessarium quidem ipsis istud consilium fuit, miserum tamen illud, ne dicam ridiculum. Quid enim magis Cen-

suram in omnium contemptum, atque ludibrium possit adducere, quàm si illud percrebrescat, de damnatæ propositionis sensu inter ipsos Censores non constare, nullumque proferri posse, qui non vel mihi per summam calumniam affingatur, vel ipsis Censoribus probetur, aut in suis sodalibus omnis erroris expertus judicetur.

Omnis error, omnis falsitas, idè falsitas & error est, quia veritati adversatur; nec certa falsitas aut error esse potest, ubi de veritate oppositâ errori non constat. Universè id in omnibus verum, multòque magis in ipsâ fide. Neque enim hæreticum aliquid judicari potest, nisi veritatem aliquam oppugnet quam fide teneamus; & quia in fidei capitibus debent omnes Catholici convenire, debent etiam de iis sententiis consentire, quibus hæreses adversantur. Divinitatem Filii oppugnavit Arius; de divinitate Filii tota Ecclesia consentit. Negat in Eucharistiâ verum Christi Corpus adesse Calvinus; in Eucharistia Christum totum verè, realiter & substantialiter, contineri, tota Ecclesia confitetur. Dicant nunc, quæso, nostri Censores, quænam sit illa catholica veritas propositioni meæ opposita, quam ipse negem, de quâ tamen, non dicam universi Catholici, sed ipsi inter se Censores universi conveniant.

An illam afferent: Possibilia esse semper omnibus justis mandata? Quasi verò hoc à me negatum sit. De possibilitatis natura



rurâ quæstio est. Molinianam illam, quæ nihil aliud requirit ut in actum prodeat, nunquàm admittam, sed plurimi ex ipsis non admittunt. Thomisticam alii ex ipsis irrident, alii probant; ipse & probo & admitto, nec unquàm fateri recusabo, sic omnes justos mandata semper observare posse, etiam cùm deest gratia efficax, quemadmodum homines visu præditi in tenebris videre possunt ob internam videndi potentiam. Id verò vel ipsis fatentibus sufficit; & quidam ex illis, quos deosculantur & probant, quia Censuræ subscripserunt, ita possibilitatem præceptorum etiam post Censuram, gratulantibus aut certè ferentibus Molinistis, explicarunt.

An illud causabuntur, gratiam sufficientem actualem, quæ semper in omnibus tentationibus præstò sit, esse de fide? At illud multi ex ipsis non credunt, qui sufficere aiunt gratiam habitualement ad certos pietatis actus; multi etiam irrident, nec illud unquàm pro fidei capite haberi sinent, in omnibus peccatis & venialibus & mortalibus adesse semper in animo cognitionem peccati, & desiderium vitandi illius divinitus immisum, ut nulum jam peccatum ex ignorantia, ex errore, ex subita cupiditate, fieri possit. Deindè, ut jam dixi, nihil hoc ad propositionem meam. Non enim omnem gratiam actualem sufficientem Thomistico sensu à Petro amovi, sed tantum efficacem.

An confugient ad suum illud tantoperè jactatum potentia proxima nomen; sed prius illius æquivocationem tollant. Molinianam enim ejus verbi significationem repudiamus quidem, sed cum multis ex ipsis Censoribus. Thomisticam non aspernamur; incommodius hoc vocabulo expressam contendimus.

An illud fidei caput in sufficientis gratia nomine locabunt, quod excitanti gratia tribuendum præfractè quidam obtinere nituntur? Primum ridiculum, in nomine quod nulla Scripturæ auctoritas, nullum Ecclesiæ decretum consecravit, fidem esse positam. Deindè, sufficientis gratia vocem usurpent quantum volent, non repugnabimus, dum ne nobis sub illo nomine Molinianum fermentum obtrudatur.

Ita novi planè generis est illa hæresis, illa blasphemia, quam in me insectantur: nulli enim catholicæ veritati adversatur. Patientur enim, eredo, illud me nec hæreticum nec blasphemum habere, quod ipsi judices in suis ut orthodoxum probant. Et tamen his sepositis, non jam levis, sed planè nulla de propositionis meæ sensu controversia esse potest.

Omninò enim sic existimo, unam in hac totâ materiâ solidam esse controversiam de gratia efficacis necessitate. De hac qui conveniunt, vix aliter quàm verbis dissentire possunt; ceteræ de actu primo & secundo, de potentia propinquâ & remotâ,

de nomine ac naturâ gratiæ sufficientis, & leves per se, & maximam partem non de re, sed de nomine sunt, quas vel omittere omninò consultissimum sit, aut, si non omittantur, intra scholarum angustias placidè discere. Nihil verò indignius fieri potest, quàm ut ad illas quæstiunculas fidei majestas detrudatur, & propter illas sollicitetur Ecclesia, fideliumque concordia dirimatur. Victrix multis in locis volitat hæresis; magnâ Europæ parte sævit & regnat; bellis, seditionibus, omnium vitiorum eluvione, catholicus orbis premitur: nos, cùm maximè decebat omnes vires ad communes hostes propulsandos convertere, vel precibus ad flectendam Dei misericordiam incumbere, de actu primò & secundo digladiari cogimur. Dum vitalia periclitantur, de unguibus laboramus. Dum tota Religio ab externis & domesticis hostibus oppugnatur, ad metaphysicas disputationes pertrahimur.

In me certè nemo istorum malorum culpam meritò conferrat. Difficultates illas, ad quas nunc adversarii mei confugiunt, nunquàm tractavi, nunquàm commovi. Cum Patribus sensi & locutus sum; & me in istas subtilitates immittere à simplicitate christiana semper alienum duxi. Sexcenties legi apud Patres, Sine gratiâ, quâ Deus in nobis & velle & perficere operatur, nihil fieri posse: id in-

noxie affirmare posse credidi post tot auctores. Incidentium quæstionum spinas nec attingi, nec attingendas omninò putavi. Hæc ars, hoc consilium fuit eorum qui non aliud labantis existimationis suæ præsidium invenerunt, quàm ut controversiam in scholasticarum contentionum dumeta compellerent, ne suam in gravissimis rebus infirmitatem detegere cogerentur. Hoc consilio illud solertissimi homines assequi volunt, ut illarum controversiarum specie tota Augustini doctrina ejiciatur ex Academicis Christianis, imò ex Orbe Christiano. Id agunt, id moluntur, illarum turbarum incentores Jesuitæ, & ipsorum gregales, quibus ita resistendum est, ut non priùs de illis inanibus controversiis litigare sinantur, quàm de ipsius gratiæ efficacis necessitate cum Ecclesiâ consenserint. Post, si libeat, de actu primò & secundo disputabitur. Quare quòd illas difficultates tractare sum aggressus, nemo sic accipiat, quasi in illis positam propositionis meæ defensionem putem. Illius enim veritas prorsus ab istis quæstionibus sejuncta est: sed cùm passim dicunt, aliquid me in animo recondere, hanc ipsis calumniandi ansam eripere studeo; simul illud in clarissimos Theologos obsequium plenius fore sum arbitratus, si non modò meam ipsis de gratiâ fidem, sed omnes etiam opiniones, exponerem.

XVII.  
F R A T R I S  
JOANNIS NICOLAI  
DOCTORIS THEOLOGI  
P A R I S I E N S I S,  
E T  
APUD PRÆDICATORES  
PRIMARIi REGENTIS,  
*MOLINISTICÆ THESES*  
THOMISTICIS NOTIS  
EXPUNCTÆ.  
1656.

# FRATRE JOANNE NICOLAI

## J U D I C I U M

DD. HALLIER, JOISEL ET LAGAULT  
Doctorem Sacræ Facultatis Theologiæ Parisiensis:

*Ex Epistola Gallica ejusdem DOM. LAGAULT scripta ad  
D. MARTINUM GRANDIN Doctorem ac Professore  
Sorbonicum, Roma 26. Maii 1652.*

..... JE vous prie de faire nos recommandations à tous nos bons Messieurs les Camarades Molinistes, dont je ne vous repete pas les noms. J'avois oublié par mes précédentes de vous dire, que nous avons trouvé le P. Nicolai à Lyon, & que je l'avois fort entretenu. Nous avons jugé, que quoi qu'il soit fort habile homme, nous eussions eu de la peine à nous accommoder avec lui, s'il eût été de notre partie, parce qu'il est un peu arrêté à ses sentimens, & ainsi il eût été capable de rompre la bonne intelligence, que graces à Dieu nous avons conservée jusqu'à présent. C'est pourquoi je vous prie, sous secret, que si vous voiez quelque disposition pour l'envoyer à l'Automne, de tâcher de détourner adroitement cela, sans que vous disiez ces raisons-là comme de moi. Nous ne jugeons pas même qu'il puisse beaucoup servir dans son Ordre, parce qu'il y est fort suspect, & qu'on le croit contraire à la doctrine des Thomistes.

A Rome le 26. May 1652.

FRA-

FRATRIS JOANNIS NICOLAI  
 DOCTORIS THEOLOGI PARISIENSIS,  
 ET APUD PRÆDICATORES  
 PRIMARI REGENTIS,  
 MOLINISTICÆ THESES  
 THOMISTICIS NOTIS EXPUNCTÆ.

**Q**ui Thesim nuper arbitro JOANNE NICOLAI defensam, & ab ipso, ut norunt omnes, scriptam legerit, liquidò comperiet nihil aliud ei fuisse propositum, nisi ut rudiores quibusdam præstigiis ludificaretur. Unum id secutus est, sed duplici viâ. Primo Molinianum sensibus Thomisticarum vocum larvâ vestiendû; deinde adversariorum placitis subdolè recensendû, vel palam adulterandû. Hoc consilia sic verba sua concinnavit, ut sub vario sensu dum Thomisticum ostendant, Molinianum occultent. Sic adversarios impetit, ut Calvinum specie, reverâ Augustinum petat. Nemo hoc in JOANNE NICOLAI miretur. Non enim novum illud, sed solemne ipsius institutum est. Sic variis ante locû, sic in Facultatû Comitû, sic in Suffragio Censorio Latine & Gallicè, ut utrâque linguâ notior esset ejus temeritas, evulgato; postremò, sic in Thesibus istis se gessit, ubique veteratorem egit, & vultus mutantem Prothea, quem nescias quo nodo possis astringere. At ipsum tamen, quamvis lubricum & volubilem, alii tenebunt, & quæ Patribus, quæ S. Thomæ, quæ adversariis affinxit proferent & coarguent. Ego verò illum in suis tantùm Thesibus insequar: & falsa quidem in Augustini discipulos crimina conferentem refellam; tergiversantem verò, & Molinam occultè foventem, apertè detrectantem, in lucem extraham, ne diutiùs utroque pede claudicet, & ancipiti personâ incautis lectoribus Thomista Molinianus illudat. Nihil hic in Jansenii defensionem de quinque propositionibus expecta. Augustini discipulos, quos ille sub Janseniani nominis invidiâ insectatur, ab ipsius calumniâ defendi, nulla invidia est.

## I. NICOLAI.

**P**riorem (gratiam) Jansenius à charitate non distinguens, & gratiam adoptionis vocans, rationali creaturæ cuilibet innocenti debitam dicit.

## CONFUTATIO.

Debitam dicit, non creaturæ merito, sed sapientiæ & iustitiæ divinæ, quæ id exigit. At tu, qui hæc in Jansenio carpis, etiam homini lapso deberi gratiam dicis eodem modo quo innocenti Jansenius. *Etsi*, inquis in Suffragio censorio, *non debet nobis quoddam ab illo juramentum, debet sibi nihilominus quoddam nos jurat.* In quo alterum judicas, teipsum condemnas.

## II. NICOLAI.

Posteriorem ille (Jansenius) velut cœlestem quamdam atque ineffabilem suavitatem in sola spiritali delectatione reponit, quâ flectatur voluntas; iste (S. Thomas) in vera motione præveniente voluntatem.

## CONFUTATIO.

Dupliciter fallis aut falleris. Qui gratiam cœlestem esse suavitatem volunt, non negant, imò asserunt, esse etiam physicam præmotionem. Tu, qui multum in præmotionis voce tibi places, nullam præmotionem nisi Molinianam admittere videris. Præmotionis & prædeterminationis voces bifariam accipi possunt. Primum ita ut physicam motionem significant, quæ physicè quidem præveniat, physicè influat in consensum, nisi voluntas resistat; non tamen consensum infallibiliter eliciat. Hanc præmotionem

Suarez, hanc Molina non gravatè concedunt. Et ipse Annatus in Informatione de 5. Propositionibus præf. p. 55. *Motionem quippe seu præmotionem physicam ad actus bonos & salutes non negamus; prædeterminationem ablegamus eo sensu quo jam dixi, & qui ferè sensus est adversariorum.* Alio sensu præmotio accipitur pro eâ quæ consensum infallibiliter elicit per modum causæ efficientis. Et hæc iterum apud Thomistas duplex; una, quæ præmovet tantum ad actus imperfectos, & dicitur gratia sufficiens, & secundum quid efficax, quia hos motus infallibiliter elicit; alia, quæ ad actus perfectos impellit; & hæc vulgò apud ipsos simpliciter & absolute efficax. Sic Alvares disp. 84. n. 9. *Quando actus supernaturales sunt imperfecti, & ex natura sua ordinantur ad alios actus, sicut cogitare, desiderare, & petere, tunc auxilium quod dicitur efficax comparatione horum actuum, non debet dici efficax simpliciter, sed secundum quid, ut disp. 80. dictum est.* Caterum quando actus sunt perfecti in suo genere, sicut sunt actus fidei & charitatis, tunc auxilium quod est efficax comparatione horum actuum, debet simpliciter & absolute dici efficax. Utrumque etiam præmotionis genus agnoscunt Augustini discipuli; sed utrumque gratiæ efficacis nomine complectuntur, quæ modò perfectos, modò imperfectos actus, prout Deo visum est, elicit. Tu, quam admiras, Molinianam an Thomisticam, nihil affirmas, ut quocumque

cumque favor inclinarit faciliè te flectas.

### III. NICOLAI.

Sive præmotionis, sive prædeterminationis nomenclaturam ferat, liberam planè semper & indifferentem voluntatem relinquit, ut agat vel non agat, ut hoc aut illud agat, ut contrarium ei agat ad quod præmota & prædeterminata supponitur, non in sensu diviso, qualem nobis affingis, sed in sensu composito.

#### CONFUTATIO.

Quid nos æquivocis, quid flexibus detines & illudis? Aut nobiscum sentis, & falsò criminaris; aut cum Molinistis, & te omnes infectari Thomistæ debent. Nil in hoc negotio à recentiorum Thomistarum doctrinâ Augustiniani dissident. Gratia quælibet indifferentem voluntatem relinquit in sensu diviso, non in sensu composito. Hoc tibi affingi si quereris, quereris etiam Thomistarum sensus affingi. Hanc enim Alvares omnium S. Thomæ discipulorum tam antiquorum quàm modernorum sententiam esse asserit disp. 92. ubi cum Molinistarum doctrinam his verbis retulisset: *Quidam dixerunt, quòd stante in homine quocumque auxilio præveniente gratia secundum omnem realem virtutem & perfectionem quam habet ut veniat à Deo, possit etiam in sensu composito dissentire & non converti*: tum n. 4. subdit: *Contraria sententia vera est, & de mente S. Thomæ omniumque Doctorem quos*

disp. 25. adduximus. Et num. 11. *Post S. Thomam secuti sunt eandem doctrinam omnes ejus discipuli tam antiqui quàm moderni.* Et disp. 74. num. 6. *Quia liberum arbitrium motum à Deo auxilio efficaci, non potest illi dissentire in sensu composito. Sed in sensu diviso, ut inferius patebit, idèd esset magnum inconvenientis si hoc possibile poneretur in esse. Sequeretur enim quòd voluntas Dei esset inefficax & impedibilis per hominis voluntatem; quod, ut Augustinus dicit, & nos supra ostendimus, est impossibile.*

Alià tamen ratione gratia quælibet indifferentem voluntatem relinquit etiam in sensu composito, quia cum actu quem elicit gratia efficax componitur & pacificè consistit potestas ad contrarium. Sic Alvares disp. 115. n. 3. & 4. *Potentia ad unum actum non repugnat potentia ad actum contrarium, nec etiam repugnat actui contrario. Actus autem contrarii repugnant inter se in eodem subiecto.* Et paulò post: *Notandum secundo, quòd cum dicitur potentiam liberam esse, qua possit omnibus requisitis ad operandum potest operari & non operari etiam in sensu composito, hoc dupliciter intelligi potest, primò ita ut compositio fiat inter prærequisita ad operandum, & potentiam ipsam operandi & non operandi; & tunc sensus est, quòd potentia ad operandum & non operandum fiat simul in eodem subiecto cum antecedenter prærequisitis ad talem operationem.* Et hic sensus verissimus est, ut postea explicabimus. Secundo modo potest intelligi ita ut compositio fiat



inter antecedenter prerequisites ad operandum talem actum; & carentiam talis actus, seu actum ipsum contrarium. Et tunc sensus est, quod omnia prerequisites etiam ex parte Dei ad operandum talem actum particularem, & carentia ejusdem actus seu actus contrarius possint esse aut aliquando sint simul in eodem subiecto. In hoc ergo sensu intendimus prædictam definitionem impugnare.

Gratia tamen quæ imperfectos actus producit, quam illi sufficientem vocant, etiam cum opposito actu componitur, quia validior ei concupiscentia resistit, & effectum impedit quem habere posset, si plenè voluntas consentiret. Duo tamen ex Thomistarum doctrinâ notanda sunt. 1. Gratiâ illam quæ imperfectos actus producit, cum sit sufficiens respectu perfectioris actus, esse simul efficacem respectu actus imperfecti ad quem ordinatur divinâ voluntate; & hoc sensu asserunt omnes & S. Augustini & S. Thomæ discipuli, gratiam numquam eo effectû carere ad quem ordinatur ex Dei voluntate. Sic passim Thomistæ, sic inter alios Alvares disp. 80. in qua quærit, *Utrum omne auxilium sufficiens secundum aliquam rationem sit efficax*, & sic responder: *His tamen non obstantibus dicendum est, omne auxilium sufficiens comparatione unius actus, semper esse efficax respectu alterius, ad quem efficiendum decreto absoluto divinæ voluntatis destinatur*. Hanc sententiam docent communiter recentiores Thomistæ.

Secundò ut quis gratiæ sufficienti consentiat, gratiam efficacem necessariam esse, imò repugnare ut ipsi sine gratiâ efficaci consentiatur. Sic Navarretus tom. 2. cont. 24. 56. *Implicat hominem facere auxilium sufficiens efficax; vel quod Deus tribuens auxilium sufficiens expellet hominem tribuentem efficacitatem*. Præterea nota, tantum abesse ut opinio illorum, qui tenent hunc modum dicendi quem destruere conamur, sit vera, ut de potentia absoluta Dei non possit fieri, ut homo recipiens auxilium illud sufficiens, reddat illud efficax. Age igitur & larvam exue. Placetne tibi gratiam efficacem propriè dictam, suum effectum infallibiliter operari? Nobiscum sentis. Placetne tibi gratiam sufficientem semper effectum illum habere, ad quem refertur ex Dei voluntate? Nil aliud volumus, cum gratiam semper habere dicimus cum effectum quem vult Deus. Placet ne tibi gratiæ sufficienti numquam plenè consentiri sine gratiâ efficaci? Non video quid à nobis dissideas. Hoc enim solum volumus, Sine gratiâ efficaci neminem reipsâ & effectivè bene agere.

Supererit levior contentio de naturâ gratiæ sufficientis. Hanc Alvares semper actualem esse vult; nos verò, quamquàm justis actualem illam gratiam quam ipse sufficientem vocat, sæpè dari fateamur, tamen ad illam potestatem, quam largitur ex illis Thomistis gratia actualis sufficiens, habitualem gratiam satis esse

esse contendimus. De hoc si certare volueris, licet; habebis enim adversarios qui resistent. Sed vana illa crimina de sensu composito & diviso mitte. Nam aut illam quam exposui doctrinam probas, & nos pariter probas: aut improbas, & Alvarem aliosque Thomistas simul improbas, ex quibus illam exscripsi.

#### IV. NICOLAI.

Non aliud gratiæ tribuere, nisi quodd illuminet intellectum, vel afficiat piâ quâdam affectione voluntatem, minus est quàm ratio postulet, non tamen tale quod rejiciat fides, etsi hoc solum dicas.

#### CONFUTATIO.

Somniare mihi videor cùm Dominicanum audio sic loquentem. Siccine tam parvi estimari præcipuam clarissimi Ordinis gloriam, ut eam unus ex alumnis suis verbulo abjiciat! Quam sententiam hic refers, præcipuum Molinianæ adversus efficacem gratiam novitatis caput esse norunt omnes. Atqui, si te audimus, in hoc ipso capite rationi adversatur Molina, non fidei. Ergo qui hæreseos Molinam accular, calumniator est. Age nunc, egregie discipule S. Thomæ, agnosce quos tu inter calumniatores adscribas. Calumniator est insigne Dominicanæ familiæ decus Thomas Lemos, qui inter illa duo, quæ totius Ordinis sui causam apud Summos Pontifices agens, contra Pelagianos tenuisse dicit Ecclesiam, hoc secundo loco refert, ipsam prævenientem

gratiam efficacem esse ex Deo, non autem ex effectu, & cooperatione liberi arbitrii. In hoc totum Pelagii dogma reponit, quod admiserit internum donum adjuvare ut possimus, non autem ut velimus. Calumniatrix fuit tota Congregatio de auxiliis, quæ illum ipsum Molinæ errorem, quem tu fidei repugnare negas, sic proscriptit An. 1661. 22. Julii. Cum Molina præter gratiam prævenientem, sive excitantem, non requirat aliam potentiorē gratiam ad eliciendos actus supernaturales fidei, spei, & penitentia, non videtur discedere à semitis Pelagii. Ut paucis absolvam, calumniator est Clemens VIII. Paulus V. & tota Thomistarum Schola, & qui suis temporibus Catholicæ fidei vindices habiti sint, Fr. NICOLAZ judicio, gravissimi criminis rei tanto post peraguntur. At illud quis patienter ferre possit? Gratiæ per se efficaci detrahitis Patrum Præsidia, Scripturæ oracula, quibus se adhuc tutata est; rationem relinquis, quâ premitur potius quàm sublevetur. Quid hoc aliud est quàm inermem & nudam Molinæ prodere? Nam si sola ratio humana disceptet, ferè actum est de causâ gratiæ quæ divinâ autoritate tota nittitur, tota defenditur.

#### V. NICOLAI.

Necessitatem absolutam gratiæ prævenientis agnosce.

#### CONFUTATIO.

Cujus gratiæ? Si Molinianæ, nihil a Molina recedis. Si efficacis & Catholicæ, cur apertè non eloquē.

eloqueris? Cur Evangelium erubescis? Pudetne te eam profiteri gratiam; quam totus Ordo tuus jamdiu defendit? Suspecta dissimulatio est, quam non aliter effugies, nisi reipsa fatearis ad omnem pietatis actum & ad ipsam orationem, necessariam esse gratiam efficacem, non quâ fiat homo agendi potens, sed quæ consensus voluntatis infallibiliter operetur per modum causæ physicae efficientis & prædeterminantis. Id si recusas, quin Molinianus audias ne recusa.

#### VI. NICOLAI.

Quod ad initium fidei necessariam eam esse Semipelagianii agnoverint, Jansenianum figmentum est ac mendacium, quod Innocentius Decreto suo confutavit. Quod hæretici tantum essent, quia talem gratiam agnoverint, cui resistere voluntas vel etiam obtemperare posset, Janseniana hæresis est, quam eodem Decreto idem Pontifex confutavit.

#### CONFUTATIO.

Ad omnia breviter accipe. Semipelagianos gratiam sufficientem Thomisticam admisisse nemo dixit: an interiorem Molinianam admisserint, quæstio facti est, ex antiquitatis monumentis dijudicanda. Hæreticos fuisse quia talem agnoverint gratiam cui resistere voluntas posset, vel etiam obtemperare, nemo sentit. Propterea hæreticos fuisse, quia gratiam efficacem ad initium fidei necessariam negaverunt, sentiunt quicumque gratiam efficacem ad

omnes pietatis actus necessariam statuunt. Hoc qui negat, Molinianus est, non Thomista: ad quos te conferas delibera & tandem elige, ne semper fluctues.

#### VII. NICOLAI.

Posse gratiæ actuali non exterius tantum suadenti, sed interius excitanti resisti; qui abnuunt, resistunt Spiritui sancto.... Resistunt Spiritui qui per Innocentium Pontificem X. in decreto Apostolico idem elocutus est.

#### CONFUTATIO.

Quin tu astutias, quin calumnias mittis? Nemo Spiritui sancto, nemo Innocentio resistit, quia gratiæ resisti nemo abnuir. Hunc errorem si nulli tribuis, nugaris: si cuiquam ex Augustini discipulis, calumniaris.

#### VIII. NICOLAI.

Otiosum & vanum foret quod Stephanus loquitur, si de Spiritu tantum exterius monente loqueretur.

#### CONFUTATIO.

Otiosa & vana Stephani verba dicere, si de Spiritu exterius monente loquatur, non otiosum & vanum, sed planè impium est. Sic enim vana foret ipsius Dei vox Cain admonentis, quam Greg. Magnus de solo Spiritu exterius monente intelligit lib. 11. Mor. cap. 3. *Plerumque fit ut cum audientis cor, exigentibus culpis, omnipotentis gratia non repletur, incassum exterius à predicatore moneatur; quia mutum est os omne quod loquitur, si ille interius in corde non clamet, qui aspirat verba quæ audiantur. Hinc est etiam quod Cain*

Et divina voce admoneri potuit, & mutari non potuit; quia, exigente culpâ malitiæ, jam intus Deus cor reliquerat, cui foris ad testimonium verba faciebat.

IX. NICOLAI.

Ineptum ac frivolum, si sensu tantum Janseniano explicaret Stephanus resistentiam quam improbat; quasi nempe gratiæ reluctetur concupiscentia, sed per gratiam tandem infallibiliter superetur.

CONFUTATIO.

Jansenium adeat qui sensum ipsius explorare velit. De Augustinianis Theologis hoc repono, neminem ex illis id sentire quod tu illis adscribis. Resisti enim gratiæ iis omnibus modis agnoscunt, quibus Thomistæ, etiam recentiores; ut supra explicatum est.

X. NICOLAI.

Sic resisti gratiæ, ut illius effectus aliquando per voluntatem dissentientem impediatur, Thomisticum est; Catholicum est.

CONFUTATIO.

Semperne latebras, semper effugia captabis? Cui gratiæ resistatur & quomodo, non aperte dices? Si efficacis effectum per voluntatem dissentientem impediri ais, erras & omnes Thomistas adversarios habes. Audi Alvarezam disp. 72. n. 4. *Liberum nostrum arbitrium exstatum & motum à Deo liberè consentit, & consequenter potest dissentire si velit: tamen quando motio Dei est efficax, infallibiliter consentiet. Etenim hoc operatur gratia in libero arbitrio*

fortiter & suaviter, quod cum possit dissentire non dissentiat. Cujus ratio est quam assignat S. Thomas 1. 2. qn. 112. a. 3. in corp. Nam intentio Dei deficere non potest. Unde si ex intentione Dei morientis est quod homo cujus cor movet, consentiat & consequatur gratiam, infallibiliter eam consequitur, & necessario necessitate infallibilitatis, non autem ex necessitate absolutâ. Si autem de sufficiente tantum loqueris, quis nescit eam effectui aliquando carere? Illud tamen fatearis oportet, ipsam gratiam sufficientem, etiamsi eo careat effectui ad quem ex naturâ suâ tendit, & quem habere posset, tamen, ut supra vidimus ex Thomistarum sententiâ, numquam eo cedere quem vult Deus.

XI. NICOLAI:

Resisti eo sensu cuilibet gratiæ potest, non cuilibet resistitur.

CONFUTATIO.

Needum ab æquivocis locutionibus recedis. Hæc enim facile detorqueri possunt in Molinianos sensus, quomobrem ut hanc suspensionem vites; de his duobus capitibus iterum quæro quid sentias. Sentisne cum Thomistis sufficienti gratiæ, si non ad sit efficax, numquam ad actum perfectum voluntatem consentire? Sic enim Alvarez disp. 58. n. 3. *Observandum est bonum usum auxilii sufficientis non esse à solo auxilio sufficienti, sed ab efficaci. Et ne quis existimet, postquam Deus sua misericordia nulli nostris prece dentiali boni meritis vocavit peccatorem per gratiam sufficientem, prius*

esse in signo rationis, quod liberum arbitrium ejusdem peccatoris motum à Deo gratiâ excitante & sufficiente se determinet ad consensum, quàm quod Deus det illi gratiam adjuvantem seu efficacem. Id ipsum sibi objicit Alvares & his verbis refellit. Ad quartum respondetur prius esse in genere causa efficientis, quod Deus conferat homini auxilium efficace & eum determinet ad consentiendum gratiâ excitanti, quàm quod homo se determinet per liberum arbitrium & velit eidem gratiâ consentire, ut ex supradictis patet. Nec admittendum est, gratiam efficacem pendere etiam, tanquam à conditione sine quâ non, ex liberâ cooperatione arbitrii, ut disp. 73. & 90. perspicuum fiet. Ad confirmationem respondetur, illam causalem esse falsam; quia homo excitatus à Deo vult consentire & cooperari Deo vocanti, ideo adjuvatur à Deo; hanc autem causalem esse veram; quia homo excitatus gratiâ sufficiente adjuvatur à Deo auxilio efficaci, ideo cooperatur, ut disp. 99. patebit.

Sentisne cum iisdem, gratiam efficacem, consensum infallibiliter operantem, ad omnem pietatis actum, etiam fidei & orationis necessariam esse, ut cum aliis omnibus Thomistis docet Alvares disp. 55. num. 6. *Secunda conclusio: Nulla dispositio remota ad gratiam haberi potest ex solâ facultate natura, siue sit petere, siue desiderare ipsam gratiam, siue quodlibet aliud; sed ad illam necessariò requiritur speciale auxilium præmoventis gratiæ. Hæc conclusio est certissima. Per illud autem speciale auxi-*

lium præmoventis gratiæ, gratiam efficacem intelligendam esse passim in hac disp. declaratur, ut cum ait n. 13. *Præter vocationem sufficientem quæ tribuit voluntati posse consentire, requiri etiam (ut actualiter consentiat) vocationem efficacem, quâ fiat consentiens.* De his si tibi mecum conveniat, nulum de præceptorum possibilitate certamen inter nos superesse reipsa convincam. Si non convenit, tecum scilicet, sed conjunctis nobiscum omnium Thomistarum copiis certabimus. Cur id urgeam ne mirare. Multis enim signis indicasti te in gratiæ efficaciis voce ludere, & eam hoc nomine afficere, quæ consensum non infallibiliter operetur, ut ex sequenti conclusione patebit.

## XII. NICOLAI.

Sic efficacem per se dici, quia vim omnem voluntati conferat ex qua fiat agendi potens, Thomisticum est & Catholicum.

## CONFUTATIO.

Non faciliè reperias Molinianum ullum qui exitialem magis gratiæ vocem emisit, eâ quam Dominicanæ familiæ alumnus, non furtim & uno loco, sed passim in Suffragio Censorio inculcas, scilicet gratiam efficacem dici, non quia dat agere, sed quia dat posse agere; ut effuax, inquis, per internam efficaciam intelligatur illo etiam casu quæ non semper externa per effectum positionem consequitur. Itane tam credulos, tam supinos fore lectores tuos credis, ut tam apertam fallaciam non deprehendant? Hoc-

et tunc sensu gratiam efficacem dicit Alvares cum ait disp. 23. n. 23: *Sexta conclusio. Hæc duo simul sunt impossibilia, quod scilicet huiusmodi auxilium prædeterminans sit in libero arbitrio, & liberum arbitrium non operetur actum illum ad quem movet; quamvis semper possit eundem actum non operari, si velit.* Prima pars huius conclusionis probatur testimoniis apertissimis S. Prosperi & S. Thomæ adductis disp. 181. n. 23. quæ iterum repetenda sunt disp. 115. num. 4. & disp. 122. num. 19. Præterea probatur: Alias voluntas Dei absoluta esset inefficax, & impediretur per voluntatem humanam ne fieret id quod omnipotens per eam voluit fieri; quod tamen repugnat verbis illis Scripturæ: Omnia quæcumque voluit Dominus fecit in cælo & in terra; ut ostendit S. Augustinus in Enchiridio ad Laurentium c. 95. & 96. & lib. de Corrept. & Grat. cap. 14.

Hoc tamen sensu Augustinus, cum ait de Corrept. & Gr. c. 12. Subventum est ergo infirmitati voluntatis humane, ut divinâ gratiâ indeclinabiliter & insuperabiliter ageretur. Et ideo quamvis infirma non deficeret, nec adversitate aliqua frangeretur. Ex quo loco ibidem infert Alvares. Ergo secundum S. Augustinum hæc duo sunt impossibilia, quod scilicet Deus auxilio efficaci moveat liberum arbitrium ad consensum, & nihilominus liberum arbitrium dissentiat. Alias enim non ageretur à gratiâ efficaci indeclinabiliter & insuperabiliter. Vin scire quis hoc sensu admiserit gratias efficaces? Admittunt Mo-

liniani, qui non ita desipiunt, ut gratiam sufficientem agendi potestatem largiri negent. Admittunt Pelagiani, qui passim illud adiutorium possibilitatis ostendant, qui posse à Deo, velle ab homine esse dicebant, neque refugiebant illud posse interiori gratiæ adscribere, ut docet Alvares disp. 99. num. 4. Pelagius in ultimo statu suæ hæresis auxilium gratiæ interioris ad posse concessit; negavit autem adiutorium gratiæ per quam Deus efficiat ut velimus. Et paulò post: Potissima controversia sancti Augustini cum Pelagio non fuit de gratiâ excitante, sed de adiuvante, quâ Deus verè efficienter facit nos velle. Frustra tu, hoc posse plenius à gratiâ quàm Pelagiani dicerent, pendere dixeris. Nisi enim ipsum velle, ipsum consentire per gratiam efficacem infallibiliter à Deo donari concesseris, numquam cum Thomistis, numquam cum Augustino, numquam cum Ecclesia senties. Attende enim cuius gratiæ confessionem Augustinus à Pelagio deponat de Grat. Christi cap. 10. Sed nos eam gratiam volumus iste aliquando fateatur, quâ futura gloriæ magnitudo non solum promittitur, verum etiam creditur & spectatur; nec solum revelatur sapientia, verum etiam & amatur; nec suadetur solum omnè quod bonum est, verum & persuadetur... Hanc delet Pelagius gratiam confiteri, si vult non solum vocari, verum etiam esse Christianus. De quâ eadem gratiâ paulò post ait cap. 13. Qui autem novit quid est quod fieri

debeat & non facit, nondum à Deo didicit secundum gratiam, sed secundum legem; non secundum spiritum, sed secundum litteram.

Hoc cum animadverteret Alvares; rectissime dicit disp. 99. n. 2. Principalem inter Catholicos & Pelagianos controversiam non fuisse de gratiâ præveniente excitante; nec de gratia quæ nolisum operatur si volumus, sed de adjutorio gratiæ, per quod Deus verè efficienter facit ut velimus, hoc est, ut idem ait disp. 122. n. 8. & 17. De illa gratia adjuvante quæ efficit ut libere & infallibiliter homo consentiat: ita ut hæc duo sint impossibilia, quod illa gratia efficax ponatur in homine & homo actu dissentiat. Ex quibus manifestum est, neutiquam ad fidem sufficere eam gratiæ confessionem, quam his verbis proponis in Suffragio Censorio p. 39. *Quantumvis, inquis, illa tantis litibus agitata vocabulorum distinctio, nihil ad fidem pertinere arbitranda sit, modo sit unus apud omnes de sensu ipso ac fundamentali veritate consensus, ut gratiæ omnia tribuantur, ut ejus virtus ac necessitas agnoscatur, ut per illam voluntas ad agendum fieri potens astruatur, ut voluntatis non agentis negligentia vel defectui ascribatur quod habuerit unde agere posset & non egit: hæc, inquam, nullo modo sufficiunt, nisi illud adjungas Pelagianæ & Catholicæ gratiæ capitale discrimen, Ipsum velle, ipsum operari Deum indeliberabiliter & insuperabiliter operari. Hoc quia negare videris, iidem compellendus es verbis, quibus*

Julianus ab Augustino Op. imper. l. 3. c. 166. *Cur ergo non confiteris sine ulla forinsecus sonante jussione Deum occulto instinctu ad quod voluerit efficacissime implendum præparare atque excitare hominum voluntates, qui liberum non defendis intelligendum, sed precipitandum extollis arbitrium?*

### XIII. NICOLAI.

Sic efficacem per se præsupponi ut voluntatem necessitate quâdam abripiat, Jansenianum iterum est & hæreticum.

### CONFUTATIO.

Necessitatem hic nullam distinguis, quia involvere veritatem studes; ego distinguere necesse habeo, ut tuas calumnias evolvam. Necessitas triplex est, coactionis, naturæ, infallibilitatis: priores duas gratiæ nemo tribuit; tertiam omnes Thomistæ tribuunt. Hanc tu ultimam necessitatem si neges, quæ in eo præcisè sita sit ut effectum suum infallibiliter gratia consequatur, non ex aliquâ scientiâ mediâ, sed ex efficacia virtutis moventis, Thomistis omnibus contradicis, è quibus unus adducendus qui tibi istum eripiat errorem: is erit Alvares disp. 72. n. 4. p. 611. *Potest semper liberum arbitrium dissentire, si velit; tamen quando motio Dei est efficax, infallibiliter consentiet. Cujus ratio est quam assignat S. Tho. 1. 2. qu. 132. a. 3. in corp. Nam intentio Dei deficere non potest. Unde si ex intentione Dei moventis est quod homo cujus cor movent consentiat & consequatur gratiam, infallibiliter eam*

consequatur



consequitur, & necessario NECES-  
SITATE INFALLIBILITATIS, non  
autem ex necessitate absolutâ.

XIV. NICOLA I.

Sic efficacem per se non ad-  
mitti ut per consensum volunta-  
tis efficax fiat; Molinianum, &  
vel minùs consentaneum rationi,  
vel ambiguo sensu dictum.

CONFUTATIO.

Quid exquisitas verborum  
ambages tanto studio quæris; ne  
molles Molinistarum auriculas  
perstringas? quid sibi volunt illæ  
parvæ? Non consentaneum est  
Molinæ dogma rationi, durius  
est; lenienda vocis asperitas,  
minùs est consentaneum. Etiam sic  
durius; addendum aliquid ad mi-  
tigandam offensionem; *vel ambi-  
guo sensu dictum*. Bene est, patet  
enim janua Jesuitis, ut non nihil  
deflexam Molinæ sententiam ab  
errore penitus vindicent. Quis  
tam ignavam dissimulationem fe-  
rar? Ferrem tamen, si vel isto  
modo sincerè tandem Molinæ re-  
nunciaret. At nihil te minùs vel-  
le nullo evidentius loco declaras.  
Non enim cum efficacem fieri  
gratiam per consensum negas, id  
intelligis quod cæteri omnes an-  
te te scriptores; nempè quòd ef-  
fectum suum gratia sortiatur, ex  
liberi arbitrii nutu non pendere,  
sed ex vi ipsa gratiæ liberum in-  
fallibiliter moventis arbitrium.  
Verùm cum apud te gratiæ effi-  
cacia nomen nihil aliud signifi-  
cet, nisi gratiam agendi poten-  
tem; cum illam per consensum  
fieri efficacem negas, hoc dicis  
illam à voluntate agendi vim non

mutuari; etsi quòd effectum actu  
habeat, voluntatis consensu fiat.  
Affingi tibi omnes hunc sensum  
crederent, nisi sedulò cavisses ne  
tibi falsò adscriptus videretur.  
Sic enim loqueris in Censorio  
Suffragio p. 14. *Fam explodat* (Na-  
varetta) *que per consensum volun-  
tatis efficax fiat, id est vim quem-  
dam partialem à voluntate mutua-  
tur aut recipiat, explodimus*. Ecce  
quid sit apud te efficacem fieri  
per consensum. Igitur omnes tuæ  
artes ed denique redeunt, ut sen-  
sus Molinianos admittas, verba  
asperneris; è contratio verba  
Thomistica retineas, sensus &  
dogmata penitus abjicias. Efficacem  
gratiam admittis, Thomi-  
sticum est; sed sensum Molinia-  
num occultas. Eam enim intel-  
ligis quâ sit quisque agendi po-  
tens, non quâ infallibiliter ad  
agendum moveretur. *Pramotionis,  
prædeterminationis* voces sedulò  
servas; at illæ nec præmovere  
apud te, nec prædeterminant vo-  
luntatem; sed Molinisticè tantum  
ipsi blandiuntur. Consensu fieri  
gratiam efficacem, meritò negas,  
Repudiatum Molinam crederes.  
At ille nescio quomodo perversæ  
interpretationis quasi postico  
admittitur. Efficacem enim gra-  
tiam per consensum fieri negas,  
quia scilicet vim agendi à con-  
sensu non mutuatur; etsi nus-  
quam neges, quòd gratia illa  
quam efficacem vocas effectum  
habeat, à consensu pendere. Imò  
id apertè insinuas Suffragii Cen-  
sorii p. 39. *Nec aliter*, inquis,  
*de gratia loquitur S. Thomas, vol*

est per auxilium sufficiens verè posse hominem operari actum illum, comparatione, cuius dicitur sufficiens, etiamsi numquam sit operaturus, nisi Deus auxilio efficaci efficiat, ut illud posse reducat ad actum secundum. Secundo modo id potest intelligi de principio sive auxilio, quo potest completè operari, ita videlicet ut non solum habeat qui principium quo verè possit operari; sed etiam habeat complementum, quo in ipso exercitio operetur & velit.

His positis planissima est Augustini discipulorum sententia. Contendunt enim primum, non semper adesse hominibus etiam iustus prius illud possibilitatis genus, quod Molinianum dici potest, cui nihil deest omnino ad ipsam actionem necessariò prærequisitum, quodque sine novo auxilio in actum prodir; in quo Thomistas omnes sibi adiunctos habent. Constans enim est omnium Thomistarum doctrina, sufficientem gratiam quâ solum posse tribuitur, non completi omnia ad agendum necessariò prærequisita, adeoque non esse omnibus modis sufficientem, seu ex se solâ non sufficere. Quidam existimant, inquit Alvares disp. 79. num. 1. quòd ut aliquod auxilium gratia dicatur verè sufficiens, quo possit credere, diligere, aut perseverare, necessarium est quòd sit ita sufficiens, ut ex parte principii activi, sive ex parte prævenientis auxilii, nullum aliud auxilium sit necessariò prærequisitum ut actualiter credat, diligit, aut perseveret. En Molinistarum sententia. Mox verò num. 2. suam

suorumque sententiam exprimit his verbis: Contrariam sententiam docent omnes Doctores, qui sentiunt, præter auxilium sufficiens quod tribuit homini posse credere, posse diligere, aut posse perseverare, necessarium esse aliud auxilium efficace prævenientis gratia, quo Deus efficiat ut homo actualiter credat, diligit, aut perseveret. Et disp. 91. n. 14. Ad sextum respondetur, hoc auxilium efficace esse necessarium per modum principii, seu ultimi complementi actus primi, ut supra dictum est. Unde sine illo datur quidem auxilium simpliciter sufficiens ad conversionem vel piam operationem, NON TAMEN OMNIBUS MODIS SUFFICIENS.

Navarretta tom. 2. cont. 19. §. 1. Quod Suares dicit, auxilium sufficiens includere in se omnia quæ sunt necessaria ad operationem, falsum est, & contra D. Augustinum. Et paulò infra: Impossibile est quòd tale principium existens in potentia ad operationem (per gratiam scilicet sufficientem de qua loquimur) contineat omnia quæ necessaria sunt ut sequatur operatio. Nam impossibile est quòd tale principium se reducat in actum ad operandum: atque adeò, ut sequatur operatio, necessarium est, etiam per modum principii operationis, illud quod facit dictam reductionem; nempe gratia efficax, quam non omnibus dari certum est. Et ibid. Speciali gratia divina conceditur ei qui operatur: quæ gratia non est ipsa operatio, sed speciale rotur ad eliciendam operationem, & consequenter non continet auxilium sufficiens quicquid per modum principii est necessarium

*cessarium ad illam operationem.* Idem etiam docet Sylvius in 1. 2. q. 111. a. 3. qu. 3. & alii vulgò.

Posteriorius autem illud possibilitatis genus, quo ita quis dicitur posse ut non habeat omnia prærequisita ad actionem, quo sic justus dicitur posse bene operari, sicut oculus dicitur posse videre etiam cum est in tenebris, quod ita sufficiens est ad bene agendum, sicut oculus sanus ad videndum sine lumine: (his enim & verbis & comparisonibus utitur Alvarez eadem disp. 79. n. 2. & 5.) illud, inquam, possibilitatis genus omnes & Augustini & Thomæ discipuli libenter iustis semper adesse profitentur & agnoscunt. Si igitur hoc solum postulas, ultrò concedimus. Si Molinianum; non concedemus quidem, sed nec Thomistæ, nec veritas umquam tibi concedet.

Neque verò hæc elabèris, quòd nonnulli recentiores Thomistæ, etiam cum iustis deest gratia efficax, illos tamen habere volunt possibilitatem perfectam in actu primo; deesse verò illis tantum possibilitatem in actu secundo. Primum enim non hæc constans est omnium Thomistarum etiam recentiorum sententia, inter quos plurimi sentiunt gratiam efficacem se tenere ex parte actus primi; & sine illà non haberi potentiam perfectam in actu primo. Ita Zumel tom. 3. disp. 5. sect. 1. *Auxilium sufficiens non dicitur sufficiens, ut nomen grammaticale sonat, quasi se ipso solum & omni alio repulso*

*non solum habeat vim agendi & operandi, sed eam exerceat.* Nam id videtur terminus ille, sufficiens, importare grammaticaliter. Sed solum dicitur sufficiens Theologicè, quia dat homini ut possit agere, tribuitque ei vim ad volendum, sed non completè omnino; quia est necessaria gratia efficax intrinseca, & determinans voluntatem per modum actus primi; & tunc est homo completè potens.

Quin & ipse Alvarez, qui pro illà potentiâ omnino proximâ per gratiam sufficientem collatâ adduci solet, non ita illam tueretur ut vulgò existimant. Disertè enim docet per gratiam efficacem & posse & agere simul donari. En verba sole clariora disp. 71. nu. 14. *Gratia, inquit, sufficiens eminenter includitur in gratiâ efficaci, non autem formaliter.* Nam gratia sufficiens formaliter loquendo ut ab efficaci distinguitur, est illa quæ solum tribuit posse operari illum actum, comparatione cuius dicitur sufficiens. *Gratia autem efficax, quamvis tribuat posse operari, non tamen confert solum posse, sed etiam actualiter operari.* Undè manifestè sequitur, justum qui gratiam efficacem ad piam aliquam operationem necessariam à Deo non accepit, etsi non careat interiori etiam per gratiam potentiâ ad rectè operandum, non habere tamen, ex ipsius Alvaris sententiâ, omne posse, ut ita dicam, ad piè operandum; quandoquidem illo posse caret quod gratia efficax, ex illo autore, confert simul cum ipso operari; & quod nemo negare

negare potest propinquius & expeditius esse ad rectè agendum, quàm illud *posse*, qualecumque sit, quod conferri dicitur per gratiam sufficientem, qualiscumque etiam illa statuatur, sive habitualis, sive actualis.

Deinde quod eodem redit, idem Alvarez agnoscit per gratiam efficacem conferri voluntati ultimum complementum actus primi. Sic enim ille disp. 18. n. 18. *Motio actualis Dei confert voluntati & omnibus causis secundis ultimum complementum actus primi, ut docet S. Thomas. Et cum arguitur: Nam talis concursus supponit in voluntate quicquid ad agendum necessarium est ex parte actus primi; Respondetur supponere quidem quicquid est necessarium ex parte actus primi per modum potentie vel operative virtutis, non tamen supponit applicationem seu ultimum complementum actus primi; sed illud tribuit voluntati.* Non ergo ex Alvarez habet quicquid necessarium est, etiam ex parte actus primi, qui gratiâ efficaci caret. Rectè ergo dicitur aliquo sensu non posse, quantumcumque aliâ ratione rectè etiam dicatur posse.

Deinde, quicquid sit de quæstione illâ philosophicâ potiùs quàm Theologicâ, sufficit Augustinianis, parentibus omnibus Thomistis, gratiam efficacem, quæ singulare Dei donum est non omnibus datum, ita iustis omnibus ad omnem pietatis actum necessariam esse, ut sine hac nihil possint in actu secundo, effectivè, & re-ipsa, licet verè possint quan-

tum ad sufficientiam operativæ virtutis in actu primo: sive fieri non posse, & quod durius etiam exprimit Navarreta, *impossibile esse* ut iustus piè quicquam re-ipsâ agat nisi à Deo efficaciter motus, Id si negas, Molinianus es, non Thomista: si concedis, frustra nobiscum de possibilitate certas; frustra nobis Constitutionem Apostolicam objicis, quam eò sincerius amplectimur, quò magis laboramus ne pravâ intentione eò detorqueatur, ut possibilitatem Molinianam, quæ efficacia gratiæ necessitatem excludit, adstruxisse videatur: quod omnium Thomistarum iudicio intoleranda est in Apostolicam sedem contumelia, & error in fide gravissimus.

#### XVI. NICOLAI.

Et interim tu magnam vocas & Catholicam veritatem, quod hæreticus error est, error magnus.

#### CONFUTATIO.

Iustis aliquando deesse gratiam quâ immediatè, proximè, & effectivè possint tentationes superare, id est, efficacem quæ largitur posse cum effectu, posse in actu secundo, dixit ille quem tam invidiosè accusas. Hoc sensu accipi voluit sententiam suam; imò non suam, sed Augustini, sed Chrysostomi. Ergo alterutrum tibi probandum, vel illam sententiam sic acceptam esse falsam & hæreticam: & tunc apertè Molinistam & insensissimum tuæ scholæ adversarium te ipse profiteberis; vel ipsum malè verba sua interpretatum esse. Neutrum

aggrederis infirmitate; animositate tamen obtrectare non desinis, cum meminisse debuisses illius præcepti: *Criminis magnitudinem contra accusatorem esse, priusquam probetur.*

#### XVII. NICOLAI.

Nulli gratiam sic deesse, ut non ex parte Dei sufficienter adsit, quoties non agnoscit Sanctus Thomas.

#### CONFUTATIO.

Nusquam id agnoscit S. Thomas, sed illud solum de quo omnes Catholici consentiunt: Deum homini suâ sponte paratum esse gratiam conferre, nisi ipse impedimentum præstaret. Sed cum post peccatum primi hominis nullus sit qui impedimentum non præstet, hoc Deus in quibusdam gratuitâ misericordiâ superat, in aliis justitiâ non superat. Ut docet idem Sanctus lib. 3. cont. Gent. cap. 161. Latiùs ista exponere non est hujus loci.

#### XVIII. NICOLAI.

Nullos ab iis ( infidelibus ) actus innoxios ac moraliter bonos fieri posse, præter fidem est.

#### CONFUTATIO.

Non satis est tibi Molinistarum audaciam æquare; etiam superare instituis. Plerique eorum, ab ipsa veritate convicti, ultrò agnoscunt exploratam esse Augustini sententiam, nulla esse in infidelibus opera omni ex parte innoxia. Tu verò, ut singularem perviciaciam tuam probes, sententiam istam etiam erroris & hæreseos accusare non dubitas. Confidentiam tuam hoc loco despicere satius

quàm refellere. Quare, ne hic iterentur quæ alibi fusè à variis tractata sunt, duo tantùm hic tractam, alterum Augustini, alterum Ecclesiæ, quibus res tota breviter conficitur. *Vera virtutes,* inquit Aug. l. 4. in Jul. c. 3. *Deo serviunt in hominibus à quo donantur hominibus; Deo serviunt in angelis, à quo donantur & angelis. Quicquid autem boni fit ab homine, & non propter hoc fit propter quod fieri vera sapientia præcipit, etsi officio videatur bonum, ipso non recto sine peccatum est.* Ipsa verè Ecclesià, ab infidelibus spiritu gratiæ destitutis nihil innoxium fieri, satis testatur, dum ita canit: *Sine tuo numine, nihil est in homine, nihil est innoxium.* Nihil tamen obstat quin multa infidelium opera, quod ad objectum & finem proximum pertinet, quod officium Augustinus appellat, moraliter bona dici possint: *Multa enim bona fiunt, non beneficientibus à quibus fiunt,* ut inquit ibid. S. Doctor.

#### XIX. NICOLAI.

Quid quodd nec ullis olim eam gratiam defuisse S. Thomas inculcat, & Judæis in lege affuisse, tamen non ex lege collatam? Impedientem vocas. Qualis gratia ista Janseniana, nisi monstrum est?

#### CONFUTATIO.

Putidam de gratiâ impediente calumniam refricasse te mirarer, nisi hunc nossem omnium Molinistarum morem esse, obritas & elisas penitus cavillationes de integro objicere, tanquam nihil ad-

adversus eas ante dictum sit. De sufficiente & actuali gratiâ legis comite graviter erras; quod ut clareat, paucis totâ res aperienda.

In primis illud statuendum: Cùm Judæis gratia sufficiens adfuisse negatur, non agi de omnibus qui veteris legis tempore, vixerunt, sed tantum de iis qui sub lege, id est sub jugo legis. Certum est enim illis temporibus fuisse nonnullos qui anticipatâ Christi venturi fide cœlitus illustrati, gratiam non modò sufficientem, sed efficacem acceperunt. Sed illi acceptis Spiritus Sancti primitiis, non jam sub lege, sed sub gratiâ; non ancillæ filii, sed liberæ; non synagogæ, sed Ecclesiæ; nec veteris, sed novi Testamenti hæredes erant. In hoc numero habendi sunt Patriarchæ, Prophetæ, aliique perpauci, qui Christi venturi ac morituri fide à maledicto legis ad Evangelii gratiam transferbantur. *In illo populo*, inquit Augustinus l. 15. contra Faustum c. 2. *Sancti Patriarchæ & Prophetæ, qui intelligebant quod agebant, vel quod per eos agebatur, in novo Testamento habebant istam spem salutis æternæ. Ad illud enim pertinebant quod intelligebant & diligebant. Quia etsi nondum revelabatur, jam tamen figurabatur.* Ex quo intelligere est quàm solidâ ratione nitantur, qui ut Judæis sub lege viventibus gratiam asserant, utuntur exemplo Patriarcharum & Prophetarum, quos nec sub lege fuisse, nec ad illam pertinuisse,

nec propriè Judæos, sed Christianos re, licet nondum nomine, fuisse Augustinus affirmat. Verùm illis sepositis, quos idem non multos fuisse passim docet, qui reliquæ Judæorum multitudini sub lege constitutæ gratiam sufficientem actualem largiuntur, nec S. Augustini, nec S. Thomæ doctrinam, nec Dei in dandâ lege consilium intelligunt; imò Christianam fidem à Paulo traditam manifesto errore violant; quod hîc facillè demonstrarem, nisi fusè probatum aliis locis esset. De Augustino item nihil hîc dicam, cum hâc in parte ita plana sententia, ut de ejus mente ambigi non possit, nisi ab eis qui ipsum non legerint. Sed quoniam cum eo mihi res est qui se Thomistam haberi vult, quid de lege sentiat S. Thomas, quid ad ea quæ ex ipso proferuntur respondeat Nicolaï, hujus loci est expendere.

Imprimis istud affirmare non vereor, nullum ex S. Thomæ locum asferri posse, in quo legi semper adjunctam gratiam sufficientem fuisse dicat. Argumento esse potest, quòd tu ipse cùm ea loca S. Thomæ, quibus crederes imponi posse lectoribus, studiosè colligeres, nullum protulisti ex quo gratiam semper legi adjunctam fuisse probares. Illa verò loca quæ ex ipso attulit autor Epistolæ, ita clara & manifesta sunt, ut nullâ cavillatione possint obsecrari. Duo tantum hîc representabo, ut palàm fiat quàm absurdâ responsione vim illorum eludere volueris. *Triplex*, inquit S. Tho.

S. Thomas 1. 2. q. 106. a. 3. ratio potest assignari, quare lex nova non debuit dari à principio mundi, . . . Tertia ratio sumitur ex hoc quod lex nova est lex gratiæ. Et idè primò oportuit quòd homo relinqueretur sibi in statu veteris legis, ut in peccatum cadendo, suam infirmitatem cognoscens recognosceret se gratià indigere. Et hanc rationem assignat Apostolus ad Rom. 5. dicens: Lex subintravit, ut abundaret delictum. Et in Ep. ad Gal. c. 3. lect. 7. Lex data est ad infirmitatem manifestandam. Homines enim de duobus presumebant, primò quidem de scientià, 2. de potentià. Et idè Deus reliquit homines absque doctrinâ legis, tempore legis naturæ. In quo, dum in errores inciderunt, convicta est eorum superbia de defectu scientiæ. Sed adhuc restabat presumptio de potentià. Dicebant enim: Non deest qui impleat, sed deest qui jubeat; & idè data est lex, quæ cognitionem peccati faceret, quæ tamen auxilium gratiæ non dabat ad vitandum peccatum; ut sic homo sub lege constitutus vires suas experiretur, & infirmitatem suam recognosceret, inveniens se sine gratiâ peccatum vitare non posse, & sic avidius quæreretur gratiam.

Hæc tu testimonia verbulo repellere tibi videris, cum ais in Censorio Suffragio: Ea S. Thomæ testimonia, magno apparatu congerit (Autor Epistolæ) quæ nihil minùs quàm institutum probent, quæ Judæis gratiam ex vi legis concessam non fuisse, ad justitiam consequendam & exercendam insinuant; sed aliunde sufficienter datam ad futuri

mediatoris fidem, per quam justificari possent, concipiendam & profutendam non excludant.

Hanc solutionem si plausus sequatur & confusus circumstantium clamor, bene habet, vicisti, aut certe non victus es: at si maturo judicio ab eruditis expendatur, nil inanius, nil absurdius fingi potuisse patebit. Datam legem asserit S. Thomas, ut hominem suæ infirmitatis admoneret; quia vires ipsi ad ea quæ imperabat præstanda non dabat. At si vires aliunde homini suppetebant, quo pacto hominem admonisset infirmitatis suæ? Nonne robur potius ejus ac potentiam ostendisset? An hominis inbecillitatem probet baculus arundineus quò niti non possit, si alium ad manum seipionem habeat quò nitatur? An hominem imbecillum aliquò pervenire non posse probabis, currum ipsi sine equis offerendo; si ille quocumque modo equos habeat quibus currui junctis ad eum locum pervehi possit? Absurda hæc & ridicula sentis? Intellige ergo quàm sit absurdum, legem datam esse ut admoneret hominem infirmitatis, quia ex se non conferebat gratiam, si hominibus sub lege constitutis gratia aliunde semper præsto fuit, nempe ex meritis Christi. Quasi verò hoc infirmiores fuerint, quòd non à lege & à servo, sed ab Evangelio & à Domino gratiam acceperint. Quocumque modo habeas gratiam, perinde firmus es si eandem habes; à quo illam habeas



& quomodò, nihil ad firmitatem vel infirmitatem interest. Discernis tu quidem gratiæ accipiendæ modum in statu veteris & novæ legis; sed hominum in utroque statu vires non discernis. Quibus enim eandem attribuis gratiam, parem quoque potentiam concedas necesse est.

Quid quòd in statu veteris legis hominem *filii relictum* asserit S. Thomas? An tu hominem qui gratiâ sufficienti sit instructus sibi relictum dices? Quid quòd idèd legem datam fuisse dicit, *ut homo infirmitatem suam experiretur, inveniens se sine gratiâ peccatum vitare non posse?* Sed quomodò experiretur infirmitatem suam, si semper affuit unde firmus esset? Quomodò inveniret se sine gratiâ peccatum non posse vitare, si semper ei affuit gratia, per quam peccatum vitare posset? Quid quod I. 2. q. 98. a. 1. *legem ex Apostolo occidisse dicit, non quidem effectivè, sed occasionaliter ex suâ imperfectione, in quantum scilicet gratiam non conferbat per quam homines implere possent quod mandabat, vel vitare quod vetabat?* At si semper hominibus, licet aliunde quàm ex lege, affuit gratia, per quam implete possent quod lex mandabat, vel vitare quod vetabat, quomodò lex illos occidit, quandoquidem neminem occidit, nisi quos gratia non adjuvat? At si tibi credimus, neminem umquam gratia non adjuvit.

XX. NICOLA I.

Quòd salvos omnes fieri Deus velit, non voluntate signi solùm,

sed voluntate beneplaciti, nihil in S. Thomæ sensu manifestius, nihil in verbis expressius; non eâ quidem quam consequentem vocat, & quæ singulas rei circumstantias præsupponit, sed eâ quam appellat antecedentem, & quam cum voluntate signi parum cavè confundunt, qui non attendunt quid loquantur.

# CONFUTATIO.

Obiter hîc te monitum volo, confidentiùs te loqui de præstantissimis scholæ tuæ Doctoribus, è quibus Bañez & Zumel ab Alvare citati voluntatem antecedentem in Deo formaliter esse negant. Alvares verò qui voluntatem antecedentem in Deo ponit formaliter, illam tamen voluntatem signi dicit esse disp. 34. n. 5. Respondetur, inquit, *Deum voluntate antecedente, quæ est voluntas signi, seu voluntas secundum quid, velle ut omnes universaliter observent præcepta ejus.* En qui, te auctore, incautè sentiunt, & non attendunt quid loquantur.

Adversarios autem tuos ne vellicat quidem ista sententia, quam hîc adstruis. Sit enim in Deo voluntas antecedens, quod tibi non gravatè concedent; non sit voluntas signi, de quo itidem non litigabunt; sit etiam voluntas beneplaciti, de nomine enim contendere non amant; duo tamen certa sunt.

Primum, non esse voluntatem simpliciter, sed tantùm secundum quid. Disertè enim sanctus Thomas negat I. p. qu. 19. art. 6. *ea quæ antecedenter volumus, nos*  
sim.

*simpliciter velle; sed tantum secundum quid: quia voluntas comparatur ad res secundum quod in seipsis sunt; in seipsis autem sunt in particulari. Unde simpliciter volumus aliquid secundum quod volumus illud consideratis omnibus circumstantiis particularibus: quod est consequenter velle. Unde potest dici, quod iudex justus simpliciter vult homicidam suspendi; sed secundum quid vellet eum vivere, scilicet in quantum est homo. Unde magis potest dici velleitas, quam absoluta voluntas.*

Deinde ex voluntate antecedenti nullam gratiæ præparationem derivari. Nam gratia non datur nisi circumspectis circumstantiis, quod abhorret à voluntate antecedenti, ut tu ipse fatearis. Id ipsum probant exempla voluntatis antecedentis à S. Thoma prolata. Similem enim eam dicit voluntati iudicis de salute latronis in quantum homo est. At ista voluntas iudicis nullam præparationem mediorum involvit, quibus latro morti eximatur.

Fatemur ergo voluntatem antecedentem ad voluntatem beneplaciti à S. Thoma sæpe revocari. Sed sicut illa tantum est voluntas secundum quid; sic est tantum secundum quid voluntas beneplaciti. Propterea cum voluntas beneplaciti strictè sumitur pro voluntate simpliciter dicta, eo sensu rectè negari potest voluntatem antecedentem esse voluntatem beneplaciti.

Non malè ergo Álvares disp. 33. negat, Deum velle voluntate

beneplaciti ut omnes salventur, adeoque graviter castigat eorum temeritatem, qui Augustinum Apostoli verba de solis electis interpretantem rejicere ausi sunt. Illorum; inquit, argumenta nendum non convincunt, sed nec probabiliter suadent, tres hæc Augustini interpretationes non esse admittendas. Nam S. Thomas, & alii plures Doctores eas admittunt; & in materia de gratiâ & prædestinatione, circa quam summi Pontifices hanc hujus viri sanctissimi doctrinam receperunt, ut disp. 5. ostensum est, nullus debet ab eâ discedere. Sed ex eorum argumentorum solutione non obscurè patebit, quàm sine causâ S. Augustinum impugnent. Et præterea id constare potest; nam VOLUNTAS BENEPLACITI DEI SEMPER IMPLETUR, ut communiter docent Theologi, præsertim S. Thomas 1. p. q. 19. a. 6. Cajet. sup. 1. Ep. ad Timoth. Sic ut in 1. dist. 46. q. unâ ad 1. Bonau ead. dist. a. 1. q. 1. Sed non omnes salvantur. Ergo DEUS NON VULT VOLUNTATE BENEPLACITI UT OMNES SALVENTUR. Ac per consequens explanationes illæ S. Augustini & S. Thoma, quibus ad omnes & solos electos verba Apostoli referunt, necessariò sunt admittende. Verùm tota quæstio nominis est; in quâ difficilis esse nemo debet, dummodò maneat illud, voluntate antecedente nullam gratiam hominibus præparatam: in quo antiquos omnes Theologos video convenire.

Voluntatem consequentem rectè explicas, dummodò inter illas

las circumstantias, quas attendit Deus, non numeres propriorum cujusque personæ meritorum prævisionem. Sed tu nunquam tibi exitus præcludes, quibus ad sodales tuos Molinistas possis transfugere.

Notari porro debet ipsos Thomistas, qui voluntatem antecedentem in Deo formaliter reponunt, & actum conditionatum esse volunt, illam ex duarum tantum conditionum alterutrâ suspendere. Prima, quæ placet Alvari, ejusmodi est: *Vellem salutem omnium, nisi ex hoc impederetur pulchritudo universi*, & bonum universale justitiæ & misericordiæ. Secunda, quæ magis ad mentem Augustini, talis est ex ipso Petavio Theolog. Dogm. to. 1. l. 9. c. 7. *Vellem omnes salvare, nisi eos primi parentis culpa odiosos fecisset*. Utrique verò tam Augustiniani, quàm Thomistæ, hanc conditionem tanquam Pelagianam explodunt: *Vellem omnes salvare, si modo ipsi velint*: *Multi*, inquit Aug. l. 4. in Jul. c. 8. *salvi non fiunt; non quia ipsi nolunt, sed quia ipse non vult*. Ergo, inquit Alvares disput. 34. num. 5. *conditio quæ includitur in voluntate antecedente, non est ista: Si ipsi voluerint, & per eos non steterit*. Hæc si sentis, nobiscum sentis: si non, sentis cum Molinistis.

# XXI. NICOLAI.

Quòd pro omnibus quoque ita passus dicatur Christus, ut non pro generibus singulorum dumtaxat, sed aliquo modo pro

singulis generum intelligi debeat, nihil rursus notius inter placita S. Thomæ; etsi non quoad efficientiam redemptionis, quia pereunt multi; sed quoad sufficientiam intentionis, quia pater voluit ne perirent.

## CONFUTATIO.

Nemo ambigit sæpiùs dictum à S. Thoma, *Christum pro omnibus sufficienter mortuum esse: sed pro multis tantum, efficienter*. De illorum verborum sensu disputatio est, de quo quid existimes, vellem clariùs ostendisses. Ac primùm quidem quid per illud efficienter apud S. Thomam intelligi debeat, non satis explicas. *Etsi*, inquis, *non quoad efficientiam redemptionis, quia pereunt multi*. Verum id quidem. Quì enim dici posset, omnes omnino efficienter à Christo redemptos, cum tam multi pereant, & à redemptione sint alieni? Sed plus aliquid per illam vocem indicat S. Thomas, quod à te dissimulari non debuit: non enim solum ab effectu & eventu repeti debet quod ait, Christum non esse pro omnibus efficaciter mortuum; sed quia Christus quosdam tantum (eos scilicet quos sæpe in Evangelio testatur sibi à Patre datos ut non perirent) efficaciter voluit per mortem suam ab æternâ morte redimere, & ea ipsis suo sanguine beneficia comparare, quibus certissime liberantur quicumque liberantur. Eam esse vim hujus vocis, efficienter vel efficaciter, apud S. Thomam si tu neges, & ad Molinistarum sensum id detorqueas, qui

qui eatenus tantum Christum pro omnibus efficaciter mortuum esse negant, quia non omnes reipsa & effective per mortem Christi salvantur; etsi necessaria ad salutem interioris gratiæ præsidia omnibus prorsus hominibus per mortem Christi ita conferantur, ut salventur qui iis uti voluerint, non salventur qui noluerint: si tu, inquam, id sentias, non solum tibi Augustiniani impugnandi sunt, sed omnes planè scholæ Thomisticæ Doctores, quos in hac parte non minùs infensos adversarios habebis, quàm Augustini discipulos:

Alterum hujus divisionis mentibrium nihilo liquidius explicas. *Christus*, inquis, *ex S. Thoma pro omnibus passus est quoad sufficientiam intentionis, quia pati voluit ne perirent.* Sed dic, fodes, quænam sit illa intentio secundum quam Christus pati voluit, ne ulli homines perirent. Duplex enim ex S. Thoma voluntas est. Alia quam naturalem appellat, quâ non simpliciter volumus, sed secundum quid; idèoque velletas potius quàm voluntas dicenda est. Alia voluntas absoluta & rationis, quâ absolute & simpliciter volumus: unde cum simpliciter dicimur aliquid velle, de eâ voluntate id intelligendum. Ex te igitur quæro, quam voluntatem intelligas, cum dicis Christum pati voluisse ne ulli homines perirent: si priorem, quæ non simpliciter voluntas est, sed secundum quid, & quæ velletas potius quàm voluntas, nemo hîc

à te dissentit. Quis enim inficietur, Christum sic affectum fuisse, ut omnium hominum salutem vellet, si ita Patri videretur? Si autem absolutam, & secundum quam simpliciter & absolute dicimur velle (ut tu etiam simpliciter & absolute dicis, Christum pati voluisse ne ulli homines perirent) vide quàm turpiter S. Thomæ imponas. Non negabis, opinor, eamdem fuisse Christi voluntatem circa salutem hominum, cum pro illorum salute oravit, & cum pro illorum salute passus est. Imò verò magis in oratione voluntas ostenditur, quàm in passione, cum ea sit ipsius orationis natura ex S. Thoma, quod sit interpretativa voluntatis humanæ. Nihil autem certius apud Doctorem Angelicum, quàm Christum, cum pro hominum salute oravit, non voluisse (de voluntate simpliciter & absolute sumtâ hîc loquor) ut per suam orationem omnes omninò salarentur. Eadem igitur passionis ratio. Sed audiamus S. Thomam 3. part. qu. 21. art. 4. in quo probat orationem Christi semper fuisse exauditam. Oratio est, inquit, quodammodo interpretativa voluntatis humanæ: Tunc ergo alia cuius orantis exauditur oratio, quando ejus voluntas adimpletur. Voluntas autem simpliciter hominis, est rationis voluntas: hoc enim absolute volumus, quod secundum deliberatam rationem volumus. Illud autem quod volumus secundum motum sensualitatis; vel etiam secundum motum voluntatis simplicis;

quæ consideratur ut natura ; non simpliciter volumus , sed secundum quid , scilicet si aliud non obstat , quod per deliberationem rationis invenitur. Unde talis voluntas magis est dicenda velleitas , quàm absoluta voluntas : quia scilicet homo hoc vellet , si aliud non obsteret. Secundum autem voluntatem rationis Christus nihil aliud voluit , nisi quod servit Deum velle. Et idè omnis absoluta voluntas Christi , etiam humana , fuit impleta ; quia fuit Deo conformis : & per consequens omnis ejus oratio fuit exaudita.

Jam satis patet Christum non voluisse , sive cum oravit , sive cum passus est , voluntate rationis & simpliciter dictâ , ut omnes omninò salvarentur ; alioquin nullus salutis exfors esset , cum ea Christi voluntas ex S. Thoma semper impleta fuerit. Verùm id magis patebit ex eorum argumentorum solutione , quæ sibi objicit S. Doctor , ubi disertè docet , Christum pro solis prædestinatis orasse , ut per ipsum vitam consequerentur æternam.

Primum enim sibi objicit , Christum petiisse à se removeri calicem passionis , qui tamen ab eo translatus non fuit. Sed respondet , quod Christus hoc petiit quasi homo naturalis voluntate mortem recusans ; & idè non esse factum quod petiit : quia ratio quæ petitionem proposuit , NOLEBAT ut hoc impleretur ; sed ad instructionem nostram volebat demonstrare nobis suam voluntatem naturalem , & motum sensualitatis , quem sicut homo habebat.

Deinde sibi opponit , quod magis ad rem facit , Christum orasse ut peccatum crucifixoribus suis ignoscereetur , neque tamen omnibus peccatum illud fuisse dimissum : itemque Christum orasse pro his qui erant in ipsum credituri , ut omnes in eo unum essent , & ut pervenirent ad hoc quod essent cum ipso in gloria cœlesti ; neque tamen omnes ad hoc pervenire : non erga omnem Christi orationem fuisse exauditam.

Quid verò ad hæc sanctus Doctor ? An Christum orasse quidem pro omnibus crucifixoribus , sed per multos sterisse quominus peccatum sibi dimitteretur : orasse pro omnium salute qui erant credituri , sed per multos stare quominus salventur ? Id profectò respondere debuit , si existimasset , quod eum sensisse videri vis , absolutè & simpliciter loquendo Christum pati voluisse , ac proinde , quod minus est , orasse ne ulli hominum perirent. Quia verò ab illâ Molinisticâ opinione , quam tu illi affingis , omnino alienus fuit ; idè illam breviter his verbis elidit : Dicendum , inquit , quod Dominus non oravit pro omnibus crucifixoribus , neque etiam pro omnibus qui erant credituri in eum ; sed pro his solùm qui erant prædestinati , ut per ipsam vitam consequerentur æternam.

Vides igitur quale sit illud quod pro magno venditis , Christum ex S. Thoma pro omnibus esse passum quoad sufficientiam intentionis , quia pati voluit ne perirent. Non enim id de absolutâ , propriâ , rationali , deliberatâ

& simpliciter dictâ voluntate intelligere potes sine manifestâ in S. Thomam calumniâ, cum apertè doceat, absolute & simpliciter loquendo, Christum *non voluisse, ut alii quàm prædestinati vitam per ipsam consequerentur aeternam*, celsi voluerit ut aliis quàm prædestinatis gratiâ conferretur. Ad aliam ergo voluntatem, quæ non tam voluntas est quàm *velleitas*, confugas oportet. Illa verò ex S. Thoma non sufficit ut simpliciter dicatur Christum aliquid voluisse. Præterea certissimum est, quæ in singulos homines ex morte Christi beneficia profluxerunt, non ex illa *velleitate*, quæ res in particulari non respicit, sed ex absolutâ & simpliciter dictâ voluntate fluxisse. Quid ergo tibi prodesse potest illa *velleitas*, nisi ad illos homines quibus gratificari voluisti inanibus verbis ludificandos, qui cum te asserentem audiunt *Christum pati voluisse ne ulli homines perirent*, numquam in animum inducunt suum id de aliquâ tantum *velleitate* esse intelligendum, sed de propriè dictâ voluntate, quâ Christus voluerit omnibus & singulis hominibus vera & interiora per mortem suam gratiæ beneficia præstari, quibus ad salutem perducantur qui voluerint, non perducantur qui noluerint; quod explosum est à Synodo Tridentinâ, quæ ita *pro omnibus Christum esse mortuum* cum Paulo testatur, ut tamen non omnes mortis ejus beneficium recipere sanciat.

## XXII. NICOLAI.

Rectius gratuita illorum electio contra Molinianos asseritur; quia magis consentaneum rationi.

## CONFUTATIO.

Itane rationi tantum? Non igitur Scripturæ, non Patribus, non universæ Ecclesiæ, & præsertim Romanæ Traditioni, cujus tanta est in hoc doctrinæ capite consensus, ut Cardinalis Bellarminus pronuntiare non vereatur, gratuitæ prædestinationis sententiam, non quorumvis Doctorum opinionem, sed fidem Ecclesiæ Catholicæ dici debere? Hocine defendere est, an prodere? Hocine munire est, an exarmare? Rationi tantum magis consentaneam gratuitam prædestinationem dicis: sed Apostolus illam supra rationem agnoscit; aliàs numquam exclamasset in illius mysterii contemplatione: *O altitudo divitiarum sapientiæ & scientiæ Dei!* Ita etiam in veritate asserendâ falsum dicis, & turpiter, etiam cum rectè sentis, prævaricaris.

## XXIII. NICOLAI.

Verius positiva istorum rejectio, vel damnatio positiva, peccatis ascribitur, contra Jansenianos.

## CONFUTATIO.

Quâ fide, quâ audaciâ verferis in hac torâ controversiâ, hinc maximè perspicere potest. In re enim omnibus notâ adversario tuo falsum crimen obijcere non dubitas, nec ullius Lectoris oculos

Jos & conscientiam reformidas. Duplex reprobatio apud Theologos; positiva, & negativa. Negativa nihil aliud dicitur quàm prædestinationis negationem, sive non prædestinari. Positiva dupliciter accipitur: 1. Negativè, non ex parte Dei, quo sensu positiva est (ut optimè explicat Jesuita Tiphanius in lib. de Ordine c. 52.) sed ex parte objecti: & sic significat actum Dei, quo quosdam non adjuvare, non discernere à massâ perditionis decernit. 2. Positivè ex parte objecti; & significat actum Dei quo quosdam ad certum supplicium destinari.

His ita constitutis in causâ reprobationis assignandâ variant Theologi. Plerique Thomistæ, in quibus Estius, & multi alii apud ipsum, & Jesuita Tiphanius, ita sentiunt, reprobationem etiam positivam ex parte Dei, non autem ex parte objecti, id est, eam quâ Deus quosdam non adjuvare efficaciter decernit, ex nullâ fieri peccati vel originâlis vel actualis prævisione. Contrà verò, reprobationem positivam non nisi ex prævisione peccati originâlis fieri, certam esse in Augustino doctrinam contendit Jansenius: sed per reprobationem illam positivam, intelligit eam quæ ex parte Dei positiva est, quod verum actum divinæ voluntatis includat; etsi ex parte objecti tantum negativa sit; & nihil aliud dicat, nisi voluntatem non adjuvandi, non liberandi, non servandi. Sic ille luculen-

tissimè suam mentem explicat tom. 3. l. 1. c. 2. Porro, inquit, illa positiva reprobatio non sic intelligenda est, quasi Deus hoc ipso quo quosdam liberandos ad æternam vitam eligit, ceteros positivè ad pœnas omnes sensus quas in inferno reipsâ pro peccatis omnibus passurâ sunt, reprobando damnaverit. Hoc enim decretum sine dubio posterius est, & omnium futurorum peccatorum ipsiusque mortis præsupponit præscientiam: sed ita potius ut hoc ipso ceteros præteritos positivè voluerit excludere dumtaxat ab æternâ vitâ quæ est in regno suo; seu quod idem est, positivè noluerit eos à totâ statu perditionis, in quò eos jacere videt, hoc est finaliter à perditione liberare. Hunc verò non dubium esse Augustini sensum ac mentem, agnoscit & latè probat infensissimus Jansenii hostis Jesuita Petavius Theol. dogm. tom. 1. l. 9. c. 9.

Reprobationem autem positivam, quæ certi supplicii destinationem includit, non nisi ex peccatorum actualium prævisione in adultis fieri integro capite docet Jansenius. Sic ergo infelix est etiam in confingendis calumniis, ut ea crimina & proba quæ in adversarium tuum congeris, in ipso non hæreant, at in familiam tuam totâ redundant. Multi enim ex illâ verè sentiunt, reprobationem positivam, quâ homines excluduntur à regno cælorum, ex nullâ fieri actualis vel originâlis peccati prævisione: quod tu illum sensisse falsò estimaris.



## XXIV. NICOLAI.

Peccata ex defectu gratiæ excusare quis non audeat, vel non possit, si committuntur quia Deus homini per se deest, adeoque necessariò committuntur.

## CONFUTATIO.

Gratiæ defectus neminem excusat à peccato; quia quòd deficiat, ex peccato est. Excusasset quidem, si homini innocenti defuisset. Audi quid sentiat Aug. l. de Corrept. & Grat. c. 11. *Si hoc adjutorium vel Angelo vel homini, cum primum facti sunt, defuisset, quoniam non talis natura facta erat, ut sine divino adjutorio posset manere si vellet, non utique suâ culpâ ceidissent. Adjutorium quippe defuisset sine quo manere non possent. Nunc autem quibus deest tale adjutorium, jam pœna peccati est: quis autem datur, secundum gratiam datur, non secundum debitum.* Hanc item doctrinam sæpius ex Augustino refert & probat S. Thomas. Qui verò in statu naturæ corruptæ defectu gratiæ quemquam à peccato excusari posse dixerit, à gravi errore excusari non potest. Sic enim debitum dicit gratiam, & idcò destruit. *Gratia enim, ut ait Aug. de pec. origin. c. 24. non erit gratia ullo modo, nisi fuerit gratuita omni modo.* Sic omnium scelerum veniam & excusationem infidelibus indulget, quos omni gratiâ caruisse certissimum est.

Nec tamen inde consequens est, quod tu malè colligis, Deum homini per se deesse. *Quod enim homines gratiâ non adjuvantur, in*

*ipsis causa est, non in Deo; ut ait Aug. l. 2. de pec. mer. 17. Ignorare tamen non debuisti, vulgarem hanc scholæ tuæ doctrinam esse, Deum Angelis & primo homini gratiam efficacem ad vitandum peccatum necessariam sine ullo merito denegasse. Ergo cum illis Thomistis, si volueris, certa: nobis ea quæ non sentimus, obijcere desine.*

Nec minùs illud vitiosè concludis, si peccata ex defectu gratiæ committuntur, necessariò committi. Semper enim ab omnibus peccatis, etiam deficiente gratiâ, abest necessitas coactionis, abest necessitas naturalis, abest ea necessitas quâ voluntas ad certum peccatum determinatur; remanet solùm peccandi in genere necessitas, sed tantùm infallibilitatis. Hanc si tu horreas aut neges, quanto in errore verberis admonet Augustinus lib. 1. Op. ultimi in Jul. his verbis. *Erras graviter si nullam necessitatem putas esse peccandi, vel eam non intelligis illius peccati esse pœnam, quod nullâ necessitate commissum est.*

## XXV. NICOLAI.

Quid ad meritum vel demeritum nihil obesse necessitatem putas, modò coactionem excluderis.

## CONFUTATIO.

Quam necessitatem? Si naturæ, vel coactionis, quis hoc putat? Si necessitatem infallibilitatis, quis Thomista non putat? cum gratiam efficacem infallibiliter flectere voluntatem, omnes

ad unum existiment. Si tu aliud genus necessitatis nosti, cedo illud.

XXVI. NICOLAI.

Necessitas igitur gratiæ tanta est, ut sine illa nihil boni meritorii ad salutem æternam pertinentis agatur, nihil omnino agi possit. Non talis illa tamen, ut vel bene agendi necessitatem ullam cum adest ferat, vel peccandi necessitatem ullam inferat cum non adest: nempe quia liberam voluntatem relinquit cum præsens est; negligentem arguit, cum est absens: ut & voluntas possit non operari cum eam habet, & impetrare possit cum eam non habet; quia Deus petentem non repellit.

CONFUTATIO.

Multa hinc animadvertenda, multa reprehendenda. Primum est, eam propositionem quam tu in Censorio suffragio hærescos damnasti, hinc à te defendi etiam durioribus verbis expressam, quàm ab autore Epistolæ vel expressa vel defensa sit. Ille enim solum dixit, post Augustinum & Chrysostomum, Justis gratiam sine quâ nihil fieri potest, aliquando deesse; sed illud verbum, *nihil*, ita interpretabatur, ut negaret omnem se potentiam & omnes actus hinc voce comprehendisse. At tu, qui propositionem illam Augustinianam tam acerbis notis inuulsi, eandem in thesim tuam, quasi tui oblitus, inseris. Eam enim gratiam sine qua, ut ais, nihil boni ad salutem pertinentis agitur, nihil

omnino agi potest, quibusdam deesse dicis, quod multò durius, & ad malam interpretationem propensus.

Secundum est, si verba tua spectentur, Semipelagianum errorem in iis apertè contineri. Hominem enim *eâ gratiâ sine quâ nihil boni ad salutem pertinentis agitur, nihil omnino agi potest*, id est ex tuâ mente, & sufficiente & efficaci destitutum; posse tamen impetrare oratione gratiam staruis; & sic gratiam ad orandum necessariam non agnoscis, quod Semipelagianum esse nullus dubitat. Ita te sentire, non ausim dicere: id verba tua significare, fidenter affirmo.

Tertium est, vix ullum dubitandi locum superesse, quin gratiam efficacem ad omnia pietatis opera necessariam non arbitreris. Nam si ita sentire, id certè apertè professus esses in eâ conclusione, ubi de necessitate gratiæ agitur, præsertim cum doctrinam Thomistarum explicare instituis, cujus præcipuum caput casu, non consultò, à te omisum, nemini verisimile fiet. Ita sensus animi tui, non modò verba, sed tuum quoque silentium prodit. Quid enim causæ asseres, cur in ea Thesi quâ Thomistarum doctrinam complecti voluisti, nulum dogma ex sequentibus expresseris.

1. Gratiam efficacem consensum infallibiliter operantem, ad omnia pietatis opera, & ad ipsam etiam orationem necessariam esse.

2. Sufficienrem gratiam non omnibus modis sufficientem esse, sive non complecti omnia ad agendum necessaria.

3. Gratiæ sufficienti neminem umquam sine efficacia auxilio consensisse; neminem cum efficacia auxilio non consensisse.

4. Cur uni potius quam alteri gratia efficax detur, ex inscrutabilibus Dei judiciis pendere.

5. Eam gratiam quæ consensum non infallibiliter elicit, sed sine alio auxilio modò efficax est, modò inefficax, Pelagianam & Semipelagianam esse.

6. Mandata Dei non esse semper possibilea possibilitate Moliniana, quæ complectitur omnia necessaria ad agendum, sed aliâ possibilitate cui deest aliquando necessarium aliquid ad agendum, quod Deus alii dat, alii non dat, pro suæ voluntatis liberrimo nutu.

Hæc fatere, nec ulla supererit tibi cum Augustinianis pugnandi causa. Nam illam reliquam de gratiâ actuali controversiam tibi ipse præcidisti, cum in Censorio Suffragio dixeris, eorum opinionem qui solius gratiæ habitualis ope certos actus asserunt, non modò posse fieri, sed & re-ipsâ interdum fieri, in fide esse penitus innoxiam. Nam si ex te gratiæ tum sufficientis tum efficacia potestas gratiæ habituali tribui potest, cur illud ægrè feras sufficientis tantum vim illi concedi, quod S. Thomæ placitis omnino consentaneum esse alibi demonstrabitur.

## CONCLUSIO,

**L**ongè plura potueram ex Joannis Nicolai Thesibus excerptare, ad Molinianum ejus animum, Molinianos illius sensus revincendos. Sed hæc lectoribus ad specimen satis erunt; utinam ipsi ad emendationem. Augustini enim discipulis nihil in votis magis fuerit, quam sanctissimi Ordinis non modò universum Corpus, quod semper fecerunt & faciunt, sed singula etiam membra pari observantiâ complecti; nec ullum ipsis vel præter spem magis, vel præter voluntatem certamen accedit, quam illud in quo cum Joanne Nicolai ipsos crudelissimè læssente confingere coguntur. In hac tamen acerbissimâ pugna conditione illud solatio est, quòd ut adversus illius familiæ degenerem filium, ita pro totius familiæ gloriâ certant. Nullius enim magis interest, quam Dominicanorum Ordinis, illatas divinæ gratiæ & S. Thomæ injurias ipsorum violatori impunè non esse. Tradita jam olim huic Ordini divinæ gratiæ defensio; hæc ipsius hæreditas, hæc corona, quam dissipari, quam abjici quis ipso gravius ferre debeat? Non terræ illa, sed patriæ ac cœli felicitas est, nullum in magno numero reperiri, qui à familiæ suæ moribus institutisque descissat. At cujusvis rectè institutæ Societatis est non fovere suorum flagitia, omnesque labe non in alienis modò, sed in

In suis maximè coercere. Quamobrem mihi Joannis Nicolai effugia errorisque detegenti, gratulabuntur, credo, quibus sui Ordinis gloria, quibus S. Thomæ doctrina, quibus Christiana fides & veritas cordi est. Non potuit ille in Augustinum insurgere, quin pariter in S. Thomam, in suæ familiæ doctrinam insurgeret; non potest ab illius peritioribus Augustinus defendi, quin pariter S. Thomas, ac totus Dominicanorum Ordo defendatur. Conjuncta causa est, conjuncta injuria, conjuncta defensio. Illa verò non necessaria solum, sed etiam expedita est. Nihil enim aliud opus est quàm adversarium latbras fugamque captantem in lucem apertumque campum educere. Hoc confecto, profligata causa est, & ad exitum perducta questio. Hæc omnium gratiæ inimicorum ars fuit, sensus suos quibusdam verborum ambagibus occultare. Hæc Pelagii, hæc Fausti præsertim versutia, ex quo Isidorus de S. Fulgentio loquens; *Obnititur, inquit, ejus (Fausti) profundam destruere calliditatem.*

Et scriptor Vitæ S. Fulgentii: *Duobus, inquit, libris quos Faustus Galliarum sūdolo sermone composuit, favens occultè Pelagianis, sed Catholicus tamen videri volens, ne occultum serperet virus, septem libris ipse respondit, plus laborans exponere, quàm convincere; quia duobus ejus sermones exponere, hoc erat delirantis argumenta convincere.*

Similis mihi cum Nicolai confictatio est, ut errores sic artes Fausti referente. Unum hoc delictum est, quòd novus ille gratiæ adversarius, cum animo, ut appareret, commotiore scripserit, magis apertè se prodidit. Si quid tamen ille causæ suæ confidit, omiſſis illis cavillationibus in certamen prodeat, Molinismum ipsi falsò objectum convincat, sincerè se Thomistam doceat, Thomistas ab Augustinianis non fictis calumniis, sed certo limite dissociet. At si maledictis, si fraudibus certare perrexerit, illi homini jam antè denuntio, non defuturos qui technas ejus & astutias solerter aperiant, ferociam verò non molli brachio contendant.

## APPENDIX.

SEU

F. JOANNIS NICOLAI

CALUMNIARUM SPECIMEN

EX LIBELLO CUI TITULUS,

CENSORIUM SUFFRAGIUM.

**H**Uic consutationi *Thesum* NICOLAI breve specimen addere visum est earum calumniarum, quibus Suffragium ejus totum sciat, Specimen appello, quia facti illius & luti minimapars; tale tamen ut eo tota Censura nitatur, & cum eo tota corruat. Arnaldi propositionem, quâ Petro gratiam sine quâ nihil poterat defuisse dixit, hereticam, impiam, blasphemam pronuntiat gravissimus & aequissimus Judex JOANNES NICOLAI. Quamobrem? Quinque de causis.

1. Quia Autor Epistole Petrum presumptione non peccasse dixit.  
2. Quia Petro gratiam Dei spontaneo nutu & sine ullâ, ex parte Petri, causâ subtractam sentit.

3. Quia negat propter presumptionem subtractam.

4. Quia impossibilia Dei mandata dicit esse.

5. Quia Petrum timore, ignaviâ, socordiâ cecidisse negat.

At illæ quinque causæ totidem mendaciæ sunt, totidem calumniæ, ut jam declarabo. Quid inde aliud sequitur, nisi mendaciis solùm & calumniis censuram niti?

## CALUMNIA I.

*In presumptione Petri nullum ab Arnaldo peccatum, ne veniale quidem admitti.*

NICOLAI, pag. 9.

„Hæc illa tria quæ Chy-  
„stomus ira in Petro repre-  
„hendit, ut subsequenter causam  
„desertionis hinc repetat, ne Deo  
„tribuatur, non Petro. Sed Ar-

„naldus excusat quoad potest,  
„ne desertio illa Petro tribuenda  
„sit, & non Deo. Excusat autem  
„quia τὸ ἐκλήμεναι, quæ crimi-  
„na latinè reddita sunt, reddi  
„mitius debuissent, ut materia  
repre-

„reprehensionis essent : quia fer-  
„ventiores excessus erant , sed  
„PECCATA NON ESSENT , quia ex  
„charitate procedebant.]

## C O N F U T A T I O.

„In prælumptione Petri pec-  
„catum & culpam , licet tantum  
„venialem , disertis verbis agnovit  
„Arnaldus in Apolog. I. pag. 10.

„( v. sup. p. 41. ) PECCASSE igi-  
„tur aliquid Petrum , quod viri-  
„bus suis nimium tribuerit , &  
„se cæteris prætulit , cum  
„Augustino , & Chrysostomo non  
„nego. ] Item p. 9. Neque me  
„fugit Chrysostomum tria etiam  
„peccata Petro adscribere ; sed  
„TRIA PECCATA &c. ]

## C A L U M N I A II.

*Desertionis causam ex Arnaldi sententiâ non Petro , sed Deo  
adscribendam.*

NICOLAI pag. 9.

„Sed Arnaldus ( Petrum ) ex-  
„cusat quoad potest , ne de-  
„sertio illa Petro tribuenda sit ,  
„& non Deo. Item expendite  
„quid Arnaldus ex Chrysostomo  
„dicat ; Deum intelligetis dese-  
„rentem quia vult , quicquid  
„aliud velit Petrus &c. ... Exhi-  
„bet ex Chrysostomo non frigi-  
„dum nec negligentem , id est  
„volentem & conantem , ut ex  
„parte Dei stet quod sic ab eo  
„desertus est. ] Et supra. Cum  
„ei gratia nudè dicitur defuisse ,  
„non omnimoda tantum & ab-  
„soluta defectio , sed spontanea  
„ex parte Dei abdicatio indica-  
„tur , quia juvare planè nolit ,  
„conantem licet & volentem ;  
„qui manifestus Jansenii sensus  
„est , expressus è Jansenio per  
„Arnaldum. ]

## C O N F U T A T I O.

Desertionis causam in Apolog. I.

disertis verbis culpæ Petri adscrip-  
sit Arnaldus. p. 17. ( v. sup. p. 76. )  
„Non negat Epistola , quod autor  
„Epistolæ lubentissimè agnoscit ,  
„ideò Petro gratiam defuisse ,  
„quia de suis viribus nimium  
„præsumserit. ] Adeò verò non  
„illam culpam in gratiæ dese-  
„ctum referunt Augustini disci-  
„puli , ut quod gratia desit , sem-  
„per in homine causam esse ve-  
„lint. Didicerunt enim ex Au-  
„gustino lib. 2. de Pecc. Merit.  
„& remiss. c. 17. quod homines  
„gratiâ non adjuventur , in ipsis  
„causam esse , non in Deo. Nemi-  
„ni verò ex Augustino gratia  
„deest , spontaneâ ex parte Dei  
„abdicazione. Numquam id do-  
„cuit , numquam id sensit Ar-  
„naldus : sentiunt tamen qui-  
„dam Thomistæ , qui gratiam effi-  
„caciæ Angelis & primo homini  
„defuisse sine peccato tradunt , quia  
„defuit in primo peccato.

*Non propter præsumptionem Petrum à Deo desertum esse.*

**H**Oc modo ex omnibus locis Patrum quos Arnaldus protulit sese expedit Nicolai, quod illi Patres desertum Petrum ob præsumptionem dicant, Arnaldus non dicat. Hoc nomine criminatur Patrum loca ab Arnaldo corrupta, detruncata, quod non semper mentionem præsumptionis addiderit. Sic enim Nicolai p. 17. "Cur ergo hæc in Petro Arnaldus non expressit, ut in vitium Petri, non in desertionem ac defectum gratiæ Dei, offensa Petri refundatur? Nisi quod ita passim ille credulis lectoribus abuti solet." Et supra: Ecce quæ vera causa Petro negationis fuerit, non desertio Dei, sed præsumptio Petri, ob quam deferi ex Augustini sensu dignus fuit. Id variis locis quasi ab Arnaldo negatum ineulcat.

#### C O N F U T A T I O.

Propter præsumptionem Petrum à Deo derelictum expressis verbis docuit Arnaldus in loco superius relato, & adhuc uberiùs ibidem, ubi cujusdam Doctoris responsioni his verbis occurrit. **RESPONDEBIT** ille: Sat scio Pe-

trum reverà à Deo derelictum, temptationem superare non potuisse; verum id ei accidisse in præsumptionis suæ poenam, ut ipsi à me laudati testantur Patres. Fateor id quidem; sed quid ad Epistolam? Contendit autor Epistolæ, post Chrysostomum & Augustinum, Petro gratiam sine quâ nihil possumus, id est, sine quâ temptationem superare non poterat, defuisse; queritur, an hæc propositio hæretica sit, an verò orthodoxa. Quis verò ita mente captus est, ut non videat propositionis hujus veritatem non infirmare, sed contrà magis statuere, qui non modò Petro gratiam defuisse agnoscit, sed quare defuerit exponit? Eò enim verius est & certius, illam Petro defuisse, quò magis ostenditur non sine causâ illam ei defuisse: ut si quis multos etiam baptizatos damnatum iri contenderet, nonne ineptiret prorsus qui hoc argueret erroris, eò quod baptizatus nullus damnandus sit, nisi qui ob peccata damnari meruerit? Neque enim tum baptizatos multos damnari negaret, sed causam cur damnarentur afferret. ]



## C A L U M N I A I V.

*Petro impossibile fuisse ut non caderet : nullam habuisse potestatem ad vitandum peccatum.*

N I C O L A I. Pag. 15.

„C Ur ergo ista ex Hilario  
 „tam fastuosè inculcan-  
 „tur..... nisi ut fingatur im-  
 „possibile quod possibile fuit.]  
 „& p. 14. Alioqui cur culpam tre-  
 „pidationis recolens amarissimè  
 „flevit, si vitare omnino non po-  
 „tuit? An flevit factum quod non  
 „facere impossibile illi fuit?... An  
 „flendam porro, nisi quia vitare  
 „illam impossibile non fuerit?] Quibus locis ita Arnaldum ar-  
 „guit, quasi diceret Petro impossi-  
 „bile fuisse ut vitaret peccatum.

## C O N F U T A T I O. ●

Petro impossibile fuisse præ-  
 ceptum, nunquam dixit Arnaldus,  
 sed contrarium planissimis verbis  
 expressit 2. Apolog. p. 31. sup. 91.  
 „Non cā tantum ratione præcep-  
 „ta Dei iusto possibilia sunt, quia  
 „potest ea servare, si vult, juxta  
 „doctrinam S. Augustini, de eo  
 „quod in potestate nostrā esse di-  
 „citur; verum etiam quia per  
 „Spiritus gratiæ & charitatis fi-  
 „bi in justificatione infusum, ve-  
 „ram & interiorē habet ad ea  
 „servanda potentiam; etsi ex do-  
 „ctrinā SS. Patrum & Concilio-  
 „rum ulterius indigeat eā gratiā

„quæ ad singulos actus datur, si-  
 „ve efficaci illo Dei interioris ani-  
 „mam moventis auxilio, sine  
 „quo, ut expressè ait S. Tho-  
 „mas, mandata servare, & in ac-  
 „ceptā justitiā perseverare non  
 „potest. Hinc fit ut de iusto au-  
 „xilio efficaci in aliquā tentatio-  
 „ne destituto rectè dicatur, &  
 „potuisse eum illam tentationem  
 „superare, & non potuisse. Po-  
 „tuit enim quantum ad poten-  
 „tiam illam quam gratia in ju-  
 „stificatione accepta cuivis iusto  
 „suppeditat: non potuit verò,  
 „quia non habuit ea omnia qui-  
 „bus indigebat, ut hæc potentia  
 „in actum suum exiret, sicut lo-  
 „quuntur Theologi.] Hoc so-  
 lum igitur contendit Arnaldus,  
 Phrasim illam Augustini & om-  
 nium Patrum, quā negant iustos  
 interdum posse implere mandata,  
 hoc sensu veram esse, quia deest  
 multis gratia efficax ad imple-  
 dum præceptum necessaria, vel  
 quia deest illa possibilitas quæ  
 semper cum effectu conjungitur,  
 quā reipsā & actu impletur præ-  
 ceptum; quāvis iustis semper  
 adsit alia possibilitas, quā verè pos-  
 sunt implere præcepta, quantum  
 ad sufficientiam operativæ virtu-  
 tis, etsi ulterius indigeant auxi-  
 lio Dei moventis ex S. Thoma.

## C A L U M N I A V.

*Petri casum ex infirmitate, ex vitio, ex timore non accidisse.*

**S**ic hoc multis locis studiosè astruit Nicolai, quasi neget Arnaldus, aut à quoquam negetur. p. 14. "An proinde, cùm Petrus asseritur trepidationis culpam nec admonitum potuisse vitare, indicatur impotentia Petri, non ignavia de quâ monitus erat? aut non fecisse reprehenditur, quod ei factu impossibile supponitur fuisse, non quòd satis pusillanimis fuit ut non faceret? ] Item p. 15. Quid est, non potuisti? An ut impossibile illi fuerit, quæ inepta exprobratio esset? An ut non vigeret, quia tam segnis & tam socors post ardorem tam vehementem ostentatum evasit? ] Item p. 16. Quid in Joannem tract. 92. Non potuisse Petrum, quando ancillæ interrogatione perterritus est, verum testimonium perhibere.... An ex ejus defectu factum esse omnino, quòd negaverit Petrus, non ex timore magno, quo contra suam pollicitationem compulsus est negare, ut ab Arnaldo præter-

missum subjungit rursus Augustinus. ]

## C O N F U T A T I O.

Petrum timore, ignaviâ, socordiâ, pusillanimitate, vitio, culpâ suâ Christum negasse, omnes Catholici consentunt; hoc ab Arnaldo negatum velle, mera calumnia est. Non habuisse verò Petrum gratiam efficacem ad vincendum timorem, ad ignaviâ superandam, ad fugiendum peccatum necessariam, qui negat Molinianus est, non Thomista & Augustinianus.

Hæc pauca de multis ex solo Joannis Nicolai Censorio Suffragio decerpta sunt, talia tamen illis totam Censuram inniti fateatur necesse sit. His enim solum quas retuli calumniis Patrum doctrinam ab Arnaldi sententiâ, veritatem à fictitio errore secernit. Sed ista fortasse uberiùs ab aliis explicabuntur, insignisque ejus in laudandis S. Thomæ testimoniis fraus & inicitia ad oculum demonstrabitur.

XVIII.  
VINDICIÆ  
SANCTI THOMÆ  
CIRCA GRATIAM  
SUFFICIENTEM.

ADVERSUS  
P. JOANNEM NICOLAI  
ORDINIS FR. PRÆDICATORUM  
ET DOCTOREM PARISIENSEM.

*Ubi omnia S. Thomæ testimonia in Suffragio Censorio ejusdem  
P. Nicolai de propositione ANTONII ARNALDI  
Doctoris & Socii Sorbonici contenta exponuntur, & à per-  
verso sensu illis affixto vindicantur: ac ejusdem Arnaldi  
propositio & sententia Sancto Thomæ omninò conformis  
ostenditur.*

# JOANNIS LAUNOII

## CONSTANTIENSIS

### THEOLOGI PARISIENSIS

#### JUDICIUM

De P. JOANNIS NICOLAI Suffragio Censorio  
adversùs Clarissimum ARNALDUM.

**H**anc necessitatem (exponendi rationum momenta, quibus  
que Arnaldi Propositionibus Nota inuruntur, meritiò  
inuri probaretur) impositam sibi sensit unus ex iis Magistris  
quos Arnaldus recusare voluit. Is est Joannes Nicolai, Do-  
minicani Ordinis Professor, qui suum de Propositione Juris  
Judicium seu Censorium Suffragium publicavit. Involutus est  
ac salebrosus Commentarius, in quo probra & contumelia  
passim occupant sedem Theologicarum rationum. Pretiosi ni-  
hil è Scripturis, è Traditione acersiti nihil habet, quo Censo-  
rium Suffragium confirmetur. Aliud est, judicare propositio-  
nem hæreticam esse; aliud, asserre momenta quibus hæretica  
probetur. Quare si quis Commentarium hunc legat & intel-  
ligat, non est enim intellectu facilis, nunquam persuadebitur  
Assertionem, qua ab illo hæretica censetur, hæreticam jure  
censendam esse. Ad me quod attinet, si quem ad Censuræ  
odium & contemptum excitare vellem, ei duntaxat consule-  
rem, ut horas aliquot in perlegendo tali Commentario colloca-  
ret. Propositionem Facti intactam reliquit, ratus fortasse eam  
non esse dignam qua inustus ab aliis notas susceperet. Ex  
Joann. Launoi Notationibus in Censuram Parisiensem  
Notat. IX. sup. pag. 168.

P R Æ F A T I O.  
IN QUA QUÆDAM GENERALITER  
D E T O T O

P. JOANNIS NICOLAI  
SCRIPTO PRÆMONENTUR:

*Atque hujus Operis argumentum & partitio exponuntur.*

**H**ABENT S. Augustini discipuli in Suffragio Censorio Patris Nicolai typis edito, quod sibi gratulentur potius quàm quod illi succenseant: quia in eo habent unde bonis & eruditibus omnibus Arnaldum innocentem probent, S. Thomam totum suum vindicent, omnesque Arnaldi Censores à S. Thomæ doctrinâ quàm longissimè aberrare convincant.

Quis enim Censuram propositionis Arnaldi, seu potius Augustinianæ propositionis ab Arnaldo exscriptæ, iniquissimè factam non judicet, qui Patris Nicolai, ejusdem Censuræ velut interpretis ac defensoris, inter cæteros examinatores ad scribendum delecti, suffragium nonnisi calumniis niti intellexerit; nec potuisse Arnaldum ab uno judice qui sententiam suam scripsit, violatæ fidei reum peragi, nisi quinque erroneis sensibus illi ab eodem judice per summam calumniam impositis?

Habent etiam unde S. Thomam totum à se stare doceant: quia cum P. Nicolai ex ejus operibus, omnia quæ ad astringendam gratiam sufficientem omnibus datam facere videbantur, magno labore corraserit; postquàm nihil ab eo nisi perverso & alieno sensu è S. Thomâ allatum esse probatum fuerit, tum certissimè constabit nihil esse in S. Thomâ quod adversariorum sententiæ suffragetur, nihil quod nostræ trefragetur.

Habent denique unde omnes Arnaldi Censores (si quid in eo damnaverint) à S. Thomæ doctrinâ quam longissimè aberrare redarguant. Omnes quippe Inquisitores non aliis argumentis ac testimoniis S. Thomam suum esse professi sunt, quàm his quæ P. Nicolai in suffragium conjecit. Intenti in illud unum Censorum omnium oculi, quoties de S. Thomæ doctrinâ

doctrinâ in Sorbonæ Comitiiis dictum est. Hoc ipse *sibi quasi propriè ex industriâ* ab examinadoribus *reservatum* præmonet p.3., *potissimumque expectatum esse ut de S. Thomâ diceret, quia specialius eum spectabat.* Omnibus ergo Arnaldi Inquisitoribus S. Thomam adimit, qui hunc Patri Nicolai adimit; horum omnium in S. Thomæ doctrinâ inscitiam, aut malam fidem arguit, qui unius Patris Nicolai in referendis S. Thomæ testimoniis seu fallaciam seu imperitiam demonstrat.

Atque utinam, quod in Facultatis Comitiiis omnium Doctorum Arnaldi defensorum votis enixè postulatum est, cæteri Inquisitores induci potuissent, ut suffragium suum censuræ de Arnaldi propositione publicæ luci exponerent. Utinam id & nunc ad tam necessariam Censuræ suæ defensionem præstarent, quia ex eorum refutatione universæ Ecclesiæ notum fieret, talem esse Censuram, ut (si Arnaldi propositionem feriat) nulla Sanctorum Patrum, Conciliorum, Sedis Apostolicæ Decretorum, ac S. Thomæ, Scholasticorum principis, autoritate fulciri possit, nullo idoneo argumento firmari, nullâ ratione defendi. Hos tamen omnes in his quæ S. Thomæ doctrinam & sensum spectant, hac suffragii Patris Nicolai confutatione refellam: quia ille hac in parte omnium illorum lingua fuit.

Quàm falsò ergo Doctor ille, Dominicani licet Ordinis, & in Studio S. Jacobi apud Fratres Prædicatores Primarius Regens, sancto Thomæ gratiæ sufficientis, omnibus etiam infidelibus communis, doctrinam imponat, quàm fallaciter omnia ejusdem Sancti testimonia pervertat, isto opere probare aggredior. Atque id, Deo duce & Angelico Doctore auspice, invictæ veritatis robore suffultus, me facile præstaturum confido: sed aliqua priùs de toto Patris Nicolai Scripto generaliter præmonenda sunt.

## OBSERVATIO PRIMA.

*In totum Patrè Joannè Nicolai Scriptum.*

**P**ater Joannes Nicolai toto suo Scripto, id de quo solùm in Antonii Arnaldi Doctoris Sorbonici propositione quaestio est, non attingit. Dixit enim Arnaldus ex SS. Augustino & Chrysostomo, *gratiam, sine quâ nihil possumus, Petro justo in tentatione defuisse.* Id hoc sensu à se accipi in Apologeticis asseruit ac probavit: Aliquibus justis aliquando deesse gratiam quâ proximè possint tentationes superare, hoc est, efficacem  
quæ

quæ posse proximum, seu posse cum effectu conjunctum tribuit, vel, quod clarius est, aliquando deesse potestatem illam quæ complectitur omnia ad agendum necessaria. Ergo Patri Nicolai alterutrum probandum fuit, aut D. Arnaldum malè Epistolæ suæ verba interpretatum esse, aut illam propositionem hoc sensu acceptam S. Thomæ doctrinæ repugnare: Censor ille toto Suffragio censorio neutrum præstat.

Atque hinc intelligitur à me hoc opere multa ex S. Thomâ circa gratiam sufficientem contra Joannis Nicolai Suffragium expendi, quæ ad Arnaldi propositionem minimè pertineant, siquidem illa gratiæ sufficientis quæstionem non attingit. Hanc enim Arnaldus Thomistico sensu omnibus justis volentibus & conantibus haud gravatè concedit, atque aded Petro, siquidem voluit & conatus est bonâ voluntate, parvâ licet & invalidâ, nec tantâ quanta sufficebat ut volendo faceret: quod in ipso limine significatum volo, ne quis me gratiam sufficientem funditus abjicere, ac justis volentibus & conantibus abjicere, contra mentem meam criminetur

## O B S E R V A T I O II.

**T**otum Suffragium Patris Nicolai his quinque calumniis potissimum nititur.

1. Calumnia. In præsumptione Petri nullum ab Arnaldo peccatum, ne veniale quidem, admitti.
2. Desertionis causam ex Arnaldi sententiâ non Petro, sed Deo, adscribendam.
3. Non propter præsumptionem Petrum à Deo desertum esse.
4. Petro impossibile fuisse ut non caderet, & nullam habuisse potestatem ad vitandum peccatum.
5. Petri casum ex infirmitate, ex vitio, ex timore non accidisse.

Vide has calumnias in Appendice Confutationi Thesium Patris Nicolai subjunctâ. *Sup. pag. 438.*

## O B S E R V A T I O III.

**E**xplicationes illas quibus Joannes Nicolai Sanctos Patres ab Arnaldo abducere nititur, studiosè hîc refellere alienum putavi. Nam cum illæ istis quinque calumniis alibi confutatis superstructæ sint, his demonstratis, utique suâ sponte corrunt. Obiter tamen cuidam istius Patris loco (1. *Parten. i. p. 7.*) occurram, in quo iugentes clamores tollit, & Arnaldum



dum calumniæ infimulat, ob hæresim Calvinianam circa desertionem justorum sibi ab ipso exprobratam. Operæ enim prædium erit illo exemplo Patrem Nicolai commovere, ut prædientiam suam ac tumorem, quo fit ut de rebus obscuris tam temerè pronuntiet, nonnihil in posterum dejiciat, postquam se in re planissimâ turpissimè lapsum esse perspexerit. Audiat igitur intestinam Scriptorum suorum dissentionem, ac secum prius in concordiam redeat, quàm tam acerbè in alios invehatur.

Monuerat illum Arnaldus in 2. Apologetico, ut caveret ne sententia sua ad Calvinianorum accederet errorem, qui nunquam justos ita à Deo deseri aiunt, quin tandem aliquando ad eum sint reversuri.

In gravem contumeliam hoc Arnaldi dictum accipit Joannes Nicolai, criminationem illam purgare aggreditur, nec solum illam *inutilem & nugacem*, sed etiam *fraudentam & mendacem* appellat. Denique & tam alienam dicit, ac si quis cum inferos nominat, cælum indicare diceretur. Et tamen ille tam confidens, tam sui juris securus hoc ipsum crimen ita suscipit, ita se in illud induit & illaqueat, ut non illud diluere, sed potius confirmare voluisse videri possit.

Quod ut ipse fateri cogatur, recogitet quæso quæ principia posuerit eadem illâ paginâ 7. sub initium, dum dictorum ipse suorum seriem refert.

*Meministi*, inquit, *ut eâ ipsâ occasione notaverim, alios quidem justos esse qui deserantur ad interitum sempiternum, quia post casum non resurgunt, sed in peccato perseverant: alios autem qui nonnisi ad tempus deserantur, quia cadere permittuntur, ut cautiore eos firmioresque casus reddat ubi resurrexerint, nec tam peccant ut peccent, quàm ut aliquod majus bonum (sic indulgente Deo) ex peccato reportent.*

Ecce duplex desertionis genus, unum ad interitum, alterum ad vitam: unum in quo nunquam resurgitur, alterum in quo semper. Jam verò si postremum illud desertionis genus omnibus justis cadentibus conveniat, nec unquam primo modo descri possint, planum erit nullum justum deseriri posse ad interitum, qui error Calvinii est, ac proinde prius illud membrum esse prorsus inutile.

Videamus igitur quo pacto mentem suam explicet Nicolai. *Meministi*, inquit, *ut illos quidem primos nunquam sine gravi negligentia vel contemptu deseri addiderim, quia indignum Deo esset, ut ab amicitia sua perpetuò exclusos vellet, qui nec illam graviter violassent. Nihil ob stare verò quin ad posteriores deserendos* (eos

( eos scilicet qui deseruntur ut resurgant ) *præsumtionis culpa sufficere intelligatur, etsi duntaxat venialis.*

Ex his verbis manifestè colligitur primum desertionis genus supponere debere peccatum mortale. Nam gravem illam negligentiam opponit veniali, & dignam esse vult exclusione à regno Dei; ex quo consequens est justum, dum justus est, eo modo non posse deferi, quia dum justus est, adhuc nullum admisit mortale peccatum.

Certum est autem omnes justos, dum in peccatum mortale prolabantur, ex ipso Patre Nicolai, deferi. Carent enim gratiâ efficaci, quæ sola ex sententia Patris Nicolai Petro deest, quem tamen desertum fatetur.

Quæro igitur ex Patre Nicolai, quâ desertione deseruntur illi justi, dum primum peccatum mortale admittunt? An primâ quæ est ad interitum? Qui possunt, cum hæc peccatum mortale semper supponat, quod nullum adhuc admiserunt? An secundâ? Utique, non enim alia restat: sed ex Patre Nicolai quicumque secundâ illâ desertione deseruntur, ita deseruntur ut redeant, ut resurgant, ut cautiore fiant. Ergo ex ipso omnes justi qui peccato gratiam amittunt, eandem recuperant, quæ Calvinistarum est hæresis.

Huic argumento respondeat quæso P. Nicolai, antequàm tantopere vociferetur: sed tamen ut meam in ipsum æquitatem demonstrem, fateor me illius mentem ab hoc errore prorsus liberam putare, sed impetu & animi impotentiâ elatum, quæ diceret, quid ex verbis suis consequeretur, minùs arbitrator advertisse. Discat ex hoc lapsu in aliis esse cautior, & minùs contumeliosus adversus viros, ut in explorandis verborum consecutionibus sagaciores quàm ipse sit, ita in aliorum mente & consilio interpretando benigniores.

## O B S E R V A T I O I V.

**Q**ui hoc Suffragium, sicut & Theses nuper à P. Nicolai concinnatas & eo Præsidente defensas, paulò attentius legerit, intelliget, ut jam ex Thesium consutatione ostensum est, nihil aliud illi propositum fuisse, quàm ut sensus Molinianos sub Thomisticis verbis occultet, sub ambiguo gratiæ sufficientis nomine Molinianam astruat, & aliquam gratiam libero arbitrio quo ad usum relictam stabiliat, saltem ad actus imperfectos, quibus ad gratiam operandi efficacem consequendam præparamur, ut semper liberum arbitrium, saltem in justis, sine ullo gratiæ efficacis adjumento impedimentum gratiæ pro

hutu suo ponat, vel non ponat, atque orando impetret ne auxilium in gravi tentatione necessarium unquam desit. Hæc certissima est Patris Nicolai sententia, nec alia esse potest, ut ex multis ejus ratiocinationibus ostendam: hæc una antiquæ ejus cum Molinistis confœderationis & inveterati in S. Augultini discipulos odii causa est: hoc unum dogma S. Thomæ auctoritate astruere nititur.

Eodem antea consilio susceptam à Petro à S. Joseph famoso Molinistâ S. Thomæ defensionem vidimus in libro quem inscripsit, *Defensio S. Thomæ Aquinatis Doctoris Angelici adversus recentiores quosdam Theologos, qui prædeterminationem Physicam ad actus liberos illi falsò affingunt. Authore Fr. Petro à S. Joseph ex Congregatione Fuliensi.* Hoc unum inter utrumque discrimen est, quod hic apertè, ille occultè, quia Dominicana Professio vetat, prædeterminantis gratiæ ad singulos actus necessitatem ex S. Thomâ evertere nititur. Pleraque ergo testimonia quibus ille utitur ad prædeterminationis physicæ necessitatem impugnandam, à P. Nicolai eodem sensu ad sufficientem astruendam referuntur. Tanta est in exponendis S. Thomæ testimoniis Thomistam inter & Molinistam concordia.

Sed quantumvis P. Nicolai tergiversetur, ac sub verborum ambagibus latere studeat, ut lectoribus incautis sub Thomistæ specie Moliniana principia ac dogmata insillat; sic omnium ferè S. Thomæ testimoniorum sensum pervertit, ut si ejusdem Patris commentarii ac ratiocinationes admittantur, gratiæ per se efficacis ac prædeterminantis ad singulos pios actus necessariæ dogma S. Thomæ principiis capitaliter adversari concludendum sit. Hic scilicet ille est verus Thomista, & Cathedræ S. Thomæ in Studio Parisiensi Regens meritò Primarius, qui Thomistice scholæ, adeoque totius Instituti Prædicatorum, cujus observantiam professus est, prærogativam præcipuam & singularem strenuè & gloriosè tutatur, qui S. Thomæ desertor ac transfuga, corruptor & proditor, ac Molinistarum fautor per summam injuriam vocatus est, pag. 46. Hic ille est æquissimo judicio selectus Arnaldi propositionis Inquisitor, ad videndum ut in ejus examine S. Thomæ doctrina extra omnem aleam poneretur: huic verò uni partes à cæteris Inquisitoribus justissimè reservatæ sunt, ut S. Thomæ ac Thomistarum sensum dicendo scribendoque exponeret sensum integrum, innoxium vindicaret, eorum animum quibus S. Thomæ veritas placet, in tam tuto dogmate confirmaret, ut os iniquitati obstrueret, calumniam inique loquentium ebano illo ac freno compesceret, & inconsultum aliquorum meticuloforum timiditatem à terrore Panico liberaret, qui S. Thomam

*Thomam incautiùs damnari reformidabant, si Arnaldi propositio damnaretur: pag. 5. Has certè partes felicissimè pro sui Ordinis dignitate, ac Facultatis Parisiensis in S. Thomam alumnum suum ac principem reverentiâ, P. Nicolai in Suffragio suo censorio exsecutus est, si S. Thomas Molinæ principiis adhæreat, & gratiæ per se efficacis, seu physicè prædeterminantis, ad singulos pios actus necessitatem rejiciat.*

## O B S E R V A T I O V.

**G** Ratiæ per se efficacis ac physicè prædeterminantis ad singulos actus necessitatem à S. Thomâ assertam esse non probo, sed suppono: quia omnis ejus schola hæc de re consentit: ac licet eam P. Nicolai Suffragio suo ac totis Thesibus confiteri semper refugiat, quia eam rejicit, licet etiam suis argumentis eam reverâ impugnet; eam tamen apertè & expressè negare non audet.

Ut autem Patris Nicolai æquivocationibus occurrâ, gratiæ per se efficacis ac prædeterminantis nomine eam cum universâ S. Thomæ scholâ intelligo, quâ voluntas non solum fit agendi potens; sed quâ etiam ad volendum aut operandum infallibiliter & indeclinabiliter propter efficaciam virtutis moventis determinatur. Infallibiliter & indeclinabiliter dico, sed tamen sine necessitate, vel naturali, vel cogente. Nullam enim aliam necessitatem admitto, quàm eam quæ ab Alvare dicitur necessitas infallibilitatis: quod admonere non abs re fuit propter stolidam quorundam cavillationem, qui cum gratiæ efficacis doctrinam totius orbis consensu Catholicam haberi, ipsâ veritate convicti, negare non audeant, tamen interdum muscitare audent eam quam Augustini discipuli tuentur, aliusmodi esse atque eam quam Thomistica schola proficitur: quorum calumniis ut occurrâ testor, eandem planè gratiæ efficiëntiam à me tribui, quam ipsi communiter omnes S. Thomæ discipuli attribuunt.

## O B S E R V A T I O VI.

**P** Ater Nicolai gravissimè 2. *Parte pag. 28. in Arnaldum & alios S. Augustini Discipulos invehitur, quos sub falso Jansenianorum nomine invidiosè designat, quod fraudulenter, insidè, veritate diminutâ, S. Doctoris loca sine pudore ad fallendum protulerint, quedam detruncarint, alia dissimulaverint, suppresserint, ablegaverint, id multis argumentis exploratum hæcenus con-*

*flare.* Auctorem libri, *De gratiâ Victrice*, ejusdem criminis reum agit pag. 29., nullum tamen ex isto libro, nec ex alio, testimonium profert, nec unquam protulit, quod detruncatum fraudulenterque ac infidè citatum ostendat, ad fingenda scilicet crimina quàm ad probanda solertior. Quàm fraudulenter ipse, quàm infidè suo Suffragio ea retulerit, non verbis exprobrabo, sed argumentis convincam. Unum hoc lectorem veritatis & sinceritatis amantem vehementer rogo, ne quid ex hoc opere legat, nisi simul Patris Nicolai Suffragium legat, & è S. Thomæ libris, quidquid ex his refero, diligenti collatione & æquâ lance perpendat.

## O B S E R V A T I O VII.

**P**ater Nicolai prædicat pag. 29. à se S. Augustini Discipulos, *ut impostores, ut falsarios, ut S. Thomæ depravatores, ad quodcumque tribunal vellent, non semel provocatos*: Auctorem libri, *De gratiâ Victrice*, quem Lalanio adscribit, interpellat, *ut huic suæ compellationi planâ & integrâ locorum, quæ producit cum illis quæ producet, collatione respondeat.* Sed quis nescit quanto semper studio ab Augustini Discipulis cum Molinistis collatio expetita sit? Illius interpellationi in Facultatis Comitii annuit Lalanus, quamquam se libri, *De gratiâ Victrice* auctorem non profiteretur. Sed quorsum hæ thrasonicæ ostentationes? Cur antea si disputando non posset, scribendo non convincebat, truncata & depravata ab Augustini Discipulis S. Thomæ testimonia? Cur cum Inquisitores in Arnaldi Epistolam à Facultate nominati sunt, non postulavit, non effecit ut, quod æquissimum erat, etiam aliqui ex Augustini Discipulis, quos Jansenianos vocat, ad examinandum seligerentur, quibuscum de S. Thomæ doctrinâ circa ea quæ ad Arnaldi propositionem pertinebant conferret? Certè sat multi erant aliis nec ætate, nec ingenio, nec doctrinâ impares. Cur cum postulatum est inter deliberandum de Semihorâ, ut à Doctorebus ex utraque parte selectis publica in Facultate de Arnaldi propositione collatio ante judicium institueretur, huic tam justæ postulationi ipse non suffragatus est? Obtineat ille cum suis ab Ecclesiæ judicibus, seu Summo Pontifice, seu Episcopis, ut ad finiendam omnem controversiam, collationem voce & scripto coram se fieri jubeant, sicut coram sel. mem. Clemente VIII. & Paulo V. instituta est: sistat se ille cum suæ sententiæ patronis, quicumque illi sint, habebit Augustini Discipulos ad defendendum, & vicissim etiam ad accusandum.

prom-

promptissimos. Non negabit fortè Summus Pontifex quod ambæ partes communibus votis ad veritatem pacemque firmandam postulaverint.

Verùm cùm renuentibus & obstantibus Molinistis, nullam cum illis legitimam collationem institui posse compertum sit, alia ad disputandum via, longior licet, quærenda est: hanc sibi Pater Nicolai scribendo patefecit. Jam scilicet habet campum ad disputationem apertum. Suffragium Censurium de propositione Antonii Arnaldi Doctoris & Socii Sorbonici ad quæstionem juris pertinente publicavit; hoc Opere refellitur: Theses edidit; confutata sunt: Arnaldi propositionem S. Thomæ auctoritate damnavit; hanc Arnaldus S. Thomæ doctrinæ penitus consentaneam esse Scripto in lucem edito comprobavit: Pater Nicolai his tribus Operibus adversus suam sententiam vulgatis satisfaciât. Verum sicut nullum S. Thomæ testimonium, ac nullum Patris Nicolai argumentum à nobis omissum est, ita eadem fide omnibus S. Thomæ testimoniis, argumentis omnibus hoc Opere propositis respondeat. Non varias ejus Interpretum opiniones exquirens, quia de his hoc Opere non agimus; sed ejus mentem ac sensum genuinum ex ipsiusmet Operibus ac sententiis eruens, quod unum indagamus. Ante omnia verò declaret, *non tergiversans, non in diverticula se conjiciens, non sub foliis & sub umbra ut lucifuga se occultans*, pag. 29. nec ut præstigiator per ambiguas gratiæ sufficientis voces lectoribus illudens, quid de gratiæ per se efficacis & physicè prædeterminantis ad singulos actus necessitate sentiat: An credat gratiam per quam voluntas non solum fit agendi potens, sed per quam etiam infallibiliter & indeclinabiliter, non propter scientiam divinam quam mediam vocant, sed propter efficaciam virtutis moventis, ad volendum aut operandum determinatur, ad singulos pios actus & perfectos & imperfectos necessariam esse: An credat eam necessariam esse etiam fidelibus ac justis omnibus ad orandum & vigilandum, ad præparandum se, ad impedimentum gratiæ non ponendum, & ad omnem usum gratiæ excitantis, quæ à Thomistis sufficiens vocatur! Id se credere cùm sincerè professus fuerit, tum illum compellemus ad agnoscendum, nullum inter nos circa S. Thomæ doctrinam controversiæ locum relinqui, Arnaldi propositionem ab eo iniquissimè damnatam esse, & S. Thomæ auctoritates quotquot retulit, inutili labore adversum nos congestas. Id verò aperte confiteri si refugiat, jam non nobis, sed universæ suæ scholæ cum illo, ut cum hoste publico & manifesto S. Thomæ Thomistarumque om-

nium doctrinæ desertore ac proditore, configendum erit. Ergo si Joannes Nicolai quod Opus adversus istud nostrum, non quidem tuendæ veritatis, sed Molinistarum famæ qualicumque responsione apud vulgus sustentandæ causâ, in lucem edat, nullam à nobis responsionem expectet, nisi in ipso limine se ejusdem gratiæ per se efficacis ad singulos pios actus necessariæ defensorem profiteatur, vel saltem, eâ penitus illasâ, S. Thomæ testimonia & argumenta hoc Libro adversus ipsum proposita diluat ac enodet.

## O B S E R V A T I O V I I I.

**P**Ater Nicolai se, & in S. Thomæ operibus, & in Thomistarum libris admodum rudem proficitur, cum dicit 2. Parte pag. 30. S. Augustini Discipulos *illud S. Thomæ reverentiam exhibere*, quia prædicant eundem sanctum aliter de gratiâ juvenem, quàm senem sensitse, & multa in Sententiarum libris scripsisse, quæ postea maturâ ætate in Summâ & aliis Operibus emendavit & revocavit. Verùm quid Professor Dominicanus S. Augustini Discipulis objicit, quod eorum nullus, nisi post Thomistas ex Ordine Prædicatorum & antiquos & recentes observavit? Ita Capreolus in 2. dist. 28. q. 1. art. 3. in fine responsionum ad object. contra 4. concl. *Ad 2. dicitur quod de concordantiâ dictorum S. Thomæ in hac materiâ, quoad Scripta & Summâ, non oportet quempiam sollicitari, quia inter ea plana contradictio est. Nam in Scriptis secutus est viam magistrorum tunc currentium; in Summâ verò tenuit viam oppositam, tanquam seniores & dicti Sanctorum concordiores & à Pelagiano errore remotiores.* Idem insinuat Alvares disp. 56. n. 21. & citat huic suæ sententiæ suffragantes Driedonem, De concordia fol. 56. pag. 2. Ruardum Tapperum Art. 3. contra Lutherum pag. 220. & Cardinalem Cajetanum in 1. 2. q. 109. art. 6. §. Nec obstat. Si quæ ergo est in hac observatione temeritas, & in S. Thomam irreverentia, hanc P. Nicolai non S. Augustini Discipulis, sed celeberrimis sui Ordinis Doctoribus objiciat.

Verùm nec Thomistas nec S. Thomam diligenter unquam legit Primarius iste Angelicæ doctrinæ in Parisiensi Prædicatorum Studio Professor. Quid enim certius & evidentius, quàm S. Thomam Cassiani Semipelagiani lectioni assuetum, (a) ut in Breviario Romano refertur, multa in Sententias de præparatione ad gratiam, seu de salutis ac justificationis initio asseruisse, quæ postea in Summâ & aliis Operibus velut Pelagia-

num

(a) *Collationes Patrum assidue pervolutat et. In Festo S. Thomæ lect. 6.*



num seu Semipelagianum errorem refutavit? In 2. dist. 28. q. 1. art. 4. Probat toto articulo hominem posse se ad gratiam præparare sine aliquâ gratiâ actuali intrinsecâ, solamque motionem excitantem externam, puta admonitionem, ægritudinem corporis, vel aliquid hujusmodi requiri; & hæc vocat, cum Cassiano & aliis Semipelagianis, OCCASIONES SALUTIS. *Mutatio voluntatis*, inquit, *effici non potest sine aliquo movente per modum excitantis*. Omne enim motum necesse est ab alio moveri, nec differt quidquid sit illud quod hujusmodi variationis OCCASIONEM præbeat, quasi voluntatem excitando, sive sit admonitio hominis, vel ægritudo corporis, vel aliquid hujusmodi; quæ omnia constat divinæ providentiæ subiecta esse, & in bonum electorum ordinata. Unde quidquid illud fuerit quod hominem excitaverit ad convertendum se, ut gratiam gratum facientem accipiat, gratia gratis data dici potest; & sic sine gratiâ gratis datâ homo se ad gratiam non præparat.

Deinde probat necesse non esse ut talis excitatio, seu admonitio, seu occasio, sit intrinseca. Quidam enim, inquit, dicunt quod nullus potest se ad gratiam gratum facientem præparare, nisi per aliquod lumen menti infusum, quod est donum gratiæ gratis datæ: istud autem non videtur conveniens, & præterea secundum hoc esset abire in infinitum, quia etiam illud lumen gratiæ gratis datæ non daretur alicui, nisi qui ad illud recipiendum se præparavit, &c. Et ideo aliis consentiendo dicimus, quod ad gratiam gratum facientem habendam, ex solo libero arbitrio se homo potest præparare. Faciendo enim quod in se est, gratiam à Deo consequitur: hoc autem solum in nobis est, quod in potestate liberi arbitrii constitutum est. Ibid. art. 3. dicit S. Paulum, cum ad Christum se convertit, divinâ gratiâ intus motum non fuisse, sed solum exterius.

Item in 2. dist. 5. q. 2. art. 1. Quidam dicunt quod ad conversionem meritoriam exigitur duplex gratia: una gratum faciens, quæ informat conversionis actum & meritorium reddit: alia gratis data, à quâ elicitur substantia actus, & quæ liberum arbitrium inclinat ad volendum. Sed istam gratiam ponere non videtur necessarium, nisi ipsa libertas arbitrii gratia dicatur, quæ procul dubio nobis à Deo est, vel aliquæ OCCASIONES, quæ quandoque dantur hominibus à Deo ad conversionem, ut instructio legis & castigatio ad humilitatem, & alia hujusmodi; sine quibus tamen possibile est gratiam consequi, quia si homo facit quod in se est, Deum dat ei gratiam: ad hoc autem faciendum non exigitur aliquid aliud. Illud enim ad quod non potest per se liberum arbitrium, non est in homine ut faciat illud. Illud enim in nobis esse dicitur, cujus nos Domini sumus

sumus. Unde positio ista implicat contradictionem, dum posuit quod ad faciendum illud quod in nobis est, liberum arbitrium non sufficit.

S. Thomas istam à Cassiano, cujus Collationes, ut in Brevariario refertur, assidue pervolutabat, doctrinam procul dubio hauserat. Sic enim Cassianus & alii Semipelagianii externa illa excitantia, & primos voluntatis conatus, OCCASIONES SALUTIS vocare consueverant. *Annuntiatur*, inquit illi in Epistola Hilarii ad S. Augustinum, *obtinende salutis OCCASIO*; eo merito quo voluerint & crediderint à suo morbo se posse sanari. Et in Epistola S. Prosperi ad eundem S. Augustinum asserunt, *omnem hominem ad credendum & ad operandum divinis institutionibus ADMONERI*, ut de apprehendenda vitâ æternâ nemo desperet, cum voluntaria devotioni remuneratio sit parata. . . . Ab his vitam æternam apprehendi qui Deo sponte crediderint & auxilium gratiæ merito credulitatis acceperint. Ita Cassianus Collatione 13. c. 13. *Deus ab homine quosdam conatus bonæ voluntatis vel exigit, vel expectat, ne penitus dormienti aut inerti otio dissoluto sua dona conferre videatur*: OCCASIONES quodam modo querens, quibus humanæ segnitiei torpore discusso, non irrationabilis munificentie suæ largitas videatur. Et c. 8. OCCASIONES præstruit vitæ & opportunitatem boni effectus, ac salutis viæ directionem demonstrat errantibus. Et c. 18. Nunc autem OCCASIONES & opportunitates salutis ingerere.

Certum ergo est & evidens S. Thomam juvenem in Sententias ea docuisse quæ Semipelagianum errorem continent: ea autem maturiori ætate in Summâ & aliis Operibus emendavit ac expressè revocavit, ut ad Pelagianum errorem pertinentia, hoc est, ad Semipelagianum: nam S. Thomas Pelagianum errorem à Semipelagianio distinguere non solet.

1. 2. q. 109. art. 6. & q. 112. art. 2. ostendit præparationem ad gratiam esse non posse sine auxilio Dei interiùs moventis. Unde patet, inquit, quod homo non potest se preparare ad lumen gratiæ suscipiendum, nisi per auxilium gratuitum Dei interiùs moventis. Item 1. p. q. 23. art. 5. *Quidquid est in homine ordinans ipsum in salutem, totum comprehenditur sub effectu prædestinationis, etiam ipsa præparatio ad gratiam. Neque enim hoc fit, nisi per auxilium divinum, scilicet interiùs movens, secundum illud Thren. ult. Convertite nos Domine ad te & convertemur.* Dicit autem in Pelagii errorem incidere, qui hujus auxilii interiùs moventis necessitatem ad incipiendum, seu ad præparandum se negaverit. *Posuerunt enim Pelagianii*, inquit hoc cod. art. 5. *quod initium benefaciendi sit ex nobis, consummatio autem à Deo.* Et in 12. ad Hebr. lect. 3. ostendit, præparare se ad gratiam, seu non ponere obsta;

obſtaculum gratiæ, eſſe ex gratiâ & electione Dei, aliàs induci errorem Pelagii. *Sed contra*, inquit, *quia ſi gratia non datur ex operibus, ſed tantùm ex hoc quod aliquis non ponat obſtaculum: ergo habere gratiam dependet ex ſolo libero arbitrio & non ex electione Dei, quod eſt error Pelagii.*

Et Quodlib. 1. art. 7. expreſſè refutat & ut Pelagii errorem cavendum docet. quod dixerat in Sent. de exterioribus moventibus ac de occaſionibus ſalutis. *Cavendus eſt*, inquit, *error Pelagii qui poſuit quòd per liberum arbitrium, &c. Indiget autem divino auxilio, non ſolùm quantùm ad exteriora moventia, prout ſcilicet ex divinâ providentiâ procurantur hominì OCCASIONES ſalutis, puta prædicationes, exempla, & interdùm aggritudines & flagella: ſed etiam quantùm ad interiorem motum, prout Deus cor hominis interiùs movet ad bonum.*

Item 1. 2. q. 109. art. 6 ad 3. refutat quod dixerat in Sententiis; Si gratia requireretur ad præparationem gratiæ habitualis, daretur proceſſus in infinitum, ſic loquitur. *Sed hoc quod homo moveatur à Deo non præexigit aliquam aliam motionem, cùm Deus ſit primum movens: unde non oportet abire in infinitum.* Et 1. 2. q. 112. art. 2. ad 2. Et q. 113. art. 10. in Corp. Et de Verit. q. 28. art. 3. ad 13. refutat quod dixerat in Sent. S. Paulum in ſua converſione interiùs non fuiſſe divino auxilio motum.

Item multis in locis refutat, ſeu ad Catholicum ſenſum revocat quod dixerat, Homini facienti quod in ſe eſt Deus non denegat gratiam 1. 2. q. 112. art. 3. Et 1. 2. q. 109. art. 6. ad 2. *Cum dicitur homo facere quod in ſe eſt, dicitur hoc eſſe in poteſtate hominis, ſecundùm quod eſt motus à Deo.* Et in 10. ad Rom. lect. 3. *Si qui tamen eorum feciſſent quod in ſe eſt, Dominus eis ſecundùm ſuam miſericordiam providiſſet, mittendo eis Prædicatorem fidei, ſicut Petrum Cornelio Act. 10. & Paulum Macedonibus, ut haberetur Act. 16. ſed tamen hoc ipſum, quòd aliqui faciunt quod in ſe eſt, convertendo ſe ſcilicet ad Deum, ex Deo eſt movente corda ipſorum ad bonum. Thren. 5. Converte nos Domine ad te, & convertemur.*

Item in 7. ad Rom. lect. 3. in hæc verba, *Velle adjacet mihi* (quibus Caſſianus utebatur, ut per naturæ bonum, quod beneficio Creatoris indultum eſt, nonnunquam bonarum voluntatum prodire principia oſtenderet, ut patet ex ejus verbis cap. 8. S. Proſperi contra Collatorem) ſic, inquam, loquitur S. Thomas. *Hoc autem verbum patrocinari videtur Pelagianis (id eſt Semipelagianis) qui dicebant, quòd initium boni operis eſt ex nobis, in quantum bonum volumus: & hoc eſt quod videtur Apoſtolus dicere, Perficere autem bonum non invenio: ſed hunc ſenſum excludit Apoſtolus Philipp. 2. dicens; Deus eſt qui operatur in nobis velle & perficere*

*cere.* Quod, in hæc Apostoli verba, de Deo interiùs movente intelligendum esse docet: *Quia interiùs*, inquit, *per instinctum movet voluntatem ad bene operandum.* Ubi & similiter docet his verbis excludi *falsam* exstimationem Pelagianorum dicentium electiones esse in nobis, sed prosecutiones operum à Deo: quia velle est à nobis, sed perficere à Deo. Et hoc, inquit, excludit dicens, *Et velle & perficere.* Rom. 9. *Non est volentis, scilicet velle, sine auxilio Dei, neque currentis, scilicet currere, sed miserantis est Dei.* Cum ergo S. Thomas antea falsæ Cassiani exstimationi juvenis adhæsisset, jam maturiori ætate S. Prosperi contra eundem doctrinam amplectitur. Similiter enim S. Prosper Cassianum refutat contra Collatorem c. 8. his verbis. *Dixit quidem B. Apostolus: Velle enim adjacet mihi, perficere autem bonum non invenio; sed idem dixit: Non quod idonei simus cogitare aliquid ex nobis ipsis, sed sufficientia nostra ex Deo est. Et idem dixit: Deus est enim qui operatur in vobis & velle & perficere pro bonâ voluntate.*

Itaque cum negari non possit, S. Thomam aliter juvenem de gratiâ sensisse & scripsisse, aliter senem; & in Summâ atque aliis Operibus multa circa gratiam ad initium justificationis requisitam emendasse & retractasse, quæ in Sententias asseruerat, id sine ullo contemptu & irreverentiâ de S. Thomâ dici potest, à quocumque dicatur, quia veraciter dicitur; sicut qui dicit S. Augustinum in libris ante Episcopatum Semipelagianum errorem tradidisse, quem postea correxit ac revocavit, Sanctum hunc Doctorem nullo modo contemnit, nec illusoriam ei reverentiam exhibet. Hoc autem non observavi, quasi quæ P. Nicolai ex Operibus S. Thomæ in Sententias testimonia refert non admittam. Nihil enim citat ex Sententiis aut ex aliis Operibus in quibus Sanctus ille Doctor rectè non senserit, & ejusdem Patris Nicolai de gratiâ actuali interiori sufficiente opinionem non rejecerit; sed Professoris hujus in S. Thomæ doctriâ & Thomistarum Operibus imperitiam, præposterumque in S. Thomam studium, & in S. Augustini Discipulos odium, j. hæc in re demonstrare tantum volui.

## ARGUMENTUM ET PARTITIO OPERIS.

**P**ater Nicolai secundâ Suffragii sui parte multas S. Thomæ auctoritates pro gratiâ sufficiente austruendâ refert, ac eas in quinque classes distribuit, & classes numeris distinguit: nos hoc Opere singula S. Thomæ testimonia quæ his in classibus retulit

retulit exponemus, & à perverso sensu illis per eum affecto vindicabimus: atque ut ex his potissimum concludit juxta S. Thomam gratiam actualem interiorem sufficientem omnibus hominibus semper dari, ac præsertim fidelibus & justis; nos hoc Opere ostendere nitemur, nihil esse in S. Thomæ doctrinâ certius, quàm gratiam actualem sufficientem omnibus hominibus semper non dari, ac nullum à Patre Nicolai testimonium proferri, ex quo concludi possit eam aut omnibus hominibus, aut etiam omnibus fidelibus ac justis semper & in omni peccati occasione dari. Ut verò S. Thomæ circa gratiam sufficientem doctrina plenius & fructuosius exponatur, non solum confutabimus quæ à Patre Nicolai objecta sunt; sed etiam certis testimoniis S. Thomæ sententiam confirmabimus. Quæ P. Nicolai quinque classibus, nos quinque sectionibus complectemur, ac singulas sectiones dividemus in articulos.

In primâ Sectione explicabimus ea testimonia in quibus S. Thomas dicit Deum, quantum in se est, gratiam suam omnibus dare, ac quidquid P. Nicolai in 1. & 2. classe retulit explanabimus.

In secundâ Sectione referemus omnia quæ ad possibilitatem præceptorum spectant, tertiâ classe Patris Nicolai contenta.

Verùm quia alia sunt è S. Thoma argumenta, ex quibus Molinistæ gratiam sufficientem communem astruere solent, quæque P. Nicolai prætermisit, scilicet imputatio peccati, voluntas Dei pro omnium salute, & mors Christi pro omnibus quoad sufficientiam pretii, ne quid desit plenæ S. Thomæ hac de quæstione elucidationi, Tertiâ Sectione de his agemus.

Quarta Sectio continebit eorum testimoniorum expositionem, quibus probatur auxilium Dei moventis semper efficax esse ad actum ad quem ex Dei intentione & absolutâ voluntate ordinatur, & eorum quæ à P. Nicolai quartâ classe objecta sunt confutationem. Hujus classis exordium ille duxit à gratiæ sufficientis & efficacis nomine & significatione: ita & nos primò investigabimus quæ sit propria apud S. Thomam causæ sufficientis & gratiæ sufficientis significatio: deinde ostendemus quantum ille Doctor & à S. Thomâ, & à recentioribus Thomistis hæc in re aberraverit.

Denique Sectione quintâ dicemus de causâ defectus gratiæ, ad explicanda S. Thomæ testimonia quintâ classe relata. Quia verò germanam S. Thomæ doctrinam, potius quàm ejus Interpretum, investigare & exhibere nobis propositum est, eam ex ipsis S. Thomæ Operibus & sententiis, non verò ex Thomistarum opinionibus, eruemus.

Ne autem actum agamus, quantum fieri poterit, nihil ex iis quæ Arnaldus in suo Scripto circa S. Thomæ de gratiâ sufficiente & efficace doctrinam dixit, repetemus. In eo potissimum ostendit juxta S. Thomam hominem sine auxilio efficaci Dei moventis non posse id velle aut agere ad quod necessarium est; exposuit quodnam posse gratiæ habituali S. Thomas tribuat; luculenter etiam multis S. Thomæ testimoniis probavit auxilium Dei moventis semper esse efficax, quantum ad effectum seu ad actum piæ voluntatis, ad quem ex Dei intentione & absolutâ voluntate ordinatur, quæ ad ejus propositionem S. Thomæ auctoritate astruendam explicari oportuit. Igitur hæc nos prætermitemus, nisi quoddam aliqua S. Thomæ testimonia circa gratiam semper efficacem ab Arnaldo rectissimè exposita iterum tractabimus, ut ea à perversis sensibus Patris Nicolai vindicemus, cujus Suffragium confutare Arnaldo propositum non fuit.

# VINDICIÆ SANCTI THOMÆ CIRCA GRATIAM SUFFICIENTEM.

Adversus P. JOANNEM NICOLAI, Ordinis Fr. Præ-  
dicatorum & Doctorem Parisiensem.

## S E C T I O P R I M A.

*In quâ ex in locis in quibus S. Thomas docet, Deum, quantum in se est, omnibus gratiam dare, gratiam actualem, sufficientem dictam, omnibus non dari ostenditur; & omnia ejusdem Sancti testimonia à P. Nicolai 1. & 2. Classe relata exponuntur, & à pravo sensu illis per eum affecto vindicantur.*

**P**ATER Nicolai primum argumenti genus ad gratiam actualem sufficientem communem S. Thomæ auctoritate astruendam ex iis testimoniis repetit, in quibus idem Sanctus Deum, quantum in se est, omnibus gratiam dare asserit. Indiscriminatim autem ea testimonia refert, ex quibus modò gratiam actualem sufficientem omnibus semper dari contendit, modò fidelibus omnibus & justis. Nos, quibus non solum Patris Nicolai sententiam confutare, sed etiam nostram illi contrariam S. Thomæ auctori-

tate confirmare propositum est, ex iisdem etiam locis primò probabimus, juxta S. Thomam gratiam actualem sufficientem dictam omnibus non dari; deinde ostendemus omnia ejusdem Sancti hæc de re testimonia, quæ P. Nicolai 1. & 2. classe ad suam sententiam confirmandam refert, perverso & alieno penitus sensu ab eo usurpata esse, nec esse ullum ex quo sequatur gratiam actualem sufficientem, aut omnibus hominibus, aut omnibus fidelibus ac justis, semper & pro omni actu dari.



## ARTICULUS I.

*In quo exponitur illud S. Thomæ testimonium in 12. ad Hebræos à P. Nicolai 1. Classe relatum: Gratia nulli deest; sed omnibus, quantum in se est, se communicat, &c. Ofsenditurque eo in loco S. Thomam expresse docere, gratiam actualem sufficientem omnibus non dari.*

**S**ANCTUS THOMAS in caput 12. ad Hebr. lect. 3. hæc Apostoli verba exponens: Contemplantur ne quis desit gratia Dei; sic loquitur. Gratia etsi non habeatur ex meritis, alioquin gratia non esset gratia: tamen oportet quod homo faciat quod in se est, Deus autem voluntate sua liberalissimè dat eam omni præparanti se. Apocalyps. 3. Ecce sto ad ostium & pulso, si quis aperuerit mihi, intrabo ad eum. 1. Tim. 2. Qui vult omnes homines salvos fieri. Et idè gratia nulli deest, sed omnibus, quantum in se est, se communicat: sicut nec sol deest oculis cæcis. (P. Nicolai hæc verba retulit, sed fraudulentè omisit sequentia, quia ipsi penitus adversa.) Dicit ergo, Contemplantur ne quis desit gratia Dei. Sed contra, quia si gratia non datur ex operibus, sed tantum ex hoc quod aliquis non ponit obstaculum, ergo habere gratiam dependet ex solo libero arbitrio, & non ex electione Dei, quod est error Pelagii. Respondeo: Dicendum est, quod hoc ipsum, quod aliquis non ponit obstaculum, ex gratia procedit. Unde si aliquis ponat, & tamen moveatur cor ejus ad removendum illud, hoc est ex dono gratia Dei vocantis per misericordiam suam: Gal. 1. Cum autem placuit ei quime segre-

garit ex utero matris mee & vocavit per gratiam suam, &c. Hoc autem donum gratia non est gratum faciens: QUOD ERGO A QUIBUSDAM REMOVETUR ISTUD OBSTACULUM, HOC EST EX MISERICORDIA DEI; QUOD AUTEM NON REMOVETUR, HOC EST EX JUSTITIA EJUS.

Hæc S. Thomæ doctrina adeò Patris Nicolai sententiæ repugnat, ut vel his solis verbis quidquid in Suffragio censorio retulit confutetur: quod ut clarè pateat aliqua apud S. Th. certa & indubitata supponenda sunt.

1. Certum est gratiam Dei dari omnibus se ad eam præparantibus; atque id de gratiâ habituali à S. Thomâ vulgò intelligi, ut fatetur P. Nicolai: Nec interest, inquit 1. classe pag. 32. gratiam ibi habitualement indicari, quæ se ad illam præparanti non desit. Sed de gratiâ actuali ex se efficaci ad tentationem vincendam, peccatum fugiendum, ac præceptum implendum necessariâ, similiter id verum est; siquidem Deus omni homini se præparanti, dignè scilicet & ut oportet, gratiam ad vincendam tentationem, peccatum fugiendum, & præceptum implendum necessariam nunquam denegat.

2. Certum est apud S. Thomam, ex omnium Thomistarum consensu, gratiam actualem ex se efficacem necessariam esse homini ut se ad gratiam habendam præparet; siquidem gratia ex se efficax necessaria est ad singulos pios actus, seu perfectos, seu imperfectos.

3. Certum est, ex loco citato, idem esse apud S. Thomam, Se præparare ad gratiam, & Non ponere obstaculum gratiæ. Quamvis enim præcisè & formaliter idem non sint, & Præparare se ad gratiam, plus dicat, quàm, Non ponere obstaculum gratiæ; siquidem hoc solum significat remotionem impediementi; illud verò superaddit ordinem positivum ad gratiam: tamen quia utrumque ponitur à S. Thomâ esse effectus ejusdem gratiæ actualis, idè pro eodem usurpatur. Atque adè in doctrinâ S. Thomæ, sicut datur gratia se ad gratiam præparanti, ita & obstaculum non ponenti; & sicut, Præparare se ad gratiam, aliquem pium actum semper includit, ita & Non ponere obstaculū gratiæ, aliquem etiam pium actum semper includit.

Itaque cum constet ex S. Thomâ gratiam semper dari iis qui se ad eam habendam præparant, seu qui ei obstaculum non ponunt, & gratia actualis necessaria sit, etiam ad præparandum se & ad obstaculum non ponendum, nec de istis ulla sit inter nos contentio; de hoc uno questione esse potest, An ex S. Thomâ

gratia actualis omnibus semper detur ut se ad gratiam habendam præparent, seu ut gratiæ obstaculum non ponant. Ita esse affirmat P. Nicolai, idque citato S. Thomæ testimonio probare aggredditur; sed ita perversè, ut ibidem sanctus ille Doctor disertè asserat gratiam ad se præparandum, seu ad obstaculum removendum, omnibus non dari.

Ex hoc enim S. Thomæ testimonio gratia actualis ad removendum obstaculum omnibus non datur, seu eor omnium non movetur ex dono gratiæ ad removendum illud: *Dicendum est*, inquit, *quod hoc ipsum quod aliquis non ponit obstaculum, ex gratiâ procedit: unde si aliquis ponat, & tamen moveatur cor ejus ad removendum illud, hoc est ex dono gratiæ Dei vocantis per misericordiam suam. Quid ergo à quibusdam removeatur istud obstaculum, hoc est ex misericordiâ Dei: QUOD AUTEM NON REMOVETUR, HOC EST EX JUSTITIA EJUS.*

Hanc autem doctrinam, quâ S. Thomas gratiam actualem ad removendum obstaculum; seu ad præparandum se, omnibus non dari affirmat, tantâ cum certitudine proponit, ut sententiam contrariam ad errorem Pelagii revocet: *Sed contra*, inquit, *quia si gratia non datur ex operibus, sed tantum ex hoc quod aliquis non ponit obstaculum: ergo habere gratiam dependet ex solo libero arbitrio, & non ex electione Dei, quod est error Pelagii. Cui objectioni respondet: Quod aliquis non ponat obsta-*  
culum,

culum, ex gratiâ Dei per misericordiam suam vocantis procedere.

Unde concludit, ex misericordiâ Dei esse, quod à quibusdam removeatur; & ex ejus justitiâ, quod à quibusdam non removeatur. Ergo ut caveatur error Pelagii & catholica veritas astruatur, dicendum est quod non ponere obstaculum gratiæ, seu præparare se ad gratiam, procedit ex gratiâ & electione Dei, quâ Deus ex misericordiâ aliquorum cor movet ad removendum obstaculum, & aliquorum ex justitiâ non movet: seu dicendum est, quod non ponere obstaculum gratiæ procedit ex gratiâ quam Deus aliquibus dat, & aliquibus non dat. Id negans P. Nicolai in errorem Pelagii juxta S. Thomam incidit, & veritatem Catholicam impugnat, adedò perversè egregius ille S. Thomæ interpreter ejus doctrinam adulterat, ut quod sanctus ille Doctor velut errorem Pelagianum confutat, iste velut propriam sancti Thomæ sententiam usurpet.

Quid ergo, inquires, hæc S. Thomæ verba significant? *Gratia nulli deest, sed omnibus, quantum in se est, se communicat: sicut nec sol deest oculis cæcis.* Hic est horum verborum sensus: Gratia nulli deest se ad illam præparanti, omnibus, quantum in se est, hoc est, omnibus illi obstaculum non ponentibus, se communicat. Hæc ipsa est S. Thomæ ratiocinatio. *Deus, inquit, voluntate suâ liberalissimâ dat gratiam omni præparanti se. . . Et ideo gratia nulli deest,*

scilicet præparanti se: gratiam autem ad se præparandum, seu ad removendum obstaculum, omnibus non dari, confestim docet. Hæc itaque verba, si sequentia non omittantur, difficultatem nullam movent. Eorundem verborum (quantum in se est) sensum plenius exponemus ac confirmabimus art. 4. postquam similem omnino sententiam ex l. 3. contra gentes c. 159. desumptam retulerimus.

Hinc verò patet quàm parùm Patri Nicolai suffragetur hoc S. Thomæ testimonium q. 14. de verit. art. 11. ad 1. ubi ait: *Hoc ad divinam Providentiam pertinet, ut cuilibet provideat de necessariis ad salutem, dummodo ex ejus parte non impediatur.* Nam quæstio non est an Deus, quantum in se est, det necessaria ad salutem non ponentibus impedimentum: sed an det omnibus gratiam ad removendum impedimentum. In doctrinâ S. Thomæ omnibus non ponentibus impedimentum, ac se ad gratiam præparantibus gratiam dari concedimus; sed omnibus ad impedimentum non ponendum & ad præparandum se gratiam dari pernegamus, nunquam à S. Thomâ assertum dicimus, imò ab eo in 11. ad Hebr. expressè negatum demonstramus. Cùm ergo P. Nicolai pronuntiat, nihil esse hoc testimonio ad gratiam communem probandam expressius, testatur quàm parùm intelligat quæ ex S. Thomâ refert, & quàm parùm sciat quæ S. Thomas docet.

A R T I C U L U S I I.

*in quo exponitur illud testimonium l. 3. contra gentes c. 159. Deus, quantum in se est paratus est omnibus gratiam dare, &c. Pariterque ostenditur, S. Thomam hoc loco expressè docere, gratiam sufficientem omnibus non dari.*

**E**st aliud S. Thomæ testimonium l. 3. contra gentes c. 159. præcedenti penitus simile, à P. Nicolai 1. classe ad gratiam communem astruendam pariter; nec minus infeliciter usurpatum; cum hoc loco S. Thomas gratiam omnibus non dari disertè pronuntiet, ac multis capitibus confirmet. Ita S. Thomas.

*Cum hoc sit in potestate liberi arbitrii, impedire divina gratia receptionem, vel non impedire, non immeritò in culpam imputatur, ei qui impedimentum præstat gratiæ receptioni. Deus enim, quantum in se est, paratus est omnibus gratiam dare. Vult enim omnes homines salvos fieri, & ad cognitionem veritatis venire, ut dicitur 1. ad Tim. 2. Sed illi soli gratiâ privantur, qui in seipsis gratiæ impedimentum præstant: sicut, sole mundum illuminante, in culpam imputatur ei qui oculos claudit, si ex hoc aliquod malum sequatur, licet videre non possit, nisi lumine solis præveniatur.*

Certum est, ut fatetur P. Nicolai, gratiam habitualetm ibi indicari, quæ se ad illam præparanti non deficit: de hoc ergo nulla est inter nos controversia: Sed quæritur, an omnibus detur gratia quâ se ad illam præparent, seu quâ illius receptioni impedi-

mentum non præstent? Id autem ex hoc loco P. Nicolai nequaquam probat, nisi per falsam consequentiam infra à nobis refutandam, postquam ex hoc ipso loco gratiam omnibus communem à S. Thomâ non doceri, imò negari & impugnari, constiterit.

Dicit ergo S. Thomas, esse in potestate liberi arbitrii impedire divinæ gratiæ receptionem, vel non impedire, atque ita non immeritò in culpam imputari ei qui impedimentum præstat gratiæ receptioni. Hinc Molinistæ concludunt, semper dari auxilium Dei moventis iis qui peccant, cum non aliter sit in potestate liberi arbitrii non impedire gratiæ receptionem, quàm per Dei moventis auxilium. Hinc Petrus à S. Joseph insignis Molinista concludit in suâ Defensione S. Thomæ disp. 1. Sect. 10. §. 2. in doctrinâ S. Thomæ non dari auxilium physicè prædeterminans: Cum ergo, inquit, per hominem non stet quin physicè prædeterminetur, sed per Deum solum qui ex mera suâ libertate statuit illi prædeterminationem non immittere, homini imputari non potest si non convertitur; aut si hoc illi imputatur, ut sit, dici non potest, quòd ad conversionem

versionem motionem prædeterminante indigeat. Verùm ista argumentatio per verba S. Thomæ immediate sequentia refellitur. Sic enim S. Doctor c. 160. seipsum interpretatur.

*Quod autem dictum est in potestate liberi arbitrii esse, ne impedimentum gratiæ præstet, competit his in quibus naturalis potentia integra fuerit, hoc est, his qui sunt in statu naturæ integræ; qualis fuit in primo parente ante peccatum, non verò his qui sunt in statu naturæ corruptæ.*

Certum est enim S. Thomam per integritatem naturæ semper intellexisse statum hominis, antequàm liberum arbitrium Adæ peccato vulneratum esset, ut patet ex 1. 2. q. 109. per multos articulos, & hanc suam doctrinam iisdem ferè verbis confirmat in illud Joan. 6. *Nemo potest venire, &c.* Aliter autem, inquit, quantum ad hoc pertinet, possumus loqui de hominibus in statu naturæ integræ, & aliter in statu naturæ corruptæ. Nam in naturâ integrâ non erat aliquod impedimentum prohibens ab hac tractatione. Illud rectè adnotavit Franciscus Ferratiensis in hunc locum. *Per naturalem potentiam, inquit, intelligit S. Thomas liberi arbitrii potentiam, quæ etiam voluntas dicitur, nullo peccato nullâque inordinatione vitiatam, sicut erat in primo parente antequàm peccaret.*

Itaque S. Thomas hoc loco gratiam omnibus dari non solum non asserit, sed potiùs docet eam omnibus non dari. Cur enim

quod generaliter statuisse videbatur hac exceptione limitat, ut de statu hominis ante peccatum intelligi velit, nisi quia nunc ob naturæ corruptionem non est in potestate liberi arbitrii impedimentum gratiæ non præstare. Ex quo sequitur, hoc in statu non dari semper omnibus gratiam quæ tribuit libero arbitrio potestatem impedimentum gratiæ non præstandi; sicut in loco antea citato in 12. ad Hebr. expressè affirmat.

Atque etiam in capitibus sequentibus illud ipsum tam disertis verbis docet, scilicet omnibus gratiam non dari quàm impedimentum gratiæ non præstent, ut ea omnia P. Nicolai reticere coactus sit: quibus ejus in exponendâ S. Thomæ mente fallacia tam apertè convincitur. Hæc enim habet S. Doctor c. 160. 161. & 162.

*Quamvis autem illi qui in peccato sunt, vitare non possint per propriam potestatem, quin impedimentum gratiæ præstent vel ponant, ut ostensum est, nisi auxilio gratiæ præveniantur; nihilominus tamen hoc eis imputatur ad culpam: quia hic defectus ex culpâ præcedente in eis relinquitur: sicut ebrius ab homicidio non excusatur, quod per ebrietatem committit, quam suâ culpâ incurrit. Præterea licet ille qui est in peccato, non habeat hoc in propria potestate, quod omnino vitet peccatum; habet tamen potestatem nunc vitare hoc vel illud peccatum, ut dictum est: unde quodcumque committit, voluntarie committit, & ita non immeritò ei imputatur ad culpam.*

culpam. Licet autem ille qui peccat impedimentum gratiæ præstet, & in quantum ordo rerum exigit, gratiam non deberet recipere; tamen quia Deus præter ordinem rebus inditum operari potest, sicut cum cæcum illuminat, vel mortuum resuscitat, interdum ex abundantia bonitatis suæ, etiam eos qui impedimentum gratiæ præstant, auxilio suo prævenit, avertens eos à malo. & convertens ad bonum: & sicut non omnes cæcos illuminat, nec omnes languidos sanat, ut in illis quos curat opus virtutis ejus appareat, & in aliis ordo naturæ servetur; ita non omnes qui gratiam impediunt auxilio suo prævenit, ut avertantur ad malum & convertantur ad bonum, sed aliquos in quibus vult suam misericordiam apparere, ita quod in aliis justitiæ ordo manifestetur. Hinc est quod Apostolus dicit ad Rom. 9. Volens Deus ostendere iram, & notam facere potentiam suam, sustinuit in multâ patientiâ vasa iræ, apta in interitum, ut ostenderet divitias gloriæ suæ in vasa misericordiæ, quæ preparavit in gloriam. Cum autem Deus hominum qui in eisdem peccatis detinentur, hos quidem præveniens convertat, illos autem sustineat, sive permittat secundum ordinem rerum procedere, non est ratio inquirenda, quare hos convertat, & non illos. Hoc enim ex simplici ejus voluntate dependet, sicut ex simplici ejus voluntate processit, quod cum omnia fierent ex nihilo, quedam facta sunt aliis digniora; & sicut ex simplici voluntate procedit artificis, ut ex eadem materiâ similiter disposi-

tâ quadam vasa formet ad nobiles usus, & quadam ad ignobiles. Hinc est quod Apostolus dicit ad Rom. 9. An non habet potestatem figuræ lutî.... Quamvis autem quosdam peccatores Deus ad se non convertat, sed in peccatis, secundum eorum meritâ, eos relinquat: non tamen eos ad peccandum inducit. Homines enim peccant per hoc quod deviant ab ipso qui est ultimus finis.... Inveniuntur tamen quadam in Scripturis, ex quibus videtur quod Deus sit aliquibus causa peccandi. Dicitur enim Exod. 10. Ego induravi cor Pharaonis &c. Quæ omnia secundum hoc intelligenda sunt, quod Deus aliquibus non confert auxilium ad vitandum peccatum, quod aliis quibusdam confert. Hoc autem auxilium est, non solum infusio gratiæ, sed etiam exterior custodia, per quam occasiones peccandi ei homini ex divinâ providentiâ tolluntur, & provocantia ad peccatum comprimuntur.

Ex his omnibus evidentissimè colligitur, gratiam actualem interioriorem, sufficientem omnibus hominibus hęc in statu communem, à S. Thoma admissam non esse, cum doceat quod Deus omnes auxilio ad vitandum peccatum necessario non prævenit; quod non est in potestate liberi arbitrii impedimentum gratiæ non præstare, nisi in naturâ integram ante peccatum primi parentis; quod licet gratiam habitua-

parent, & impedimentum non præsent, cum tamen omnes impedimentum gratiæ præsent, nisi Deus gratiâ suâ eos misericorditer præveniat; quod gratiam hanc prævenientem, ad removendum impedimentum necessariam, Deus nemini debet, & ad suæ justitiæ ostensionem quibusdam non largitur, & quibusdam ex gratiâ & ex abundantia bonitatis, & præter rerum ordinem agens largitur; quod aliquibus ad vitandum peccatum non confert auxilium, non solum gratiæ interioris seu infusæ, sed etiam custodiæ exterioris; quod peccatum homini justè à Deo imputatur, etsi gratia necessaria desit; quod Deus homines sibi ipsis derelinquens non est causa peccati, sed homines: quia per hoc peccant quod deviant ab ultimo fine; quod denique ex simplici Dei voluntate pendet, si unum & non alium prævenit & convertit. Quæ omnia cum nunquam per gratiæ interioris communis doctrinam, sed per alia principia exponant, quantum ab

hac gratiæ sufficientis omnibus, cum præceptum urget, semper datæ sententiâ abhorreat, luce clariùs innotescit.

Quantum verò tota hæc S. Thomæ doctrina Joannis Nicolai cæterorumque Molinistarum sensui ac principis sit contrariâ, legenti per se patet: cum è contra doceant, Deum omnes suâ gratiâ semper prævenire; semper esse in potestate liberi arbitrii per gratiam actualem semper præsentem præparare se ad gratiam recipiendam, & illi impedimentum non præstare; non imputari peccatum, si gratia ad illud vitandum necessaria desit; gratiam omnibus, cum præceptum urget, ex justitiâ deberi; eam secundum ordinem rerum, puta secundum ordinem bonitatis & justitiæ Dei, omnibus in peccato existentibus dari; nunquam homines sibi à Deo relinqui, aliâs eum fore causam peccati; Denique ex simplici Dei voluntate non pendere quod hos convertat, & non illos.

### A R T I C U L U S I I I.

*In quo solvuntur argumenta, quibus P. Nicolai probare nititur S. Thomæ testimoniis supra allatis gratiam sufficientem astrui.*

**F**rustrâ verò P. Nicolai Molinisticis argumentis corroborare nititur quod S. Thomas apertissimè impugnat: frustrâ gratiam sufficientem communem, quam ex S. Thomæ verbis & doctrinâ astruere non potest, per fallaces consequentias deducit.

De S. Thomæ sententiâ agitur: illa verò ex ipsiusmet doctrinâ inquirenda, vel per consequentias apud eum positas & penitus exploratas eruenda.

*Nec interest, inquit P. Nicolai, gratiam ibi habitualemente indicari, quæ se ad illam præparant*



non desit; quia cum ei cui gratia talis deest, defectus ipse præparationis imputetur ad culpam, nec ad eam interim consequendam sine gratiâ interiori actuali movente præparare se possit, numquid hoc ipso consequens est, interiorem illam actualem gratiam ei etiam non deesse qui se per illam non preparat; aut quid aliud insinuat 1. 2. q. 76. a. 2. ad 2. cum ait quod [etsi privatio gratiæ secundum se non sit peccatum, tamen ratione negligentia preparandi se ad gratiam potest habere rationem peccati?] Nam quæ hominis esse negligentia potest, quod ad gratiam consequendam se non præparet, si auxilium deest quo se præparet, nempe si actualis interior gratia deest, &c.

Defectus præparationis ad culpam imputatur, negligentia præparandi se ad gratiam peccatum est, ad gratiam consequendam sine gratiâ interiori actuali movente præparare se homo non potest: verissima hæc est S. Thomæ doctrina. At dicere eum Patre Nicolai, *Quod hoc ipso consequens est interiorem illam actualem gratiam ei etiam non deesse qui se per illam non preparat. Nam quæ hominis negligentia esse potest, quod ad gratiam consequendam se non præparet, si auxilium deest quo se præparet; nempe si actualis interior gratia deest?* falsissima est hæc Joannis Nicolai consequentia, Molinianis principiis ad efficacis gratiæ necessitatem evertendam tota subnixa, & à S. Thomæ mente non modò aliena, sed etiam apertè ab ipso his ipsis locis de quibus agitur impugnata.

Hoc scilicet Patris Nicolai argumentum, si quid valeret, gratiam per se efficacem ad præparandum se non esse necessariam, seu gratiam actualem interiorem, quæ homo ad præparandum se indiget, libero arbitrio subjectam esse, necessariò concluderetur. Nam certum est gratiam per se efficacem deesse homini se non præparanti: si ergo illa, inquit Molinistæ, simpliciter necessaria est ad se præparandum, quæ hominis negligentia esse potest, quod ad gratiam consequendam non se præparet, quando auxilium necessarium deest quo se præparet? Si defectus præparationis imputatur ad culpam, si negligentia præparandi se rationem peccati habet, ut S. Thomas docet, numquid hoc ipso consequens est juxta Patris Nicolai argumentationem, actualem interiorem gratiam, ad præparandum se absolute necessariam, ei etiam non deesse, qui se per illam non præparat: efficax autem deest ei qui se non præparat. Ergo hac P. Nicolai argumentatione positâ, per evidentem consequentiam ex certâ S. Thomæ doctrinâ deductâ, gratia per se efficax ad se præparandum non est absolute necessaria. Atque ita hæc falsa Nicolai collectio Molinianis principiis superstructa, gratiæ per se efficacis ad singulos pios actus necessitatem evertit. Id adeò certum est, ut Petrus à S. Joseph Molinista insignis, in suâ Defensione S. Thomæ disp. 1. Sect. 8. §. 1. hoc eodem ar-

gumento ostendere nitatur, S. Thomæ doctrinam coherere non posse cum sententiâ quæ prædeterminationem physicam ad omnes actus requirit. Igitur P. Joannes Nicolai, vel se Petro à S. Joseph & alijs Molinistis, qui S. Thomæ Molinismum affingunt, contra Scholam suam publicè adjungat, vel ab hujusmodi argumentationibus, cum Molinistico errore necessariò connexis, abstrahat.

Ubi hæc Patris Nicolai consequentia nunquam S. Thomæ in mentem venit. Ubi enim unquam apud Sanctum illum Doctorem legit, negligentiam se præparandi nullam esse, peccatum non esse, & ad culpam non imputari, nisi ei qui se non præparat adsit gratia actualis interior quâ se præparet? Contra docet quòd cum aliqui gratiæ auxilio non præventi impedimentum gratiæ ponunt, nihilominus hoc eis imputatur ad culpam; primum quidem quia hic defectus ex culpâ præcedente in eis relinquitur; deinde verò quia habent potestatem, non quòd omnino vitent pec-

catum, sed quòd nunc vitent hoc vel illud: denique *quavis*, ut ait idem Sanctus, *quosdam peccatores Deus ad se non convertat, sed in peccatis secundum eorum merita eos relinquat, non tamen eos ad peccandum inducit, Homines enim peccant per hoc quòd deviant ab ipso qui est ultimus finis.* Consequentias è S. Thomæ doctrinâ non deducimus, sed ipsa ejus verba peccati imputationem in homine cui gratia ad se præparandum deest exponens referimus.

Demùm hæc Patris Nicolai consequentia his ipsis locis de quibus agitur à S. Thomâ apertè impugnatur; siquidem Sanctus ille asserit gratiam ad se præparandum & ad removendum obstaculum necessariam, & sine quâ obstaculum non removetur, quibusdam non dari, à quibus non removetur istud obstaculum: hi tamen obstaculum ponendo peccant, illisque negligentia præparandi se, seu removendi obstaculum, ad culpam imputatur, ut expressè docet.

#### A R T I C U L U S I V.

*In quo plenius exponitur & confirmatur horum verborum sensus, Gratia, quantum in se est, omnibus se communicat; sicut nec sol deest oculis cæcis; ac, Deus, quantum in se est, paratus est omnibus gratiam dare.*

**E**TI articulis præcedentibus satis ostensum fuerit ex his S. Thomæ verbis, *Gratia nulli deest, sed omnibus, quantum in se est, se*

*communicat; & Deus, quantum in se est, paratus est omnibus gratiam dare, gratiam communem altrui non posse: siquidem ea-*  
dem

dem verba nihil aliud in locis allegatis significant, quàm gratiam habitualement omnibus ad eam se præparantibus, & illi impedimentum non ponentibus à Deo semper dari: quia tamen hæc verba, etiam ad gratiam actualement indicandam accommodari possent, & de eâ affirmari, ut eorum argumentis occurrat, qui ex his de gratiâ actuali expositis colligunt Deum gratiam actualement ad præparandum se, & ad peccatû vitandum necessariam, omnibus dare, ostendendum est ex eisdem verbis etiam de gratiâ actuali intellectis, gratiam actualement omnibus hoc in statu naturæ corruptæ communem astrui non posse.

Ad hujus verò doctrinæ elucidationem observandum est, quod S. Thomas aliquando hominem in particulari, ut est in seipso, & secundum naturam per peccatum corruptam, sicut nunc est, considerat; aliquando verò generaliter, secundum naturam ut in se est, non habitâ ratione status in quem per peccatum incidit, seu peccati naturæ per hominem adjuncti.

Itaque juxta hanc variam considerationem de auxilio divino ad non peccandum necessario diversimodè loquitur: quia cum de homine, ut est in seipso & habitâ ratione status in quo jam est per peccatum, loquitur, gratiam omnibus hominibus à Deo dari nunquam docet: contra verò eam aliquibus aliquando non dari sæpius pronuntiat, ut locis antea citatis in 12. ad Hebr. ubi ait gratiam ad removendum ob-

staculum aliquibus à Deo ex justitiâ denegari. Et 3. contra gentes c. 160. 161. & 162. ubi idem differtissimè asserit. Item 1. 2. q. 79. art. 1. in c. *Contingit quod Deus non prabet aliquibus auxilium ad evitandum peccatum, quod si præberet non peccarent.* Item 1. 2. q. 106. art. 3. ad 1. *Humanum genus propter peccatum primi parentis meruit privari auxilio gratiæ, & ideo quibuscumque non datur, hoc est ex justitiâ: quibusumque autem datur, hoc est ex gratiâ, ut Augustinus dicit in lib. De perfect. justit.* Item 2. 2. q. 2. art. 5. ad 1. *Quod quidem auxilium (sine quo homo non potest Deum & proximum diligere, nec credere articulos fidei) quibuscumque divinitus datur, misericorditer datur: quibus autem non datur, ex justitiâ non datur in pœnam præcedentis, aut saltem originalis peccati, ut Augustinus dicit in lib. de corrept. & grat.* Item & aliis passim locis infra referendis.

Cum verò hominem secundum naturam ut in se est, generaliter considerat, non habitâ ratione status in quem per peccatum incidit, seu peccati quo homo naturam corrumpit, dicit Deum, quantum in se est, gratiam suam omnibus hominibus dare, seu quantum in se est, paratum esse eam omnibus dare. Atque ita hæc verba, quantum in se est, denotant naturam quam Deus condidit, non habitâ ratione peccati quod homo fecit; indicant naturam, ut est à Deo creata, non ut est ab homine per peccatum vitiata; significant quod merè

Dei est in homine per bonitatem Creatoris, sine intuitu illius quod hominis est in homine per vitium & corruptionem peccati, Deus ergo, quantum in se est, omnibus hominibus gratiam actualem semper dar, seu dare paratus est; quia eam nulli unquam nisi ex consideratione & merito præcedentis peccati, vel actualis, vel saltem originalis, denegat; nunquam eam ex se, sed semper ex aliquo hominis merito denegat; nunquam denique eam denegat, nisi considerans peccatum quo homo naturam corrumpit. Quid jam inde pro gratiâ actuali, ad non peccandum sufficiente & necessariâ omnibus hominibus secundum naturæ corruptæ statum in quo nunc sunt, seu secundum omnes circumstantias particulares consideratis communi, colligi potest? Nihil prorsus. Simul enim verum est quod Deus, quantum in se est, omnibus hominibus gratiam dat, seu dare paratus est: & quod eam aliquibus denegat; quia scilicet nemini eam ex se, & sine alicujus peccati consideratione & merito denegat, & simul eam aliquibus post considerationem & ob meritum alicujus peccati, seu aliquibus consideratis in particulari, & ut sunt in seipsis, justè denegat: porro causam defectus gratiæ, juxta S. Thomam, semper ab homine repeti debere Sect. 5. uberrimè probavimus.

Hanc esse S. Thomæ mentem, hanc hujus sententiæ expositionem, hunc horum verborum,

*quantum in se est, de gratiâ actuali intellectuum sensum, ita certum evidensque est, ut nec alius esse possit: cum, ut articulis præcedentibus ostensum est, eodem loco, scilicet in 12. ad Hebr. in quo docet gratiam omnibus, quantum in se est, se communicare; simul doceat, gratiam ad removendum impedimentum aliquibus à Deo ex justitiâ non dari: & eodem loco, scilicet l. 3. contra gentes cap. 159, in quo docet, Deum, quantum in se est, paratum esse omnibus gratiam dare, simul etiam doceat cap. 160. 161. & 162. Deum aliquibus non conferre auxilium ad virandum peccatum; ex iis qui gratiam impediunt, aliquos auxilio suo non prævenire, ut in iis justitiæ ordo manifestetur; ac demùm quod dixerat in potestate liberi arbitrii esse ne impedimentum gratiæ præster, competere his in quibus naturalis potentia integra fuerit, hoc est, competere homini in statu naturæ integræ, non verò in statu naturæ corruptæ.*

Eadem expositio iterum evidentiùs ex S. Thomæ verbis sic confirmari potest. Sanctus ille Doctor & in 12. ad Hebr. & lib. 3. cont. gent. c. 159. ex hoc Apostoli testimonio, *Deus vult omnes homines salvos fieri*, probat Deum, quantum in se est, omnibus gratiam dare. Sic enim loquitur in 12. ad Hebr. *qui vult omnes homines salvos fieri, & ideo gratia nulli deest, sed omnibus, quantum in se est, se communicat*. Ecce, 159. l. 3. cont.

cont. gent. *Deus, quantum in se est, paratus est omnibus gratiam dare: Vult enim omnes homines salvos fieri.*

Ergo S. Thomas non vult alio modo & alio sensu Deum, quantum in se est, omnibus gratiam dare, quam eo quo docet Deum velle omnes homines salvos fieri. Atqui ubi exponit hoc Apostoli testimonium, istam generalem Dei pro omnium salute voluntatem ad singulos homines non extendit, nisi in quantum voluntas illa est antecedens: hanc autem voluntatem antecedentem reponit in velleitate quâdam, quæ solum naturam humanam secundum rationem generalem naturæ, & ut à Deo ad salutem condita est, respicit, sine ullâ peccati naturæ adjuncti consideratione; quæque hominibus, ut sunt in se ipsis, nullas ad salutem gratias præparat, sicut sect. 3. art. 3. & 4. luculenter ostendimus, Ergo juxta S. Thomam Deum paratum esse, quantum in se est, omnibus & singulis hominibus gratiam dare, nihil aliud significat, quam Deum eadem voluntate antecedente paratum esse, quantum de se est, omnibus secundum naturam, ut est ab ipso condita, consideratis gratiam dare: nequaquam verò significat, Deum paratum esse voluntate consequente, quæ sola salutis media præparat ac decernit, eam dare omnibus & singulis in particulari, secundum corruptionem peccati cui subjacent consideratis. Atque ita, sicut

juxta S. Thomam Deus omnes & singulos homines salvos fieri non vult aliâ voluntate, quam antecedente, ex quâ juxta eundem Sanctum nullæ ad salutem gratiæ in homines derivantur; ita omnibus & singulis hominibus gratiam, quantum in se est, non communicat, nec dare paratus est, nisi eadem voluntate antecedente. En totius hujus ratiocinationis vis hoc argumento breviter collecta, quo facillimè demonstratur his S. Thomæ verbis, *quantum in se est*, gratiam actua-lem omnibus hominibus hoc in statu communem astrui non posse.

Juxta S. Thomam Deus omnibus & singulis hominibus gratiam, quantum in se est, non communicat, seu dare paratus non est, nisi eo modo quo vult omnes & singulos homines salvos fieri, ut probatum est. Atqui juxta S. Thomam Deum velle omnes & singulos homines salvos fieri, non est Deum omnibus & singulis hominibus gratiam aliquam actua-lem dare, ut sect. 3. probabitur. Ergo similiter juxta S. Thomam Deum, quantum in se est, omnibus & singulis hominibus gratiam communicare, seu dare paratum esse, non est Deum omnibus & singulis hominibus gratiam aliquam actua-lem dare.

Sed quid, inquiet aliquis, significat ista gratiæ divinæ cum sole comparatio, *Sicut nec sol deest oculis cæcis*, ut ait in 12. ad Hebr. & lib. 3. contra gentes cap. 160.

*Sicut*

*Sicut, sole mundum illuminante, in culpam imputatur ei qui oculos claudit?* Quid, inquam, significat, nisi perpetuam & intimam divinæ gratiæ in omnes homines etiam secundum peccati corruptionem, seu ut sunt in seipsis consideratos, diffusionem? Imò verò contrarium indicat & expositionem à nobis allatam mirificè confirmat.

Sicut enim sol, quanquam lumen suum omnibus rebus ad illud recipiendum dispositis communicet, ramen cæcorum oculos actu non illuminat propter impedimentum cæcitatæ, nec illis deesse dicitur, etsi eorum cæcitatem non auferat, nec oculos illorum qui hos clausierint aperiat: sic licet Deus gratiæ suæ lumen omnibus hominibus ad illud recipiendum dispositis communicet, tamen ex cæcorum mentes actu non illuminat propter impedimentum cæcitatæ, nec illis, quantum de se est, deesse dici potest, etsi eorum cæcitatem gratiæ suæ lumine non sanat, nec eos qui oculos claudunt, ac se ab ejus lumine avertunt, ad se convertat. Deus igitur omnes homines, quantum de se est, illuminat; quia nemini gratiæ suæ lumen denegat, nisi homo ipse illi impedimentum apponat. Verùm omnes homines post peccatum gratiæ divinæ impedimentum præstant: illud autem removere ex gratiâ procedit: illud ergo Deus in aliquibus per gratiam removel ex misericordiâ, & illud in aliquibus non removel ex justitiâ, ut ait idem San-

ctus in 12. ad Hebr. Atque ut docet l. 3. contra gentes c. 160. eisdem gratiæ impedimentum non præstare in potestate quidem liberi arbitrii est, si natura integra fuerit, secus si per peccatum corrupta. Denique ut loquitur ibidem c. 161. *sicut Deus non omnes cæcos illuminat, nec omnes languidos sanat, ut in illis quos curat opus virtutis ejus appareat, & in aliis ordo natura servetur: ita non omnes qui gratiam impediunt auxilio suo prævenit, ut avertantur à malo & convertantur ad bonum: sed aliquos in quibus vult suam misericordiam apparere, ita quod in aliis justitia ordo manifestetur.* Et tamen, ut ibidem docet, his omnibus quos ex justitiâ gratiæ suæ auxilio non prævenit, quantum in se est, paratus est gratiam dare, & his omnibus in quibus ex justitiâ impedimentum non removel, gratia, quantum in se est, se communicat: sicut nec sol deest oculis cæcis. Ex quibus omnibus sole clariùs innotesce hæc S. Thomæ verba, *quantum in se est*, nihil aliud significare quàm naturam hominis ut in se est, & ut est à Deo condita, non habitâ ratione peccati per quod est ab homine corrupta, seu non consideratis circumstantiis particulæ eidem naturæ adjunctis.

Nec omittendum est discrimen illud, quod S. Thomas observat inter solem qui lumen interiùs non immitte ubi obstaculum invenit, & Deum qui gratiæ suæ lumen non apponit his in quibus obstaculum invenit; quia sol agit necesse

necessitate naturæ, Deus verò proprio suo iudicio, voluntariè, ac secundum ordinem suæ sapientie. Unde concludit solum hominem qui fenestram claudit causam esse, ne sol domum illuminet; causam autem subtractionis gratiæ non esse solum illum qui ponit obstaculum gratiæ, sed etiam Deum qui suo iudicio gratiam non apponit, mentis excacationem non sanat, & cordis obdurationem non aufert. Solis quidem est omnia corpora, quantum de se est, illuminare, & lumen interiùs ubicumque obstaculum non invenit immittere: & in hoc solum stat solis cum Deo gratiam omnibus, quantum de se est, communicantis comparatio ac convenientia. Sed solis non est obstaculum remove, nec cæcitatem auferre, nec eorum oculos qui hos claudunt & à sole avertunt aperire & ad se convertere: verum Dei est obstaculum quod homines gratiæ lumini apponunt remove, cæcitatem auferre & eorum oculos qui hos claudunt, & à sole iustitiæ avertunt, aperire, & ad se convertere: Deus verò voluntariè agens secundum ordinem suæ sapientie, ac nemini quidquam debens, in aliis hoc facit ex misericordiâ, in aliis non facit ex iustitiâ, & in quantum hoc in aliquibus suo iudicio non facit, dicitur hoc modo causa eorum excacationis & obdurationis. Ex quo patet, quàm longè à S. Thomæ doctrinâ aberrant qui ex hac solis comparatione, & ex hac sententiâ quâ Deus dicitur,

quantum in se est, paratus esse omnibus gratiam dare, omnibus hominibus sub peccato consideratis gratiam actualem ad removendum impedimentum, ad faciendam mentis excacationem, & ad auferendam cordis obdurationem, à Deo intus semper immitti concludunt: hæc sunt S. Thomæ verba 1. 2. q. 79. art. 3. in c.

*Respondeo dicendum, quod excacatio & obduratio duo important, quorum unum est motus animi humani inherens malo & averti à divino lumine: & quantum ad hoc Deus non est causa excacationis & obdurationis, sicut non est causa peccati. Aliud autem est subtractio gratiæ, ex quâ sequitur, quod mens divinitus non illuminatur ad rectè videndum, & cor hominis non emolliatur ad rectè vivendum: & quantum ad hoc Deus est causa excacationis & obdurationis. Est autem considerandum, quod Deus est causa universalis illuminationis animorum, secundum illud Joannis: Erat lux verâ quæ illuminat omnem hominē venientem in hunc mundum; sicut sol est universalis causa illuminationis corporum; aliter tamen & aliter. Nam sol agit illuminando per necessitatem naturæ; Deus autem agit voluntariè per ordinem suæ sapientie: Sol autem licet, quantum est de se, omnia corpora illuminet, si quod tamen impedimentum inveniat in aliquo corpore, derelinquit illud tenebrosus, sicut patet de domo cujus fenestæ sunt clausæ: sed tamen illius obsecrationis nullo modo causa est sol: Non enim suo iudicio agit ut lumen interiùs non immittat, sed causa ejus est*



est solum ille qui claudit fenestram: Deus autem proprio iudicio lumen gratia non immittit illis in quibus obstaculum invenit. Unde causa subtrahendi gratia est non solum ille qui ponit obstaculum gratia, sed

etiam Deus qui suo iudicio gratiam non apponit, & per hunc modum Deus est causa excitationis, & aggravationis aurium, & obdurationis cordis.

## A R T I C U L U S V.

*In quo exponitur illud testimonium, Deus non deficit ab agendo quod est necessarium ad salutem; & ostenditur, ex S. Thomæ circa id doctrina, gratiam sufficientem omnibus non dari.*

**P**ater Nicolai gratiam actua-  
lem interioriorem ad preparan-  
dum se necessariam nunquam  
deesse, hoc alio S. Thomæ testi-  
monio confirmat: Deus non defi-  
cit ab agendo quod est necessarium ad  
salutem. Hæc sunt Patris Nicolai  
verba 1. classe pag. 32.

Sit unus tamen vice omnium lo-  
cus, unum testimonium S. Thomæ,  
una quæ nulla insignior (et si com-  
pendiosa) expressio ex q. 49. 1. p.  
art. 2. ubi querit [An summum  
bonum, quod est Deus, sit causa ma-  
li?] Et eam sibi objectionem for-  
mans, quod in 2. phys. dicatur idem  
esse causa salutis navis & periculi  
ejus; adeoque cum Deus causa sit  
boni vel salutis, debeat quoque dam-  
nationis & mali causa esse. Respon-  
det ad 3. quod [submersio navis at-  
tribuitur nautæ ut causa, ex eo quod  
non agit quod requiritur ad salutem  
navis; sed Deus non deficit ab agen-  
do quod est necessarium ad salutem.]  
Sic pergit P. Nicolai.

Neque verò quisquam objiciat  
quod Cajetanus ibi addit, sic intelligi  
hoc debere, ut ab agendo quod est ne-  
cessarium ad salutem Deus non defi-

ciat, cum id agere debet: imò quod  
ipse S. Thomas 1. 2. q. 79. art. 1.  
eam ob causam probat inter ceteras;  
Deum peccati causam etiam indirecte  
dici non posse, nec debere: quia ta-  
men si [aliquibus non præbet auxilium  
ad evitandum peccata (quod si præ-  
beret non peccarent) hoc totum facit  
secundum ordinem sue sapientiæ &  
justitiæ, cum ipse sit sapientiæ &  
justitiæ: unde non imputatur ei quod  
alius peccet (sicut causa peccati) si-  
cut gubernator non dicitur causa sub-  
mersionis navis, ex hoc quod non  
gubernat navim, nisi quando sub-  
trahit gubernationem POTENS ET  
DEBENS gubernare.]

Rectissime profectò, & Cajetani  
in hunc S. Thomæ locum exposi-  
tio, & hoc alterum S. Thomæ  
testimonium adversus Patrem Ni-  
colai objiciuntur. Sic enim lo-  
quitur Cajetanus in resp. ad 3.  
Adverte quod tunc tantum absentia  
causa agentis dicitur causa defectus;  
quando DEBETUR presentia; &  
propterea, quia nunquam, cum rebus  
debetur, Deus subtrahit influxum,  
idcirco non sequitur propriè loquendo  
quod Deus sit causa defectuum, ex  
hoc

hoc solo quod non facit, quamvis quandoque Scriptura ipsum tali modo causum appellet, ut patet circa inductionem Pharaonis.

Rectè etiam hoc aliud testimonium adversus Patrem Nicolai obijcitur, ubi S. Thomas docet, Deum aliquibus non præbere auxilium ad evitandum peccatum, quod si præberet non peccarent, &c.

Hinc enim sequitur horum S. Thomæ verborum, *Deus non deficit ab agendo quod est necessarium ad salutem*, alium non esse sensum quàm istum, Deus non deficit, hoc est, semper agit quando debet. Si enim aliquid non debet, id non tribuendo seu denegando non deficit; sicut, ut ipse docet, submersio navis non attribuitur nautæ ut causæ, ex hoc quod non gubernat navim, nisi quando substat gubernationem potens & DEBENS gubernare. Quare Deus auxilium necessarium non præbendo nunquam deficit, quia illud, quoties denegat, nunquam debet. Ergo ut P. Nicolai aliquid ex hoc loco pro gratiâ omnibus communi concluderet, probandum illi esset ex S. Thoma, quod Deus hoc in statu debet omnibus auxilium quod est necessarium ad evitandum peccatum, & quod omnibus dat ac debet gratiam ad impedimentum gratiæ non ponendum. Hoc autem à S. Thomæ doctrinâ ita alienum est, ut in loco citato ex 1. 2. doceat Deum secundum ordinem suæ sapientiæ & justitiæ non præbere aliquibus auxilium ad evitandum peccatum, quod si præberet non pec-

carent: illud idem, gratiam scilicet ad præparandum se, & ad impedimentum non ponendum necessariam, aliquibus justè non conferri, tam expressè docet in his quæ antea ex libro 3. contra gentes & in 12. ad Hebr. retulimus, ut ista ab iis quibus sinceritatis aliquid inest, non legi necesse sit, qui S. Thomæ auctoritate gratiæ actualis interioris omnibus communis, & ad peccati imputationem necessariæ doctrinam propugnant. Hoc ita certum est, ut id diffiteri non possit P. Nicolai, cum objectioni à seipso propositæ respondet. Hæc ejus verba sunt.

*Nemo id (inquam) obijciat, quasi ex eo sit consequens Deum interdum sponte ab hoc agendo deficere quod est necessarium ad salutem, quia nemini quidquam debet. Nam etsi Deus non debet nobis quod ab illo juramur, debet sibi nihilominus quod nos jurat: quia pertinet ad illius providentiam ut nos juret, nisi culpa nostra sit quod non juret aut quod jurare cesset, ut postea plenius ostendetur. Et hoc ipsum præ se feri Cajetanus. Cur enim ait, Cum id agere debet, si non utique aliquando sic debet, quando nihil nostrum est, quod eum justè ab hoc agendo impediat?*

*Sed expressius multò id S. Thomæ verba præ se ferunt. Cur enim ait quod cum Deus non præbet auxilium ad vitanda peccata, hoc totum fuit secundum ordinem suæ sapientiæ & justitiæ: nisi quia ob culpam tantum nostram id præbere omittit ut in peccatam? Non quia sic sponte vult, aut sic sponte deficit ab agendo quod est*  
necesse

*neceſſarium ad ſalutem. Hoc nimirum eſt quod ad 1. ibid. addit [ eum in malum inclinare hominum voluntates, in quantum non prohibet: ſed hoc tamen etiam contingere ex merito præcedentis peccati. ]* Ubi ergo peccatum non præcedit (qualecumque tandem ſit) numquid intelligitur id præbere quo quis deinceps prohibeatur à peccando? Numquid ſibi debere ut præbeat? Numquid non deficere à præbendo, quamdū homo ab officio non deficit; & juſto deſit, niſi & ei juſtus antecederet deſuerit; aut Petro deſuiſſe dicatur, niſi quia deſuit ei Petrus? Aut deſecerit ab agendo quod erat Petro neceſſarium ad ſalutem, niſi quia in eo deſecit Petrus quod erat ſibi neceſſarium ad cautelam? Aut velit & intendat aliud S. Thomas quaſi Arnaldo ſuffragetur.

P. Nicolai tria hic inſinuat quibus Suffragium ejus Cenſorium omni ex parte deſtruitur. 1. Calumniam Arnaldo impingit, quæ præcipuum illius Suffragii fundamentum eſt. 2. Gratiam ſufficientem omnibus communem, quam eodem Suffragio aſtruere aggreditur, à S. Thomâ negatam fuiſſe oſtendit. 3. Demum Arnaldi propoſitionem quam hæreſeos damnat, S. Thomæ probari, & ab omni Cenſura immunem eſſe docet.

1. Arnaldo Calumniam impingit, cum oſtendit Deum juxta S. Thomam ultro ac ſponte nunquam ulli deeſſe, & hoc præcipue fundamento Arnaldi propoſitionem, tanquam S. Thomæ omnino contrariam, hæreſeos damnat; quaſi Arnaldus un-

quam dixerit, Deum ſponte ac ultro aliquibus deeſſe. Id nec Arnaldus unquam dixit, nec quiſquam alius S. Auguſtini Diſcipulus: cum Sanctis Patribus & S. Thomâ conſtanter tenent, quod homines gratiâ non adjuventur, in iſtis cauſam ſemper eſſe, non in Deo.

2. Gratiâ ſufficientem omnibus communem à S. Thomâ negatam fuiſſe, oſtendit P. Nicolai: ſi quidem, ut ipſe loquitur, juxta S. Thomam, ubi eſt aliquod peccatum præcedens, Deus juſtè negat auxilium ad vitandum peccatum & impedimentum gratiæ non ponendum neceſſarium: ac proinde peccatum juſtè tunc imputatur, etſi gratia interior ad illud vitandum neceſſaria deſit. Fateatur ergo P. Nicolai juxta S. Thomæ doctrinam, omnibus hominibus libero arbitrio utentibus gratiâ actualem interiorem ſufficientem ad vitandum peccatum, ad præparandum ſe, & ad impedimentum gratiæ non ponendum neceſſariam, non ſemper dari, eam aliquibus ex peccati præcedentis merito juſtè denegari, quibus tamen, & præcepti non impleti culpa, & negligncia præparandi ſe, imputatur. Fateatur de ſolis juſtis revocari poſſe in controverſiam, an juxta S. Thomam gratia actualis ſufficiens ſemper illis detur: de quo mox agemus.

Denique P. Nicolai Arnaldi propoſitionem quam hæreſeos damnat, S. Thomæ probari, & ab omni Cenſurâ immunem eſſe docet. Nam inſinuat, ubi peccatum præ-

*præcedit, qualecumque tandem sit, hoc est, seu mortale, seu veniale, rectè intelligi Deum id non præbere quo quis deinceps prohibetur à peccato: postquam Petrus in eo defecit ab agendo quod erat sibi necessarium ad cautelam, rectè dici posse quodd Deus Petro defuit in eo quod necessarium illi erat ad tentationem vincendam. Hoc idem primâ sui Suffragii parte n. 7. his verbis expressit. Quod enim Chrysostomus Petrum nullo fructum auxilio astruit ne caderet, ad hoc momentum spectat quo negavit, quia illo se privaverat cum præsumpsit. Atqui id solùm dixit Arnaldus, defuisse Petro in tentatione gratiam ad eam vincendam necessariam, seu sine quâ illam vincere non potuit: concedit verò gratiam illi defuisse peccati præcedentis, quod veniale solùm fuit, merito; concedit Petrum de suis viribus nimium præsumendo defecisse ab agendo quod erat sibi necessarium ad cautelam, & idè Deum illi postea defuisse in eo quod erat illi necessarium ad tentationem vincendam. Ergo Patris Nicolai judicio S. Thomas, qui aliud non vult nec intendit, Arnaldo suffragatur: atque ira damnatâ per Patrem Nicolai Arnaldi propositione, S. Thomæ doctrina hæreseos, impietatis & blasphemix damnatur; seu potius probatâ per Patrem Nicolai S. Thomæ doctrinâ, Arnaldi propositio ab omni Censurâ immunis declaratur.*

Verùm cum constet, annuente Patre Nicolai, Deum peccati ve-

nialis merito posse justo non præbere auxilium, quo prohibeatur à peccando, objiciet justo adfuisse auxilium saltem ad peccatum veniale vitandum, cujus merito postea gratiâ destituitur, adeoque adfuisse Petro gratiam ad non præsumendum, ad sibi cavendum, & ad humiliter orandum. Sed quid ad Arnaldi propositionem, quâ nihil aliud asseritur, quàm gratiam Petro justo ad tentationem vincendam necessariam defuisse; an verò habuerit, necne, gratiam ad vincendum præcedens præsumptionis peccatum, cujus merito postea desertus est, nullo modo attingit. Tamen Patris Nicolai quæstioni satisfacere non detrecto; sed videar ille ne eam scrutando profundius, ad damnamdam gratiæ per se efficacis ad singulos pios actus necessitatem, vel ad absolvendam Arnaldi propositionem compellatur.

Quæro enim à Patre Nicolai, An istud auxilium actuale sufficiens, quod contendit Petro justo adfuisse, saltem ad cavendum sibi, ad non præsumendum, & ad gratiam in tentatione, humilitatis & orationis merito consequendam, tale sit ut illud quod est ex se efficax ac prædeterminans ad hoc non requiratur, ac sit in liberi arbitrii nutu, sine ope gratiæ prædeterminantis hoc auxilio sufficiente uti, gratiæ impedimentum non ponere, & præparare se ad gratiam efficacem in tentatione consequendam? Si respondeat illud auxilium non esse necessarium: ergo Molinianæ gra-

tiæ adhæret, & gratiæ prædeterminantis ad singulos actus necessitati, adversus omnem suam scholam, renuntiat. Si respondeat illud esse necessarium, quæro ab illo, cujus actualis peccati merito hoc auxilium Petro ad non præsumendum denegatum fuerit, ubi nullum præcedere supponitur? Nos verò quam ob causam auxilium efficax aliquibus justis aliquando denegetur, quinta Sectione plenissimè exponemus.

Præterea si peccati venialis merito, Deus aliquibus justis gratiam in gravi tentatione necessariam justè denegare possit, ut ipse fateri cogitur, cum, juxta Tridentini Concilii doctrinam, nulli justo, si Beata Virgo excipiat, tanta gratia conferatur, ut abique omni peccato vivat, & justis omnes quotidie necesse habeant veniam pro innumerabilibus peccatis & offensionibus & negligentis suis à Deo postulare, ut Sacerdotes in altaris Sacramento profitentur, agnoscendum est nullum esse justum qui quotidie à Deo pro alicujus peccati actualis merito justo Dei judicio deserti non possit.

Ergo admissa gratiæ per se efficaciæ ad singulos pios actus necessitate, tota controversia secundum Patrem Nicolai in hoc tandem recidet; An Auxilium actuale sufficiens, seu excitans, præter quod aliud ex se efficax ad quemlibet pietatis actum, etiam imperfectum exercendum necessarium est, justis semper detur

in omni peccati venialis occasione, hoc est, An nullus justus nullum unquam peccatum veniale admiserit ac admittat subreptionis, inadvertentiæ, teporis, præsumptionis, negligentis, commissionis, omissionis, ex ignorantia, ex infirmitate, ex habitu vitioso per actus præcedentes comparato, nec per habitualement gratiam sublato, circa voluptates, honores, divitias, in somni, potus, vel cibi excessu, in cogitatione, verbo & opere, quin actualiter motu aliquo divinitus immisso de hoc peccato non admittendo cogitaverit; quin & voluntas se, ut ab illo abstineret, divinam inspiratione moram & excitatam senserit? Nam secundum & Molinistas & Thomistas gratia actualis sufficiens consistit in pia cogitatione intellectus & pia inspiratione voluntatis, quæ semper percipitur ab habente, ut ostendit Bellarminus; scilicet id non agnoscere impium erit & hæreticum, totaque tam detestanda hæresis, impietas, ac blasphemia, in Antonii Arnaldi propositione deprehensa, in hoc consistet, quod Arnaldus judicatus fuerit non credere quod omnes justis in omni actu cujuscunque peccati venialis, sæpe in se divinam aliquam ejus non admittendi cogitationem & inspirationem sentiant. O doctrinam pestilentem! ô litem exitiosam! quæ ne longius serpat & plurius animos occupet, quorunque Doctores hanc sententiam tenere ausi fuerint, æquissimo Patris Nicolai

Nicolai & similium Cenforum judicio à Facultate Theologiæ Parisiensis prorsus repellendi, &

etiam à fidelium communione, si hoc in horum Cenforum arbitrio fuerit, merito rescandunt.

## ARTICULUS VI.

*In quo exponuntur tria S. Thomæ in Scripturam testimonia, & à perverso Patris Nicolai sensu vindicantur.*

**P**ater Nicolai tribus S. Thomæ in Scripturam testimoniis, suam de gratiâ sufficiente, fidelibus omnibus communi, sententiam confirmat.

Quid expressius, inquit 1. classe pag. 31. quàm quod in illud 1. ad Cor. 1. [Fidelis Deus per quem vocati estis in societatem Filii ejus, &c.] Inde infert omnibus ministrari à Deo que sunt necessaria, ut ad illam Societatem possint, si velint, pervenire. Sic enim post prædicta subiungit: [Non autem videretur fidelis esse, si nos vocaret in societatem Filii sui, & nobis denegaret (quantum in ipso est) ea per que pervenire ad eum possemus.] An diceret, quod (quantum in ipso est) ea vocatis non denegat, per que pervenire ad illum possint, nisi aliqui desint vocationi ejus, quia non prestant quod in ipsis est, cum ille præstet quod ex illius parte requiritur, seu quantum in ipso est necessaria subministrat?

Jam integrum S. Thomæ testimonium referamus, ut vel sola lectione pateat, quantum ab illius sensu P. Nicolai aberret.

Hæc sunt Apostoli verba 1. Cor. 1. Expectantibus revelationem Domini nostri Jesu Christi, qui & confirmabit vos usque in finem sine

crimine in die adventus Domini nostri Jesu Christi, fidelis Deus per quem vocati estis in societatem Filii ejus Domini nostri Jesu Christi. Ita S. Thomas in hæc verba: Secundo ostendit, quod hac expectatio non est vana ex auxilio divine gratiæ. Unde subdit: Qui (scilicet Christus, qui spem dedit vobis hujusmodi revelationis) etiam confirmabit vos in gratiâ accepta. 1. Petri ult. Modicum passus ipse perficiet, confirmabit, solidabitque, & hoc usque in finem, scilicet vita nostra. Matt. 10. Qui perseveraverit usque in finem, hic salvus erit. Et infra: Tertiò rationem suæ promissionis assignat dicens; quod Deus vos confirmabit, quod debetis sperare, quia Deus est fidelis. Deut. 32. Deus fidelis & absque ullâ iniquitate. Per quem vocati estis in societatem Filii ejus Jesu Christi Domini nostri, ut scilicet habeatis societatem ad Christum, & in presenti per similitudinem gratiæ, & in futuro per participationem gloriæ. Non autem videretur esse fidelis Deus, si nos vocaret ad societatem Filii, & nobis denegaret, quantum in ipso est, ea, per que pervenire ad eum possemus: unde Josue 1. dicit: Non te deferam, neque derelinquam.

Ex his verbis manifestum est

S. Thomam loqui cum Apostolo de sanctis secundum propositum ad gratiam & gloriam vocatis, seu *vocatis*, ut ipse ait, *in societatem filii in presenti per gratiam, & in futuro per gloriam, & à Christo usque in finem in gratiâ acceptâ*, seu sine crimine confirmandis. *Rationem*, inquit, *sue promissionis assignat dicens, quòd Deus vos CONFIRMABIT, quòd debetis sperare, quia Deus est fidelis*; loquitur de iis de quibus Josue 1. dicitur, *Non te deferam, neque derelinquam*, hoc est, quibus daturus est perseverantiam in gratiâ. Fidelis autem Deus iis qui sic vocati sunt, hoc est, electis non denegat, quantum in ipso est, ea per quæ pervenire ad eum possint; eos non deserit dando illis, non solum gratiam, sed etiam in gratia perseverantiam, quam alius non dat qui non sunt secundum propositum vocati. *Multis enim*, inquit 1. 2. q. 109. art. 10. *datur gratia, quibus non datur perseverare in gratiâ. Alius non est horum S. Thomæ verborum sensus, quæ si integra P. Nicolai retulisset, iis ad gratiam sufficientem omnibus fidelibus communem astruendam utinamquam ausus esset.*

Nec etiam P. Nicolai hoc aliud testimonium in cap. 10. 1. Cor. referre potuit, nisi dimidium exhibendo. Ibid. enim S. Thomas de perseverantia etiam loquitur. Hæc ejus verba sunt: *Deinde cum dicit, Fidelis Deus, ostendit paratum adjutorium in tentatione. Ubi commendat Deum adju-*

*tozem, quia aut nolis resistendi potentiam, quod notatur ibi, Sed faciet cum tentatione, &c. Perseverantiam, quod notatur ibi, Ut possitis sustinere. Verè fidelis Deus, qui dat potentiam ne vincamur, gratiam ut increamur, constantiam ut vincamus. Cum ergo S. Thomas de iis solum loquatur quibus Deus daturus est in tentatione victoriam, & in gratiâ perseverantiam, de quibus solum, ut monet Augustinus, Apostolus loquitur; frustra P. Nicolai hoc S. Thomæ testimonium ad gratiam sufficientem astruendam commemorat.*

Tertium testimonium sic refert, ut & Scripturæ ac S. Thomæ verba corrumperet, eisque sensum affingat, cujus fundamentum nullum esse comperiet, quisquis locum integrum legerit: sic loquitur P. Nicolai.

*Quid expressius quam quod in Isaia 1. 5. ad illa verba commentatur: Quid potui facere vinea mea & non feci? Cum scilicet præter alias interpretationes quæ ad locum præsentem non pertinent, id ad animam fidem refert cui justè à Deo exprobetur, quod cum ab eâ exspectaret vinas, fecit labruscas, id est, loco judicii & justitiæ fecit iniquitatem, non obstante quòd, quantum est ex parte suâ, nihil facere Deus omiserit, per quod ad justitiam & fructus bonos eam suis beneficiis prepararet, &c.*

1. Nec in Scriptura, nec in S. Thomæ in hunc locum commentario ita legitur: *Quid potui facere vinea mea & non feci?* Sed ita,



ait, *Quid est quod debui ultra facere vineæ meæ, & non feci ei? An quod exspectavi ut faceret vinas; & fecit labruscas?*

2. S. Thomas toto hoc in istud caput commentario, gratiæ interioris nullomodo meminit, sed solum loquitur de variis Dei in Judæum populum beneficiis per diligentiam cultus vineæ figuratis, quibus eos ad sui cultum provocaret, quæ ad tria præsertim revocat, ad bonitatem terræ Judæis datæ, ad custodiam Angelorum & bonorum virorum, & ad regiam dignitatem.

3. S. Thomas id omne de Judæis exponit: *Hic arguit ergo*, inquit, *peccatum duarum Tribuum, quod committébant in abusu rerum, sub quâdam metaphorâ. Equidem exponens quotuplex vinea sit, dicit esse vineam fidelis animæ; sed hinc non sequitur, quod quidquid hoc capite dicitur, fideli animæ accommodari possit. Nam pariter dicit esse vineam cælestis patriæ, nec tamen beatis convenire possunt hæc omnia, nec de iis dici potest, Exspectavi ut faceret vinas, & fecit labruscas: imò nec fideli animæ, qualem eam describit, tribui ista possunt; quia dicit hujus vineæ vinum esse* 1. poenitentiam. 2. corporalem munditiam. 3. spiritalem lætiti-  
am. Ergo fidelem animam & justè viventem intelligit, de quâ dici non potest, *Exspectavi ut faceret vinas, fecit autem labruscas.*

Hic ergo S. Thomas occasione hujus verbi, *vineæ*, varias vineas refert. Nota (inquit super illo verbo, *Vinea facta est dilectio*) quod est *vinea multiplex* 1. *carnalis concupiscentia*. 2. *est vinea fidelis animæ*. 3. *est vinea militantis Ecclesiæ*. 4. *est vinea cælestis Patriæ*.

4. Denique et si S. Thomas hæc verba, *Quid delui facere*, ad animam fidelem transferret, quid aliud sequeretur, quàm Deum erga fideles & justos semper facere quod illis debet? Sed an S. Thomas hîc vel alibi dicit, quod Deus justis omnibus semper gratiam debeat ad bonos fructus semper faciendos? Minimè verò. Quoties ergo eam aliquibus justis non dat, eam non debet; & quoties eam dat, gratis dat, & sine debito. *Quomodo enim est gratia (ut ait S. Augustinus De gratiâ Christi cap. 23.) si non gratis datur? Quomodo est gratia si ex debito redditur? Ubi loquitur de gratiâ quæ necessaria est, non solum arbori malæ ut bona fiat, sed etiam arbori bonæ ut bonos fructus faciat. Nec tantum (inquit c. 19.) ut arbor sit bona, sed etiam ut faciat fructus bonos, eandem gratiâ necessarium est ut adjuvetur, sine quâ boni aliquid facere non potest. Ipse quippe in bonis arboribus cooperatur fructum, qui & forinsecus rigat atque excolit per quemlibet ministrum, & per se dat intrinsicè incrementum.*

## ARTICULUS VII.

*In quo exponitur hoc testimonium: Lex nova, quantum est de se, sufficiens auxilium dat ad non peccandum; ac satisfat argumentis omnibus, quibus P. Nicolai probare nititur his verbis auxilium actuale, non verò habituale designari.*

**P**ater Nicolai in 2. classe auctoritatum hoc solum testimonium objicit ex 1. 2. q. 106. art. 2. ad 2. *Lex nova quantum est de se, &c.*

*Etsi, inquit, jam satis porro ex ante dictis compertum est, quàm sufficiens ad peccata vitanda prebeat homini auxilium ex parte Dei, nec justo sultem denegetur per quod in justitiâ stare possit, eò ampliùs tamen & apertius id patebit ex eo loco, ubi expresse ipsum nomen sufficientis auxilii prefato sensu S. Thomas usurpat. Expendamus. En quod loquitur S. Thomas 1. 2. q. 106. art. 2. ad 2. [Gratia novi Testamenti etsi adjuvet hominem ad non peccandum, non tamen ità confirmat in bono, ut peccare non possit: & ideo si quis post acceptam gratiam novi Testamenti peccaverit, majori pœnâ est dignus tanquam majoribus beneficiis ingratus, & auxilio sibi dato non utens: nec tamen propter hoc dicitur quod lex nova iram operatur: quia, quantum est de se, sufficiens auxilium dat ad non peccandum.] Vili oculi qui non vident gratiam quandam sufficientem iis datam qui peccant?*

Hoc vident omnium oculi; sed ubi oculi qui vident hanc gratiam sufficientem actualem esse, de quâ sola quæstio est? Vident legentium & intelligentium

omnium oculi, his verbis auxilium gratiæ habitualis & justificantis designari, sicut ex toto articulo tam luculenter ostendit Arnaldus in suo Scripto de doctrinâ S. Thomæ art. 4. ut id probare supervacaneum sit, sed solum Patris Nicolai conjecturæ omnes diluendæ sint.

*Verum, inquit Pater Nicolai, S. Thomas gratiam habitualement auxilii nomine appellare non solet, sed potius intelligere actualem. Fatcor frequentius apud S. Thomam auxilii nomine gratiam actualem designari; sed satis etiam communiter, sicut ipse fatetur Nicolai, auxilii nomen habituali S. Thomas tribuit, ut hoc loco habitualement intelligere censeatur, nullumque ex auxilii appellatione adversum nos argumentum peti possit: scilicet apud S. Thomam auxilium est velut generale nomen, quod & gratiæ habituali quâ sanamur, & actuali quâ movemur tribuitur, ut patet 1. 2. q. 109. art. 9. Respondeo dicendum quod, sicut supra dictum est, homo ad rectè vivendum dupliciter auxilio Dei indiget, uno modo quantum ad aliquod habituale donum, per quod natura humana corrupta sanatur, & etiam sanata eleveitur ad operanda opera meritoria vite æternæ, quæ excedunt proportionem na-*

*tura* : alio modo indiget homo auxilio gratiæ, ut à Deo moveatur ad agendum. Quantum igitur ad primum auxilii modum, homo in gratiâ existens non indiget auxilio gratiæ, quasi alio habitu infuso; indiget tamen auxilio gratiæ secundum alium modum, ut scilicet à Deo moveatur ad rectè agendum. Ita & art. 3. gratiam habituales designat nomine auxilii naturam sanantis. Et art. 4. ad 3. nomine auxilii gratiæ. Sic l. 3. cont. gent. c. 150. dicit quod divinum auxilium convenienter gratia nomen accepit, tum quia gratiâ datur, tum quia habentem Deo gratum & dilectum facit.

Præterea, inquit P. Nicolai, nisi etiam adsit actualis ad voluntatem adjuvanda, habitualis non sufficit ad hunc effectum ex se solâ: apud S. Thomam auxilium habituale non sufficit, præter quàm quòd ad potentiam informandam, non ad actum reipsa exsequendum.

Ex quo concludit quod S. Thomas per auxilium sufficiens ad non peccandum, non intelligit solum habituales gratiam, sed etiam actuale.

Sed quòd tendit argumentum istud, nisi ad gratiam Molinæ astruendam, & ad auxilii ex se efficacis ad singulos pios actus necessitatem evertendam? Siquidem juxta Patrem Nicolai, S. Thomas per auxilium sufficiens ad non peccandum, illud intelligit præter quòd aliud non requiritur ad actum reipsa exsequendum, quale est actuale; S. Thomas autem non loquitur de actua-

li quòd sit efficax, quia loquitur de eo quòd datur iis qui peccant: ergo loquitur de actuali quòd est solum sufficiens: atqui auxilium actuale sufficiens præter quòd aliud non requiritur ad actum reipsa exsequendum, est auxilium Molinianum, libero arbitrio subiectum, & quòd alterius auxilii ex seipso efficacis ad piè agendum necessitatem excludit: ergo hoc Patris Nicolai argumento gratia Molinæ astringitur, prædeterminantisque auxilii necessitas evertitur.

Non respondebit, puto, P. Nicolai, Non excludo necessitatem gratiæ efficacis, etsi loquar de actuali sufficiens; quia loquor solum de actuali quæ dat posse, qualis est sufficiens, non verò de actuali quæ dat operari, qualis est efficax. Exponat enim quòd fieri possit, ut aliquod auxilium actuale ex se solo sufficiat ad actum reipsa exsequendum & tamen aliud auxilium actuale requiratur ad actum reipsa exsequendum. Præterea si juxta Patrem Nicolai auxilium actuale sufficiens rectè nuncupatur sufficiens quia dat posse, etsi ad actu velle & operari ex se solo non sufficiat, sed aliud præterea requiratur, quare similiter gratia habitualis non rectè vocabitur sufficiens, quia dat posse, ac potentiam informat, etsi ad actu velle & operari ex se solâ non sufficiat, sed alia præterea requiratur? Itaque vel Patris Nicolai argumentatio penitus inanis est, vel tendit ad Molinæ gratiam ab universâ Thomistarum Scholâ

Semipelagianismi damnatam, S. Thomæ auctoritate astruendam.

Subjungit P. Nicolai: *Nec interest aut quidquam juvat justificandi verbum quod in titulo præfigitur, cum inquiritur utrum lex nova vivificet, ut ad gratiam habitualement, per quam reddimur justi, sequentium omnium scopus & sensus referatur, sicut prædicti explicatores urgent. Non intelligunt vulgari usu sensum duplicem pati posse, vel effectivum nempe, vel formalem, nec eatenus tantum dici justificare legem novam, quod gratiam habitualement contineat quæ hominibus infundatur, ut justos reddat, sed quod præbeat actualem qua justitiæ infusionem causet, &c.*

Imò verò maximè interest, & multum juvat justificandi verbum quod in titulo præfigitur. Multum etiam juvat quod & hoc & præcedenti articulo per gratiam, quam dicit per legem novam dari, aliam quam habitualement non designat. *Principaliter*, inquit articulo præcedente, *lex nova est ipsa gratia Spiritus sancti, quæ datur Christi fidelibus per fidem Christi*: at quænam hæc est nisi habitualis? Et de hac eadem gratiâ paulò post: *Habet*, inquit, *lex nova quadam sicut dispositiva ad gratiam Spiritus sancti* (scilicet habitualement) & *ad usum hujus gratiæ pertinentia*. En de cujus gratiæ usu loquitur, & hoc articulo vocatur, *gratia Spiritus sancti interius data, gratia fidei faciens*, *lex in corde scripta*, quæ habitualement gratiam denotant. Ad gratiam ergo habitualement sequen-

tium omnium scopum & sensum referri prædicti explicatores rectissimè urgent. Satis verò intelligunt justificandi verbum sensum duplicem pati posse, vel effectivum nempe, vel formalem, sed pernegant hoc loco alium pati posse quam formalem. Legat P. Nicolai Conradum Koëllin in hunc articulum. Illius enim testimonium repudiare non potest, cum hunc postea classe 4. n. 6. nobis ianto fastu objiciat. *Nota etiam* (inquit interpres ille) *quod nova lex modo dicto justificat, scilicet ratione principalis, non effectivè, sed formaliter: Deus autem principaliter effectivè justificat, & Sacramenta nova legis instrumentaliter effectivè, dispositivè*. Antea verò dixerat, *Et intelligitur ista conclusio de justificatione pro adoptione HABITUS justitiæ apud Deum: quia cum gratiâ gratum faciente infunduntur omnes virtutes, etiam justitiæ propriè dictæ*.

Multum etiam juvat verbum, *UTENDI: Auxilio*, inquit, *sibi dato non utens*. Nam apud S. Thomam habitibus propriè utimur. Definitur enim habitus 1. 2. q. 78. art. 2. *Quo quis utitur cum voluerit*. Ibid. *Uti habitu non est necessarium, sed subjacet voluntati habentis*. Gratiâ autem actuali propriè non utimur: uti enim est applicare; at gratiam actualem non applicamus, sed potius ipsa nos ad agendum applicat; & idè vulgò dicitur in Scholâ Thomistarum, quod gratia actualis non subjacet voluntati quoad usum, ut Alvares docet disp. 87. *Non utitur*,

utitur, inquit, voluntas auxilio (scilicet actuali) propriè loquendo, cum non applicet aut determinet illud ad operandum. Ergo S. Thomas gratiam habitualement, quâ propriè utimur, designat; non verò actualement, quâ propriè non utimur. Sic articulo præcedenti de gratiâ habituali loquens dixit, *Legem novam habere multa ad usum hujus gratiæ pertinentia*. De gratiæ usu plura dicemus Sect. 4. art. 9.

Auxilium autem habituale sufficiens dicitur ad non peccandum vel quantum ad sufficientiam operative virtutis, ut loquitur S. Thomas 1. 2. q. 109. art. 2. & ut exponit Conradus Koëllin in art. 9. qui est de justis. *Gratia gratum faciens*, inquit, est principium operandi opera gratuita habitualia per modum actus primi sufficiens. Ibidem. *Homo primò indiget ipsâ gratiâ habituali, quæ faciat eum potentem ad operandum meritoriè, quæ est actus primus constituens hominem in potentiâ activâ sufficienti ad operandum meritoriè*. Quia autem supra art. 1. dictum est quòd quantumcumque res habeat principium operandi sufficiens, indigeat auxilio & motione divinâ, idèd habitâ gratiâ, adhuc opus est motione Dei, & ut patebit speciali, actuali scilicet. Quamquam verò auctor ille doceat per gratiam habitualement esse principium sufficiens in actu primo operandi bonum; tamen ibidem asserit, juxta S. Thomam, justum sine motione, seu auxilio actuali, non posse operari bonum & vitare peccatum; quia scilicet isto auxilio ad bonum operandum

indiget. *Arguitur ergo sic*, inquit: *Ex illâ ratione nulla res creata potest in quemcumque actum prodire, nisi virtute motionis divinæ: ergo habens gratiam non potest operari bonum & vitare peccatum absque auxilio, quod est motio divinæ*. Et infra: *Dico enim quod gratia datur ut sanet mentem hominis, & ut habeat principium & formam operativam meritoriè: sed non potest semper operari meritoriè, nec in gratiâ permanere, nisi per auxilium divinum*.

Vel auxilium habituale sufficiens dicitur secundum quid, seu in genere suo, in genere scilicet gratiæ habitualis, ut ait Silvius mox citandus, quia ut docet S. Thomas 1. 2. q. 109. art. 9. *Homo in gratiâ existens non indiget alio auxilio gratiæ, quasi aliquo alio habitu infuso*. In quantum autem aliquid sufficiens ad agendum sumitur pro eo præter quod aliud ad agendum non requiritur, seu quod complectitur omnia ad agendum necessaria, hoc sensu juxta S. Thomam gratia habitualis non est sufficiens, seu non sufficit ad rectè agendum: quia homo in gratiâ existens indiget auxilio gratiæ secundum alium modum, ut scilicet à Deo moveatur ad rectè agendum. Hoc ipsum expressè dicit 1. 3. contra gentes c. 155. *Sciendum tamen est*, inquit, *quòd cum ille qui gratiam habet, peccat à Deo ut perseveret in bono, sicut liberum arbitrium non sufficit ad istum effectum, qui est perseverare in bono, sine exteriori Dei auxilio, ita nec ad hoc sufficit aliquis habitus nobis infusus*; sic 1. p. q. 83. art. 1.

ad 2. dicit liberum arbitrium non esse sufficiens, nisi moveatur, hoc est, non habere quod requiritur ut benè velit & currat, nisi à Deo moveatur & adjuvetur. *Ad secundum dicendum*, inquit, quod verbum illud Apostoli (scilicet, *Non est volentis neque currentis*) non est sic intelligendum, quasi homo non velit & non currat libero arbitrio; sed quia liberum arbitrium ad hoc non est sufficiens, nisi moveatur & adjuvetur à Deo. De his plura dicemus. Sect. 4. art. 1. ubi exponemus quæ sit propria apud S. Thomam hujus vocis (sufficiens, & gratia sufficiens) significatio.

Nec ista quam tradimus hujus S. Thomæ testimonii de gratia habituali expositio nova est: hanc ipsam inter veteres Thomistas probat Conradus Koëllin, ut antea ostensum est, inter recentiores verò eruditissimus S. Thomæ interpretes Silvius in hunc articulum eam multis argumentis urget, & confirmat in 1. 2. q. 106. art. 2.

*Pro solutione secundi argumenti*, inquit, dicendum est, quod etiam si majori penâ dignus sit qui post acceptam gratiam novi Testamenti peccat, tanquam maioribus beneficiis ingratus, & auxilio sibi dato non utens, non idcirco lex nova vel iram operatur, vel prævaricationem addis: quia lex nova, quantum est de se, dat auxilium sufficiens ad non peccandum.

Ex his porro verbis, *Auxilio sibi dato non utens*, non sequitur S. Thomam agnoscere auxilium absolute & simpliciter sufficiens, quod non sit

efficax. *Auxilium enim quo non utitur is qui post acceptam gratiam novi Testamenti peccat, non est simpliciter & absolute sufficiens ad non peccandum*, ita ut præter illud nihil aliud ex parte Dei requiratur, sed est tantum sufficiens secundum quid, seu in suo genere, in genere scilicet gratia habitualis. Est enim gratia & charitas quam hoc ipso quo Filius novi Testamenti constitutus est accipit, & quâ non utitur dum peccat.

Dices: B. Thomas absolute loquitur de divino auxilio, & lex nova etiam præbet auxilium actuale, illudque auxilii divini nomine B. Thomas & alii solent intelligere: ergo non oportet verba allegata, *Auxilio sibi dato non utens*, restringere ad habitus infusos. Respondeo negando consequentiam. Quamvis enim nomine auxilii frequenter intelligatur actuale, hoc tamen non est perpetuum, ut apparet ex q. 109. sequenti. art. 9. Deinde ratio restringendi est, quod B. Thomas doceat, ut jam dividimus, auxilium actuale, seu actualem Dei motionem esse efficacem.

Ex eo quod in eadem responsione ait, *Legem novam, quantum est de se, sufficiens auxilium dare ad non peccandum*; hinc sequitur sanctum Doctorem agnovisse quod lex nova, quantum est de se, seu de naturâ & conditione suâ, det suis filiis auxilium sufficiens; non tamen sequitur quod agnoverit dare auxilium sufficiens, quod non sit efficax ad effectum ad quem proximè confertur. Nam habitus infusi, quos omnibus filiis suis confert, sicut sufficientes, ita etiam efficaces sunt ad auxilium ejusque

que potentias exornandas & ad reddendas eas promptas ad bene operandum. Actuale etiam auxilium quod confert, efficax est ad movendam voluntatem in illud ad quod proxime datur, juxta id quod ex quest. 6. de potentiâ & ex hujus partis quest. 30. superius attulimus conformiter isti sententia S. Augustini de Predest. SS. c. 8. Gratia quæ oculi, &c.

Ergo, si quid vident eorum oculi, qui hoc S. Thomæ testimonium legunt, vident in eo per gratiam sufficientem non designari actuale, sed solum habituale. Qui verò hoc unum videri demonstrant, urgent instantque gratiam actualem sufficientem ab efficace distinctam sibi quovis in loco S. Thomæ quoad nomen ostendi: Illis etiam satis erit, si P. Nicolai auxilii actualis sufficientis nomen ostenderit. Nec enim, ut nugatur ille, de gratiæ vel auxilii nomine litigant. S. Thomæ de hoc nomine, & ejus significatione sententiam accuratè expendemus Sect. 4. art. 1.

Postquàm hanc primâ Sectione exposuimus omnia S. Thomæ te-

stimonia, in quibus dicit Deum, quantum in se est, omnibus gratiam dare, & ex his gratiam actualem omnibus hoc in statu, de quo solum inter nos agitur, communem astrui non posse, imò destrui ostendimus; jam sancti Thomæ doctrina circa Dei pro omnium salute voluntatem referenda esset, cum sanctus ille Doctor præsertim hanc Apostoli Sententiâ, *Deus vult omnes homines salvos fieri*, confirmet Deum, quantum in se est, omnibus gratiam dare. Sed cum P. Nicolai hoc argumento usus non fuerit, ac secundum argumenti genus ad gratiam sufficientem communem astruendam è possibilitate præceptorum repetat, idè ut simul & non interruptè quidquid de gratiâ sufficiente communi dixit refutemus, testimonia quæ ad possibilitatem præceptorum pertinent sequenti Sectione exponimus: cætera verò argumenta quæ specialiter non attigit, ex imputatione peccati, ex voluntate Dei & morte Christi peti solita, tertiâ Sectione tractabimus.

## SECTIO SECUNDA.

*In quâ ostenditur ex in qua S. Thomas de possibilitate præceptorum docet, gratiam sufficientem omnibus communem non solum non astrui, sed etiam rejici; ac testimonia à Patre Nicolai tertiâ Classe allata exponuntur.*

Pater Nicolai aliud argumenti genus ad gratiam sufficientem astruendam è possibilitate præceptorum repetit, Ut vel hoc

unum, inquit 3. classe pag. 35. quod S. Thomas tam frequenter inculcat circa observantiam præceptorum, ad gratia sufficientis convic-  
nem



nem sufficere possit; quia juxta S. Thomam præcepta sic sunt possibilia, ut nunquam hominibus desit gratia per quam illa observare possint, aut observandi vires impetrare, nec obligent si illa desit. Ego verò ad hujus argumenti confutationem sufficere posse contendo, quod antea ex S. Thomâ allatum est de gratiâ actuali sufficiente quibusdam ad præparandum se, aut impedimentum gratiæ removendum non datâ, qui tamen præcepto tenentur, & quibus illorum

transgressio ad culpam imputatur: quam doctrinam non solum non lædunt, sed confirmant, quæ S. Thomas de possibilitate præceptorum docuit. 1. Itaque ostendimus possibilitatem præceptorum nunquam à S. Thomâ per gratiam sufficientem expositam fuisse. Deinde testimoniis omnibus à Patre Nicolai laudatis satisfaciemus. Notandum est autem nos de præceptis divinis loqui, non quantum ad substantiam operis, sed quantum ad modum, seu finem præcepti, qui est charitas.

## ARTICULUS PRIMUS.

*In quo ostenditur S. Thomam ad possibilitatem præceptorum exponendam nunquam ad aliquam gratiam actualem sufficientem communem recurrere.*

**S**anctus Thomas sæpè de possibilitate præceptorum agit, sæpè objectiones ex præcepti servandi & peccati vitandi impossibilitate petitas proponit, nec unquam ad gratiam aliquam interioriorem sufficientem, iis omnibus qui præcepta transgrediuntur à Deo datam, recurrit, ut præcepta nulli esse impossibilia ostendar, nec aliter unquam possibilia esse docet, quàm quia cum divino auxilio servari possunt, quod quibusdam datur ex misericordiâ, & quibusdam ex justitiâ non datur.

I. 2. q. 109. art. 4. argumentum 2. sic proponit. *Præterea Hieronymus dicit in Expositione catholica fidei, illos esse maledicendos qui Deum præcepisse homini aliquod im-*

*possibile dicunt: sed impossibile est homini quod per seipsum implere non potest: ergo homo potest implere omnia præcepta legis per seipsum.* Sic responderet.

*Ad 2. dicendum, quòd illud quod possumus cum auxilio divino, non est nobis omninò impossibile, secundum illud Philosophi in 3. Ethicorum: Quæ per amicos possumus, aliquid nos possumus.*

Item 2. 2. q. 156. art. 2. 1. argumentum sic proponit. *Videtur quod incontinentia non sit peccatum, quia, ut Augustinus dicit in libro de libero arbitrio, nullus peccat in eo quod vitare non potest: Sed incontinentiam nullus potest ex seipso vitare, secundum illud Sapientia 8. Scio quòd non possum esse continens nisi Deus det: Ergo incontinentia*

non est peccatum. Sic respondet.

*Ad 1. ergo dicendum, quod homo potest vitare peccatum & facere bonum, non tamen sine divino auxilio, secundum illud Joannis 15. Sine me nihil potestis facere. Unde per hoc quod homo indiget divino auxilio ad hoc quod sit continens, non excluditur quin incontinentia sit peccatum; quia, ut dicitur in 3. Ethicorum, Quia per amicos possumus, aliquantulum per nos possumus.*

Sed P. Nicolai contendit consequi ex his verbis divinum auxilium nobis adesse, quo possumus. *An non autem, (inquit n. 2.) id illusorie dicat, si auxilium quoque divinum nobis deest? Sicut & illud quod in exemplum affert, aliquantulum nos id posse quod possumus per amicos, illusorie diceretur, si deessent nobis amici, vel ope sua indigentibus non adessent.*

Hæc est Patris Nicolai ratiocinatio, non S. Thomæ doctrina de quâ solum agitur. Ostendat ergo P. Nicolai quod juxta S. Thomam illusorie dicitur, impossibile nobis non esse quod cum auxilio divino possumus, nisi quoque divinum adsit auxilium. Ostendat quod S. Thomas unquam dixerit, idem impossibile nobis non esse, quia nunquam nobis deest divinum auxilium per quod possumus.

Hæc est Patris Nicolai à suis Molinistis accepta ratiocinatio, quâ gratiæ prædeterminantis necessitas evertitur. Nonne enim similiter inculcant illusorie dici, non esse nobis impossibile quod cum auxilio divino possumus, nisi

semper quoque nobis adsit auxilium tale, ut præter illud aliud non requiratur ad præceptum servandum, aut saltem ad orandum. Nam, ut ait Alphonsus le Moyné disp. 1. de gratia sufficienti art. 2. assert. 1. *Per gratiam sufficientem (quæ dat posse, & præter quam alia requiritur ad orandum & operandum) mandatum Dei non sit possibile.* Sic P. Nicolai suis ratiocinationibus Molinismum S. Thomæ affigit.

Quantum ad id quod dicit P. Nicolai, illusorie dici nos posse per amicos, si deessent nobis amici, vel ope sua indigentibus non adessent: in memoriam quæso revocet quod antea docuit, scilicet, juxta S. Thomam, Deum in penam peccati actualis præcedentis justè negare posse auxilium sufficiens & necessarium ad peccatum vitandum, sicut ostendimus Sect. 1. art. 5. Quæro enim utrum hæc in hypothesis Deus peccatori impossibilia præcipiat, cui auxilium necessarium & sufficiens in peccati penam denegat? Et num juxta S. Thomam dicendum non sit præceptum illi esse possibile, quia illud cum auxilio Divino implere potest, etsi Deus illi ope sua indigenti per auxilium suum in penam præcedentis peccati non adsit.

Sed discat P. Nicolai ex Silvio istam comparisonem non per omnia posse accommodari. Ita Silvius: *Illud ait hic B. Thomas ad 2. Quod possumus cum auxilio divino non est nobis omnino impossibile, secundum illud Philosophi in 3. Ethicorum,*

eorum: Quæ per amicos possumus, aliquid possumus. Ubi tamen observandum est istam comparationem non per omnia posse accommodari. Cum enim aliqua possumus per amicos, distinctè designari possunt quedam quæ sunt tantum in nostrâ potestate & non amici, possuntque à nobis sine ipso præstari, antequàm ipse nos adjuvet, ut ad amicum ire, vel ab eo velle adjuvari, ab eo petere auxilium; & interdum incipere opus nostrum, & uti auxilio quod ipse dedit: cum tamen, quantum ab ea qua per Deum agimus, vel possumus, nihil omnino sit nostrum & non Dei, dicente Apostolo: Quis te discernit? &c. Et infra gratiam sufficientem omnibus non dari docet; licet verum sit homines viatores semper posse divina mandata servare. Unde concludit quoddam secundum rei veritatem est impertinens ad salvandum quoddam homo possit divina mandata servare.

Atque ut ex ipsâ S. Thomæ doctrinâ confutentur Patris Nicolai commenta, hoc unum testimonium referendum est, quo expressè docet auxilium sine quo non possumus fidei & charitatis præcepta servare, aliquibus non dari, qui tamen præcepto tenentur, & quibus impossibile præceptum dici non potest; quia scilicet hoc possunt cum auxilio gratiæ, ut agnoscat P. Nicolai etiam de iis, quibus deest auxilium Dei, sine quo non possunt, dici juxta S. Thomam, quoddam præceptum illis impossibile non est; quia illud cum Dei auxilio servare possunt: & cum dicitur, nul-

lum teneri ad id quod non est in ejus potestate, & nullum peccare in eo quod vitare non potest; non esse hunc sensum; quoddam peccatum non sit, nisi adsit gratia sine qua non possumus; sed esse istum sensum, quoddam peccatum non sit, nisi exteriora omnia quæ requiruntur adsint, sicut auditus ad fidem, aded ut faciamus cum volumus, seu si volumus, & sic in arbitrio voluntatis facere vel non facere: En expressum hæc de re S. Thomæ testimonium.

2.2. q. 2. art. 5. 1. Argumentum sic proponit. Videtur quod non teneatur homo ad credendum aliquid explicitè. Nullus enim tenetur ad id quod non est in ejus potestate. Sed credere aliquid explicitè, non est in hominis potestate. Dicitur enim Rom. 10. Quomodo credent in illum quem non audierunt? Quomodo audient sine predicante? Quomodo autem predicabunt nisi mittantur? Sic respondet.

Ad 1. ergo dicendum, quod si in potestate hominis esse dicatur aliquid excluso auxilio gratiæ, SIC AD MULTA TENETUR HOMO, AD QUÆ NON POTEST SINE GRATIA PRÆPARANTE, sicut ad diligendum Deum & proximum, & similiter ad credendum articulos fidei: Sed tamen hoc potest cum auxilio gratiæ; quoddamque auxilium quibuscumque divinitus datur, misericorditer datur, QUIBUS AUTEM NON DATUR, EX JUSTITIA NON DATUR, IN PœNAM PRÆCEDENTIS AUT SALTEM ORIGINALIS PECCATI, ut AUGUSTINUS Dicit LIB. DE CORREPTIONE ET GRATIA. Ergo aliquibus in pœnam

poenam peccati non datur gratia sine quâ non possunt fidei ac dilectionis præcepta implere, quibus tamen hæc præcepta impossibilia non sunt.

Idem Sanctus 1. 2. q. 109. art. 6. 1. argumentum sic proponit. *Videtur quod homo possit seipsum ad gratiam preparare per seipsum absque exteriori auxilio gratie. Nihil enim imponitur homini quod sit ei impossibile, ut supra dictum est. Sed Zachar. 1. dicitur: Convertimini ad me, & ego convertar ad vos: nihil autem est aliud se ad gratiam preparare, quàm ad Deum converti. Ergo videtur quod homo per seipsum possit se ad gratiam preparare absque auxilio gratie.* Sic responder.

*Ad 1. ergo dicendum, quod conversio hominis ad Deum sit quidem per liberum arbitrium: & secundum hoc homini præcipitur quod se ad Deum convertat. Sed liberum arbitrium ad Deum converti non potest, nisi Deo ipsum ad se convergente, secundum illud Jer. 31. 18. Convertite me & convertar, quia tu Dominus Deus meus: & Thren. ult. Convertite nos Domine ad te & convertemur.*

Non recurrit ad gratiam aliquam sufficientem datam omnibus quibus præcipitur quod ad Deum se convertant, ut explicet quomodo præceptum se convertendi ad Deum, seu se præparandi ad gratiam, homini impossibile non sit: sed id præcipi a Deo dicit, quia conversio fit per liberum arbitrium, licet illud ad Deum actu converti non possit, nisi Deo ipsum ad se con-

vertente; quo significatur gratia Dei efficax; siquidem fieri non potest ut is ad Deum non convertatur; quem Deus ad se convertit, sicut ipsa Scripturæ verba declarant: *Convertite nos & convertemur.* Quare 1. p. q. 62. art. 2. ad 3. dicit quod hæc gratia per quam aliquis præparat se ad gratiam habendam est *operatio Dei ad se animam convertentis: quæ exigitur ad hoc ut aliquis se præparet; & sine hac efficaci gratia Dei ad se convertentis non solum homo non se præparat, sed nec se præparare potest, cum sine hac ad Deum converti non possit, & juxta S. Thomam præparare se ad gratiam sit ad Deum converti. Et idè, inquit hoc eod. art. 6. in c. quod homo convertatur ad Deum, hoc non potest esse nisi Deo ipsum convergente: hoc autem est præparare se ad gratiam, quasi ad Deum converti.*

Dicitur enim P. Nicolai, quod secundum S. Thomæ doctrinam gratia quæ exigitur, ut aliquis se ad gratiam præparet, & sine quâ se præparare non potest, omnibus datur quibus Deus præcipit quod se ad gratiam præparent? Verum omnibus præcipi ut se ad gratiam seu habendam seu servandam præparent non negabit. Atqui juxta S. Thomam gratia quæ exigitur ut quis se præparet, & sine quâ non potest se præparare, est Deus hominem ad se convertens, seu est operatio Dei ad se animam convertentis. Consequens ergo est, ut P. Nicolai dicat, quod in doctrinâ S. Tho-

me Deus omnes homines ad se semper convertit, quodque illi ad Deum semper convertuntur: quod quàm falsum absurdumque sit, per se satis patet.

Idem Sanctus 1. 2. ead. q. 109. art. 8. 1. argumentum sic proponit. *Videtur quòd homo sine gratiâ non possit peccare. Nullus enim peccat in eo quod vitare non potest, ut Augustinus dicit in lib. de dualus animabus & de libero arbitrio. Si ergo homo existens in peccato mortali non possit vitare peccatum, videtur quod peccando non peccat, quod est inconveniens. Sic responder.*

*Ad 1. ergo dicendum, quòd homo potest vitare actus singulos peccati, non tamen omnes, nisi per gratiam, ut dictum est; & tamen quia ex ejus defectu est, quòd homo se ad gratiam (scilicet habitualem) habendam non praparet, propter hoc à peccato non excusatur, quòd sine gratiâ peccatum vitare non potest.*

Non responder S. Thomas idèò hominem non excusari à peccato, quia semper habet gratiam sufficientem, quâ se potest

ad gratiam habendam prapare; sed quia ex ejus defectu est, quòd se non praparet. Quòd autem P. Nicolai secundum Moliniana principia comminiscitur, non fore hominis defectum, nisi gratiam habeat, satis superque confutatum est.

S. Thomas multis aliis in locis hoc idem sibi ex S. Augustino objicit: *Nullus peccat in eo quod vitare non potest; nec unquam per gratiam sufficientem, omnibus quì peccant datam, illud solvit & exponit, ut videre est 1. 2. q. 74. art. 3. 2. 2. q. 10. art. 1. 1. arg. 2. q. 148. art. 1. arg. 2. q. 158. art. 2. arg. 3. sed illud ita semper intelligit, ut nullus peccet, nisi in eo quod in potestate sic habet, ut cùm vult faciat vel non faciat: sicut qui non credit non peccat contra fidem, nisi audierit, peccat autem si audierit, etsi auxilium Dei sine quo credere non potest, non habeat, ut evidens est ex iis quæ docet 2. 2. q. 2. art. 5. arg. 1. & ad 1. & q. 10 art. 1. in c. & arg. 2.*

## A R T I C U L U S I I.

*In quo ostenditur, cur juxta S. Thomam nunquam dici debeat, præceptum esse impossibile; etsi gratia sufficiens omnibus semper non detur.*

*S. Thomæ cum S. Augustino, in explicandâ præceptorum possibilitate, concordia.*

**Q**uanquam autem juxta S. Thomam, auxilium sine quo homo præceptum credendi & Deum diligendi implere non potest, aliquibus non detur: inde

tamen non sequitur præceptum credendi vel diligendi Deum aliquibus esse impossibile. Vox enim illa, impossibile, absolute usurpata id ex S. Thomâ significat, quod

quod nullo modo facere possumus, nequidem alterius auxilio adjuti. Quare juxta S. Thomæ doctrinam impossibile dici nunquam debet, quod cum Dei auxilio facere possumus, ut semper respondet, sive illud auxilium nobis adsit, sive non adsit.

Egregius est in eam rem locus I. p. quæst. 62. art. 2. ad 2. *Difficile est quod transcendit potentiam: sed hoc contingit esse dupliciter. Uno modo, quia transcendit potentiam secundum suum naturalem ordinem: & tunc si ad hoc possit pervenire aliquo auxilio, dicitur difficile; si autem nullo modo, dicitur impossibile, sicut impossibile est hominem volare. Alio modo transcendit aliquid potentiam, non secundum ordinem naturalem potentie, sed propter aliquod impedimentum potentie adjunctum.... Converti autem ad beatitudinem ultimam, homini quidem est difficile, & quia est supra naturam, & quia habet impedimentum ex corruptione corporis & infectione peccati; sed Angelo est difficile propter hoc solum, quod est supernaturale.*

Sed juxta hanc S. Thomæ doctrinam quæret aliquis: sicut dicimus, simpliciter loquendo, esse impossibile cæcum videre, vel mortuum, resurgere, quanquam Dei auxilio & operatione fieri possit ut cæcus videat & mortuus resurgat, cur pari modo non dicemus simpliciter esse impossibile, aliquem præceptum fidei seu dilectionis implere, quanquam Dei auxilio & operatione fieri possit ut credat ac diligit?

Illud etiam S. Thomas rectissi-

mè exponit & illustrat. Docet enim ampliùs, licet simpliciter loquendo dici possit esse impossibile cæcum videre, simpliciter tamen dici non posse aliquod præceptum alicui esse impossibile: quia licet præceptum impleri non possit, nisi operatione divinâ; ad hoc tamen implendum cooperatur liberum hominis arbitrium, & ideo non dicitur esse impossibile simpliciter: sanandæ autem cæcitati & mortuo suscitando non cooperatur liberum arbitrium, seu natura inferior. Unde simpliciter loquendo impossibile est cæcum videre & mortuum resurgere, licet operatione divinâ id fieri possit. En expressum hâc de re S. Thomæ testimonium.

In quæst. disputatis q. 24. de veritate (quæ est de libero arbitrio) art. 11. §. argumentum sic proponit: *Sed dices, quod quamvis talis sit impænitabilis ex viribus propriis, potest tamen reduci ad pænitentiam ex munere divinæ gratiæ. Sed contrâ, quando aliquid est impossibile secundum causas inferiores, licet divinâ operatione fieri possit, dicimus simpliciter loquendo illud esse impossibile, sicut cæcum videre, vel mortuum resurgere. Si ergo ex viribus propriis aliquis non sit capax pænitentiae, simpliciter debet dici quod est obstinatus in malo, quamvis divinâ virtute possit reduci ad pænitentiam. Huic argumento sic respondet. Ad §. dicendum, quod quando natura inferior potest aliquid dispo-*  
*nere, vel qualitercumque operari, non dicitur impossibile simpliciter, quamvis non possit perfici nisi divinâ*

operatione ; sicut non dicimus esse impossibile simpliciter prolem in materno utero animâ rationali animari : & similiter quamvis liberatio à peccato fiat operatione divinâ ; quia tamen ad hoc liberum arbitrium cooperatur , non dicitur esse impossibile simpliciter.

Tota hæc S. Thomæ de possibilitate præceptorum doctrina , isto & præcedenti testimonio contenta , cum S. Augustino mirificè consonat , qui duobus modis similiter exponit ac docet præceptum non debere dici impossibile.

1. Quia illud cum divino auxilio implere possumus : Potest , inquit de nat. & grat. c. 67. peccatum careri , sed opitulante Deo , qui non potest falli. Et c. 43. Medicinâ poterit , quod vitio non potest. Et de perf. iussit. c. 3. Vitari potest peccatum , si natura vitiosa sanetur gratiâ Dei per Jesum Christum. Idem docet S. Thomas juxta doctrinam primo testimonio contentam.

2. S. Augustinus docet præceptum non debere dici impossibile , quia hoc est in potestate nostra quod cum volumus facimus. Verum est , inquit Retract. l. 1. c. 22. cunctis homines hoc posse , si velint. Et de prædest. SS. c. 6. Credere vel non credere , inquit , est in arbitrio voluntatis humane. Illud etiam S. Thomas docet juxta doctrinam 2. testimonio contentam , cum dicit præceptum non debere dici impossibile simpliciter , quia illi implendo cooperatur liberum arbitrium , quod idem est , ac quia illud facinus cum volumus , seu

quia illud facere vel non facere est in arbitrio voluntatis humane.

Sed juxta S. Augustinum , sicut & juxta S. Thomam , gratia requiritur ut velimus. Verum est , ait Augustinus , omnes homines hoc posse , si velint , id est , ab amore visibilium rerum & temporalium se ad ejus præcepta servanda convertere ; sed preparatur voluntas à Domino ( scilicet ut velint ) & tantum augetur munere charitatis , ut possint. Et de prædest. SS. c. 6. Non quia credere vel non credere non est in arbitrio voluntatis humane , sed in electis preparatur voluntas à Domino. Similiter S. Thomas 1. 2. q. 109. art. 8. ad 3. exponens illud Eccles. 15. Ante hominem vita & mors , bonum & malum , quod placerit dabitur illi ; Nunc etiam , inquit , quodcumque vult homo datur ei , sed hoc quod bonum velit , habet ex auxilio gratiæ. Sicut autem juxta S. Augustinum , ita & juxta S. Thomam , voluntas in omnibus per gratiam non præparatur. Multi , inquit S. Augustinus , audiunt verbum veritatis , alii credunt , alii contradicunt : volunt ergo isti credere , nolunt autem illi : sed cum aliis præparetur , aliis non præparetur voluntas à Domino , discernendum est utique , quid veniat de misericordiâ ejus , quid de iudicio.

Ita verò S. Thomas in 12. ad Heb. lect. 3. ubi pro eodem sumit præparare se ad gratiam , & non ponere obstaculum gratiæ. Dicendum est , inquit , quod hoc ipsum quod aliquis non ponit obstaculum ,



ex gratia procedit: quodd ergo à quibsdam removeretur istud obstaculum, hoc est ex misericordia Dei: quodd autem non removeretur, hoc est ex justitia ejus. Et 2. 2. q. 2. art. 5. ad 1. Sed hoc potest (credere scilicet & diligere) cum auxilio gratia, quodd quidem auxilium quibuscumque divinitus datur, misericorditer datur, quibus autem non datur, ex justitia non datur, in pœnam precedentis aut saltem originalis peccati, ut Augustinus dicit in lib. de corrept. & grat.

Ex quibus patet, quàm benè S. Augustinus divinæ gratiæ Doctor, & S. Thomas ejus discipulus ac scholæ Magister, inter se in exponendâ præceptorum possibilitate, sicut & in cæteris omnibus de gratia Christi capitibus conveniant. Frustrâ ergo P. Nicolai & alii Molinistæ in S. Thomæ, sicut & in S. Augustini Operibus gratiam sufficientem communem quærun, quibus possibilitatem

præceptorum astruxerint ac exposuerint. Eam verò eos invenisse quis putet, si nec semel tot libris, tot locis quibus Sancti hî Doctores de possibilitate præceptorum agunt, dictum invenerint, idèd præcepta non esse impossibilia, idèd peccata caveri posse, quia Deus omnibus gratiam actualem anteriorem semper dat, quâ præcepta implere & peccata cavere possint? Cùm tamen illud unum sit quodd Molinistæ semper respondent, quia omnibus gratiam sufficientem semper dari existimant. Illud nunquam hos Sanctos Doctores tenuisse, vel hoc argumentum certissimè évincitur, quia id ab illis nunquam responsum est; imò verò omnibus eam non dari sæpè assertum est. Jam expendamus singula S. Thomæ testimonia à P. Nicolai ad gratiam hanc sufficientem astringendam per possibilitatem præceptorum tertiâ Classe relata.

## A R T I C U L U S I I I.

*In quo omnia S. Thomæ testimonia à Patre Nicolai circa possibilitatem præceptorum 3. Classe relata exponuntur, & à perverso sensu illis per eum afficto vindicantur.*

**P**ater Nicolai 3. Classe n. 1. sic loquitur, ut ex possibilitate præceptorum gratiam sufficientem communem astruat.

*Quid aliud, scilicet Quodlibeto 2. art. 6. certissimè adstruit?* [Nullus tenetur, inquit, ad hoc quodd est supra vires suas, nisi per modum quo fit sibi (vel ei) possibile.] Atque inde concludit, quodd quia mysteria fi-

dei sunt supra potentiam hominis naturalem, & ex peculiari dono Dei provenit ut credantur: [tenetur homo credere secundum quodd adjuratur à Deo ad credendum.] Et eadem ratio debet esse de præceptis omnibus quæ facere tenetur, nec tamen sine adjutorio Dei potest.

Sed P. Nicolai, ut S. Thomam non nisi de adjutorio gratiæ lo-

qui insinuaret, de industria omisit quæ sequuntur: en testimonium integrum. Homo ergo teneatur credere secundum hoc quod adjuvatur à Deo ad credendum. Adjuvatur autem à Deo aliquis ad credendum tripliciter. Primò quidem per interiorem vocationem, de qua dicitur Joan. 6. Omnis qui audit à Patre, & didicit venit ad me; & ad Rem. 8. Quos prædestinavit, hos & vocavit. Secundò per doctrinam & predicationem externam, secundum illud Apostoli ad Rem. 10. Fides ex auditu, auditus autem per verbum Christi. Tertio per exteriora miracula. Ergo S. Thomæ sensus is est, quòd homo non teneatur credere, nisi secundum quod adjuvatur aliquo ex his tribus modis, scilicet vel per interiorem vocationem, vel per prædicationem, vel per miracula: sensus autem non est quòd homo non teneatur credere, nisi secundum quod adjuvatur per interiorem vocationem. Cum enim non possit dici quòd necesse sit hominem tribus his modis adjuvari, ut credere teneatur, dici oportet quòd sufficit hominem aliquo ex his tribus modis adjuvari, ut credere teneatur. Id verò manifestè patet ex ipso articuli scopo, in quo id unum S. Thomas docet: Christo credendum fuisse, etsi visibilia miracula non fecisset. Quod ex eo probat: quia homines à Deo ad credendum tripliciter adjuvantur, per interiorem vocationem, per doctrinam, per miracula. Unde concludit: Si autem Christus visibilia miracula non fecisset, adhuc rema-

nebant alii modi attrahendi ad fidem, quibus homines acquiescere tenerentur. Eadem ergo ratione, qui Christo forinsecus insonante foris audiebant, intus non audiebant, ut ait Augustinus, Christo nihilominus credere tenebantur: quia duobus aliis modis, prædicatione scilicet & miraculis, vocabantur ad fidem, quibus acquiescere tenebantur.

Quantum verò à S. Thomæ mente alienum sit, ut vocationem interiorem omnibus communem hoc articulo asstruere voluerit, hæc verba mox sequentia demonstrant. Ad 1. ergo dicendum quòd inter illa opera qua Christus in hominibus fecit, annumerari etiam debet vocatio interior, quæ QUOSDAM ATTRAXIT, sicut Gregorius dicit in quadam homilia, quod Christus per misericordiam Magdalenam traxit interiùs. An ita loqueretur, an quosdam per vocationem interiorem attractos, & non potius omnes attractos diceret, si vocationem interiorem omnibus communem hic asstrueret, ac teneret? An diceret, quòd Christus per misericordiam Magdalenam traxit interiùs, nisi vellet insinuare, quòd Christus per justiciam quosdam non trahit interiùs, eos gratiâ interiori non adjuvando: dicit autem per vocationem interiorem quosdam attractos esse, ut ostendat variis modis Christum operari, scilicet per miracula, per vocationem interiorem, & per doctrinam.

Omitto dicere, hanc quam P. Nic-

Nicolai S. Thomæ hoc articulo sententiam affingit, ita esse illius doctrinæ ex adverso contrariam, ut 2. 2. q. 2. art. 5. ad 1. de hac quæstione expressè agens, utrùm homo teneatur ad credendum aliquid explicitè, disertè doceat, aliquibus qui tenentur credere articulos fidei sicut & Deum diligere, auxilium gratiæ sine quo hoc non possunt, ex iustitia non dari: hoc testimonium antea art. 1. retulimus, ubi ostendimus quomodo juxta S. Thomam præceptum sit alicui possibile, etiamsi illi non adsit auxilium divinum sine quo illud implere non potest.

P. Nicolai aliud deinde testimonium refert ex Quodlibeto 7. art. 17. ad 3. En integrum, cuius partem iste suo more supprimit. *Dicendum quod in quolibet præcepto duo sunt consideranda, scilicet finis præcepti & possibilitas observandi: quia omnia præcepta cuiuslibet legis sunt ordinata ad aliquod bonum inducendum, vel malum tollendum, nec aliquid impossibile præcipi potest. Unde dicit Hieronymus: Qui dicit Deum aliquid præcepisse impossibile, anathema sit. Si ergo sit tale præceptum, quod nullo modo reddi possit impossibile, observandum, & sine eo finis intentus haberi non possit, obligatio illius præcepti semper manet, sicut est in præceptis de actibus virtutum; quia ad minus actus interiores semper sunt in hominis potestate, & sine eis vita spiritalis conservari non potest, ut dictum est (hæc quæ sequuntur de industria omisit P.*

Nicolai, quia ex his innoscitur, hoc loco actus interiores virtutum cum actibus exterioribus comparari) *Duobus ergo modis præceptum de operatione manuum obligationem amittit: uno modo, quando aliquis redditur impotens ad laborandum, propter corporis imbecillitatem; alio modo, quando suum luxus præcepti, scilicet conservationem corporalis vite, consequi potest sine labore manuum, ut ex dictis patet.*

Ad clariorem hujus testimonii elucidationem referenda est obiectio cui respondetur, quæ talis est. *Ad præcepta servanda omnes tenentur: sed ad labores manuum non omnes tenentur, aliæ qui sunt divites & manibus non laborant, mortaliter peccarent.*

Hoc ergo articulo S. Thomas quærit & expendit, *Utrum operari manibus sit in præcepto: docet possibile debere esse quod præcipitur, atque ut id exponat circa quæstionem ab eo propositam, actus interiores virtutum cum actibus exterioribus comparat: dicit hos esse semper in præcepto, quia sunt semper in hominis potestate; istos non esse semper in præcepto, quia scilicet non sunt semper in hominis potestate: ut quando aliquis ad eos redditur impotens propter corporis imbecillitatem; & hoc modo præceptum de operatione manuum obligationem amittere. Pater itaque actus interiores virtutum dici semper esse in hominis potestate, quia hos semper facimus cum volumus, ut loquitur S. Augustinus;*

actus verò exteriore, puta laborem manuum, non esse semper in hominis potestate, quia hos non semper facimus cum volumus: frequenter enim ob corporis imbecillitatem laborare non potest, etiam qui maximè voluerit. Itaque dicere quod actus interiorum virtutum semper sunt in hominis potestate, quia semper illi adest Dei gratia quâ potest eos exercere, à S. Thomæ mente penitus alienum est: ut hinc omnibus innotescat perpetua in exponendo S. Thomæ sensu Patris Nicolai hallucinatio, qui ex hoc loco concludit, gratiam sufficientem saltem ei adesse dici debere, qui præcepta observare tenetur, juxta verum & certum sensum S. Thomæ.

Posteà P. Nicolai S. Thomam in Sententias citat. In 2. sent. dist. 28. q. 3. art. 3. in quo quaeritur, *Utrum homo possit implere præcepta sine Dei gratia*. Post argumenta: *Sed contra*, inquit, Hieronimus dicit, qui Deum dicit præcipere impossibilia, anathema sit: sed impossibile est homini illud quod implere non potest: ergo mandata Dei homo per se implere non potest.

Prætereà Deus non est magis crudelis quàm homo: sed homini imputatur in crudelitatem, si obliget aliquem per præceptum ad id quod implere non posset: ergo hoc de Deo nullo modo est estimandum. Verba sequentia P. Nicolai suppressit; & ita sine gratiâ homo per se legis præcepta implere potest.

Ex quo sequitur (inquit P. Nicolai) quòd cum sine divinâ voluntate quodlibet bonum in nobis operan-

te, vel sine actuali gratiâ, nemo ea implere possit, crudelu esset Deus, ex mente S. Thomæ, si præciperet ea servari, & eos qui non servant ad peccati reatum obligaret, nec ad eorum impletionem vel observationem necessarium auxilium praberet, saltem tale quod sufficiens dici posset.

Hæc est Patris Nicolai ratio-cinatio, sed S. Thomæ verbis penitus contraria. Nam S. Thomas hinc non concludit, omnibus gratiam dari, quod facit P. Nicolai; sed è contra, hominem sine gratia per se legis præcepta implere posse, ut hinc id unum sequi videri possit, Dei gratiam sive actualem, sive habitualement, ad legis præcepta implenda non esse necessariam. Quare P. Nicolai prudenter suo mote hanc S. Thomæ conclusionem reticuit, *Et ita sine gratia homo per se legis præcepta implere potest*, ne eâ posita consequentiæ quam deducit falsitas innotesceret.

Quis ergo, inquires, horum S. Thomæ verborum sensus est? Hic est quem sequens S. Thomæ responsio declarat: *Dicendum est ergo*, inquit, quòd præcepta legis, quantum ad id quod directe sub præcepto cadit (hoc est, ut ipse exponit, quantum ad substantiam operis, & non quantum ad modum agendi, & intentionem Legislatoris, seu finem præcepti, qui est, non tantum ut hæc opera fiant, sed ut ex charitate fiant) potest aliquis implere per liberum arbitrium sine gratia gratis data, vel gratus faciente, hoc est, sine gratia actuali & habituali. Hoc uno

uno sensu S. Thomas loquitur; de præceptis solùm quantùm ad substantiam operis, non verò quantùm ad modum agendi in argumentis, *sed contra*, loquitur, ut ex ipsis conclusionis verbis patet: Ergo mandata Dei homo per se implere potest: & ita sine gratiâ homo per se legis præcepta implere potest.

S. Thomas in qq. disp. de veritate q. 24. quæ est de libero arbitrio art. 14. eandem doctrinam tradit; quam P. Nicolai non minùs absurdè pro gratiâ sufficiente communi commemorat. Ita S. Thomas.

*Queritur utrum liberum arbitrium possit in bonum sine gratia? Et videtur quòd sic: quia præceptum non datur de impossibili: unde Hieronymus dicit, Maledictus qui dicit Deum homini aliquid impossibile præcipisse: sed homini præcipitur ut bonum faciat: ergo homo potest per liberum arbitrium bonum facere. Sic respondet.*

*Ad 1. ergo dicendum, quòd illud quod præcipit Deus non est impossibile homini ad servandum, quia & substantiam actus potest ex libero arbitrio servare, & modum quo elevatur supra facultatem naturæ, pro ut scilicet sit ex charitate, potest servare ex dono gratiæ, quamvis non ex solo libero arbitrio.*

S. Thomas per donum gratiæ quo homo potest servare præcepta ex charitate, gratiam habitualement designat, non verò actualement; & licet actualement designaret, eam omnibus dari non dicit. Quid verò absurdius in S. Thomæ doctrinâ, quàm donum gra-

tia quo homo servare potest omnia præcepta ex charitate, omnibus semper dari?

Confirmat autem P. Nicolai ex sequenti responsione gratiam omnibus dari. Ita S. Thomas.

*Præterea nullus debet corripitur, si non faciat quod scire non potest: sed homo justè corripitur, si omittat facere bonum: ergo per liberum arbitrium homo bonum facere potest. Sic respondet.*

*Ad 2. dicendum, quòd rectè homo corripitur qui præcepta non implet, quia ex ejus negligentia est quòd gratiam non habet, per quam potest servare mandata quantum ad modum, cum possit nihilominus per liberum arbitrium ea servare quantum ad substantiam. An ex ejus negligentia porro esset (inquit P. Nicolai) quòd non haberet ejusmodi gratiam, si quantum est ex parte Dei per seipsum deesset, non hoc adesse saltem per quod haberi potest. Hæc est Patris Nicolai consequentia, non in S. Thomæ doctrinâ, sed in Molinianis principiis fundata. Ubi enim unquam S. Thomas docuit non fore hominis negligentiam, nec illam homini ad peccatum imputandam, nisi Deus homini concedat gratiam actualement interiorem, quâ se possit ad gratiam habendam disponere? Vel unum S. Thomæ testimonium proferat P. Nicolai, ubi id S. Thomas expressè asserat. Nos multis expressis testimoniis hoc toties inculcatum & nunquam probatum confutavimus, & amplius postea Sectione sequenti, ubi de peccati imputatione, con-*

futabimus: imò ex hoc ipso articulo gratiam actualem omnibus non dari convinci potest. Eam enim sic definit S. Thomas ibid. in corp. *Ipsa misericordia Dei, per quam interiorius motum mentis operatur.* Quis autem dixerit Deum per suam misericordiam interiorius motum mentis in omnibus operari? Imò secundum S. Thomam certissimum est, Deum in multis hunc ex justitia non operari.

Omitto calumniosè semper ad-versariorum doctrinam à Patre Nicolai proponi, cum nec Arnaldus, nec quisquam alius S. Augustini discipulus teneat gratiam ex parte Dei per se ipsam ulli deesse, sed semper in homine causam esse cur desit.

Ut verò P. Nicolai ostendat, S. Thomam maturum aliud non dixisse, quàm quod juvenis, hoc ex Summa testimonium refert 1. 2. q. 100. art. 10. *Non est impossibile hoc præceptum observare quod est de actu charitatis; quia homo potest se disponere ad charitatem habendam, & quando habuerit eam, potest eam uti.* Hic ne legitur, gratiam actualem interiori omnibus semper dari, quàm se possint ad gratiam habendam disponere, & cum eam habuerint eam uti? Minimè verò; sed hoc concludit P. Nicolai: quàm falsò, satis antea ostendimus.

Respondeo ergo 1. quod ex S. Thoma 1. p. q. 23. art. 3. ad 3. duplex est impossibilitas, alia absoluta, alia conditionata. Itaque juxta doctrinam ibi à S. Thomâ traditam nunquam debet dici

quòd impossibile sit absolutè reprobo se ad gratiam, seu ad charitatem disponere; quia semper potest habere auxilium Dei, quo se ad illam disponat. Sed, ut ibidem docet, ex suppositione dici potest, quòd reprobatus non potest gratiam adipisci, seu quòd non potest se ad gratiam habendam disponere; & idè licet aliquis non habeat gratiam actualem, per quam se ad gratiam habitualemente disponere potest, & per quam potest eam uti, non sequitur quòd sit illi impossibile habere charitatem, aut quando illam habuerit eam uti; & tamen peccatum ejus qui reprobat & qui à gratia deseritur, licet secundum impossibilitatem conditionatam non possit gratiam adipisci, in culpam imputatur; non quia gratiam actualem sufficientem habet quàm possit se ad gratiam disponere: Sed quia, inquit ibidem, *licet aliquis non possit gratiam adipisci qui reprobat à Deo, tamen quòd in hoc peccatum vel illud labatur, ex ejus libero arbitrio contingit: unde & meritò sibi imputatur in culpam.* Et antea ad 2. *Culpa provenit ex libero arbitrio ejus qui reprobat, & à gratia deseritur: & secundum hoc verificatur dictum Prophetæ, scilicet; Perditio tua Israël ex te.*

Respondeo 2. ex S. Thomâ, quòd illud quod possumus cum divino auxilio, non est nobis omninò impossibile, ut antea exposuimus: semper autem homo potest cum auxilio divino se disponere ad charitatem habendam, & quando habuerit eam, potest eam uti.

Res-

Respondeo 3. juxta S. Thomam ex supradictis, quod quamvis liberatio à peccato, & similiter præcepti charitatis observatio, fiat operatione divinâ, quia tamen ad hoc liberum arbitrium cooperatur, non dicitur esse impossibile simpliciter. Unde ut suprà vidimus 1. 2. q. 109. art. 6. *Nihil homini impossibile à Deo imponitur, dum ei precipitur ut se ad Deum convertat: quia hominis ad Deum conversio fit per liberum arbitrium, etsi liberum arbitrium ad Deum converti non possit, nisi Deo ipsum ad se convertente.*

Denique hoc addo observatione dignissimum, his & similibus argumentis gratiæ per se efficacis ad singulos actus necessitatem S. Thomæ auctoritate everti: quia hæ consequentiæ & ratiocinationes è S. Thomæ testimoniis circa possibilitatem præceptorum deductæ, vel ad gratiam sufficientem communem astruendam nihil valent, vel ad astruendam gratiam sufficientem communem, libero arbitrio saltem ad orandum & ad disponendum se subiectam, valent: ut rectè probat M. Alphonsus le Moyne, Molinianæ ad orandum gratiæ assertor, in suo Tractatu de gratiâ.

Demùm P. Nicolai observat quater à S. Thoma variis in locis id velut ex S. Hieronymo uniformiter quoad sensum relatum, *Eos esse maledicendos & execrandos, qui aliquid impossibile dicunt esse quod homini à Deo præceptum fit.* Id uniformiter quoad sensum à S. Thomâ relatum non abnuimus;

sed vel uno loco relatum esse ad gratiam sufficientem omnibus qui præcepto tenentur astruendam, pernegamus, ut circa singula ostendimus. Illud enim exponens 1. 2. q. 109. art. 4. ad 2. nihil homini impossibile præceptum docet: quia quod possumus cum auxilio divino, non est nobis omninò impossibile; non verò quia semper habemus auxilium Dei quo præcepta implere possumus, sicut articulo præcedente ostendimus.

*Scio hæc verba (inquit P. Nicolai) quibus nititur S. Thomas, tantum si Hieronymi essent, non Hieronymi tamen esse, sed Pelagii.*

Id rectè scis, Pater mi, cum S. Augustinus lib. de gratia Christi c. 32. & de peccato originali c. 30. Pelagii confessionem, quâ hæc verba continentur, ut dolo plenam refuteret. Rectè scis visam fuisse Zozimo, à quo suscepta est, Catholicam, ob verborum ambiguitatem quibus Pelagius simulatâ voluntatis emendatione ad Summum Pontificem decipiendum usus erat sed nec ignorare debes Zozimum, fraude postea detectâ, damnationis sententiam in Pelagium & Cælestium tulisse. Ergo cum hæc verba Catholicum sensum præ se ferant, hæc S. Thomas falsâ inscriptione deceptus, velut ex Hieronymo referre potuit; sed fateri te necesse est, eadem hæc verba hæreticum etiam sensum à Pelagio intentum occultare: ea porro S. Thomas juxta Catholicum sensum à S. Augustino defensum, & à Zozimo appro-



approbatum usurpat, qui alius non est quàm is quem contra te defendimus. Tu verò Pelagii sensum à S. Augustino confutatum amplecteris, & quod intolerabile est, S. Thomæ falsissimè affingis. Pelagii enim sensus hic erat, hæc mens, ut hæc sententiâ execramur etiam blasphemiam eorum qui dicunt impossibile aliquid homini esse præceptum, doctrinam gratiæ per se efficacis quam ad singulos pios actus necessariam esse, & sine quâ nihil boni fieri posse S. Augustinus cum universâ Ecclesiâ asserbat, velut blasphemam & execratione dignam sugillaret. Hæc eadem Catholicorum doctrina est, quam à S. Thomâ eadem verba sub Hieronymi nomine referente, tanquàm blasphemam reje-

ctam esse, tua argumenta tuæque consequentiæ probant, si quid probant, quicquid Pelagii dolum imitatus dissimules. Hæc eadem doctrina est quam tu, si quid ex Arnaldo damnas, hæreseos & blasphemix damnas in Arnaldo, qui nihil aliud scribendo docuit, quàm gratiam per se efficacem ad omnes pios actus necessariam, & sine quâ nihil piè fieri potest, Petro justo in tentatione defuisse, quæ certissima est S. Augustini doctrina Pelagiano errori opposita. Siccine tu ( ut in te tua verba in Arnaldum falsissimè contorra, verissimè retorqueam ) S. Thomam illudis, aut ementito S. Thomæ nomine nos fascinas, si vel credula nimis mentes, vel teneri nimis oculi nobis essent.

### S E C T I O T E R T I A.

*In quâ ex iis quæ S. Thomas docet de imputatione peccati, de Voluntate Dei antecedente & consequente, & de morte Christi pro omnibus, quantum ad sufficientiam pretii, gratiam actualem sufficientem omnibus communem non solum non astrui, sed etiam negari ostenditur.*

**P**ater Nicolai his quidem argumentis quæ vulgò à Molinistis ab imputatione peccati, à voluntate Dei, & à morte Christi petuntur, ad gratiam sufficientem communem, S. Thomæ auctoritate astruendam, specialiter non utitur: sed quia non solum Patrem Nicolai hoc Opere confutare, sed etiam S. Thomæ de gratiâ sufficiente doctrinam integre exponere suscepi; quia e-

tiam non solum Patri Nicolai, sed & cæteris Molinistis quidquam nobis ex S. Thomæ doctrinâ ad sententiam suam confirmandam obijciendi locum omnem præripiendum esse arbitror, idcò hæc argumenta à Patre Nicolai penè intacta tractare aggredior, ostensurus illa, juxta S. Thomam, ad gratiam sufficientem communem astruendam non solum non valere, sed etiam multum valere ad de-

destruendam. Id verò postquàm ostensum fuerit, tùm P. Nicolai, cæterique Molinistæ, si sapiunt, S. Thomam velut suæ sententiæ patronum sibi vindicare, ac nobis velut nostræ adversarium objicere desinent; tùm de S. Thomâ, sicut jam de S. Augustino, obmu-

tescent, cùm constet aliis argumentis quàm istis, vel his quæ duabus præcedentibus Sectionibus abundè confutata sunt, gratiam actualem sufficientem communem non posse stabiliri, nec doctrinam, quam contra illos defendimus, impugnari.

## ARTICULUS PRIMUS.

*In quo ostenditur S. Thomam nunquam peccati imputationem per gratiam sufficientem, in qui peccant semper datam, exposuisse.*

**S**ANCTUS THOMAS sæpè docet hominem à gratiâ deseri, & tamen peccare, quia voluntate suâ & libero arbitrio peccat; nunquam autem ad gratiam sufficientem communem recurrit, ut ostendat justè homini peccatum imputari: eam ergo non admittit, siquidem ad ea solvenda, propter quæ potissimum admittenda dicitur, nunquam illâ usus est. Illud ex multis locis probatur.

1. p. q. 23. art. 3. argumentum 3. sic proponit. *Nulli debet imputari quod vitare non potest: sed si Deus aliquem reprobât, non potest vitare quin ipse pereat. Dicitur enim Eccles. 7. Considera opera Dei, quod nemo possit corrigere quem ipse despecterit: ergo non esset hominibus imputandum quod pereunt; hoc autem est falsum: non ergo Deus aliquem reprobât. Sic respondet.*

*Ad 3. dicendum, quòd reprobatio Dei non subtrahit aliquid de potentiâ reprobati: unde cùm dicitur quòd reprobus non potest gratiam adipisci, non est hoc intelligendum*

*secundum impossibilitatem absolutam, sed secundum impossibilitatem conditionatam, sicut supra dictum est, quòd prædestinatum necesse est salvari necessitate conditionatâ, quæ non tollit libertatem arbitrii. Unde licet aliquis non possit gratiam adipisci, qui reprobatur à Deo; tamen quòd in hoc peccatum, vel illud labatur, ex ejus libero arbitrio contingit: unde & meritò sibi imputatur ad culpam.*

Nulla hic gratiæ sufficientis omnibus qui peccant datæ mentio; quam tamen nemo illius assertor in similis argumenti solutione unquam prætermitteret. Agitur de explicandâ peccati imputatione circa reprobos, qui non possunt gratiam adipisci. Respondet, ne meritò illis imputari ad culpam quòd pereunt, & quòd in peccatum cadunt, quia habent gratiam sufficientem, quâ possunt illud vitare? Minimè verò: sed quia, quòd in hoc peccatum vel illud labantur, ex eorum libero arbitrio contingit. Similiter ad 2. dicit, reprobatio-

nem non esse causam culpæ, verum causam derelictionis à Deo: sed culpam provenire ex libero arbitrio ejus qui reprobat, & à gratiâ deseritur. Cur S. Thomas ita loquitur, si reprobis cum peccat, à gratiâ sufficiente nunquam deseritur? Cur à Deo derelinqui dicitur, qui semper ejus gratiâ sufficiente adjuvatur? Profectò quisquis asserit neminem culpandum esse, nisi adsit illi gratia ad non peccandum sufficiens, contrariè omnino respondebit, dicetque culpam provenire ex libero arbitrio ejus qui reprobat, & à gratiâ Dei ad non peccandum sufficiente nunquam deseritur.

In hæc verba Joan. 6. Nemo potest venire ad me, &c. Sic loquitur.

Tertia questio est de hoc quod dicit, quòd nemo venire potest, nisi trahens à Patre; quia secundum hoc si nullus veniat ad Christum, non imputatur ei, sed ei qui non trahit eos. Respondeo dicendum, quòd verè nullus venire potest, nisi trahens à Patre. Nam sicut grave per naturam, non potest per se sursum ferri, nisi trahatur ab alio; ita cor humanum, ex se ad inferiora tendens, non potest sursum elevari, nisi trahum: si verò non elevatur, non est defectus ex parte trahentis, qui quantum in se est, nulli deficit; sed est propter impedimentum ejus qui non trahitur. Aliter autem, quantum ad hoc pertinet, possumus loqui de hominibus in statu naturæ integre, & aliter in statu naturæ corruptæ. Nam in natura integra non erat aliquod impedimentum prohibens ab

hac tractione. Et ideo omnes indigent trahi: Deus autem omnibus ad trahendum manum porrigit, quantum in se est; & quod plus est, non solum attrahit manum recipientis, sed etiam aversos à se convertit, secundum illud Thren. ult. Convertite nos Domine, & convertemur. Et in Psal. 84. secundum aliam litteram, Deus tu conversus vivificabis nos. Ex quo ergo Deus paratus est dare omnibus gratiam, & ad se trahere, non imputatur ei si aliquis non accipiat, sed ei qui non accipit. Quare autem non omnes aversotrahitis, sed aliquos, licet sint omnes equaliter aversi, ratio quidem in generali potest assignari, ut scilicet in illis qui non trahuntur appareat & resurgat ordo divine justitiæ; in illis autem qui trahuntur, immensitas divine sapientiæ. Quare autem in speciali trahat hunc, & illum non trahat, non est ratio aliqua, nisi beneplacitum voluntatis divine. Unde dicit Augustinus: Quem trahit & quem non trahit, quare illum trahat & illum non trahat, noli velle judicare, si non vis errare; semel accipe & intellige: Nondum traheris? Ora ut traharis. Hoc etiam ostendi potest per exemplum. Nam assignari potest ratio quare artifex ponit aliquos lapides inferius & aliquos superius, & aliquos ex lateribus ex dispositione domus, cujus complementum hoc exigit: sed quare hos lapides hic ponat, & hos ibi, dependet à suâ simplici voluntate; & inde est quòd prima ratio dispositionis refertur ad voluntatem artificis. Sic ergo Deus ad complementum universi quosdam quidem trahit, ut in eis appareat sua

mise-

*miseriordia; quosdam verò non trahit, ut ostendatur in eis sua iustitia: sed hos trahit, illos non trahit, secundum suum beneplacitum voluntatis. Similiter etiam quare in Ecclesiâ aliquos fecit Apostolos, alios Confessores, alios Martyres, ratio est propter Ecclesiæ decorem & complementum; sed quare Petrum fecit Apostolum, Stephanum Martyrem, & Nicolaum Confessorem, non est alia ratio nisi voluntas sua. Sic ergo patet humana facultatis defectus, & auxilii divini subsidium.*

Anteâ Sect. 1. art. 2. 3. & 4. exposuimus, quid sit Deum omnibus, quantum in se est, manum porrigere, seu, quod idem est, paratum esse dare omnibus gratiam; ac ostendimus nullo modo ex his verbis concludi posse, quod gratia sufficiens omnibus detur; imò ex hac S. Thomæ responsione, eam omnibus non dari evidenter sequitur: quia si ad peccati imputationem semper datur; si illi debita est qui tenetur Evangelio sibi annuntiato credere, ac Deum diligere; satis non est quod Deus sit paratus gratiam sufficientem ad credendum & diligendum dare, sed ulterius requiritur ut illam actu det, saltem ad removendum impedimentum quod illi ponitur. Et tamen, ut hoc argumentum solvat, non dicit Deum actu dare omnibus gratiam actualem sufficientem, saltem ad removendum impedimentum prohibens ab hac tractatione; sed recurrit tandem ad divinæ iustitiæ ostensionem, & ad beneplacitum voluntatis divi-

næ, ex omnibus æqualiter aver-  
sis aliquos solum ad se miseri-  
corditer trahentis, & etiam ad  
humanæ voluntatis defectum ex  
se ad inferiora tendentis, & im-  
pedimentum gratiæ ponentis,  
propter corruptionem ex origi-  
nali peccato subsecutam.

1. 2. q. 109. art. 8. argumen-  
tum 2. sic proponit. *Praterèa ad  
hoc corripitur homo, ut non peccet.  
Si igitur homo in peccato mortali exis-  
tens non potest non peccare, vide-  
tur quod frustra ei correptio adhi-  
beatur: quod est inconveniens.*

Si S. Thomas aliquam gratiam  
actualem sufficientem commu-  
nem agnovisset, nonne debebat  
respondere, quod homo in pec-  
cato semper habet gratiam suffi-  
cientem, per quam potest pecca-  
tum vitare, & ob quam illi cor-  
reptio frustra non adhibetur: sed  
S. Thomas contrariâ prorsus viâ  
procedit, atque ita objectionem  
hanc solvit.

*Ad 2. dicendum: correptio uti-  
lis est, ut ex dolore correptionis vo-  
luntas regenerationis oriatur; si ta-  
men qui corripitur filius est promif-  
sionis, ut strepitus correptionis so-  
rinsecus insonante aut flagellante,  
Deus in illo intrinsecus occultâ in-  
spiratione operetur & velle, ut Au-  
gustinus dicit in lib. de corrept. &  
grat. Ideò ergo necessaria est corre-  
ptio, quia voluntas hominis requi-  
ritur ad hoc quod à peccato absti-  
neat: sed tamen correptio non est  
sufficiens sine Dei auxilio. Unde  
Ecles. 7. Considera opera Dei, quod  
nemo possit corrigere quem ille de-  
spexerit.*

Ideo ergo correptionem fieri dicit, quia voluntas hominis ad non peccandum requiritur; utilem verò esse docet, cum adest auxilium Dei, sine quo non est sufficiens: quòd auxilium non dicit omnibus dari qui corripiuntur, sed eis qui sunt filii promissionis.

Prætermitto omnia alia similia testimonia à nobis antea Sect. 1. art. 1. 2. 3. & 4. exposita, sed illud præcipuà attentione dignum, 1. 2. q. 79. art. 1. ubi quærens, *An Deus sit causa peccati*, dicit contingere quòd Deus, non præbet aliquibus auxilium ad evitandum peccatum, quod si præleret, non peccarent. Hæc scilicet responsio defectuosa est, imò falsa, si omnibus qui peccant gratia sufficiens semper detur ac dari debeat. Falsum est enim quòd Deus non præbeat auxilium ad evitanda peccata; si sufficiens semper præbeat, cujus concessio est ratio ob quam non Deo, sed homini peccatum hominis imputatur. Et hæc esset una, vera ac solida ex adversariorum mente solutio, si S. Thomas talem gratiam omnibus semper dari censuisset.

Ad peccati imputationem gratiam Christi nullomodo requiri; imò sæpè aliquibus quibus peccatum imputatur, nullam dari, ex his etiam quæ de merito ac de demerito S. Thomas docet, apertè colligitur. Dicit enim aliud quidem præter hominis naturam ad meritum requiri, puta gratiam; ad demeritum autem naturam sibi relictam sufficere:

hominem naturæ suæ relictum, & sine gratiâ, non posse actum meritorium, qui est supra facultatem naturæ exercere; posse verò actum peccati, qui est demeritorius: puram potentiam non posse esse principium merendi, sed posse esse principium demerendi. Ita Quodlibeto 5. art. 5. Boni (inquit) qui per gratiam iustificantur, non solum sunt à Deo ab æterno præcogniti, sed etiam electi ad gratiam habendam: peccatores autem qui non iustificantur per gratiam, non sunt electi vel præordinati à Deo ad culpam, sed solum præcogniti quòd non sint gratiam habituri, sed suæ naturæ sint relinquendi. Quia verò omne agens potest in id quod est infra se, non autem in id quod est supra se. natura sibi relictâ non potest in actum meritorium; qui est supra facultatem naturæ; potest autem in actum peccati, qui est demeritorius.

Ibidem ad 1. Naturalia enim adjuncta per gratiam, sunt principia merendi; sibi autem relictâ, possunt esse principia demerendi.

Et quodlibeto 6. art. 6. ad 1. Si autem sic intelligatur, quòd pura potentia non possit esse principium merendi neque demerendi, verum est quantum ad meritum, quòd non potest esse sine gratiâ; non est autem verum quantum ad demeritum.

Dicet fortè aliquis, S. Thomam de gratiâ habituali hîc loqui, quæ est principium merendi: ex quo concludet S. Thomam per naturam sibi relictam, intelligere solum naturam gratiâ habituali.

non

non verò omni actuali, destitutam: ad merendum requiri ut adsit gratia habitualis, non verò ad demerendum: id unum ex hac S. Thomæ doctrinâ colligi, cum quâ simul (inquiet) verum est, nunquam actum demeritorium fieri, nisi adsit gratia actualis. Verum evidens est, juxta principia à S. Thomâ hîc posita, illud de his loqui qui non solum habituali, gratiâ, sed etiam omni actuali destituti sunt, ac docere homines utrâque hâc gratiâ carentes peccare ac demereri. Quid est enim hominem naturæ suæ relinqui, nisi gratiâ non solum habituali, sed etiam actuali à Deo non adjuvari? Præterea, an sanctus ille Doctor diceret hominem ex seipso, & naturæ suæ relictum, posse in actum demeritorium, quia omne agens potest in id quod est infra se, nisi vellet hominem non elevatum supra se, ac omni gratiâ supernaturali, sive habituali, sive actuali destitutum, posse peccare ac demereri? Cum etiam universaliter statuit, principia sibi relicta posse esse principia demerendi, quid intelligit, nisi principia solis suis naturalibus relicta, & omni auxilio su-

pernaturali destituta? Et quid significat per puram potentiam quæ potest esse principium demerendi, nisi potentiam cum solis suis naturalibus agentem, nullâ supernaturali virtute instructam, nulloque supernaturali auxilio, sive habituali sive actuali, elevatam ac adjutam? Denique si S. Thomas existimaret, peccatum & actum demeritorium nunquam ab aliquo fieri, nisi adsit illi gratia supernaturalis actualis, cum elevans supra se, ac supernaturalem benè ac meritorie agendi virtutem illi conferens, an ita unquam locutus esset? Nonne dixisset, naturam gratiâ quidem habituali destitutam posse peccare ac demereri; sed omni gratiâ carentem, & solis suis naturalibus relictam, non posse peccare nec demereri? Adcò S. Thomæ doctrinæ principiis omnibus contraria est hæc absurdissima opinio, quæ asserit gratiam aliquam supernaturalem sufficientem actualem ad peccandum ac demerendum requiri, seu peccantibus semper in omnis peccati occasione dari, ut illis peccatum ad culpam ac demeritum justè imputari possit.

## A R T I C U L U S I I.

*In quo idem confirmatur ex iis quæ de lege docet 1. 2. q. 98. & 106. & in Epist. ad Rom. ac Patris Nicolai responsio refellitur.*

**Q**Uæ S. Thomas de Lege docet, certissimum etiam nobis argumentum præbent, gratiam sufficientem communem ab

eo admissam nunquam esse. Nam juxta S. Thomam homines legis veteris præceptis astrictos fuisse, atque illis ejus prævaricationem

ad culpam imputatam esse, nemo est qui in dubium revocet. *Lex* (inquit ex Apostolo 1. 2. q. 98. art. 1. ad 2.) *subintravit ut abundaret delictum, in quantum scilicet homines accipientes occasionem à lege, abundantius peccaverunt: tùm etiam, quia gravius fuit peccatum post legis prohibitionem: tùm etiam, quia concupiscentia crevit. Magis enim concupiscentius quod nobis prohibetur.* Et tamen omnibus qui sub lege erant, gratiam sufficientem quâ possent illam implere, semper à Deo datam fuisse nunquam dicit; imò eam multis negatam fuisse, ubique docet. Hoc plurimis argumentis ex 1. 2. q. 98. & 106. ubi de lege veteri & novâ agit, petitis probare facillimum est.

1. 2. q. 106. art. 3. ostendit, *Legem novam non debuisse dari à principio mundi: quia, inquit, est lex gratiæ, & idèò primò oportuit quòd homo relinqueretur sibi in statu veteris legis, ut in peccatum cadendo, suam infirmitatem cognoscens, recognosceret se gratiâ indigere.* Et hanc rationem assignat Apostolus ad Rom. 3. dicens: *Lex subintravit, ut abundaret delictum: ubi autem abundavit delictum, superabundavit & gratia.*

Et q. 98. art. 6. in quo ostendit legem veterem convenienter datam fuisse tempore Moysis. *Sed postquam, inquit, homo est instructus per legem, convicta est ejus superbia de infirmitate, dùm implere non poterat quod cognoscebat; & idèò sicut Apostolus concludit ad Rom. 8. Quod impossibile erat legi,*

*in quo infirmabatur per carnem, misit Deus Filium suum, ut justificatio legis impleteretur in nobis.*

Si gratia sufficiens omnibus datur quibus legis prævaricatio imputatur ad culpam, quidquid hic dicit S. Thomas falsum est. Nam P. Nicolai cæterique Molinistæ negare non possunt, gratiam sufficientem ad legem novam pertinere; cum verò ad veterem, cùm sit effectus Passionis Christi: *Lex per Moysen data est; gratia & veritas per Jesum Christum facta est.* Joan. 1. Ergo si gratia omnibus detur, nunquam homo fuit in statu veteris legis & sub lege, nec potuit lex nova à principio mundi non dari, quia ante legem veterem, sub lege veteri, & extra illam semper adfuit omnibus hominibus gratia sufficiens ad legem novam pertinens, per quam poterant semper implere quod mandabatur, vel vitare quod vetabatur. Falsa etiam est hæc ratio ob quam S. Thomas dicit, *Legem non debuisse dari à principio mundi, quia primò oportuit quòd homo relinqueretur sibi in statu veteris legis.* Falsa, inquam, est hæc ratio, cùm nunquam homo in statu veteris legis sibi relictus fuerit, sed semper habuerit, non quidem per legem veterem; sed per novam, auxilium gratiæ sufficientis, quo ejus infirmitas ad legem implendam adjuvabatur, & quo in peccatum non cadere poterat. Falsum est etiam hominis per legem instructi superbiâ de infirmitate unquam convictam esse, dum imple-



implere non poterat quod cognoscebat, cum semper illud per gratiam sufficientem, illi semper cum lege collatam, implere potuerit. Itaque cum S. Thomæ doctrinâ, his duobus articulis contentâ, stare non potest, omnibus hominibus simul cum lege gratiæ actualis sufficientis auxilium à Deo semper datum esse.

Nec minùs evidenter gratiam sufficientem omnibus cum lege dari negat prædicto art. 3. q. 106. ad 1. argumentum, quod sic proponit. *Videtur quòd lex nova debuerit dari à principio mundi. Non enim est personarum acceptio apud Deum, ut dicitur ad Rom. 2. sed omnes homines peccaverunt & egent gratiâ Dei, ut dicitur ad Rom. 3. ergo à principio mundi lex Evangelii dari debuit, ut omnibus per eam subveniretur. Sic respondet.*

*Ad 1. ergo dicendum, quòd humanum genus propter peccatum primi parentis meruit privari auxilio gratiæ, & idè quibuscumque non datur, hoc est ex justitiâ, ut Augustinus dicit lib. de perfect. justit. Unde non est acceptio personarum apud Deum, ex hoc quòd non omnibus à principio mundi legem gratiæ proposuit, quæ erat debito ordine proponenda.*

De quâ gratiâ S. Thomas loquitur? De eâ quâ omnes homines indigent ut possint benè operari, sine quâ, ut loquitur 2. 2. q. 2. art. 5. ad 1. homines non possunt credere, ac Deum & proximum diligere: dicit hanc omnibus ex justitiâ non dari, quia per peccatum primi paren-

tis meruerunt eâ privari. Idem docet q. 98. art. 4. exponens eum Deum legem veterem solis Judæis dando, magis uni populo quàm aliis viam salutis aperuerit. *Salutaria autem beneficia, inquit ad 2. Deus humano generi confert ex suâ gratiâ: unde non est personarum acceptor, si quibusdam præ aliis conferat. Unde Augustinus dicit in lib. de predest. SS. Omnes quos Deus docet, misericordiâ docet; quos autem non docet, iudicio non docet. Hoc enim venit ex damnatione humani generis pro peccato primi parentis.*

Pertinere responsio ad 3. gratiam omnibus communem à sancto Doctore admissam non fuisse demonstrat. Argumentum 3. sic proponit. *Magis est homini necessaria salus spiritualis, quæ est æterna, quàm salus corporalis, quæ est temporalis: sed Deus ab initio mundi providit homini ea quæ sunt necessaria ad salutem corporalem: ergo etiam lex nova, quæ est valde necessaria ad salutem spiritualem, debuit hominibus à principio mundi dari. Quibus idem Sanctus sic respondet.*

*Ad 3. dicendum, quòd ea quæ pertinent ad salutem corporalem deserviunt homini quantum ad naturam, quæ non tollitur per peccatum: sed ea quæ pertinent ad spiritualem salutem ordinantur ad gratiam, quæ amittitur per peccatum. Idè non est similis ratio de utrisque.*

Idem ferè dicit q. 98. art. 4. ad 3. *Dicendum, inquit, quòd beneficia gratiæ subtrahuntur hominibus propter culpam, sed beneficia natu-*

ralia non subtrahuntur.

S. Thomas in hoc argumento & in ejus solutione quatuor certissima docet. Primò legem novam, quæ per quatuor annorum millia hominibus data non fuit, ad quam tamen toto hoc tempore aliqui anticipatione quâdam pertinerunt, esse ad salutem omninò necessariam. 2. Eam magis esse homini necessariam, quàm ea quibus ad salutem corporalem indiget. 3. Deum, qui homini semper providit ea quæ ad vitam corporalem necessaria sunt, non semper providisse ea quæ ad salutem spiritalem necessaria sunt, his legem novam à principio mundi non dando. 4. Rationem hujus variz dispositionis esse, quòd cum natura per peccatum destructa non fuerit, Deus post peccatum necessaria ad vitam naturalem providere non desinit; sed non ita de necessariis ad animæ salutem homini providet: quia cum gratia per peccatum amissa fuerit, eam dare Deus non debet; sed est donum gratuitum, quod dat quibus vult ex misericordiâ, & quibus vult negat ex justitiâ. Nullum certè hâc in doctrinâ vestigium est ullius gratiæ sufficientis communis omnibus hominibus post peccatum datæ, & semper cum lege conjunctæ, ut illius prævaricatio ad culpam imputetur.

Denique 1. 2. q. 98. art. 1. ad 2. *Lex*, inquit, *dnituro occidisse, non quidem effectivè, sed occasionaliter ex suâ imperfectione, in quantum scilicet gratiam non conse-*

*rebat, per quam homines implere possent quod mandabat, vel vitare quod vetabat.*

Item q. 99. art. 2. ad 3. *Sicut Augustinus probat in lib. de spiritu & litera, etiam litera legis, quantum ad præcepta moralia, occidere dicitur occasionaliter, in quantum scilicet præcepit quod bonum est, non præbens auxilium gratiæ ad implendum.*

Idem docet in Epist. ad Gal. c. 3. lect. 7. *Ideo, inquit, data est lex, quæ cognitionem peccati faceret, quæ tamen auxilium gratiæ non dabat ad vitandum peccatum; ut sic homo sub lege constitutus vires suas experiretur, & infirmitatem suam recognosceret, inveniens se sine gratiâ peccatum vitare non posse, & sic avidius quæreret gratiam.* Ergo fuerunt aliqui sub lege, quibus illius prævaricatio ad culpam imputata est: (occasionaliter enim lex eos occidit, in quantum accipientes ab eâ occasionem abundantius peccaverunt,) quibus tamen gratia, per quam illam implere possent ac peccatum vitare, collata non fuit.

Nec prætermittendum quod ibidem dicit, scilicet q. 98. art. 1. ad 3. Legem non alio modo possibilem fuisse indicans, quàm quia cum gratiâ adjuvante servari poterat, per quam gratiam eam evidenter intelligit, quæ omnibus non datur, quia eam esse docet de quâ dicit Apostolus, *Non est volentis neque currentis, scilicet velle & currere in præceptis Dei, sed miserentis Dei;* & de quâ dicit Psalmista, *Viam manda-*

mandatorum tuorum cucurri, cum dilatasti cor meum: dici autem non potest, Deum omnium qui erant in statu veteris legis per donum gratiæ miserum esse, & eorum cor dilataste, ut vellent & curre-  
rent in præceptis Dei.

Ad bonitatem legis pertinet (inquit arg. 3.) quod sit possibilis ad observandum, & secundum natu-  
ram & secundum humanam consue-  
tudinem: sed hoc non habuit lex ve-  
tus. Dicit enim Petrus Act. 15. Quid tentatis impouere iugum super cervicem discipulorum, quod neque nos, neque Patres nostri portare po-  
tuimus? Ergo videtur quod lex ve-  
tus non fuerit bona. Sic respon-  
det.

Ad 3. dicendum, quod iugum le-  
gis servari non poterat sine gratiâ  
adjuvante, quam lex non dabat.  
Dicitur enim Rom. 9. Non est vo-  
lentis neque currentis, scilicet velle  
& currere in præceptis Dei, sed  
misericentis Dei. Unde in Psal. 118.  
dicitur; Viam mandatorum tuorum  
cucurri, cum dilatasti cor meum,  
scilicet per donum gratiæ & chari-  
tatis.

Eandem doctrinam habet va-  
riis locis in Epist. ad Rom. in  
quibus de lege loquitur. In cap.  
4. lect. 2. Lex, inquit, iram opera-  
tur occasionaliter, quia & præcipit,  
& gratiam adimplendi non præbet.  
Et paulò infra: Et idè lege datâ  
sine gratiâ adjuvante prævaricatio  
crevit, & maiorem iram promeruit.  
At si nunquam lex data fuit, quin  
simul gratia data fuerit, non qui-  
dem ex virtute legis, sed cum  
lege, cur lex sine gratiâ adju-

vante data dicitur, & cur lege  
datâ, & gratiâ non adjuvante,  
prævaricatio crevisse dicitur?  
Ubi enim lex adest & simul gra-  
tia, undecumque conferatur, ad-  
juvat ad implendum quod præci-  
pit, non est majoris prævarica-  
tionis occasio, nec dici posset lege  
datâ prævaricationem unquam  
crevisse, si lex semper adjunctam  
habuisset gratiam quâ posset im-  
pleri.

Et in 5. lect. 6. Sciendum ta-  
men, quod sicut Philosophus dicit in  
10. Ethic. Prohibitio legis, licet il-  
los qui sunt malè dispositi cohibeat  
ab exterioribus peccatis solo pœna  
timore, quosdam tamen bene dispo-  
sitos inducit per amorem virtutis.  
Sed ista bona dispositio, quantum ad  
aliquid, potest esse à naturâ; sed  
ejus perfectio non est nisi per gratiam:  
ex quâ contingit, quod etiam lege  
veteri datâ non in omnibus peccatum  
abundat, sed in pluribus: quidam  
verò lege prohibente, & gratiâ ul-  
terius adjuvante, ad perfectionem vir-  
tutum tandem pervenerunt. Quod  
si ex gratiâ contingit, legè datâ,  
non in omnibus peccatum abun-  
dare, sed in pluribus; sequitur  
lege datâ aliquibus gratiam con-  
cessam esse, non omnibus. Præ-  
tereà si omnibus cum lege aderat  
gratia, ergo in omnibus Judæis,  
etiam duris & rebellibus, erat per-  
fectio bonæ dispositionis ad præ-  
cepta legis ex amore iustitiæ, hoc  
est, ex charitate servanda; siqui-  
dem gratia hanc bonam disposi-  
tionem conferebat. Hoc autem  
contradictionem involvit. Nam  
juxta S. Thomam hâc lectione,

duri & rebelles ii dicuntur, qui cum sint malè dispositi ab exterioribus peccatis, solo pœnæ timore cohibentur, & quibus lex in flagellum data est.

Et in 6. lect. 3. dicit Judæos qui sub lege erant, hoc est, qui solo timore cogeantur legem observare, quales multi fuerunt, caruisse gratiâ inclinante voluntatem ad legem ex amore observandam. *Alio modo, inquit, dicitur aliquis esse sub lege, quasi à lege coactus, & sic dicitur esse sub lege qui non voluntariè ex amore, sed timore cogitur legem observare. Talis autem caret gratiâ, quæ si adesset inclinaret voluntatem ad observantiam legis, ut ex amore moralia ejus præcepta impleat.*

His omnibus S. Thomæ de lege testimoniis P. Nicolai brevissimè responder hoc verbo Suffragii Censorii parte 2. n. 3. pag. 29. *Ea S. Thomæ testimonia magno contigerit apparatu (Arnaldus in Epistolâ suâ) quæ nihil minus quam institutum probent, quæ Judæis gratiam ex vi legis concessam non fuisse ad justitiam consequendum & exercendam insinuent, sed aliunde sufficienter datam ad futuri Mediatoris fidem (per quam justificari possunt) concipiendam & profitendam non excludant: imò petiùs evidenter, indubitè, & apertè supponant.*

Id quidem à Patre Nicolai pronuntiatum video, probarum non video; id ramen Patri Nicolai sententiam dicenti, nemo jure exprobrer: Nam, ut ipse ait 1. parte pag. 6. *non est Inquisitorum ut ad eorum rationes atque objecta respon-*

*deant, in quos inquirunt, ne causidici ex Judiciis fiant.* Mirum tamen est, ut cum ipse, *velut ex abundanti* causidicus ex Judice fieri, ac judicii sui censorii rationem non solum dicendo proferre, sed etiam ipsis publicis committere statuerit, atque etiam S. Thomæ doctrinam evolvere aggressus sit, de quâ in Comitibus Facultatis præ angustia temporis nihil dixerat: mirum, inquam, cur, cum omnia S. Thomæ testimonia, quibus suam gratiam sufficientem astrui posse putavit, tam studiosè collegerit, nullum protulerit ex quo gratiam semper legi adjunctam fuisse probaret, & tamen ad eò confidenter assereret, ac nulli testimonio responderit, quo & in Arnaldi Epistolâ, & in aliis Operibus, eam semper legi adjunctam non fuisse tam evidenter ostensum est; ut vel hinc pateat rem esse ab illo temerè assertam, quæ probari nullo modo potest: eam verò impugnare ac destruere facillimum, ut ex sequentibus patet.

Respondeo 1. multa nos circa legem testimonia protulisse, ex quibus non solum gratiam ex vi legis concessam non fuisse, sed etiam simul cum lege omnibus datam non fuisse, diserte probavimus.

Respondeo 2. absurdum esse quidquid S. Thomas de lege dicit, si gratia semper cum illâ, aliunde licet, omnibus conferatur. Nam ut rectè in Thesium Confutatione observatum est n. 19. si vires aliunde homini suppetebant

tebant ad implendum quod lex mandabat, quo pacto hominem suæ infirmitatis admonuisset? Quomodo S. Thomas diceret, quòd postquàm homo est instructus per legem, convicta est ejus superbia de infirmitate, dùm implere non poterat quod cognoscebat, si per gratiam sufficientem illi, licet non ex vi legis, semper datam, illud semper implere potuit? Quomodo hominem sibi in statu veteris legis relictum assereret, si gratiâ sufficiente, licet aliunde quam ex vi legis, semper instructus esset? Quomodo aliqui sub lege esse dicerentur, si omnibus semper cum lege aderat gratia Christi ad novam legem pertinens, & vires credendi in Christum ac diligendi tribuens? Quomodo denique diceret ex Apostolo legem occidere, non conferendo gratiam per quam homines implere possent quod mandabat, si semper hominibus, licet aliunde, data fuit sufficiens gratia per quam illud implere possent. Lex enim non occidit, nisi eos quos gratia non adjuvat. Vide hâc de re dicta in Thesium Confutatione n. 19.

Dicit fortè P. Nicolai hujus suæ responsionis aliquod in S. Thomâ fundamentum esse 1. 2. q. 98. art. 2. Argumentum enim 4. sic proponit: 1. ad Tim. 2. dicitur, quòd Deus vult omnes homines salvos fieri: sed lex vetus non sufficiebat ad salutem hominum, ut supra dictum est: ergo ad Deum non pertinebat talem legem dare: Lex ergo vetus non est à Deo. Sic respondet.

Ad 4. dicendum, quòd quamvis lex vetus non sufficeret ad salvandum homines; tamen aderat aliud auxilium à Deo hominibus simul cum lege, per quod salvari poterant; scilicet fides Mediatoris, per quam justificati sunt antiqui Patres, sicut etiam nos justificamur; & sic Deus non deficiebat hominibus, quin daret eis salutis auxilia.

Sed quid hæc S. Thomæ doctrina significat, nisi fidem Christi Mediatoris, per quam homines justificari & salvari possent, fuisse simul cum lege propositam? Aliàs nemo in statu veteris legis justificari potuisset, cum nullus unquam, ut ait S. Thomas q. 106. art. 1. habuerit gratiam Spiritus sancti nisi per fidem Christi explicitam vel implicitam. Unde dicit q. 107. art. 3. ad 1. Quòd omnia quæ credenda traduntur in novo Testamento explicitè & apertè, traduntur credenda in veteri Testamento, sed implicitè & sub figurâ. Et hoc sensu aderat simul cum lege aliud auxilium, scilicet fides Mediatoris, hominibus in veteri Testamento exhibitâ, per quam homines poterant justificari; & sic Deus non deficiebat hominibus, quin daret eis salutis auxilia. Sed his verbis significari, omnibus cum lege datum fuisse auxilium actuale interius, per quod credere possent, & implere quicquid lex præcipiebat, tam absurdum est, quàm absurdum est dicere, fidem Mediatoris, quæ est auxilium illud de quo loquitur, non solum fuisse omnibus exhibitam, sed etiam datam; arque ita non ali-

quos, sed omnes in lege veteri fidem habuisse in Christum, & justificatos fuisse.

Adde quòd, juxta S. Thomam, auxilium gratiæ ad implenda mandata non conferebatur nisi per fidem Christi. *Fides Christi*, inquit in 3. ad Rom. lect. 4. *auxilium gratiæ confert ad implenda moralia præcepta legis*. Et in 4. ad Rom lect. 2. *Per fidem Christi, cujus circum.issio signum erat, auferre batur peccatum originale, & conferebatur auxilium gratiæ ad rectè agendum*. Ergo qui sub lege nullam habebant fidem Christi, quales multos fuisse indubitatum est, nullum habebant auxilium gratiæ ad implenda legis præcepta. Omnibus ergo in statu veteris legis fides in Christum proposita fuit, sed paucis gratia fidei data est; ac proinde paucis etiam datum est auxilium gratiæ, quod per fidem Christi ad legem implendam conferebatur: paucis inquam, qui secundum hoc, ut docet S. Thomas, ad novum Testamentum pertinebant. *Fuerunt tamen aliqui, inquit q. 107. art. 1. ad 2. in statu veteris Testamenti habentes charitatem & gratiam Spiritus sancti, qui principaliter expectabant promissiones spirituales & æternas, & secundum hoc pertinebant ad legem novam*. Et ad 3. *Illi autem qui in veteri Testamento Deo fuerunt accepti per fidem, secundum hoc ad novum Testamentum pertinebant*. Non enim justificabantur nisi per fidem Christi, qui est auctor novi Testamenti. Et q. 106. art. 1. ad 3. *Per fidem autem Chri-*

*sti pertinet homo ad novum Testamentum: unde quibuscumque fuit lex gratiæ indita, secundum hoc ad novum Testamentum pertinebant*. De his plura art. 5. Ubi de morte Christi pro omnibus quantum ad sufficientiam.

Eam verò S. Thomæ doctrinam maximè illustrat, quod de eadem Mediatoris fide docet S. Augustinus in Epist. ad Gal. *Sanati sunt, inquit, ab impietate superbiæ, ut reconciliarentur Deo, quicumque homines humilitatem Christi, & per revelationem antequàm fieret, & per Evangelium posteaquam facta est, credendo dilexerunt, diligendè imitari sunt*. Sed hæc iustitia fidei, quia non pro merito data est hominibus, sed pro misericordiâ & gratiâ Dei, non erat POPULARIS antequàm Dominus homo inter homines nasceretur. Semen autem cui promissum est, populum significat, (id est Christianos) non illos paucissimos qui revelationibus ea futura cernentes, quamvis per eandem fidem salvi fierent, populum tamen salvum facere non poterant. Atque illud ipsum est quod S. Thomas docet in 5. ad Rom. *Quia perfectio (bonæ dispositionis ad legem servandam) non est nisi per gratiam, ex qua contingit quòd etiam lege veteri datâ non in omnibus peccatum abundat, sed in pluribus*.

Silvius eodem modo hæc S. Thomæ verba exponit in 1. 2. q. 106. art. 2. circa finem: *Si dicas, inquit, S. Thomam supra q. 98. art. 2. ad 4. docere, Deum omnibus, saltem aliquando, dare auxilia sufficientia ad salutem, quando ait,*  
*Quam-*

Quamvis lex vetus non sufficeret ad salvandum homines, tamen aderat aliud auxilium à Deo hominibus simul cum lege, per quod salvari poterant, scilicet fides Mediatoris.

Respondeo eum hoc non docere 1. Quia non loquitur de omnibus hominibus, sed de solis illis quibus data erat lex vetus, id est, de solis Israëlitis. Certum est autem quod Deus non pariter gratiam dederit gentilibus in infidelitate relictis, sicut Judæis, juxta illud Psalmi 147. Non fecit taliter omni nationi.

2. Quia illud auxilium, quod dicit adfuisse, erat fides Mediatoris; eam verò fidem non omnibus datam fuisse, tum ex illo 2. Thessal. 3. Non omnium est fides; tum ex parvulis olim inter Judæos sine circumcisione mortuis, & nunc sine baptismo morientibus, tum ex grandioribus citrà ullam Dei cognitionem remanentibus, manifestum est.

3. Quia fides Mediatoris non est absolute sufficiens ad salutem sine charitate & sine gratiâ actuali, operante ut velimus & operemur bonum quod agnoscimus, ac insuper dante perseverantiam.

4. Quia auxilium, quod dicit adfuisse hominibus, non dicit fuisse omnibus datum, sed solum dicit adfuisse. Adfuit autem quatenus Deus constituerat illud dare omnibus illis qui secundum ejus ordinationem circumciderentur, aliosque legis veteris ceremonias, eo modo quo oportebat, observarent; sicuti, imò & longè majori ratione, nunc quodam sensu dici potest, adesse omnibus hominibus à Deo auxilium, quatenus exhibitum est pretium omnibus justificandis

& salvandis sufficiens, & quatenus Deus constituit dare gratiam omnibus Christi Sacramenta ritè suscipientibus; quamvis non propterea sequatur, quod omnibus sine exceptione interius conferatur gratia verè ac propriè sufficiens, cum constet nec fidem nec charitatem omnium animis infundi vel donari; sine quibus tamen nemo salvari potest. Sed Christianis nunc proprium est, quod omnibus illis conferatur gratia in suo genere sufficiens, quando baptismum ritè suscipiunt, & quando caterorum Sacramentorum bonorumve aliorum spiritualium sunt participes; quod tamen præter eam adhuc alia gratia sit ad benè operandum necessaria, q. 109. art. 2. & 9. docet B. Thomas.

Sed si quis hæc S. Thomæ verba de auxilio salutis non solum exhibito, sed etiam dato, & in cordibus Judæorum cum lege difuso, intelligenda esse contenderit: quia scilicet sanctus ille Doctor dicit, auxilium salutis non solum adfuisse, sed etiam à Deo datum esse: Et sic Deus, inquit, non deficiat hominibus, quin daret eis salutis auxilia; tunc S. Thomas non de Judæis omnibus, sed de vocatis secundum propositum, ac de filiis Abrahæ secundum promissionem, seu de veris Israëlitis loqui dicendus est. Iis enim omnibus simul cum lege salutis auxilia, hoc est, fides Mediatoris, & auxilium gratiæ per illam ad implenda legis præcepta collatum, à Deo data sunt, & eorum cordibus per Spiritum sanctum infusa. Nam S. Thomas hæc sa-



lutis auxilia in fide Mediatoris posita, omnibus hominibus cum lege data esse non dicit, nec alios quibus hoc auxilium, quod est fides Mediatoris, datum est, in exemplum adducit, quàm antiquos Patres per eandem fidem iustificatos, aliquos scilicet ex illo Abrahamæ semine, non carnis modò, sed etiam promissionis filios, quibus Deus in lege non defecit, quàm daret eis salutis auxilia: quia, ut ait idem Sanctus in hæc Apostoli verba 4. ad Rom. UT SECUNDUM GRATIAM FIRMA SIT PROMISSIO OMNI SEMINI; *promissio Dei firma est, non quidem per operationes hominum quæ possunt deficere, sed secundum gratiam quæ infallibilis est.* Nec tamen, si eadem salutis auxilia aliquibus aliis, qui filii solùm carnis erant, cum lege data non sunt, Deus iis defecisse dicendus est; quia, ut docet idem Sanctus, ad eos non pertinebant Dei promissa. NON ENIM, inquit Apostolus ad Rom. 9. OMNES QUI SUNT EX ISRAEL, *id est, ut ait idem Sanctus in hæc Apostoli verba, ex Jacob secundum carnem progeniti: HI SUNT VERI ISRAELITÆ: ad quos pertinent Dei promissa; sed illi qui sunt recli & videntes Deum per fidem; seu ut ibidem dicit, qui ex gratiâ promissionis divinæ facti sunt filii Abrahamæ secundum imitationem fidei.*

Ex isto igitur S. Thomæ testimonio, seu de fide Mediatoris cum lege exhibitâ & propositâ, seu de eadem fide intus datâ & cordibus infusâ intelligatur, auxilia salutis interiora, ac verè sufficientia ad iustitiâ fidei & salutem consequendam, omnibus Judæis carnaliter ex Abraham natis data fuisse, & eorum cordibus infusa, colligi nequaquàm potest. Ubique verò contrarium statuit, Lege datâ peccatum in pluribus abundasse asserit, quia perfectio bonæ dispositionis ad legem implendam non est nisi per gratiam, paucis utique in lege veteri non omnibus communem. Dicit eos omnes qui solo timore legem servabant, atque adedò plures ex illo populo carnali, caruisse gratiâ ad eam ex amore servandam inclinante. Denique ista gratiæ divinæ, sine quâ præceptum impleri non potest, omnibus hominibus simul cum lege intus datæ assertio, sic repugnat cum eâ doctrinâ, quam ab eo de lege veteri, & in Summâ, & in Epistolam ad Rom. constanter traditam ostendimus; ut omnia ejus hâc de re principia convellat, qui ex hoc uno loco perperam accepto, eandem gratiam Judæis omnibus secundum carnem, non quidem ex legis virtute, sed simul cum lege intus datam statuere voluerit.

A R T I C U L U S I I I.

*In quo referuntur sensus omnes secundum quos S. Thomas exponit, quomodo Deus velit omnes homines salvos fieri, & ex nullo gratiam sufficientem communem colligi posse ostenditur.*

EX his quæ Sectione primâ diximus, jam satis intelligitur quo sensu S. Thomas Deum velle omnes homines salvos fieri docuerit, & quàm perperam Molinistæ ex hoc argumento gratiam sufficientem S. Thomæ autoritate astruant. Ubi cumque enim sanctus ille Doctor Deum, quantum ex se est, omnibus hominibus gratiam dare asseruit, id semper hæc Apostoli sententiâ confirmavit, *Deus vult omnes homines salvos fieri: Qui vult* (inquit in 12. ad Hebr. lect. 3.) *omnes homines salvos fieri, & ideo gratia nulli deest; sed omnibus, quantum in se est, se communicat.* Similiter lib. 3. contra gentes c. 159. *Deus, quantum in se est, paratus est omnibus gratiam dare: Vult enim omnes homines salvos fieri.* Sic etiam in c. 9. ad Rom. lect. 3. *Obduratio, inquit, non videtur divine voluntati adscribi, cum scriptum sit: Qui vult omnes homines salvos fieri.* Itaque per hanc sententiam, *Deus vult omnes homines salvos fieri*, S. Thomas aliud non intellexit, quàm Deum, quantum est ex se, omnibus gratiam dare, atque ejus negationem semper hominum meritis, nunquàm verò divinæ voluntati adscribendam esse. Postquam ergo ostendimus Sect.

1. S. Thomam per hanc doctri-

nam, Deus, quantum in se est, omnibus gratiam dar, nunquàm intellexisse quòd Deus omnibus in hoc naturæ corruptæ statu gratiam actualem semper intus det; imò eum iisdem in locis expressè contrarium docuisse, consequenter ostendimus S. Thomam nunquàm hanc Apostoli sententiam, *Deus vult omnes homines salvos fieri*, ad gratias actuales omnibus hominibus post peccatum communes astruendas usurpasse, Molinistasque omnibus testimoniis in quibus sanctus ille Doctor dicit, Deum velle omnes homines salvos fieri, penitus abuti, cum ex iis colligunt S. Thomam gratias sufficientes omnibus hominibus post peccatum dari docuisse.

Sed ad clariùs intelligendum quod S. Thomas circa Dei pro omnium salute voluntatem docet, atque ad plenius confutandum quidquid Molinistæ ex hoc argumento pro suâ sententiâ colligere moliantur, referenda est expressa S. Thomæ circa hunc locum expositio, & explicandum præsertim, quid sit apud illum voluntas antecedens, & quàm falsò Molinistæ ex illâ gratiam sufficientem communem stabiliant.

Quatuor potissimum in locis S. Thomas hanc Apostoli sententiam,

tiam,

tiam, *Deus vult omnes homines salvos fieri*, ex professo exponit, varios ejus sensus refert, ac quid sit voluntas antecedens & consequens explicat: scilicet 1. p. q. 19. art. 6. ad 1. In suo Commentario in Epistolas Pauli, in hæc verba 1. ad Tim. 2. *Deus vult omnes homines salvos fieri*, lect. 1. In quæst. disp. de veritate q. 23. quæ est de voluntate Dei art. 2. & in 1. dist. 47. q. 1. art. 1.

1. p. q. 19. art. 6. Quærit, *Utrum voluntas Dei semper impleatur*. Respondet affirmativè, quòd necesse est voluntatem Dei semper impleri. 1. argumentum sic proponit. *Videtur quod voluntas Dei non semper impleatur: dicit enim Apostolus 1. ad Tim. 2. quod Deus vult omnes homines salvos fieri, & ad agnitionem veritatis venire: sed hoc non ita evenit: ergo voluntas Dei non semper impletur*. Sic respondet.

*Ad 1. ergo dicendum, quòd illud verbum Apostoli, quod Deus vult omnes homines salvos fieri, &c. potest tripliciter intelligi. Uno modo, quòd sit accommodata distributio, secundum hunc sensum, Deus vult salvos fieri omnes homines qui salvantur: non quia nullus homo sit quem salvum fieri non velit; sed quia nullus salvus sit, quem non velit salvum fieri, ut dicit Augustinus. Secundo potest intelligi, ut fiat distributio pro generibus singulorum, & non pro singulis generum. Secundum hunc sensum, Deus vult de quolibet statu hominum salvos fieri, mares & feminas, Judæos & Gentiles, parvos & magnos, non sa-*

*men omnes de singulis statibus. Tertiò secundum Damascenum intelligitur de voluntate antecedente, non de voluntate consequente.*

In 1. ad Tim. 2. lect. 1. Præter hos tres sensus, duos alios refert. *Sed contra (inquit) Omnia quæcumque voluit fecit. Sed si dicis quod non, quia homo non vult, videtur inconveniens quod omnipotens impediatur per voluntatem non omnipotentis. Respondeo. Velle ponitur quandoque pro voluntate beneplaciti, quandoque pro voluntate signi. Pro voluntate signi vult salvare omnes, quia omnibus proposuit salutis præcepta, consilia & remedia. Pro voluntate beneplaciti sic exponi potest quatuor modis: uno modo ut sit locutio causalis, sicut Deus dicitur aliquid facere, quia facit alios illud facere: sicut Rom. 8. Spiritus postulat, id est, postulare nos facit. Sic ergo Deus vult, quia scilicet facit suos sanctos velle, quòd omnes salvifiam. Hoc velle enim debet esse in sanctis, quia nesciunt qui sunt predestinati, & qui non. Alio modo, ut sit distributio accommodata, id est, omnes qui salvabuntur, quia nullus salvatur nisi per voluntatem ejus, sicut in unâ scholâ magister docet omnes pueros hujus civitatis, quia nullus docetur nisi ab eo. Alio modo, ut sit distributio pro generibus singulorum, non pro singulis generum, id est, nullum genus hominum excipit à salute; quia olim tantum Judæis, sed modo omnibus præbatur. Et hoc magis facit ad intentionem Apostoli. Alio verò modo, secundum Damascenum, ut intelligatur de voluntate antecedente, non consequente. In quæst. disp. & in 1. dist. 47. hos multiplices sensus non refert, sed solum exponit quid sit voluntas antecedens & consequens.*

Ex his quinque sensibus, secundum quos S. Thomas hanc sententiam exponit, *Deus vult omnes homines salvos fieri*, manifestum est esse quatuor ex quibus nullo modo colligi potest Deum omnibus gratias sufficientes semper dare, & id ex solâ voluntate antecedente inferri posse. Si ergo probatum fuerit ex voluntate antecedente id minimè sequi, con-

cludendum erit ex his quæ S. Thomas de voluntate Dei circa omnium salutem docet, gratias sufficientes omnibus hominibus communes nullo modo astrui posse. Id autem ex voluntate antecedente minimè sequi facillè intelliget quisquis attendere voluerit, quid sit apud S. Thomam voluntas antecedens & consequens.

# ARTICULUS IV.

*In quo exponitur, quid sit apud S. Thomam voluntas antecedens & consequens, atque ex voluntate antecedente gratiam sufficientem omnibus communem astrui non posse ostenditur.*

**S**ANCTUS THOMAS 1. p. q. 19. art. 6. ad 1. Quid sit voluntas antecedens & consequens sic exponit.

Tertiò secundum Damascenum intelligitur de voluntate antecedente, non de voluntate consequente: quæ quidem distinctio non accipitur ex parte ipsius voluntatis divinæ, in quâ nihil est prius vel posterius, sed ex parte volutorum. Ad cuius intellectum considerandum est, quod unumquodque secundum quod bonum est, sic est volitum à Deo. Aliquid autem potest esse in primâ sui consideratione, secundum quod absolute consideratur, bonum vel malum; quod tamen prout cum aliquo adjuncto consideratur (quæ est consequens consideratio ejus) è contrario se habet. Sicut hominem vivere est bonum, & hominem occidi est malum, secundum absolutam considerationem: sed si addatur circa aliquem hominem, quod sit homicida, vel vivens in periculum multitudinis, sic bonum est eum occidi, & malum est eum vivere. Unde potest dici quod Iudex justus antecede-

nter vult omnem hominem vivere, sed consequenter vult homicidam suspendi. Similiter Deus antecederet vult omnem hominem salvari, sed consequenter vult quosdam damnari secundum exigentiam suæ justitiæ. Neque tamen id quod antecederet volumus, simpliciter volumus, sed secundum quid; quia voluntas comparatur ad res secundum quod in seipsis sunt; in seipsis autem sunt in particulari: unde simpliciter volumus aliquid, secundum quod volumus illud, consideratis omnibus circumstantiis particularibus: quod est consequenter velle. Unde potest dici quod Iudex justus simpliciter vult homicidam suspendi; sed secundum quid vellet eum vivere, scilicet in quantum est homo. Unde magis potest dici velleitas, quam absoluta voluntas. Et sic patet quod quicquid Deus simpliciter vult, fit; licet illud quod antecederet vult, non fiat.

Et in 1. Tim. 2. lect. 1. hæc habet. Alio verò modo secundum Damascenum, ut intelligatur de voluntate antecedente, non consequente. In voluntate

luntate enim Dei licet non sit prius & posterius, dicitur tamen voluntas antecedens & consequens. Item secundum ordinem volitorum, secundum quod voluntas potest dupliciter considerari, scilicet in universali vel absolute; & secundum aliquas circumstantias & in particulari. Et prius est absoluta consideratio & in universali, quam in particulari & comparata. Et ideo voluntas absoluta est quasi antecedens, & voluntas alicujus rei in particulari est quasi consequens. Exemplum de mercatore qui vult omnes merces suas salvare absolute, & hoc voluntate antecedente. Sed si consideret salutem, non vult omnes merces per comparationem ad alia salvare, scilicet quando cum salute sequitur submersio navis: & hæc voluntas est consequens. Sic in Deo salus omnium hominum in se considerata habet rationem ut sit volibilis, & Apostolus hic ita loquitur: & sic ejus voluntas est antecedens: sed si consideretur bonum justitiæ, & quod peccata puniantur, sic non vult: & hæc est voluntas consequens.

In quæst. disp. q. 23. de voluntate Dei art. 2. in quo quæritur, Num divina voluntas in antecedentem & consequentem dividatur: sic eam exponit. Et similiter est considerandum in operatione Dei, quâ operatur in creaturis. Quamvis enim ipse in sua operatione materiam non requirat, & res à principio creaverit nullâ materiâ præexistente; nunc tamen operatur in rebus quas primò creavit, eis administrans, præsuppositâ naturâ quam prius eis dedit. Et quamvis posset à creaturâ omne impedimentum auferre, quo perfectionis incapaces existunt; tamen secundum ordinem suæ sapientiæ disponit de rebus secundum eorum conditionem, ut unicuique tribuat secundum modum suum. Illud ergo ad quod Deus Creaturam ordinavit, quantum

est de se, dicitur esse volitum ab eo, quasi primâ intentione, seu voluntate antecedente: sed quantum creatura impeditur propter sui defectum ab hoc fine, nihilominus tamen Deus implet in eâ id bonitatis cujus est capax; & hoc est quasi de secunda intentione ejus, & dicitur voluntas consequens. Quia ergo Deus omnes homines propter beatitudinem fecit, dicitur voluntate antecedente omnium salutem velle; sed quia quidam suæ salutis adversantur, quos ordo suæ sapientiæ ad salutem venire non patitur propter eorum defectum, implet in eis alio modo, id quod ad suam bonitatem pertinet, scilicet eos per justitiam damnans, ut sic dum à primo ordine voluntatis deficiunt, in secundum labantur, & dum Dei voluntatem non faciunt, impleatur in eis voluntas Dei. Ipse autem defectus peccati, quo aliquis redditur dignus pœnâ in præsentem vel in futuro, non est volitus à Deo, neque à voluntate antecedente, neque consequente, sed est ab eo solummodo permissus. Nec tamen intelligendum est ex prædictis, quod intentio Dei frustrari possit, quia istum qui non salvatur præscribit ab æterno fore non salvandum: nec ordinat ipsum in salutem secundum ordinem predestinationis, qui est ordo absolute voluntatis; sed quantum ex parte sua est, dedit ei naturam ad beatitudinem ordinatam.

Deinde art. 3. in quo quæritur, Num Dei voluntas dividatur in beneplaciti & signi voluntatem: hæc habet. Invenitur enim in Deo propriè ratio voluntatis, ut supra dictum est; & sic voluntas de Deo propriè dicitur, & hæc est voluntas beneplaciti, quæ per antecedentem & consequentem distinguitur, ut dictum est.

Denique in 1. dist. 47. q. 1. art. 1. Respondeo dicendum, quod quidquid vult Deus voluntate consequente

quente, totum fuit; non autem quidquid vult voluntate antecedente, quia hoc non simpliciter vult, etiam perfecte, sed secundum quid tantum; nec ista imperfectio est ex parte voluntatis, sed ex conditione voluti. Est enim à contrario de voluntate & cognitione speculativa. Cognitionis enim speculativa perficitur in abstractione à singularibus: sed voluntas, & quidquid aliud est ordinatum ad opus, perficitur in particulari circa quod est operatio. Illud ergo est simpliciter & perfecte volitum, quod subiacet voluntati, secundum omnes particulares conditiones circumstantes ipsum particulare, & hoc pertinet ad voluntatem consequentem, quæ respicit opera & dispositiones quibus aliquis sufficienter ordinatur ad hoc quod sit sibi conveniens debitum hoc quod dicitur Deus velle, ut saltem vel ad huiusmodi: & ideo talis voluntas non potest impediri, sicut nec præscientia cui subijcitur res secundum illas conditiones quibus in actu consistit. Illud autem quod est rectum & bonum secundum aliquam conditionem rei universalem consideratam, non habet rationem voluti simpliciter, sed secundum quid tantum; sicut istum hominem, in quantum est homo, non est nisi bonum salvari, eo quod natura sua ad hoc est ordinata, & hoc Deus vult voluntate antecedente, secundum quam non dicitur aliquid velle simpliciter; & ideo talis voluntas potest non impleri. Hæc sunt quæ S. Thomas de voluntate antecedente & consequente variis in locis habet.

Ex his testimoniis certum est, primum juxta S. Thomam voluntatem antecedentem ad voluntatem beneplaciti referri; cum illud expresse dicat q. 23. de voluntate Dei art. 3. mox citato. Et hæc est, inquit, voluntas bene-

placiti, quæ per antecedentem & consequentem distinguitur, ut dictum est. (scilicet art. 2.) Sic pariter in 1. ad Tim. 2. dicit Apostoli verba pro voluntate beneplaciti exponi posse quatuor modis: Quartus autem modus est, inquit, ut intelligatur de voluntate antecedente & consequente. Et in 1. dist. 47. q. 1. art. 2. possumus ergo loqui de voluntate vel beneplaciti vel signi, & de voluntate beneplaciti vel consequente vel antecedente, illa tamen licet sit voluntas beneplaciti, est velleitas potius quam absoluta voluntas, & per hanc Deus non vult simpliciter, sed solum secundum quid, quare non semper impletur: ac proinde cum voluntas beneplaciti semper impleri dicitur, ea intelligenda est, quæ est absoluta, & per quam Deus vult simpliciter, qualis est consequens, non verò ea quæ est potius velleitas, & per quam Deus non vult aliquid simpliciter, sed secundum quid, qualis est antecedens.

Secundò sequitur ex hac doctrina quòd juxta S. Thomam, voluntas antecedens est propriè & formaliter in Deo, non verò impropriè & eminenter: sicut in Judice propriè & formaliter est illa voluntas, quæ homicidam, quem vult simpliciter suspendi, secundum quid velle vivere, scilicet in quantum est homo. Hoc in doctrinâ S. Thomæ certum est; quia omnis voluntas beneplaciti est propriè & formaliter in Deo, ac sola voluntas signi non invenitur propriè in Deo,

Deo, sed solùm improprie & metaphoricè, sicut docet art. 3. citato. *Esic voluntas*, inquit, *de Deo proprie dicitur, & hæc est voluntas beneplaciti, quæ per antecedentem & consequentem distinguitur.* Similiter 1. p. quæst. 19. art. 11. *Voluntas autem proprie de Deo dicitur, & in Deo distinguitur voluntas proprie & metaphoricè dicta. Voluntas enim proprie dicta vocatur voluntas beneplaciti; voluntas autem metaphoricè dicta, est voluntas signi, eo quòd ipsum signum voluntatis voluntas dicitur.*

Observandum tamen est à gravissimis Theologis asseri voluntatem antecedentem non esse proprie & formaliter in Deo, sed solùm eminenter. Bannez in 1. p. q. 19. art. 6. utrumque probabiliter sustinet, & multis rationibus confirmat. Concludit tamen multò probabiliùs dici quòd sit solùm eminenter in Deo. Estius in 1. dist. 46. §. 3. pag. 223. asserit ac probat non esse in Deo proprie & formaliter, sed solùm improprie & eminenter.

S. Thomæ doctrinam circa hanc quæstionem exposui, quia P. Nicolai in suis Theſibus objicit S. Augustini discipulis, quòd voluntatem antecedentem ad voluntatem signi, non verò ad voluntatem beneplaciti referant; quasi per voluntatem antecedentem gratiam sufficientem non conferri ex hoc concludant, quòd illa sit voluntas signi, non autem beneplaciti. Minimè verò id inde concludunt, sed ex propria naturâ voluntatis antecedentis,

quanquàm illa ad voluntatem beneplaciti referatur, sicut reverà ex certâ S. Thomæ doctrinâ ad eam refertur.

Assero ergo, juxta certam S. Thomæ doctrinam his testimoniis contentam, Deum per voluntatem antecedentem nihil circa hominum in hoc naturæ corruptæ statu existentium salutem simpliciter velle, nihil penitus operari, & nullum medium præparare, ac nullam gratiam, nullumque auxilium conferre. Atque ita ex voluntate Dei antecedente, circa omnium salutem à S. Thomâ positâ, colligi non posse Deum omnibus hominibus gratiam sufficientem ad vitandum peccatum & ad præceptum implendum dare. Illud hoc argumento facillimè ostenditur.

Voluntas Dei antecedens pro salute omnium, de quâ loquitur S. Thomas, nihil est aliud quàm velleitas quædam, quæ solùm naturam humanam secundum rationem generalem naturæ, & ut à Deo ad salutem condita est, respicit sine ullâ peccati consideratione, & quæ naturam in particulari, & ut est per primi hominis peccatum corrupta, non considerat: quia *voluntas*, ut inquit S. Thomas 1. p. q. 19. art. 6. *comparatur ad res secundum quod in seipsis sunt: in seipsis autem sunt in particulari. Unde simpliciter volumus aliquid secundum quod volumus illud inconsideratis circumstantiis omnibus particularibus: quod est consequenter velle.* Ex quo concludit, solam consequentem voluntatem



ratem esse voluntatem absolutam, & per quam Deus vult simpliciter. Atqui voluntas per quam Deus hominibus in hoc statu naturæ corruptæ media necessaria ad salutem præparat & confert, & gratias aliquas dare decernit, non est illa voluntas per quam Deus naturam humanam generaliter in se, & ut est à Deo condita, respicit: sed est voluntas per quam Deus respicit homines in particulari, ut sunt in seipsis, secundum conditiones quæ illos circumstant, & ut naturam habent per primi hominis peccatum corruptam ac damnationi obnoxiam. Ergo Deus per voluntatem antecedentem nulla hominibus in hoc statu ad salutem media præparat ac confert, ac nullas eis gratias dare decernit, nihilque penitus circa eorum salutem operatur.

Præterea per eam solam voluntatem Deus operatur in hominibus quæ ad eorum salutem conducunt, per quam illa simpliciter vult. Cum enim quidquid simpliciter vult, semper impleatur, nihil simpliciter vult quin aliquid operetur, vel saltem quin fieri permittat; nihil etiam operatur, quin illud simpliciter velit. Atqui Deus per voluntatem antecedentem nihil vult simpliciter eorum quæ ad hominum salutem conducunt: quia Deus ea quæ vult per voluntatem antecedentem, non vult simpliciter, sed solum secundum quid; & circa illa habet solum velleitatem, non verò absolutam vo-

luntatem. Ergo Deus per voluntatem antecedentem nihil operatur eorum quæ ad hominum salutem conducunt, ac proinde nullas gratias confert. Et hoc habet S. Thomas in 1. dist. 47. q. 1. art. 2. cum docet quoddam operatio non respondet voluntati antecedenti, sed consequenti. *Sed alia duo signa, inquit, scilicet permissio & operatio respondent voluntati consequenti.* Quod significat Deum nihil operari, nec fieri permittere, nisi ex voluntate consequente.

Deinde S. Thomas comparat voluntatem Dei antecedentem circa omnium salutem, voluntati Judicis justī, qui simpliciter vult homicidam suspendi; sed secundum quid vellet eum vivere, scilicet in quantum homo est. Sicut ergo Judex ex hac voluntate, quā vellet homicidam vivere, nulla ei media præparat quibus capitis poenam evadere possit; ita Deus eā voluntate, quā vellet omnes homines salvari, in quantum ex parte suā dedit eis naturam ad beatitudinem ordinatam, nulla eis media præparat, ac nullas gratias decernit, quibus salutem consequi possint.

Denique ex illā voluntate antecedente media ad salutem necessaria non præparati, confirmat exemplum parvulorum in utero materno sine baptismo decedentium. Et si enim ex S. Thomā Deus velit voluntate antecedente illos salvari; nunquam tamen docuit S. Thomas media illis ad salutem & baptismi susceptionem

necessaria, vi hujus voluntatis à Deo decerni.

Quare non est voluntas antecedens, sed consequens, quæ præparat & confert media necessaria ad salutem hominum qui salvantur. Nec dicitur voluntas antecedens ex hoc quòd omnia hominum merita antecedit, & consequens ex hoc quod sequatur prævisionem meritorum: sed antecedens dicitur, quia præcedit considerationem rerum, ut sunt in particulari, estque simplex vellex respiciens rex in generali, ex quâ nullus effectus sequitur, ac nullum medium decernitur ad id consequendum quod Deus hoc modo vult. Voluntas autem consequens includit omnem voluntatem producentem effectum aliquem, diciturque consequens, quia sequitur considerationem rerum ut sunt in seipsis, & secundum suas circumstantias particulares. Atque ita duplex est in Deo voluntas consequens, alia justitiæ, alia misericordiæ: & quia Deus justus neminem sine merito punit ac damnat, voluntas consequens justitiæ, non ob rationem generalem voluntatis consequentis, sed ob rationem voluntatis quæ est ex justitiâ, supponit semper in iis qui damnantur merita eorum damnationis, scilicet peccatum originale vel actuale: sed voluntas consequens misericordiæ, quæ salutem electorum respicit, non supponit in eis ullorum meritorum prævisionem, quia ante gratiam nulla sunt merita, cum ipsa sit causa

& origo meritorum omnium.

Itaque ex voluntate illâ antecedente salvandi omnes homines, nulla media, nullæ gratiæ ad salutem hominibus, ut sunt, præparantur & conferuntur: quia voluntas antecedens respicit solum naturam, ut est à Deo condita. In quantum autem natura post peccatum originale consideratur, vel Deus vult homines aliquos salvari, & ex vi hujus voluntatis, quæ consequens dicitur, præparat illis omnia beneficia ad salutem necessaria, quibus certissimè liberentur, & ad vitam æternam perveniant; sicut docet S. Thomas: *Sub prædestinatione*, inquit int 8. ad Rom. lect. 6. *cadit omne beneficium salutare, quod est homini ab eterno divinitus preparatum.* Et infra: *Vocatio est efficax in prædestinatis, & justificatio nunquam in eis frustratur.* Et qq. disp. de veritate q. 6. de prædestinatione art. 3. *Librum arbitrium potest deficere à salute; tamen in eo quem Deus prædestinat tot alia adminicula præparat, quòd vel non cadat, vel si cadat quòd resurgat, sicut exhortationes & suffragia orationum, donum gratia, & alia hujusmodi, quibus Deus adminiculatur homini ad salutem.* Quod etiam S. Augustinus expressè dicit de corrept. & grat. c. 17. his verbis: *Quicumque ab illâ originali damnatione istâ divine gratiæ largitate discreti sunt, non est dubium quòd & procuratur eis audiendum Evangelium, & cum audiunt credunt, &c.* Vel Deus non vult aliquos salvari & à malsâ perditionis,

ditionis, per peccatum originale factâ etui, & illis non præparat media omnia ad salutem necessaria, sive eis non procurando lavacri gratiam, antequàm ex hac vitâ exeant, si parvuli sint; ac si adulti sint, non procurando eis Evangelium prædicari, seu non dando gratiam quâ credant, seu non dando gratiam quâ usque ad mortem in fide Christi & charitate perseverent, ut dicit idem S. Augustinus eodem cap. 7. de corrept. & grat. *Ac per hoc, inquit, & qui Evangelium non audierunt, & qui eo audito in melius commutati perseverantiam non acceperunt, &c. non sunt ab illâ conspersione discreti, quam constat esse damnatam.* Et tamen vult eos omnes voluntate illâ antecedente salvari, ratione humanæ naturæ quam ad salutem fecit, non considerando particulares condiciones quæ ipsam circumstant, puta quod sit per peccatum primi hominis corrupta, & damnationi obnoxia: iis autem qui credunt & non perseverant usque in finem, dat quidem multa gratiæ efficacis beneficia ex voluntate consequente, non quâ simpliciter & absolutè velit eos salvari, sed quâ vult simpliciter eos ad tempus credere, & præsentem iustitiam habere. Secundum ergo divinam providentiam, inquit S. Thomas quodlib. 3. art. 11. ad 7. *quibusdam datur donum gratia ad præsentem iustitiam, & tamen non datur eis donum perseverantia. Quod eo præcipuè sine ita Deus ordinavit, inquit S. Augu-*

*stinus de corrept. & grat. c. 13. ne fortè quis extollatur, sed omnes etiam qui benè currunt timeant, dum occultum est qui perveniant. Propter ergo huius utilitatem secreti credendum est quosdam de filiis perditionis, non accepto dono perseverandi usque in finem in fide, quæ per dilectionem operatur, incipere vivere, & aliquandiu fideliter ac justè vivere, & postea cadere, neque de hac vitâ priusquam hoc eis contingat auferri.* Ergo ex S. Thomæ circa voluntatem Dei pro omnium hominum salute doctrinâ, gratia sufficiens communis astrui nullo modo potest, sive considerentur ea quæ de antecedente & consequente voluntate docuit, sive alii modi, secundum quos exposuit illud Apostoli, *Deus vult omnes homines salvos fieri.*

Circa hanc autem de voluntate Dei antecedente pro omnium hominum salute doctrinam, S. Rhemigius Archiepiscopus Lugdunensis, & eadem Ecclesia in lib. de tribus Epistolis c. 11. 12. & 13. monent cavendum esse maximè, ne per hanc expositionem falso & Pelagiano sensui occasio præbeat. Scilicet tradunt quatuor modos, à S. Thomâ allatos, intelligendi huius Apostolici dicti, *Deus vult omnes homines salvos fieri.* 1. De generibus singulorum. 2. Per id quod nullus nisi Deo volente salvatur. 3. Per id quod Deus facit sanctos velle & optare ut omnes salvetur. Quartum modum sic exponunt: *Ita sit ut, etiam si secundum pium quorundam Patrum piorum sensum, Deus vult om-*

nes homines salvos fieri, bonitate Creatoris, quâ Creaturam suam benè à se conditam perire non vult, id ipsum iterum nolit Judicis equitate, quâ eandem Creaturam suam vel originali vel etiam actuali peccato nequiter inquinatam & vitiatam, impunitam esse non sinit. Qui quartus modus cum dictis à S. Thomâ de voluntate antecedente convenit. De hoc sic loquuntur: *In tribus itaque prioribus modis, & vera omnino, & salubris intelligentia est: in quarto autem modo illud sine dubio cavendum, quia & occasionem Pelagianæ pravitati præbet, quòd Deum ut salvet homines humanas expectare asserit voluntates. Et infra: Quod autem illi simpliciter intelligitur, Deum omnes homines velle salvos fieri, bonitate scilicet Creatoris; ita, ut putamus, fideliter potest recipi, si hanc voluntatem bonitatis suæ erga salutem hominum non credat, humanâ obistente voluntate, implere non posse, sed obistente humanâ iniquitate implere nolle.*

Itaque, juxta hujus Ecclesiæ doctrinam, voluntas hæc generalis & antecedens, quæ & conditionata dicitur, potest duobus modis intelligi, alio vero & Catholico, alio falso & Pelagiano. Verus & Catholicus est, Quod, ut inquit Petavius Theolog. dogm. tomo 1. l. 9. c. 7. *Deus vellet omnes homines salvos fieri, nisi eos primi culpa parentis odiosos fecisset.* Falsus & Pelagianus est, quòd Deus, quantum est ex se, homines, etiam ut per primi hominis peccatum sunt corrupti, confide-

rans, habet veram & efficacem voluntatem salvandi omnes homines, si ipsi velint; ex hac voluntate eis media necessaria & gratias sufficientes confert ut salventur, & in ipsorum nutu est ut iis utantur & per eas salventur. Unde fit ut, cum omnes non velint iis uti & salvari, Dei voluntas in multis non impleatur, & sit sine effectu; imò non magis impleatur in prædestinatis, quàm in reprobis: quia juxta hanc sententiam, nulla est alia Dei voluntas circa prædestinatos, quàm ut salventur si velint, quæ eadem est circa reprobos: tam reprobi autem quàm prædestinati salvantur si velint, nec contingit prædestinatos potius salvari quàm reprobos ob diversitatem voluntatis Dei, quæ in se eadem est circa horum & illorum salutem, sed ex diversitate voluntatis hominum, quia scilicet Deo volente æqualiter utrosque salvate, alius vult salvari, & alius non vult. Et hic sensus falsus & Pelagianus est, quia necessariò supponit, quòd Deus expectat hominum voluntates, nec in eis motum bonum ipse per suam gratiam operatur; quòdque voluntas Dei eorum salutis causa non est. Quæ doctrina, à Concilio Arausicano can. 4. damnata, est universæ S. Thomæ de divinâ prædestinatione, voluntate & gratiâ doctrinæ contraria, totisque S. Augustini libris de errore convicta.

Id S. Fulgentius cum aliis quindecim Africæ Episcopis in lib. de Incarnat. & Grat. ad Petrum Diaconum,

eorum, & alios ex Oriente Romanam fidei causam missos, expressè refutat cap. 29. asseritque eos falsi, nec considerare quæ Scriptura de divinæ voluntaris omnipotentia dicit, qui existimant divinam voluntatem æqualiter se habere erga salvandos & damnandos. Hæc sunt horum sexdecim Episcoporum verba: Illud verò Apostolicum, ubi dicitur de Deo, Qui vult omnes homines salvos fieri, & ad agnitionem veritatis venire, non sicut oportet intelligunt, qui hanc Dei voluntatem sicut in vasis misericordia, sic & in vasis iræ accipiendam existimant, minus considerantes veracissimam Scripturæ sententiam, quæ divinæ commendans omnipotentiam voluntatis, Omnia, inquit, quæcumque voluit fecit in cælo & in terrâ, in mari & in omnibus abyssis.

Rectissimè Estius annotavit hunc sensum esse Pelagii: Sciendum est, inquit in 1. Ep. ad Tim. c. 2. nonnullos Apostolicam sententiam hoc modo interpretari, Qui vult omnes homines salvos fieri, mo-

dò ut ipsi velint. Huiusmodi enim conditionem in verbis Apostoli latere existimant Ambrosiaster & Pelagius: ab his reipsa non dissentiant, qui sententiam ad hunc modum suppleant; Qui vult, quantum in ipso est, omnes homines salvos fieri. Dicunt enim Deum omnibus hominibus suppeditare media sufficientia ad salutem consequendam; atque id volunt in his Apostoli verbis significatum esse.

Rectissimè etiam idem Theologus in 1. dist. 46. §. 2. Non debemus, inquit, in Deo imaginari, sicut est in hominibus, voluntatem, studium, conatum aliquem quo velit, studeat, nitatur, & quantum in ipso est, agat ut omnes homines salventur, quod tamen propterea non assequatur, quia bonæ ejus voluntati obsistit mala voluntas hominum, quâ prevalente atque impediende frustratur voluntas Dei: quæ opinio & potentiæ divinæ detrahit & felicitati. Nam si non potest Deus quod vult, impotens est; se non assequitur quod optat, infelix est & miser.

## ARTICULUS V.

*In quo ostenditur ex iis quæ S. Thomas docet de morte Christi pro omnibus, quantum ad sufficientiam, gratiam sufficientem communem astrui non posse.*

**M**iror eorum in S. Thomæ doctrinâ inquirendâ oscitantiam, qui ex his quæ de sufficientiâ mortis Christi pro omnium hominum salute, & omnium peccatorum delezione docet, gratiam Christi actualem, quam suffi-

cientem vocant, in omnes homines transfundi intulerunt, & etiam in fidei dogma ex morte Christi pro omnibus consequens transformarunt. Investigabo quidquid S. Thomas hac de re tractavit. Proponam primum

quæ in libris in Sententias, deinde quæ in Commentario in Pauli Epistolas, demùm quæ in Summa habet; ostendamque, Christum mortuum esse pro omnibus quoad sufficientiam, juxta S. Thomam nihil aliud esse, quàm mortem Christi habere in se virtutem ad omnes homines salvandos & omnia peccata delenda sufficientem; &, Christum sufficienter per mortem suam mereri & operari, nihil aliud esse, quàm ejus mortem habere in se tantam merendi & operandi virtutem, quanta requiritur.

In 3. dist. 19. q. 1. art. 1. in quo quaerit, *Utrum per passionem Christi simus liberati à peccato*, ad 1. quaestionem sic respondet. *Solus Christus aliis potest sufficienter mereri; quia potest in naturam, in quantum Deus est, & charitas sua quodammodo est infinita, si. ut & gratia, ut supra dictum est: in hoc autem pro totâ naturâ meruit, in quo debitum naturæ, scilicet mortis, quæ pro peccato ei debebatur, exsolvit ipse peccatum non habens; ut sic non pro se mortem solvere teneretur, sed pro naturâ solveret: unde satisfaciendo pro totâ naturâ, sufficienter meruit peccatorum remissionem aliis qui peccata habebant.*

Deinde ad 4. *Christus, in quantum nobis influxit per meritum, dicitur caput nostrum, ut supra dictum est. Ex capite autem non recipitur influxus in membris divisis, sed in membris conjunctis capiti, quantumcumque caput ex se sufficiens sit ad influendum. Unde, quamvis meritum Christi sit sufficiens ad delendum pec-*

*cata, tamen ad efficientiam deletionis requiruntur ea quæ capiti conjungunt: hujusmodi autem sunt fides & charitas; & idè Magister assignat fidem passionis & charitatem, quasi causæ efficientiæ deletionis culpæ: causam tamen sufficientiæ assignat in hoc quod dicit, quod mors Christi est verum sacrificium per quod peccata delentur. Unde quamvis ex aliis beneficiis, & sanctorum exemplis charitas excitetur; non tamen conjungit merito sufficienti ad culpæ deletionem, in quantum ex eis excitatur, sed in quantum excitatur ex passione Christi.*

Ex hoc loco, caput ex se sufficiens esse ad influendum in omnia membra, non est influxum habere in omnia membra, seu conjuncta sint, seu divisa, sed est habere in se virtutem influendi in omnia; sic tamen ut influxum habeat in ea solùm quæ conjuncta sunt. Pariter ergo, meritum Christi esse sufficiens ad delenda peccata, non est Christum ut caput influere in omnes homines, sed habere ex se virtutem influendi in omnes, licet influxum solùm habeat in aliquos per fidem & charitatem, per quæ homines illi ut capiti conjunguntur. Itaque, Christi meritum esse sufficiens ad delenda omnia peccata & ad salvandum omnes homines, non est Christum efficienter mereri ut actu communicentur omnibus gratiæ actuales ad peccatorum remissionem, & ad salutem sufficientes; quod non sit sine influxu actuali Christi: sed nihil aliud est quàm meritum

Christi

Christi habere in se vim ac virtutem delendi omnia peccata, & salvandi omnes homines: aded ut quicumque Christo per fidem & Sacramenta conjungitur, ejus meriti effectum in se recipiat.

Id expresse dicit in responsione ad 2. quæstionem. *Dicendum*, inquit, quod ad hoc quod aliquid in alterum effectum inducere possit, duo requiruntur; unum ex parte agentis, scilicet quod habeat virtutem sufficientem ad inducendum illum effectum: alterum ex parte recipientis, ut scilicet dispositum sit ad suscipiendum actionem. Christi autem, qui in nobis meruit deletionem peccatorum, invenitur sufficientia ad delendum omnia peccata nostra ex duobus, scilicet ex actione, in qua meritum consistit, quæ agit vi divinâ, eo quod est actio Dei & hominis, ut dictum est; & ex hoc habet infinitam in merendo efficaciam: & iterum ex eo quod passio abstulit, scilicet animam Deo unitam; quæ etiam habebat infinitum valorem, ex hoc quod est Deo unita, & ex hoc est infinita efficacia in satisfaciendo. Ex parte autem nostra requiritur, ut nos preparemus ad meriti Christi effectum in nobis suscipiendum per fidem intellectus, & charitatem affectus, & per imitationem operis; quod quidem non contingit in omnibus: & ided quoad sufficientiam satisfactionis & meriti, omnia peccata per Christi passionem deleta sunt; non autem quantum ad efficientiam.

Ex hoc loco sufficientia Christi ad deletionem peccatorum est solum ex parte Christi, ut habentis in se virtutem sufficientem ob

unionem verbi ad delendum peccata, non autem ut dantis hominibus gratias aliquas actuales: nec etiam est ex parte hominum gratiam recipientium; sed hoc quod est Christum mereri ac dare aliquas gratias salutares hominibus, & homines eas recipere, pertinet ad efficientiam meriti Christi. Cum enim omnes gratiæ Christi, seu sufficientes, seu efficaces, sint effectus meriti Christi, quoties aliquis darur, id meritum Christi non solum sufficienter, sed etiam efficienter operatur.

Ibidem infra: *Ad 1. dicendum*, inquit, quod in illis qui damnantur est indispositio ad recipiendum effectum meriti Christi: unde ex hoc contingit quod eorum peccata non delentur, non ex insufficientiâ meriti Christi.

Et ad 3. dicendum quod passio Christi, quantum ad sufficientiam, potest delere peccata, etiam antequam fiant; sed efficientia deletionis non est nisi postquam aliquis à peccato commissio convertitur: sicut medicina sufficiens ad sanandum paratur interdum antequam aliquis infirmetur, sed non sanatur per ipsam actum, nisi postquam infirmus fuerit.

Ex his etiam patet, meritum Christi esse sufficiens, & passionem ejus habere sufficientiam, nihil aliud esse, quam in se habere virtutem quanta requiritur: siquidem dicitur sufficiens, etiam quoad peccata quæ non sunt, sicut medicina dicitur sufficiens ad sanandum alicujus morbum qui nondum est.



Art. 2. in c. Potestatem igitur diaboli, quâ viſios detinet, Chriſtus per paſſionem ex toto amovit, quantum ad ſufficientiam, licet non quantum ad efficientiam, niſi in illis qui vim paſſionis ſuſcipiunt per fidem, charitatem & Sacramenta: & per hoc dicitur dominium diaboli evaſſe; ſed poteſtatem quâ impugnat non ex toto evaſſavit, ſed debilitavit dum ipſum hoſtem vicit, & hominibus auxilia multa ad reſiſtendum tribuit, ſicut Sacramenta, gratiam abundantiore, & alia huiusmodi. Hoc etiam nihil aliud ſignificat, niſi paſſionem Chriſti in ſe habere virtutem amovendi poteſtatem diaboli, ita ut eam in omnibus qui vim ejus ſuſcipiunt per fidem & charitatem, actu ſeu efficienter amoveat. Cum dicit autem, Chriſtum per ſuam paſſionem multa auxilia, puta Sacramenta, gratiam abundantiore, & alia hominibus tribuiſſe, nihil ſignificat, niſi ea parata eſſe omnibus hominibus per ejus mortem, & multis dari. Si enim hoc eſſet, Chriſtum per paſſionem ſuam ſingulis gratiam abundantiore communicare, dicendum foret etiam ſingulis Sacramenta per ejus mortem conferri, quod omnino falſum eſt. Quot enim parvuli & adulti ſine baptiſmi Sacramento deſcendunt?

Deinde ad 4. Dicendum, inquit, quòd hoc quòd Idolatra adhuc manent ſub ſervitute demonis, contingit ex eo quòd auxilia quæ ſunt ex paſſione Chriſti, accipere negligunt.

Et ad 5. Dicendum quòd multitudo malorum, quæ erunt in ultimis

temporibus, non erit ex hoc quòd virius paſſionis Chriſti deſiciat; ſed quia armaturam Dei, quâ armati ſunt per paſſionem Chriſti, abjicient, vel contemnent; quia refrigeſcet charitas multorum: & ideo non eſt mirum ſi devincantur: hoc eſt, fidem & Sacramenta & alia remedia, ſeu auxilia per Chriſtum parata, abjicient & contemnent.

Art. 3. ad 1. quæſtionem: Chriſtus igitur per paſſionem ſuam à pœnâ aternâ quæ debetur originali (peccato) quod omnes contrahunt, dupliciter abſolvit, ſcilicet auſerendo reatum, quantum ad illos qui participes efficiebantur redemptionis ejus, & adhuc vivebant, & auſerendo pœnam quantum ad illos qui mortui erant: ab omnibus quidem, quantum ad ſufficientiam; ſed quantum ad efficientiam ab illis in quibus nullum inveniebatur. Quid eſt autem, Chriſtum pœnam peccati originalis, quæ conſiſtit in carentia viſionis divinæ, ab omnibus qui mortui erant, auſerre quantum ad ſufficientiam? Eſt ne dare omnibus mortuis media ſufficientia ad viſionem Dei conſequendam? Quid abſurdius? Sed eſt, paſſionem Chriſti habuiſſe in ſe virtutem ſufficientem ad omnes mortuos ab hac pœnâ abſolvendos, à quâ eos ſolum, in quibus nullum peccatum inveniebatur, efficienter abſolvit.

Ad 2. quæſtionem oſtendit quod mors Chriſti liberat à pœnâ temporali ſufficienter, quantum ad omnes, non autem efficienter, niſi quantum ad eos qui ejus paſſionis participes ſunt; ita ut ra-

men

men solum in fine mundi ab omnibus sanctis pœnæ omnes auferendæ sint. Hæc autem sufficientia solam virtutem liberandi ab omni pœnâ mortis Christi inexistenter significat.

Quartum autem argumentum sic proponit: *Positâ causâ sufficienti ponitur effectus: sed adhuc in illis qui vim passionis Christi omnibus modis in se excipiunt, manet pœna temporalis: ergo passio Christi non liberat à pœnâ temporali.* Sic respondet.

Ad 4. *Dicendum, quod in causis quæ agunt ex ordinatione sapientie, non est necessarium quod positâ causâ statim ponatur effectus; sed tunc effectus ponitur, quando sapientie ordo requirit: & taliter agit passio Christi.* Similiter ergo, licet passio Christi sit causa sufficiens omnium gratiarum quæ hominibus dantur, tamen non est necesse positâ causâ poni hunc effectum, alicujus scilicet gratiæ communicationem: sed tunc effectus ille ponitur, hoc est, gratia aliqua actualis datur, quando sapientie ordo requirit. Atque ita sicut passio Christi est causa sufficiens liberationis ab omni peccato & ab omni pœnâ quoad omnes, propter virtutem liberandi, licet actu nec omnia peccata, nec omnes pœnæ auferantur, nec omnes homines liberentur; ita etiam est causa sufficiens omnium gratiarum actualium, seu quæ sufficientes, seu quæ efficaces dicuntur, & quoad omnes homines; quia scilicet virtutem habet conferendi, licet actu gratiæ e-

tiam sufficientes nec omnibus, nec semper conferantur.

Denique dist. 20. q. 1. art. 1. ad 1. quæstionem ad 2. *Dicendum, quod hoc quod omnes homines non reparantur, non est ex insufficientiâ medicinæ reparantis, cum sit sufficiens, quantum in se est, ad reparandum omnes qui naturam humanam habent, vel habere possunt: sed ex defectu eorum qui reparationis effectum in seipsis impediunt.*

Ergo juxta S. Thomam in Sententias certissimum est, sufficientiam passionis Christi pro omnium salute non consistere in auxilio omnibus collato, sed in virtute de se ad omnes salvandos sufficiente.

Jam quæ in Paulum docet expendenda sunt. In 2. caput ad Hebr. lect. 3. in hæc verba: *Ut gratia Dei pro omnibus gustaret mortem, sic loquitur: Pro omnibus autem dupliciter potest intelligi, ut vel sit distributio accommodata pro omnibus prædestinatis; pro istis enim tantum habet efficaciam: vel absolute pro omnibus quantum ad sufficientiam: sufficiens enim, quantum de se, omnibus est.* 1. Tim. 4. *Qui est Salvator omnium, maxime amens fidelium.* Chrysostomus: *Pro omnibus hominibus generaliter mortuus est, quia omnibus pretium sufficit, & si omnes non credunt, ipse tamen quod suum est implevit.* In id autem 1. Tim. 4. *Qui est Salvator omnium hominum, maxime autem fidelium, hæc habet quæ ad gratiam communem astringendam nullo modo profunt: Et sustinemus propter spem vite (quia speramus in Deum vivum)*

qui est Salvator vitæ præsentis & futuræ. Item ex officio Dei, cujus est salvare, Isaia 43. Non est absque me Salvator; & idcò incarnatus est Deus & vocatus est Jesus. Math. 1. Ipse enim saluum faciet populum suum à peccatis eorum: & Jesus idem est quod Salvator; quia salvat salutem corporali quoad omnes, & idcò dicit, Omnium hominum; item spiritali quoad bonos; & idcò dicit, Et maxime fidelium.

Et in 1. ad Tim. 2. lect. 1. Ipse est propitiatio pro peccatis nostris: pro aliquibus efficaciter, sed pro omnibus sufficienter: quia pretium Sanguinis ejus est sufficiens ad salutem omnium; sed non habet efficaciam nisi in electis, propter impedimentum.

Itaque S. Thomas his in locis nonnisi de sufficientià pretiū, sive de ejus virtute, magnitudine & potentiā pro omnium salute loquitur, secundum illud S. Prosperi in responsione ad objectionem primam Vincentianam, Quod magnitudinem & potentiam pretii, & quod ad unam pertinet causam generis humani, Sanguis Christi redemptio est totius mundi. Sed, mortem Christi esse pretium sufficiens pro omnium salute, non est, per mortem Christi conferri & applicari omnibus auxilia actualia sufficientia ad salutem, sed est illam habere in se vim & virtutem salvandi omnes homines & munda-  
dandi omnia hominum peccata, adeò ut si aliqui non salventur, id non ex defectu virtutis mortis Christi, sed ex defectu voluntatis humanæ, atque ex peccato, seu originali, seu actuali proveniat;

& propter hoc dicit eam non habere efficaciam nisi in electis, propter impedimentum, ut mox exponemus.

Id rectissime annotavit, & ex parvulorum exemplo, quibus per baptismum succurri non potest, verissime confirmavit Facultas Duacensis in Censurâ Assert. 7. Sufficiens ergo, inquit, quam postulat generalis redemptio, in pretio Sanguinis Christi est; non autem in auxilio omnibus collato, ut pretendit objectio. Nam aliquin etiam parvulis, quibus per baptismum succurri non potuit, tale auxilium tribuendum erit, aut certe dicere oportebit, non pro illis Christum se dedisse in redemptionem, & ita non pro omnibus.

Hæc est Concilii Tridentini doctrina, hic sensus, cum sess. 6. can. 3. dicit, Quod etsi pro omnibus mortuus est Christus, non omnes tamen mortis ejus beneficium recipiunt, sed hi dumtaxat, quibus meritum ejus communicatur: scilicet per fidem quam omnes non receperunt. Nam ut dicit idem Concilium sess. 6. cap. 2. Hunc proposuit Deus propitiatorem per fidem: ergo nec gratiam actualem sufficientem dictam, per quam venit ad fidem, & bona voluntas esse incipit, omnes homines vi mortis Christi recipiunt, cum ipsa sit aliquod beneficium mortis Christi, & ex ejus merito conferatur. Itaque juxta Concilium Tridentinum Christus pro omnibus mortuus est, quia scilicet mors ejus virtutem habet omnes omnino homines redimendi, &

ab omni peccato liberandi; quam omnibus per fidem, aut alia beneficia salutaria meritis ejus non communicetur.

Hanc Concilii Tridentini doctrinam Catechismus ejusdem Concilii apertius expressit parte 2. de Sacramento Eucharistiæ cap. 4. sect. 24. his verbis: *Nam si ejus virtutem inspiciamus, pro omnium salute sanguinem à Salvatore effusum esse satendum est: si verò fructum quem homines ex eo perciperint cogitemus, non ad omnes, sed ad multos tantum eam utilitatem pervenire facile intelligemus.*

Dicitur autem pro predestinatis tantum habere efficaciam, seu non habere efficaciam nisi in electis, propter impedimentum, scilicet quantum ad consecutionem vitæ æternæ, siquidem in non electis qui baptisati sunt, qui in Christum credunt ac piè vivunt, habet efficaciam quantum ad remissionem peccatorum per baptismum, & quantum ad omnia beneficia salutaria, seu auxilia actualia quæ per Christum recipiunt, cum baptismus, fides, & omnes Christi gratiæ sint effectus mortis Christi. Quare gratiæ sufficientes non sunt à morte Christi solum considerata secundum sufficientiam, sed sunt à morte Christi etiam considerata secundum efficaciam seu efficientiam, ut antea ex 3. in Sentent. notavimus: siquidem illæ, sicut & cæteræ, sunt propriè effectus & merita mortis Christi. Atque ita si Christus morte suâ omnibus gratias sufficientes meruisset ac

contulisset; esset mortuus pro omnibus, non solum quantum ad sufficientiam pretii, sed etiam quantum ad efficaciam seu efficientiam & applicationem, non quidem pro vitâ æternâ dandâ, sed pro aliis beneficiis salutaribus conferendis. Ubi autem S. Thomas dixit, mortem Christi habere efficaciam seu efficientiam in omnibus hominibus, & omnibus applicari? *Meritum Christi*, inquit qq. disp. de veritate. q. 29. quæ est de gratiâ Christi art. 7. ad 4. quantum ad sufficientiam, aqualiter se habet ad omnes, non autem quantum ad efficaciam. Et ad 13. Hoc ipsum gratiæ alicui nostrum à Deo confertur, quod efficaciam meriti Christi consequatur.

Lovanienſes hæc eadem responsione Assertionem septimam Jesuitarum refutarunt, & Censuræ notâ affecerunt. Talis enim erat Assertio: *Deus voluit dare Christum in redemptionem pro omnibus, nullo excepto: ergo omnibus preparavit sufficientia remedia per Christum. Probatur consequens, quia eatenus est Christus omnium Redemptor, quatenus per ipsum dantur omnibus sufficientia auxilia, quibus resurgant à peccatis. Si enim non darentur sufficientia, verus non esset eorum Redemptor, quia neque quoad sufficientiam, neque quoad efficaciam.* Hanc ratiocinationem hujusmodi Censurâ afficiunt.

Non dissimili erat olim Massiliensium ratiocinatio: sed cui sic respondendum. Christus Redemptor est omnium, quoad pretii sufficientiam, quia merito sanguinis ejus omnes

à peccatis liberari possent, si crederent: non est autem Redemptor omnium secundum efficaciam, quia non omnibus per eum datur ut credant. Ut enim infidelis credat, præter prædicationis beneficium, necessarium est gratiæ specialis donum, quo fiat ut prædicationi consentiat.

Itaque omninò absurdum est, & à S. Thomæ mente alienum, ex iis quæ de morte Christi, quantum ad sufficientiam pretii pro omnibus oblatâ docet, velle illi gratiæ sufficientis omnibus vi mortis Christi præparatæ ac datæ doctrinam affingere, juxta quam dicendum esset, Christum pro omnibus, non solum quoad sufficientiam, sed etiam quoad efficaciam mortuum esse.

Neque etiam hæc eadem verba, *Sed non habet efficaciam nisi in electis propter impedimentum*, gratiæ sufficienti communi ullo modo favent; imò eam juxta S. Thomæ doctrinam omnibus non dari supponunt. Ostendimus enim Sect. 1. art. 1. juxta S. Thomam, gratiam non deesse quidem hominibus, nisi ob impedimentum, sed probavimus simul verum esse omnes homines post peccatum primi parentis impedimentum gratiæ præstare, ac Deum singulari gratiâ, quam nemini debet, & quam largitur quibus vult, in aliis hoc impedimentum ex misericordia remove, & in aliis ex justitiâ non remove. Quod ergo, inquit in 12. ad Hebr. lect. 3. *a quibusdam removetur illud obstaculum, hoc est ex misericordiâ Dei; quod autem non removetur, hoc est ex justitiâ ejus.*

Sicut ergo Deus omnibus gratiam non dat ad removendum impedimentum, ita mors Christi non habet efficaciam in omnibus ad removendum impedimentum, hoc est, per illam non applicatur, nec datur omnibus gratia ad idem impedimentum removendum.

Itaque à S. Thomæ doctrinâ & sensu omninò aberrant, qui hæc verba ita intelligunt, ut dicant mortem Christi pro nutu liberi arbitrii, gratiâ sufficiente sibi per illam oblatâ & collatâ, prout vult, utentis vel non urentis, in hominibus efficaciam habere, & hanc efficaciam à Dei electione & misericordiâ non procedere, nec Dei esse facere ut mors Christi, quæ pro omnibus sufficiens est, in aliquibus prout voluerit efficaciam habeat: imò hunc sensum velut Pelagianum S. Thomas rejicit, cum dicit in 12. ad Hebr. *Ergo habere gratiam dependet ex solo libero arbitrio, & non ex electione Dei, quod est error Pelagii*, ut latè ostendimus Sect. 1. art. 1. Sed S. Thomas nihil aliud hoc loco & quovis alio docuit, nisi solam corruptionem malitiamque hominum obstare, ne omnes fruantur pretio Sanguinis Christi, quod ad omnia mundi crimina & peccata delenda de se sufficientissimum est; eo omnes frui posse, si in Christum erederent; ac si omnibus fidem in Christum per Christum non det, causam ab eorum peccatis repetendam esse, per quæ hæc gratiâ indigni sunt: quanquam singularis misericordiz

diz abundantia aliquos ex his per Christum eligit, in quibus non obstante eorum indignitate cum aliis communi, impedimenta quæ gratiæ ponunt, per gratiam suam tollit ac superat; atque ira misericorditer facit, ut illis effectus meritorum Christi conferatur, & in his Christi passio efficaciam habeat, quam in aliis non habet ob impedimenta quæ ipsi ponunt, quæ Deus per similem misericordiam iudicio iusto remove-  
vere non voluit.

Id omne S. Thomas de merito Christi loquens expressè docet in qq. disp. q. 29. de gratia Christi art. 7. in quo quærit, Num Christus aliū mereri potuerit? Ad 4. Quartum argumentum sic proponit: Meritum Christi equaliter se habet ad omnes homines, quantum est de se: si igitur alicui Christus meruit salutem, omnibus meruit: sed meritum Christi frustrari non potest: ergo omnes salutem consequuntur, quod patet esse falsum. Sic respondet.

Ad 4. dicendum, quod meritum Christi, quantum ad sufficientiam, equaliter se habet ad omnes, non autem quantum ad efficaciam; quod accidit partim ex libero arbitrio, partim ex divinâ electione, per quam quibusdam misericorditer effectus meritorum Christi confertur, quibusdam vero iusto iudicio subtrahitur. Et ad 13. Hoc ipsum gratis alicui nostrum à Deo confertur, quod efficaciam meriti Christi consequatur. Et quod jam retulimus in 3. dist. 19. q. 1. art. 3. ad primam quæstionem ad 4. In causis quæ agunt ex ordinatio-

ne sapientiæ, non est necessarium quod posita causâ statim ponatur effectus; sed tunc effectus ponitur, quando sapientiæ ordo requirit: & taliter agit passio Christi. Et 3. p. q. 8. art. 3. ad 1. Dicendum, inquit, quod illi qui sunt infideles, etsi actu non sint de Ecclesiâ, sunt tamen de Ecclesiâ in potentiâ: quæ quidem potentia in duobus fundatur: primò quidem & principaliter in virtute Christi, quæ est sufficiens ad salutem totius humani generis; secundariò in arbitrii libertate. Docet autem eodem art. in Corp. pendere à divinâ prædestinatione, quod potentia secundum quam sunt de Ecclesiâ & uniantur Christo ut capiti, reducatur ad actum. Quariò, inquit, Christus est caput eorum qui sibi uniantur solum in potentiâ, nondum reduci ad actum, quæ tamen est ad actum reducenda, secundum divinam prædestinationem.

Dicit aliquis sufficientiam pretii, secundum quam Christus pro omnibus hominibus mortuus est, intelligi non posse de solâ magnitudine pretii pro omnium salute sufficientissimi; quia eodem sensu dici posset mortuus etiam pro dæmonibus, cum pariter mors ejus sit pretium pro eorum salute sufficiens, quantum ad virtutem redimendi, utpote infinitam.

Respondeo, etsi sit virtus infinita in Christo ad redimendum etiam dæmones, tamen dici non posse mortuum pro dæmonibus, nequidem sufficienter, seu quantum ad sufficientiam pretii; quia scilicet ad hoc ut Christus dicatur sufficienter mortuus pro aliquibus,

bus, duo requiruntur; unum ex parte Christi, ut scilicet habeat virtutem in se sufficientem ad illos redimendos; alterum ex parte subiecti, scilicet ut sit capax recipiendi influxum & actionem Christi, quod fit per fidem & Sacramenta. Licet autem sit in Christo virtus infinita, & ad redimendos etiam dæmones sufficiens; quia tamen non sunt capaces recipiendi influxum & actionem Christi per fidem & Sacramenta, siquidem eorum natura irreparabiliter est damnata, & in malo obstinata, ac sunt extra statum merendi & salutem consequendi, atque ita non sunt in potentia ut Christo uniantur; ideo Christus non potest dici sufficienter mortuus pro dæmonibus. Quamobrem nullam causam nullumque remedium pro eorum liberatione instituit: omnes autem homines quamdiu sunt in viâ, vel recipiunt actum, vel sunt capaces recipiendi influxum & actionem Christi per fidem & Sacramenta, vel actu uniantur Christo, vel sunt in potentia ut Christo uniantur, & hæc potentia reducenda est ad actum in aliquibus, scilicet in iis omnibus qui Christo per fidem & Sacramenta uniri sunt, & in aliquibus nunquam reducenda est ad actum, puta in parvulis sine baptismo morientibus. Unde docet S. Thomas Christum esse caput omnium hominum, quia omnes uniantur Christo vel actu, vel in potentia, etsi aliqui sint in quibus ista potentia nunquam ad actum reducenda est.

Christus, inquit 3. p. q. 8. art. 3. est caput omnium hominum, sed secundum diversos gradus. Primo enim & principaliter est caput eorum qui actu uniantur sibi per gloriam. Secundo eorum qui actu uniantur sibi per charitatem. Tercio eorum qui actu uniantur sibi per fidem. Quarto vero eorum qui sibi uniantur solum in potentia nondum reducta ad actum, quæ tamen est ad actum reducenda secundum divinam predestinationem. Quinto vero eorum qui in potentia sunt sibi uniti, quæ nunquam reducetur ad actum, sicut homines in hoc mundo viventes qui non sunt predestinati, qui tamen ex hoc seculo recedentes totaliter desinunt esse membra Christi, quia jam nec sunt in potentia, ut Christo uniantur.

Itaque Christus pro omnibus omnino hominibus mortuus est sufficienter, seu quantum ad sufficientiam pretii, quia habet sufficientem virtutem ad omnes omnino homines redimendos, & præterea nullus homo est qui dum est in viâ, non recipiat actum, aut non sit capax recipiendi influxum & actionem Christi, seu qui Christo per fidem & Sacramenta non uniat, vel actu, vel in potentia; quod cum de dæmonibus dici non possit, dici etiam non potest pro iis sufficienter mortuus, etsi virtus passionis illius ad illos redimendos in se sufficientissima sit. Quomodo autem Christus non solum quantum ad sufficientiam pretii & virtutem passionis pro omnibus omnino hominibus mortuus fuerit, sed etiam omnes omnino homines salvandi volun-



voluntatem habuerit, non quidem rationalem, sed naturalem, quæ magis velleitas dicenda est, quam abioluta voluntas, articulo sequente exponemus.

Denique quæ S. Thomas de sufficientia mortis Christi in Summâ habet, referenda sunt. 3. p. multis in locis eam sufficientem vocat ad omnium peccatorum deletionem, eodem omnino sensu; quia scilicet habet in se tantam virtutem, quanta ad omnia peccata delenda requiritur.

3. p. q. 1. art. 4. in c. *Respondeo dicendum*, inquit, quod certum est Christum venisse in hunc mundum, non solum ad delendum illud peccatum quod traductum est originaliter in posteros; sed etiam ad deletionem omnium peccatorum quæ postmodum superaddita sunt: non quod omnia deleantur, quod est propter defectum hominum qui Christo non inhaerent, se undum illud Joan. 3. Venit lux in mundum, & dilexerunt homines magis tenebras quam lucem: sed quia ipse exhibuit quod sufficiens fuit ad omnium peccatorum deletionem. Docet autem postea art. 8. in c. ut jam dictum est, homines inhaerere Christo, & illi actu uniri, ut capiti, secundum divinam prædestinationem. Quartò, inquit, Christus est caput eorum qui sibi uniantur solum in potentia nondum reducenda ad actum, quæ tamen est ad actum reducenda secundum divinam prædestinationem.

Eadem q. art. 2. in 2. arg. & ad 2. eam satisfactionem ad reparationem humanæ naturæ sufficientem esse dicit, præter quam ni-

hil aliud ad illam requiritur. Docet autem posse dici dupliciter sufficientem, perfectè & imperfectè. Uno modo, inquit, perfectè, quia est condigna per quamdam adæquationem ad recompensationem culpa commissa; & sic hominis puri satisfactio sufficiens esse non potuit pro peccato. Alio modo potest dici satisfactio hominis esse sufficiens imperfectè, scilicet secundum acceptationem ejus qui est eâ contentus, quamvis non sit condigna; & hoc modo satisfactio puri hominis est sufficiens.

Et q. 46. art. 5. ad 3. *Dicendum*, inquit, quod secundum sufficientiam, una minima passio Christi suffieisset ad redimendum genus humanum ab omnibus peccatis: sed secundum convenientiam sufficiens fuit quod pateretur omnia genera passionum, sicut dictum est.

Et q. 48. art. 2. in c. *Et ideo passio Christi non solum sufficiens*, sed etiam superabundans satisfactio fuit pro peccatis humani generis, secundum illud 1. Joan. 2. Ipse est propitiatio pro peccatis nostris, non pro nostris autem tantum, sed etiam pro totius mundi. Et ad 2. dicendum (inquit) quod major fuit charitas Christi patientis, quam malitia crucifigentium. Et ideo plus potuit Christus satisfacere suâ passione, quam Crucifixoress offendere occidendo, in tantum quod passio Christi sufficiens fuit & superabundans ad satisfaciendum pro peccatis crucifigentium ipsum.

Et q. 79. art. 7. ad 2. *Dicendum* (inquit) quod sicut passio Christi prodest quidem omnibus, quan-

zum ad sufficientiam, & ad remissionem culpa, & adeptiōem gratiæ & gloriæ (hoc est, habet in se ut omnibus proſit, ſicut ait S. Proſper Reſp. 1. ad objectionem Vincentianam.) ſed effectum non habet, niſi in illis qui paſſioni Chriſti conjunguntur per fidem & charitatem.

Et q. 22. art. 3 ad 2. Dicendum (inquit) quòd peccata non commemorantur in novâ lege propter inefficiam ſacerdotii Chriſti, quaſi per ipſum non ſufficienter expiantur peccata. Sufficienter autem per ſacerdotium Chriſti peccata expiari, hoc eſt, ut dicit in argumento, Sed contra, Sacerdotium Chriſti habere virtutem emundandi peccata, Et ut dicit in c. Habere plenam vim expiandi peccata.

Obſiſci ſolent aliqua ex hac 3. parte testimonia, ubi per mortem Chriſti paratum omnibus remedium dicitur contra demonis tentationes, quo aliqui uti negligunt: unde concluditur, Chriſtum morte ſua meruiſſe, præparaſſe & contuliſſe omnibus auxilia ſufficientia, quibus aliqui uti negligunt. Ita ergo 3. p. q. 49. art. 2. ad 2. loquitur. Dicendum quòd diabolus etiam num po-teſt quidem, Deo permittente, homines tentare, quantum ad animam, & vexare quantum ad corpus: ſed tamen præparatum eſt homini remedium ex paſſione Chriſti, quo ſe po-teſt tueri contra hoſtis impugnatio-nes, ne deducatur in interitum mor-tis æternæ: & quicumque ante paſſionem Chriſti diabolo reſiſtibant, per fidem paſſionis Chriſti hoc facere

poterant, licet paſſione Chriſti non dum peractâ. Et ibidem ad 3. Dicendum quòd Deus permittit diabolo poſſe decipere homines in certis perſonis, temporibus, & locis, ſecundum occultam rationem judiciorum ſuorum; ſemper tamen per paſſionem Chriſti eſt paratum hominibus remedium ſe tuendi contra nequitias demonum, etiam tempore Antichriſti: ſed ſi aliqui hoc reme-dio uti negligant, nil deperit effi-caciæ paſſionis Chriſti. Ad plenam horum locorum intelligentiam, S. Thomæ doctrina, hæc quæſtione contenta, exponenda eſt, quæ omninò conformis eſt his quæ antea ex 3. in Sententias retulimus.

Poſtquàm S. Thomas quæſt. præcedente 48. art. 6. oſtendit quòd paſſio Chriſti operata eſt noſtram ſalutem per modum efficien-tiæ, hæc deinde quæſtione varios effectus paſſionis Chriſti refert & explicat, qui ſunt libera-rio à peccato, à poteſtate dia-boli, à pœnâ peccati, reconcilia-tio cum Deo, & apertio januæ cœli. In hoc ergo efficacia paſſionis Chriſti conſiſtit, quòd mors Chriſti hæc omnia per mo-dum efficien-tiæ operata fuerit: & quòd in ſe habeat virtutem ſufficientem, hoc eſt condignam, & tantam quanta requiritur ad delenda omnia omnium homi-num peccata. Unde oportuit, inquit 3. p. q. 1. art. 2. ad 2. ad con-dignam ſatisfactionem (hoc eſt, ut ibidem dicit, ad ſatisfactionem perfectè ſufficientem) ut actus ſatis-facientis haberet efficaciam infinitam,

utpote Dei & hominis existens: hoc est virtutem infinitam ad recompensationem culpæ commissæ. Verùm id in omnibus actu non operatur, sed solum in iis qui per fidem & Sacramenta passioni ejus communicant, seu quibus ejus passio per fidem & Sacramenta applicatur. Passio Christi, inquit q. 49. art. 3. ad 1. sortitur effectum suum in illis quibus applicatur per fidem, & charitatem, & per fides Sacramenta. Et ad 3. Satisfactio Christi habet effectum in nobis, in quantum incorporamur ei, ut membra capiti suo. Et art. 4. Deus placatus est super omnia offensa generis humani, quantum ad eos qui Christo passio conjunguntur secundum modum premissum. Et art. 5. Per passionem Christi liberati sumus, non solum à peccato communi totius humane nature, & quantum ad culpam, & quantum ad reatum pœne, ipso solvente pretium pro nobis; sed etiam à peccatis propriis singulorum qui communicant ejus passioni per fidem, charitatem, & fidei Sacramenta. Et art. 1. ad 3. Christus in suâ passione nos à peccatis liberavit causaliter, id est, instituens causam nostræ liberationis, ex quâ possent quæcumque peccata quandoque remitti, vel præterita, vel præsentia, vel futura. Sicut si Medicus faciat medicinam, ex quâ possint quicumque morbi sanari, etiam in futurum. Deinde verò ad 4. Dicendum quòd quia passio Christi præcessit, ut causa quedam universalis remissionis peccatorum, sicut dictum est, necesse est quòd singulis adhibeatur (hoc est applicetur) ad deletionem pro-

priorum peccatorum; hoc autem fit per baptismum, & poenitentiam, & alia Sacramenta quæ habent virtutem ex passione Christi. Et ad 5. Dicendum, quòd etiam per fidem applicatur nobis passio Christi ad percipiendum fructum ipsius, secundum illud Rom. 3. Quem proposuit Deus propitiatorem per fidem in sanguine ipsius. Et q. 61. art. 1. ad 3. Passio Christi est sufficiens causa humane salutis; nec propter hoc sequitur quòd Sacramenta non sint necessaria ad humanam salutem, quia operantur in virtute passionis Christi, & passio Christi quodammodo applicatur hominibus per Sacramenta, secundum illud Rom. 6. Quicumque baptisati sumus in Christo Jesu, in morte ipsius baptisati sumus. Et in quæst. disp. q. 29. de gratiâ Christi art. 7. ad 8. Meritum Christi sufficienter operatur ut quadam causa universalis salutis humane: sed oportet hanc causam applicari singulis per Sacramenta & per fidem formatam, quæ per dilectionem operatur; & ideò requiritur aliquid aliud ad salutem nostram præter meritum Christi, cujus tamen meritum Christi est causa.

Quia ergo per passionem Christi instituta & præparata sunt remedia per quæ omnia omnium hominum, qui iis uti voluerint, peccata remitti possunt quocumque loco & tempore; & quia mors Christi omnes, quibus per fidem & Sacramenta applicatur, efficitur à peccato, pœnâ, & potestate diaboli liberat; ideò etsi aliquibus iis remediis uti nolentibus non applicetur, nihil tamen deperit ejus efficaciz. Nam effi-

efficacia mortis Christi in hoc non consistit, ut omnibus applicetur, & in omnibus effectum habeat; sed in hoc, ut omnes quibus per fidem & fidei Sacramenta applicatur, à peccato & à pœnâ per modum efficientiæ liberet, & in se habeat virtutem omnes redimendi. *Passio Christi*, inquit q. 48. art. 6. ad 2. *per spiritalem contactum efficaciam sortitur, scilicet per fidem & fidei Sacramenta, secundum illud Apostoli: Quem proposuit Deus propitiatorem per fidem in sanguine ipsius.* Ergo à S. Thomæ doctrinâ his locis contentâ omninò aberrant, qui hinc concludunt gratiam actualem sufficientem singulis hominibus per passionem Christi conferri & applicari, cum nihil aliud sequatur, nisi fidem ac fidei Sacramenta per passionem Christi omnibus parata esse ac proposita, quorum usu se tueri possunt adversus diaboli insidias.

Id evidentissimè confirmatur exemplo parvulorum, quibus per baptismum succurri non potest. Nam juxta S. Thomæ doctrinam, parvulis omnibus remedium per mortem Christi paratum est. Quid autem illud est? An per mortem Christi media sufficientia, quibus baptismum recipere possint, esse disposita & ordinata? Minimè verò; sed hinc solum sequitur, per mortem Christi institutum esse baptismi Sacramentum habens virtutem remittendi peccata, & ea remittens omnibus quibus confertur, & ut loquitur S. Thomas art. 4. ad 3.

*Habens efficaciam ex passione Christi.* Quòd si aliquibus hoc remedium non adhibeatur, iis scilicet qui in utero materno decedunt, nihil deperit efficaciz mortis Christi, quia non desinit semper habere virtutem omnes redimendi, & sortiri effectum suum in omnibus parvulis quibus per baptismum applicatur, seu qui conspeliuntur Christo in baptismo. Ergo remedia omnibus per Christi mortem parata esse, quibus qui utuntur, fructum mortis Christi percipiunt, nullo modo in S. Thomæ doctrinâ significat, omnibus per Christi mortem media sufficientia ad salutem, seu gratias actuales sufficientes præparatas esse & collatas.

Hæc fuit Lovanienſium, circa parvulorum exemplum responsio. *Ex eo*, inquiunt in Censurâ assertionis 25. quòd *Christus pro omnibus est parvulis mortuus & baptismum instituit*, non rectè colligitur sufficiens eos contra peccatum habere remedium. Ut enim dicit Prosper (ad 9. caput Gallorum) non sufficit hominum redemptioni, crucifixum esse Dominum Christum, nisi commoriantur & conspeliuntur ei in baptismo; & quanquàm dici possit sufficiens pro parvulis institutum remedium; dici tamen non potest id eos habuisse, quod nec in suâ nec in suorum habuerunt potestate.

Similiter Duacenses in Censurâ ejusdem assertionis: *Mors Christi, & Sacramentum baptismi*, remedia sunt, quæ sufficiunt salutem omnium parvulorum, nemine

excepto: sed non inde consequens est omnes parvulos habere sufficiens remedium contra peccatum ex parte Dei. Quamvis enim paratum ac propositum sit tale remedium, non tamen ab eo rectè dicitur haberi, cui impossibile est illud applicari; impossibile, inquam, studio & industria humanâ. Multa enim tam ex parte Dei, quàm ex parte hominum requiruntur, eaque in parvulorum potestate non sunt posita, ut parvuli ipsi Christo commoriantur & conspiciantur per baptismum; & tamen nisi hoc modo commortui & conspulti ei fuerint, nec baptismus, nec

mors Christi illis sunt remedio.

Argumentum quod P. Nicolai ex his verbis (*sunt nihil efficacie passionis Christi deperit*) desumit, ut probet gratiam sufficientem dici posse efficacem, etsi effectus ex illâ non sequatur propter non utentium negligentiam: istud, inquam, argumentum hoc loco non refello, sed Sect. 4. arr. 2. ubi de gratiæ sufficientis & efficacis nomine & significatione secundum S. Thomam dicendum erit, & iis quæ Joan. Nicolai 4. classe n. 1. hac de re habet, respondendum.

# ARTICULUS VI.

*In quo ostenditur juxta S. Thomam Christum nullam voluntatem habuisse salvandi omnes homines, ex quâ auxilium actuale sufficiens omnibus commune astrui possit.*

Cum juxta S. Thomam nulla sit in Deo pro hominum salute voluntas, per quam gratiæ sufficientes omnibus præparentur ac conferantur, sic nec in Christo: siquidem nulli per Christum ulla gratia confertur, nisi quam Pater dari vult, & Pater nullam nisi per Christum dari vult. Nemo (inquit Joan. 6.) potest venire ad me, nisi Pater, qui misit me, traxerit eum. Et Joan. 17. Non pro mundo rogo, sed pro his quos dedisti mihi. Et Joan. 6. Omne quod dedit mihi Pater ad me veniet. Et Eph. 1. Elegit nos in ipso ante mundi constitutionem, ut essemus sancti. Qui prædestinavit nos in adoptionem filiorum per Jesum Christum, in ipsum, secundum propositum voluntatis suæ. Atque ut id evidentiùs pateat,

exponendum est quotuplex sit in Christo voluntas.

Notandum est duplicem in Christo, sicut in Deo, pro hominum salute voluntatem, secundum S. Thomam considerari posse, ut in Consecratione Theosum Patris Nicolai n. 21. rectissime expositum est. Alia est quam naturalem appellat, quæ, ut ait sanctus ille Doctor in 3. dist. 17. q. 1. art. 3. ad 4. quæst. ad 2. Est de eo quod habet in se bonitatem, non considerato ordine ejus ad aliud, quâ non simpliciter volumus, sed secundum quid; ideoque velleitas potius quàm voluntas dicenda est: & hæc voluntas naturalis aliquem solum in Christo patiente affectum denotat, quo omnium salutem vellet, si ita Patri

videretur, & quo mortem suam omnibus per fidei & charitatis gratiam & Sacramenta applicari veller, ad peccatorum remissionem & æternæ vitæ consecutionem, ac beneficia, quibus omnes homines certissimè liberarentur per sanguinem suum, præparari & conferri optaret, si sic esset placitum ante Patrem, & ad gloriam ejus quam quærebat conducens: seu, ut idem Sanctus ibidem docet, voluntas illa Christi naturalis, similis est voluntati Dei antecedenti, per quam Christus naturam hominis generaliter, ut est à Deo condita & ad salutem ordinata, considerans, veller omnes homines salvari: sed sicut voluntas Dei antecedens nulla hominibus ad salutem media præparat, ac nullas gratias confert, ut antè ostendimus, pariter hæc voluntas Christi naturalis, seu velleitas illa & affectus erga omnium hominum salutem, nulla eis ad salutem media efficienter meretur, ac nullas gratias confert; sicut etiam illa naturalis Christi voluntas, quæ mortem recusans perit ut calix iste à se transeat, nulla ad passionem Crucis non subeundam media disponit. Certissimum quippe est omnia beneficia quæ in quoslibet homines ex morte Christi profluxerunt, non fluxisse ex illâ voluntate naturali, quæ res in particulari, & quod Patri omnibus circumstantiis consideratis placitum est, non respicit; sed ex aliâ voluntate, quæ est absoluta & simpliciter dicta, ac ab-

solutæ Patris æterni voluntati, per quam omnes gratiæ decernuntur, conformis.

Est alia voluntas absoluta & rationis, quâ absolutè & simpliciter volumus: unde cùm simpliciter dicimur aliquid velle, de eâ voluntate id intelligendum est. Christus autem per hanc voluntatem omnium omninò hominum salutem non voluit, nec omnium conversionem; proindeque per illam non comparavit illis media, seu auxilia ad salutem & conversionem necessaria; per hanc voluntatem nihil aliud simpliciter voluit, nisi quod scivit Deum simpliciter velle: proindeque cùm Deus non velit simpliciter omnibus omninò hominibus gratias ad salutem sufficientes dari, ut ostendimus, ita nec Christus.

Hanc autem doctrinam ex S. Thomâ probare facillimum est. Nam certum est eandem fuisse Christi voluntatem circa salutem hominum, cùm pro illorum salute oravit, & cum pro illorum salute passus est: imò verò magis in oratione voluntas ostenditur, quàm in passione, cùm ea sit ipsius orationis natura ex S. Thomâ, quòd sit *interpretativa voluntatis humane*. Nihil autem certius apud Doctorem Angelicum, quàm Christum, cùm pro hominum salute oravit, non voluisse (de voluntate simpliciter & absolutè sumtâ hic loquor) ut per suam orationem omnes omninò salvarentur. Eadem igitur passionis ratio. Sed audiamus S.

Tho-

Thomam 3. p. q. 21. art. 4. in quo probat orationem Christi semper fuisse exaudiram. *Oratio est, inquit, quodammodo interpretativa voluntatis humane. Tunc ergo alius oranti exauditur oratio, quando ejus voluntas adimpletur. Voluntas autem simpliciter hominis, est rationis voluntas. Hoc enim absolute volumus, quod secundum deliberatam rationem volumus. Illud autem quod volumus secundum motum sensualitatis, vel etiam secundum motum voluntatis simplicis, qua consideratur ut natura, non simpliciter volumus, sed secundum quid; scilicet si aliud non obstat, quod per deliberationem rationis invenitur: unde talis voluntas magis est dicenda velleitas, quam absoluta voluntas, quia scilicet homo hoc vellet, si aliud non obsteret. Secundum autem voluntatem rationis Christus nihil aliud voluit, nisi quod scivit Deum velle: & ideo omnis absoluta voluntas Christi, etiam humana, fuit impleta; quia fuit Deo conformis: & per consequens omnis ejus oratio fuit exaudita.*

Jam satis patet Christum non voluisse, sive cum oravit, sive cum passus est, voluntate rationis & simpliciter dictâ, ut omnes omnino homines salvarentur; alioquin nullus salutis exfors esset, cum ea Christi voluntas, ex S. Thomâ, semper impleta fuerit. Verum id magis patebit ex eorum argumentorum solutione, quæ sibi objicit sanctus Doctor, ubi disertè docet, Christum pro solis prædestinatis orasse, ut per ipsum vitam consequerentur æternam.

Primum enim sibi objicit; Christum petiisse à se removeri calicem passionis, qui tamen ab eo translati non fuit; sed responderi, quod Christus hoc petiit quasi homo, naturali voluntate mortem recusans; & ideo non esse factum quod petiit, quia ratio qua petitionem proposuit, volebat ut hoc impleretur: sed ad instructionem nostram volebat demonstrare nobis suam voluntatem naturalem, & motum sensualitatis quem sunt homo habebat.

Deinde sibi opponit, quod magis ad rem facit, Christum orasse ut peccatum crucifixoribus suis ignoscereetur; neque tamen omnibus peccatum illud fuisse dimissum: Itemque Christum orasse pro his qui erant in ipsum credituri, ut omnes in eo unum essent, & ut pervenirent ad hoc quod essent cum ipso; neque tamen omnes ad hoc pervenire: Non ergo omnem Christi orationem fuisse exauditam.

Quid verò ad hæc S. Doctor? An Christum orasse quidem pro omnibus crucifixoribus, sed per multos steterisse quominus peccatum sibi dimitteretur? Orasse pro omnium salute qui erant credituri, sed per multos stare quominus salventur? Id profectò respondere debuisset, si existimasset, absolute & simpliciter loquendo, Christum pati voluisse, ac proinde, quod minus est, orasse ne ulli hominum perirent. Quia verò ab illâ Molinistica opinione omnino alienus fuit, ideo illam breviter his verbis elidit: *Dicendum, inquit, quod Do-*



minus non oravit pro omnibus Crucifixoribus, neque etiam pro omnibus qui erant credituri in eum; sed pro his qui erant predestinati, ut per ipsum vitam consequerentur æternam.

S. Thomas idem omninò docuerat in Sentent. in 3. dist. 17. q. 1. art. 3. ad 4. quæst. Dicendum, inquit, quòd omnis oratio quam Christus obtulit hæc intentione ut ipsam impetraret, fuit exaudita: sed cum aliquis impetrare non intendat quòd absolute non vult, hæc sola oratio Christi exaudita fuit, quæ erat de eo quòd Christus absolute voluit. Hoc autem dicitur aliquis simpliciter & absolute velle, in quo ultimus ejus consensus stat; ultimus autem consensus est secundum supremam partem appetitus in homine. Appetitus autem rationis est supra appetitum sensus, & in appetitu rationis est supremum quòd in finem tendit, vel in aliquod conjunctum fini. Et idè hoc solum Christus absolute voluit, quòd secundum rationem voluit in finem, & ut in ordine ad finem: & omnis talis sua oratio fuit exaudita. Quòd autem secundum sensualitatem voluit, absolute non voluit, & idè ratio non ad hoc orando proposuit ut impetraret: nec tamen fuit simulatio, quia appetitum sensualitatis exprimebat ratione jam dictâ. Similiter quòd volebat ratio ut natura, si in eo non sicut in finè quiescebat, non simpliciter volebat, ut prius dictum est; & idè etiam hæc non ad hoc proposuit orando ut impetraret: propter hoc hujusmodi orationes non fuerunt exaudite.

Hæc autem argumenta proponit sicut in Summâ. Uterius videtur quòd nec omnis Christi oratio fuit exaudita, per id quòd dicitur in Psal. 21. Clamabo per diem, & non exaudies: quòd glossa exponit de Christo.

2. Praterèa oravit ut discipuli ser-

varentur à malo, ut patet Joan. 17. & omnes qui credituri erant per verbum eorum in ipsum: hoc autem non fuit impletum, nec quantum ad ipsos Apostolos, nec quantum ad alios credentes: nec de malo culpa, nec de malo pœna: ergo non omnis Christi oratio fuit exaudita.

3. Praterèa ut dicitur Luca 23. oravit pro crucifixoribus ut peccatum eis non imputaretur, sed ut parceretur. Sed non omnis remissum fuit illud peccatum, quia non omnes conversi sunt ad fidem, sine quâ non est peccatorum remissio. Ergo sua oratio non fuit exaudita.

4. Praterèa oravit ut calix ab eo transferretur, ut patet Matth. 26. Hoc autem non fuit factum. Ergo, &c. His quatuor argumentis sic respondet.

Ad 1. ergo dicendum quòd hoc dixit Christus in personâ Ecclesiæ, ut dicit glossa: vel loquitur de oratione exprimente voluntatem sensualitatis, aut velleitatem rationis ut natura.

Ad 2. dicendum, quòd voluntas rationis ut natura, est de eo quòd habet in se bonitatem, non considerato ordine ejus ad aliud. Unde voluntas talis in Christo fuit de salute omnium hominum, sicut voluntas fuit in Deo: sed secundum hanc, simpliciter & absolute non dicitur aliquis velle. Hanc autem voluntatem Flugo de sancto Vi-lore dicit voluntatem pietatis. Sed voluntas ut ratio, est de eo quòd habet bonitatem, etiam in ordine ad aliud; & secundum hanc voluntatem non volebat Christus omnes salvari; sicut nec Deus voluntate consequente: & secundum hanc dicitur aliquis simpliciter & absolute velle. Et idè oratio Christi quæ fuit secundum hanc voluntatem, fuit exaudita; non autem quæ fuit secundum primam. Et idè dicit Hieronymus, quòd Christus exauditus est pro  
pre-

*predestinatis, non autem pro non predestinatis.*

*Et similiter dicendum est ad tertium.*

*Ad 4. dicendum, quod in illa oratione ratio expressit motum sensualitatis, non suum: unde illud quod orabat, non simpliciter voluit.*

Denique S. Thomas idem docet in Paulum in hæc verba 3. ad Hebr. *Exauditus est pro suâ reverentiâ. Sed contra, inquit, videtur quod non fuit exauditus primò pro se, quia non transivit calix ab ipso, quod tamen petebat. Item nec pro aliis, quia non fuit indultum Judeis quibus petebat indulgeri, Luca 23. Pater dimitte illis, &c. Dicendum est, quod Christus in omnibus quæ voluit fieri fuit exauditus; ipse autem secundum appetitum sensualitatis, & secundum voluntatem, in quantum est quidam appetitus naturalis, refugiebat mortem; & quantum ad hoc orabat, ut ostenderet se verum hominem: sed voluntate consequente rationem deliberatam volebat mori; unde dicit, *Veruntamen non sicut ego volo, sed sicut tu.* Item volebat quod ignosceretur omnibus, sed illis tantum qui crediderunt, & multi postea conversi sunt.*

Ergo cum dicitur, Christum pro omnibus pati voluisse ne perirent, aut habuisse voluntatem pro omnium omnino salute, id juxta S. Thomam de absolutâ, propriâ, rationali, deliberatâ & simpliciter dictâ voluntate intelligi non potest, cum apertè doceat, Christum non voluisse simpliciter ut alii quàm predestinati vitam per ipsum consequerentur æternam, etsi voluerit simplici-

ter & absolute, ut aliis quàm predestinatis gratia conferretur: si quidem omnes gratiæ quæ hominibus, etiam reprobis, ad credendum & piè vivendum à Deo dantur, sunt effectus mortis Christi, & ex ejus passionis merito proveniunt; quod negant Calvinistæ, omnes gratias quæ reprobis dantur, ad Dei providentiam, non ad Christi passionem referentes, juxta nuperrimas Theses Tiguri defensas anno 1653. Ita enim habet Thesis 40. *Gratia illa transitoria, quas vocant, providentia divina, non mortis Christi sunt effecta.*

Ex his evidentissimè sequitur, juxta S. Thomam, Christum nullam voluntatem habuisse salvandi omnes homines, ex quâ gratia sufficiens omnibus communis astrui possit: quia ex voluntate naturali quam habuit pro omnium salute, nulla ad salutem media profluunt, ac nullæ gratiæ præparantur: voluntatem verò ex quâ media & gratiæ ad salutem profluunt, quæ est absoluta & rationis voluntas, pro omnium omnino hominum salute non habuit. Atque ita ex doctrinâ S. Thomæ Christus per mortem suam, sive quoad sufficientiam pretii, sive quoad sufficientiam voluntatis & intentionis, ut loquitur P. Nicolai in Thesibus, consideretur, omnibus omnino hominibus gratias actuales sufficientes ad salutem actu non contulit.

## S E C T I O Q U A R T A.

*In quâ refertur propria causæ sufficientis, & gratiæ sufficientis apud S. Thomam significatio; ac ostenditur omnem actualem Christi gratiam semper esse efficacem; quantum ad effectum ad quem ex Dei intentione ordinatur; & exponuntur omnia S. Thomæ testimonia à Patre Nicolai 4. classe allata.*

**P**ater Nicolai 4. in classe ea S. Thomæ testimonia proponit, quibus probet omnem Christi gratiam non esse efficacem, hoc est, semper effectum actum non inducere, ob voluntatis resistantiam, quæ eundem effectum impedit.

Verùm cum nec statum quæstionis exponat, nec Arnaldi sententiam fideliter referat, frustra multa testimonia congerit, quibus confirmat quod nec ab Arnaldo, nec ab ullo alio S. Augustini discipulo in controversiam revocatur.

Cum ergo Arnaldus omnem interiorem Christi gratiam efficacem esse statuit, id cum cæteris S. Augustini discipulis non alio, quàm communi Thomistarum omnium sensu intelligit; scilicet semper esse efficacem ad hunc actum, ad quem efficiendum ex absoluta Dei voluntate & intentione destinatur, & ordinatur; quod non obstat quin illi aliquando resistatur respectu alterius effectus, ad quem ex naturâ suâ refertur, & quem ob voluntatis resistantiam non consequitur. Sic dicunt omnem Christi gratiam voluntati internam semper bonam aliquam volunta-

tem efficere, seu parvam, seu magnam: sed sæpè hominem per illam ad credendum, ad piè vivendum, & ad aliquod opus bonum faciendum excitari, qui resistente peccati delectatione ad fidem perfectam, aut piam vitam non perducitur, nec istud opus bonum implet; & eo sensu interioris gratiæ motibus non solum pugnando, sed etiam dissentiendo sæpissimè resisti, & impedimentum poni. Vide id ab Ant. Arnaldo fusè explanatum in Scripto de Doctrinâ S. Thomæ art. 17. Hic quæstionis status est. Arnaldo imponit P. Nicolai, dum aliam in eo sententiam impugnat, ac operam perdit, nisi hunc Arnaldi de gratiâ semper efficace sensum S. Thomæ auctoritate refellat. Hæc annotasse sufficeret ad omnium quæ à Patre Nicolai quartâ classe dicuntur confutationem: sed omnia S. Thomæ testimonia exponenda sunt, & à perverso istius Censoris sensu vindicanda.

Etsi autem doctrinam hanc de gratiâ Christi semper efficace ad eum effectum, ad quem ex Dei intentione ordinatur, S. Thomæ auctoritate confirmare non intendamus, quia id abundè

dè Arnaldus præstitit; præcipuum tamen ejusdem Sancti testimonium, quo eadem doctrina maxime nititur, à nobis referendum est: quia P. Nicolai ejus vim aliquibus argumentis, ac multis aliis S. Thomæ testimoniis infringere tentavit. Primum ergo expendemus quidquid P. Nicolai ad hoc testimonium respondet. Deinde exponemus omnia

testimonia quibus probare conatur gratiam Dei semper efficacem non esse. Sed prius S. Thomæ circa gratiæ sufficientis & efficacis nomen & significationem doctrinam referenda est, & à novis Patri Nicolai cavillationibus vindicanda, cum ille hujus quartæ classis exordium ab hoc argumento duxerit.

## A R T I C U L U S I.

*In quo refertur propria apud S. Thomam hujus vocis sufficiens significatio, sive de gratiâ, sive de quâcumque aliâ re sermo sit.*

**J**uxta perpetuam & constantem S. Thomæ doctrinam, sive de gratiâ, sive de quâcumque aliâ re sermo sit, illud sufficiens ad aliquid vel habendum vel agendum dicitur, præter quod nihil aliud ad hoc vel habendum vel agendum requiritur, vel cui nullam aliam virtutem addi necesse est: dividiturque in id quod est sufficiens simpliciter & absolutè, & in id quod est sufficiens in certo genere tantum.

Sufficiens simpliciter & absolutè, ad aliquid vel habendum, vel agendum, est id præter quod nihil omninò aliud requiritur ad illud vel habendum vel agendum. Sic gladius persecutoris dicitur causa sufficiens mortis, & caro per generationem propagata, dicitur causa sufficiens peccati originalis.

Sufficiens autem in certo genere est, id præter quod nihil aliud ex isto genere requiritur

ad id cujus respectu dicitur sufficiens, etsi aliud requiratur, in alio scilicet genere: sic lumen dicitur sufficiens ad videndum, quia ad videndum nihil aliud in isto genere requiritur, etsi præterea alia requirantur, puta sanitas oculorum. Id vide in Antonii Arnaldi Dissertatione fusè expositum 3. p. art. 8. & 9.

Sic semper sufficientis nomen apud S. Thomam usurpari pro eo, præter quod nihil aliud ad aliquid requiritur, & cui nullam aliam virtutem addi necesse est, facile potest infinitis testimoniis & exemplis confirmari. Primò referemus quæ dicit generaliter de causâ sufficiente ad aliquid: deinde quæ dicit de gratiâ habituali sufficiente: denique quæ dicit de gratiâ actuali sufficiente.

*Causa sufficiens ad aliquid.*

**I**N qq. disp. de spiritualibus creaturis quæst. unicâ art. 10. in 16.

*Positâ causâ SUFFICIENTI*, inquit, *superfluum est aliam causam ponere ad eundem effectum*. Id velut constans axioma in argumento proponit, & in responsione concedit.

Qq. disp. de verit. q. 27. quæ est de gratia art. 5. in quo quærit, *Nûm in uno homine sit una tantum gratia gratum faciens*: in argum. Sed contra: *Ubi SUFFICIT unum*, inquit, *superfluum est ponere plura*. Et in c. *Illud quod ponitur SUFFICIENTER ordinare ad aliquid unum*, oportet esse unum tantum; quia si multa essent, neutrum eorum sufficeret, vel alterum superflueret. Et 2.2. q. 188. art. 8. in c. *Hoc est per se SUFFICIENS*, cui nihil deest.

Hoc pronuntiatur variis ubique exemplis confirmat. Dicit qq. disp. de potentiâ q. 6. quæ est de miraculis, art. 9. ad 19. *Fidem non esse SUFFICIENTEM causam ad miracula faciendâ*, sed dispositionem quamdam: quia nempe ad hæc faciendâ aliud requiritur, ordo scilicet divina providentiæ, quæ hominibus congrua remedia, pro variis causis diversimodè dispensat.

Qq. disp. de malo q. 4. quæ est de peccato originali, art. 1. ad 3. dicit carnem per generationem propagatam non esse SUFFICIENTEM causam peccati actualis, quia scilicet ad illud voluntas requiritur; sed peccati originalis esse SUFFICIENTEM causam, quia scilicet ad illud contrahendum aliud non requiritur.

Qq. disp. de correctione fraterna quæst. unicâ art. 1. ad 13. dicit admonitionem fraternam non

esse SUFFICIENTEM ad emendationem, quia præter illam auxilium divinum requiritur. Sic & in Summâ 1. 2. q. 109. art. 8. ad 2. dicit correctionem esse necessariam ad emendationem, sed non esse sufficientem sine Dei auxilio: *Ideò ergo*, inquit,  *necessaria est correptio, quia voluntas hominū requiritur ad hoc quòd à peccato abstineat*: sed tamen correptio non est SUFFICIENS sine Dei auxilio. Unde Eccles. 7. *Considera opera Dei, quòd nemo possit corrigere quem ille desuperaverit*.

1. p. q. 14. art. 11. in c. dicit essentiam divinam esse principium SUFFICIENS cognoscendi omnia quæ per ipsum fiunt, quia scilicet ad cognoscenda omnia aliud non requiritur. Idem sæpè repetit.

Quæst. 39. art. 8. in c. dicit in Deo esse SUFFICIENTEM virtutem ad operandum & causandum, quia scilicet nulla alia virtute indiget.

Q. 46. art. 1. ad 9. dicit Deum ab æterno esse SUFFICIENTEM causam mundi, quia scilicet alterius virtute ad mundum creandum non indigebat.

Q. 105. art. 5. ad 1. Dicendum, inquit, quòd Deus SUFFICIENTER operatur in rebus ad modum primi agentis, nec propter hoc superfluit operatio secundorum agentium.

Q. 60. art. 2. in c. dicit Angelorum naturam non esse principium SUFFICIENS ad hæc quæ sunt supra naturam, quia scilicet alia virtus præter naturalem requiritur.

2. 2. q. 115. art. 2. Ad 1. dicendum, inquit, quòd auctoritates illæ loquuntur de adulatore qui laudat

laudat peccatum alicujus. Talis enim adulatio dicitur plus nocere quam gladius persecutoris; quia in potioribus bonis nocet, scilicet in spiritalibus, non autem nocet ita efficaciter; quia gladius persecutoris occidit effectivè, quasi SUFFICIENS causa mortis; nullus autem adulando potest esse alteri SUFFICIENS causa peccandi, ut ex supra dictis patet. Et ad 2. Dicendum, inquit, quòd ratio illa procedit de eo qui adulatur intentione nocendi. Ille enim plus nocet sibi quam aliis, quia sibi nocet tanquam SUFFICIENS causa peccandi, aliis autem occasionaliter tantum.

Hoc loco causa sufficiens mortis ea est quæ occidit effectivè, & adulatio dicitur sufficiens causa peccandi respectu adulantis, quia per eam ipse peccat; respectu autem aliorum dicitur non esse causa sufficiens peccati, sed occasio tantum; quia ex illa sæpè aliorum peccatum non sequitur, licet det peccandi occasionem.

Q. 178. art. 1. in c. *Spiritus sanctus*, inquit, SUFFICIENTER providet Ecclesie in his quæ sunt utilia ad salutem, ad quod ordinantur gratie gratis date, hoc est, actu providet Ecclesie per operationem miraculorum, quantum requiritur in his quæ ad salutem utilia sunt. Ibid. ad 3. Illi qui jam perfecti sunt, spiritu Dei SUFFICIENTER aguntur, ut non indigeant actu aliis obedire, hoc est, à Deo aguntur, quantum necesse est ad suorum operum directionem.

3. p. q. 30. art. 4. ad 3. Argu-

mentum sufficiens idem est ac argumentum efficax, hoc est habens plenam vim ad probandum. Ideò, inquit, conceptus Elisabeth sterilis inducitur, non quasi SUFFICIENS argumentum, sed quasi quoddam figurale exemplum, & idcò ad confirmationem hujus exempli subditur argumentum EFFICAX ex omnipotentia divinà.

Eadem 3. p. q. 47. art. 1. in c. Persecutores Christi dicuntur causam sufficientem mortis Christo intulisse, quia ex illà causà est mors subsecuta. Respondeo, inquit, dicendum, quòd aliquid potest esse causa alicujus effectus dupliciter; uno modo directè ad illud agendo, & hoc modo persecutores Christi eum occiderunt, quasi SUFFICIENTEM causam mortis ei intulerunt, cum intentione occidendi ipsum, & effectum subsequente; quia scilicet ex illà causà mors est subsecuta.

Non ostendo hinc S. Thomam, cum de passione Christi loquitur ut causà remissionis peccatorum, eodem sensu usurpasse has voces, causa sufficiens remissionis peccatorum; virtus sufficiens ad omnes homines redimendos & ad delenda omnium peccata; sufficienter; sufficientia, in quantum scilicet est in passione tanta virtus, quanta requiritur ad delenda omnium hominum peccata: id, inquam, non ostendo, quia id satis patet ex dictis Sect. 3. art. 5. & præterea articulo sequente in Patris Nicolai confutatione accuratè exponitur.

*Gratia habitualis sufficiens.*

**N**Ec aliter S. Thomas loquitur, aliove sensu gratiæ sufficientis nomen usurpat, cum de gratiâ seu habituali seu actuali loquitur.

1. 2. q. 114. art. 3. ad 3. dicit Spiritum Sanctum, qui per gratiam inhabitat hominem, esse sufficientem causam vitæ æternæ; quia scilicet ad vitam æternam consequendam non requiritur alia virtus, quam Spiritus Sancti per gratiam inhabitantis: seu quia gratia habitualis est æqualis gloriæ in virtute. *Dicendum*, inquit, quod gratia Spiritus Sancti quam in presenti habemus, etsi non sit æqualis gloria in ætæ, est tamen æqualis in virtute, sicut semen arborum in quo est virtus ad totam arborescentiam: & similiter per gratiam inhabitat hominem Spiritus Sanctus, qui est SUFFICIENS causa vite æternæ, unde & dicitur esse pignus hereditatis nostræ 1. Cor. 1. Sic & qq. disp. de veritate q. 6. art. 4. in 3. arg. dicit gratiam habitualement, quantum est de se, sufficienter dissonere ad gloriam.

Quæret forè aliquis, cur cum juxta S. Thomam, gratia habitualis sit dispositio sufficiens ad gloriam, & causa sufficiens gloriæ, cur, inquam, in quocumque invenitur gratia, non invenitur & gloria, sicut juxta S. Thomam, in quocumque est præparatio sufficiens ad gratiam habitualement, invenitur gratia habitualis, ut dicemus infra?

Hoc ipsum sibi objicit S. Thomas qq. disp. de verit. q. 6. quæ est de prædestinatione art. 4. arg. 2. *Sicut*, inquit, dispositio naturalium bonorum est præparatio ad gratiam; ita per gratiam præparamur ad gloriam: sed in quocumque est præparatio SUFFICIENS ex naturalibus bonis, est invenire gratiam: ergo & in quocumque est invenire gratiam, erit invenire gloriam. (Obiter nota præparationem ex naturalibus bonis eam hîc vocari, quæ sit per pium conatum voluntatis, nondum habitu supernaturali instructæ, etsi auxilio Dei intus moventis adjutæ.) Huic argumento sic respondet.

*Ad 2. dicendum*, quod nulla præparatio disponit aliquid ad habendam aliquam perfectionem, nisi suo tempore; sicut naturalis complexio disponit puerum ad hoc quod sit fortis vel sapiens, non quidem tempore pueritiæ, sed tempore perfectæ ætatis: tempus autem habendi gratiam est simul cum tempore præparationis nature; unde non potest inter utrumque aliquod impedimentum intercedere; & sic in quocumque invenitur præparatio nature, invenitur & gratia: sed tempus habendi gloriam non est simul cum tempore gratiæ; unde inter utrumque potest impedimentum intercedere, & propter hoc non est necessarium, quod præscitus qui habet gratiam, sit habiturus gloriam.

Deinde hoc 3. argumentum proponit. Præterea si aliquis habens gratiam non sit habiturus gloriam, aut hoc erit propter defectum gratiæ, aut propter defectum dantis gloriam:



non est autem ex defectu gratiæ quæ, quantum est in se, SUFFICIENTER disponit ad gloriam, nec ex defectu dantis gloriam, qui, quantum est in se, paratus est omnibus dare. Cui argumento sic respondet.

*Ad 3. dicendum, quod non est neque ex defectu gratiæ, neque ex defectu dantis gloriam, quod habens gratiam gloriâ privetur, sed ex defectu recipientis in quo impedimentum intervenit.*

Hæc sunt quæ habet S. Thomas de sufficientiâ gratiæ habitualis ad vitam æternam. Jam referenda sunt quæ docet de ejus sufficientiâ ad merendum, ad perseverandum, ad operandum bonum, & ad non peccandum.

*I. p. q. 62. art. 4. in c. dicit liberum arbitrium non esse sufficientem causam meriti; quia scilicet præter liberum arbitrium gratia habitualis ad merendum requiritur, nec actus liberi arbitrii meritorius est, nisi in quantum est gratiâ informatus. Liberum arbitrium, inquit, non est sufficiens causa meriti; unde actus non potest esse meritorius secundum quod est à libero arbitrio, nisi in quantum est gratiâ informatus.*

*3. p. q. 27. art. 4. ad 1. dicit quod gratia sanctificationis non sufficiebat in Virgine, ad hoc ut fomes peccati, ante Christi conceptionem ligatus, non prorumperet in actum inordinatum, licet ad hoc operaretur; quia scilicet præterea requirebatur specialis providentia Dei, non permittentis ne aliquis motus inordinatus proveniret. Dicendum er-*

*go, inquit, quod in beatâ Virgine post sanctificationem in utero, remansit quidem fomes peccati, sed ligatus: ne scilicet prorumperet in aliquem motum inordinatum, qui rationem præveniret. Et licet ad hoc operaretur gratia sanctificationis, non tamen ad hoc SUFFICIEBAT; alioquin virtute illius gratiæ hoc ei fuisset præstitum, ut nullus motus posset esse in sensualitate ejus, nisi ratione præventus: & sic fomitem non habuisset, quod est contra supra dicta. Unde oportet dicere quod complementum illius ligationis fuit ex divinâ providentiâ, quæ non permittit aliquid motum inordinatum ex fomite provenire.*

Certè eodem modo dici debet gratiam sanctificationis in sanctis non esse sufficientem ad hoc, ut in eis morus inordinati non insurgant, seu ut abstineant à peccatis; quia virtute gratiæ sanctificantis hoc eis non præstatur: sed præterea requiritur specialis protectio & auxilium Dei moventis, ut docet *I. 2. q. 109. art. 1. & 9.*

*Lib. 3. contra gentes c. 155. dicit nec liberum arbitrium, nec gratiam habitualement sufficere ad perseverandum in bono, quia præterea requiritur auxilium gratiæ actualis, quod qui habet gratiam à Deo petit, ut in bono perseveret. Sciendum tamen est, inquit, quod cum ille qui gratiam habet, petat à Deo ut perseveret in bono; sicut liberum arbitrium non sufficit ad istum effectum, qui est perseverare in bono, sine exteriori Dei auxilio, ita nec ad hoc SUFFI-*

CIT aliquis habitus nobis infusus.

Item 2. 2. q. 137. art. 4. in 1. arg. Ergo, inquit, sola inclinatio virtutis SUFFICIÛT ad perseverandum: non ergo ad hoc requiritur ali- quod auxiliũ gratiæ. Concludit in hoc argumento, non requiri auxiliũ actuale ad perseverandum, quia habituale sufficit ad perseverandum: atque istam consequentiã admittendo, respon- det habitualem gratiam non suf- ficere, sed aliam requiri; quia cum habitus sit quo quis utitur cum voluerit, voluntas potest eo non uti usque ad mortem. Ad 1. ergo dicendum, inquit, quod vir- tus perseverantia, quantum est de se, inclinat ad perseverantiã; quia tamen habitus est quo quis utitur cum voluerit, non est necessarium quod habens habitum virtutis, immobili- ter utatur eo usque ad mortem.

Notandum hic est, quod licet S. Thomas his in locis doceat gratiam habitualement non esse suf- ficientem simpliciter, scilicet ad perseverandum; quia ad perseve- randum aliud auxiliũ requiri- tur: tamen aliquando vocat eam, sufficientem ad non peccandum, ad bene operandum, & ad perse- verandum; scilicet quantum ad posse, seu quantum ad sufficientiam operative virtutis, ut loquitur S. Thomas 1. 2. q. 109. art. 2. hoc est, in quantum confert sufficien- tiã, seu virtutem, potentiam & facultatem adæquatam in actu primo bene operandi. Nam ut ait ad Gal. lect. 6. Spiritus sanctus est in nobis per gratiam, per quem ac- quirimus habitum virtutum, & ex

hoc POTENTES sumus operari secun- dum virtutem. Et in 3. ad Ephes. lect. 2. Huiusmodi autem auxiliũ duplex fuit, unum quidem ipsa FA- CULTAS exsequendi, aliud ipsa OPE- RATIO SIVE ACTUALITAS. Facul- tatem autem dat Deus infundendo virtutem, & gratias per quas ef- ficitur homo POTENS & aptus ad operandum. Sed ipsam operationem confert, in quantum operatur in no- bis, interiorius movendo & instigando ad bonum.

Item qq. disp. de verit. q. 27. quæ est de gratia art. 5. ad 1. Gra- tia habitualis cooperans dicitur, se- cundum quod inclinat ad actum in- trinsecum & extrinsecum, & se- cundum quod præstat FACULTATEM perseverandi usque ad finem. Hoc eodem sensu Conradus Koëllin in 1. 2. q. 109. art. 9. dicit gra- tiam habitualement esse sufficientem ad operandum per modum actus primi: ejus testimonium retuli- mus Sect. 1. art. 7.

Vel gratia habitualis dicitur sufficiens ad operandum, non qui- dem absolute & simpliciter, sed secundum quid, seu in certo ge- nere, sicut antea exposuimus; scilicet in genere principii habi- tualis: sicut panis dicitur suffi- ciens ad conservationem vitæ in certo genere, hoc est in genere cibi; quia, ut docet S. Thomas qq. disp. de verit. q. 27. quæ est de gratia art. 5. in c. Una gratia habi- tualis SUFFICIÛT in uno homine, cum per unam SUFFICIENTER ordinetur in vitam æternam. Et, ut ait 1. 2. q. 109. art. 9. Homo in gratiã exi- stens non indiget alio auxilio gratiæ; quasi

quasi aliquo alio habitu infuso. Hoc sensu dicit art. 5. mox citato ex qq. disp. ad 16. gratiam habitua-lem, quam parvuli acceperunt in baptismo, fore sufficientem coo-perari libero arbitrio, quando ipsius usum habere poterunt. *Di-cendum*, inquit, *quod in parvulis, etsi non sit gratia cooperans in actu, est tamen cooperans in virtute. Illa enim gratia cooperans quam accepe-runt, SUFFICIENS erit cooperari li-bero arbitrio, quando ipsius usum habere poterunt.* Sed non sic erit sufficiens cooperari eorum libero arbitrio, ut ad ejus usum alio Dei moventis auxilio non indigeant. Si quidem ut ibidem ait ad 3. *Quantumcumque homo habeat habi-tum gratia, semper tamen indiget divinâ operatione, quâ in nobis ope-ratur modis prædictis*, (scilicet quantum ad actum interiorem vo-lendi, & exteriorem, & resisten-tiam quâ resistimus peccato, & perseverantiam) & hoc propter in-firmitatem nostrâ naturâ, & multi-tudinem impedimentorum, &c. Un-de concludit, quod ided habens gratiam, necesse habet petere di-vinum auxilium. Itaque gratiam habitua-lem dicit esse sufficientem cooperari libero arbitrio, quia scilicet una ad hoc sufficit in suo genere sine ullo alio habitu infu-so. Ostendimus Sect. 1. art. 7. hoc sensu gratiam habitua-lem à S. Thomâ sufficientem dici, cum docet legem novam, quantum de se est, dare auxilium SUFFICIENS ad non peccandum, nec aliam gratiam quàm habitua-lem his verbis de-signari. Silvius in 1. 2. q. 106.

art. 2. docet gratiam habitua-lem esse sufficientem hoc eodem sen-su, scilicet secundum quid, seu in certo genere: ejus testimo-nium retulimus Sect. 1. art. 7.

Ex quibus patet, juxta S. Tho-mæ doctrinam, gratiam sufficien-tem justis omnibus communem, per quam semper sunt etiam adæ-quatè potentes ad volendum & operandum quod bonum est, ad merendum, ad peccatum vitan-dum, ad resistendum tentationi-bus, ad mandata implenda & ad perseverandum in justitiâ, esse propriè gratiam habitua-lem: gra-tia verò actualis Dei interiùs mo-ventis, illis actualitatem & ope-rationem confert, seu ad volen-dum voluntate parvâ, seu ad vo-lendum voluntate magnâ, ac ope-randum efficaciter quod volunt: & tamen per hanc motionem et-iam possunt, & sine eâ non pos-sunt velle & operari quod bonum est, & in justitiâ perseverare, juxta eundem S. Thomam 1. 2. q. 109. art. 1. 9. & 10. ut fusè osten-dit Arnaldus in suo Scripto De do-ctrinâ S. Thomæ art. 6. non quî-dem in quantum posse significat facultatem & potentiam adæqua-tam in actu primo, sed in quantum complectitur omnia ad volen-dum seu operandum necessaria, inter quæ est motio Dei actualis: sicut oculus sine lumine videre non posse dicitur, in quantum lu-men requiritur ad videndum, etsi sine lumine in oculo sano sit fa-cultas ac potentia videndi in actu primo adæquata. Nam, juxta S. Thomam, necessarium simplici-

ter ad aliquid definitur, illud sine quo aliquid esse vel fieri non potest, ut fusè ostensum est in Libro Defensionis Constitutionis Innocentii X. & fidei Ecclesiæ parte 1. c. 9. Hæc est certa doctrina & S. Thomæ & veterum omnium Thomistarum, Braduardini de Causa Dei l. 2. c. 5. Gregorii Ariminensis in 2. Sent. dist. 28. quæst. 2. art. 2. Joannis Capreoli in 2. Sent. dist. 28. quæst. 2. art. 3. Conradi Koëllin in 1. 2. qu. 109. art. 9. & 10. Cardinalis Cajetani in Matth. c. 26. & in 1. 2. quæst. 109. art. 8. & 10. Francisci Ferrariensis in 3. contra gentiles c. 155. & celeberrimorum è recentibus, Estii in 2. Sent. dist. 26. §. 1. 41. 43. Silvii in 1. 2. quæst. 109. art. 4. pag. 723. Doctorum Lovaniensium in Justificatione Censuræ pag. 129. & 131. ac Duacensium in Censura Assert. 14.

*Gratia actualis sufficiens.*

**I**N qq. disp. de verit. quæst. 27. quæ est de gratia art. 3. ad 12. dicit, auditum non esse causam sufficientem fidei, quia præter auditum requiritur gratia interior Dei facientis credere. *Dicendum*, inquit, quod auditus non est causa SUFFICIENS fidei; quod patet ex hoc quod multi audiunt qui non credunt; sed causa fidei (sufficiens nempe simul & efficax) est ille qui facit credentem assentire his quæ dicuntur.

Item 2. 2. q. 6. art. 1. in c. *Quantum verò* ad 2. inquit, scilicet ad assensum hominis in ea quæ sunt fidei, potest considerari duplex causa;

una quidem exterius inducens, sicut miraculum visum, vel persuasio hominis inducentis ad fidem, quorum neutrum est SUFFICIENS causa. Videntium enim unum & idem miraculum, & audientium eandem prædicationem, quidam credunt, & quidam non credunt: & ideo oportet ponere aliam causam interiorem (sufficientem nempe simul & efficacem) quæ moveat hominem interius ad assentiendum his quæ sunt fidei.

Item in 12. ad Rom. lect. 2. *Hoc autem* (scilicet, *Sed non omnes obediunt Evangelio*) *Apostolus dicit*, ut ostendatur quod verbum exterius loquentis non est causa SUFFICIENS fidei, nisi cor hominis attrahatur interius virtute Dei loquentis: Joan. 6. *Omnis qui audit a Patre & didicit, venit ad me.*

S. Thomæ ratiocinatio his locis contenta supponit aliquam causam non esse sufficientem ad credendum, quam effectus non sequitur, & quæ posita nondum creditur; & eam solam esse sufficientem ad credendum, quam effectus sequitur, & quæ posita creditur: siquidem ideo prædicatione verbi, seu auditus, ac miracula non sunt causa sufficiens fidei; quia ex audientibus & videntibus alii credunt, & alii non credunt. Hinc sequitur causam sufficientem fidei illam solum esse, per quam omnes, quibus adest illa causa, credunt: atque ita illa gratia interior, cum quæ aliqui credunt & aliqui non credunt, qualis est Moliniana, non est juxta S. Thomam causa sufficiens fidei, sicut nec auditus;

&

& illa sola gratia interior est causa sufficiens fidei, quæ efficax est ad credendum, seu quæ facit credere, & de quâ dicitur Joan. 6. *Omnis qui audit à Patre & didicit, venit ad me.*

1. p. q. 105. art. 3. ad 2. *Dicendum*, inquit, quod verbum illud *Apostoli* (scilicet, *Non est volentis neque currentis*) non sic est intelligendum, quasi homo non velit & non currat libere arbitrio, sed quia liberum arbitrium ad hoc non est SUFFICIENS, nisi moveatur & juvetur à Deo: hoc est, non habet quidquid requiritur ut velit & currat, nisi ad volendum & ad currendum à Deo moveatur & adjuvetur.

In 2. ad Cor. c. 12. lect. 3. in illud, *Sufficit tibi gratia mea.* Et verè, inquit, SUFFICIT gratia Dei ad mala vitanda, ad bona facienda & ad vitam consequendam eternam: quia scilicet ad hæc omnia nihil aliud ex parte Dei, quam ejus gratia requiritur.

Si id de gratiâ habituali intelligatur, dicenda est sufficere in certo aliquo genere, hoc est in genere principii habitualis, ut antè ostendimus. Hunc enim Apostoli locum, *Sufficit tibi gratia mea*, de gratia habituali vulgò exponit. 3. p. q. 7. art. 2. in arg. 2. & ad 2. *Videtur*, inquit, quod in Christo non fuerint virtutes. Christus enim habuit abundantiam gratiæ: sed gratia SUFFICIT ad omnia rectè agendum, secundum illud 2. ad Cor. 12. *SUFFICIT tibi gratia mea*: ergo in Christo non fuerunt virtutes. Sic respondet.

Ad 1. ergo dicendum quod gratia SUFFICIT homini, quantum ad omnia quibus ordinatur ad beatitudinem: horum tamen quædam perficit gratia (scilicet habitualis) immediate per se ipsam, sicut gratum facere Deo, & alia hujusmodi, quædam autem mediantibus virtutibus, quæ ex gratiâ procedunt.

Item eadem 3. p. q. 6. 1. art. 1. in 2. argumento. 2. ad Cor. 12. *Apostolo dicitur*, SUFFICIT tibi gratia mea: non autem SUFFICERET, si Sacramenta essent necessaria ad salutem: non sunt ergo Sacramenta salutis humana necessaria. Sic respondet.

*Dicendum quod gratia Dei est SUFFICIENS causa humana salutis: sed Deus dat hominibus gratiam secundum modum eis convenientem, & idè necessaria sunt hominibus Sacramenta ad gratiam consequendam* (scilicet habitualem.)

Item & qq. disp. de verit. q. 27. art. 5. in arg. Sed contra; probat ex hoc Apostoli testimonio, *Sufficit tibi gratia mea*, ut omni gratiam gratum facientem sufficere homini ad salutem.

Eadem 3. p. q. 7. art. 10. ad 1. & 2. gratiam sufficientem longè diverso sensu à vulgari exponitur. Dicit enim eam gratiam esse sufficientem ad aliquem statum, quæ est tanta, quanta requiritur ad illum statum, ad quem quis à Deo est electus. Sic beatam Virginem habuisse gratiam sufficientem ad eum statum ad quem erat à Deo electa, ut esset scilicet mater Dei; B. Stephanum habuisse gratiam sufficientem,

tem, ut esset idoneus minister & testis Dei, ad quod erat electus; denique omnes sanctos habere gratiam sufficientem ad merendum vitam æternam, ad quam sunt à Deo præordinati. Atque ita juxta hanc doctrinam gratia sufficiens illa est propriè, quæ est condigna & adæquata in comparatione ad id ad quod aliquis est à Deo electus & præordinatus, seu illud sit commune sanctis omnibus ad vitam æternam præordinatis, seu speciale sit & ad aliquorum excellentiam pertinens: hæc ejus verba sunt.

Ad 1. ergo dicendum, quòd beata Virgo dicta est plena gratiâ, non ex parte ipsius gratiæ, quia non habuit gratiam in summâ excellentiâ quâ potest haberi, nec ad omnes effectus gratiæ; sed dicitur fuisse plena gratiâ per comparisonem ad ipsam; quia scilicet habebat gratiam SUFFICIENTEM ad statum illum ad quem erat electa à Deo, ut esset scilicet mater unigeniti eius. Et similiter Stephanus dicitur plenus gratiâ, quia habebat gratiam SUFFICIENTEM ad hoc quod esset idoneus minister & testis Dei, ad quod erat electus. Et idem dicendum est de aliis. Harum tamen plenitudinum una est plenior alterâ, secundum quod aliquis est divinitus præordinatus ad altiorem vel inferiorem statum.

Ad 2. dicendum, quòd Apostolus ibi loquitur de illâ plenitudine gratiæ, qua accipitur ex parte subjecti, in comparatione ad id ad quod homo est divinitus præordinatus. Quod quidem est, vel aliquid commune

ad quod præordinantur omnes sancti, vel aliquid speciale quod pertinet ad excellentiam aliquorum. Et secundum hoc quædam plenitudo gratiæ est omnibus sanctis communis, ut scilicet habeant gratiam SUFFICIENTEM ad merendum vitam æternam, quæ in plenâ Dei fruitione consistit, & hanc plenitudinem optat Apostolus fidelibus quibus scribit.

De morione sufficienti hæc habet 1. p. q. 105. art. 4. *Potest voluntas moveri sicut ab objecto à quocumque loco, non tamen SUFFICIENTER ET EFFICACITER nisi à Deo*: quia scilicet, ut ibidem docet, solus Deus est bonum universale: unde ipse solus implet voluntatem, & ejus virtutem passivam adæquat: atque ita solus sufficienter eam movet, ut objectum. Hoc loco pro eodem sumit, movere sufficienter & efficaciter voluntatem ut objectum; & hoc est, sic movere voluntatem, quantum sufficit & requiritur, ut illa impleatur, & adæquetur ejus virtus passiva, quæ se extendit, non ad bonum aliquod particulare, sed ad bonum universale. Dicit deinde, voluntatem moveri à Deo, non solum ut ab objecto, sed etiam ut ab eo qui dedit virtutem intelligendi: & hoc modo Deum movere voluntatem interiùs eam inclinando. Nullum hic discrimen affert inter movere sufficienter, & movere efficaciter voluntatem, sive per modum objecti, sive dando illi virtutem, & interiùs eam inclinando; imò potius idem esse insinuat.

In 1. ad Rom. lect. 6. *Primò*, inquit, ostendit quòd virtus Evangelica gratie est necessaria ad salutem. *Secundò* quod est EFFICAX SIVE SUFFICIENS. Idem ergo est gratiam Evangelicam esse sufficientem, & esse efficacem ad salutem.

Item voluntatem Dei esse causam sufficientem & efficacem pro eodem sumit in 9. ad Rom. lect. 4. Cum omnia, inquit, voluntati divine attribuantur, quæ est causa SUFFICIENS, eo quod nullus potest ei resistere. Unde sequitur: *Voluntati ejus quis resistit?* Voluntas autem Dei causa etiam efficax dicitur, quia nullus ei resistit.

Qq. disp. de verit. q. 6. quæ est de prædestinatione art. 4. in 2. & 4. arg. docet in eo in quo est præparatio sufficiens ad gratiam habitualement, inveniri simul & gratiam habitualement. In quocumque, inquit in 2. arg. est præparatio SUFFICIENS ex naturalibus bonis (non tamen sine auxilio Dei moventis, ut antè exposuimus) est invenire gratiam, scilicet habitualement. Et in 4. Quicumque præparat se SUFFICIENTER ad gratiam, habet gratiam. Id respectu gratiæ habitualis verum esse concedit: quia tempus habendi gratiam est simul cum tempore præparationis ad gratiam. Unde, inquit, non potest inter utrumque aliquod impedimentum intercedere: & sic in quocumque invenitur præparatio natura (scilicet sufficiens) invenitur & gratia, scilicet habitualis. Atque ita quando talis est alicujus ad gratiam habitualement præparatio, ut major ad illam consequendam re-

quiratur ista; præparatio, juxta S. Thomam, dicenda non est sufficiens ad gratiam consequendam; sed dicenda est nondum sufficiens, seu insufficiens ad gratiam consequendam; quia non sufficit ad hoc quod ad gratiam habitualement perducatur ac disponatur, licet ad illam consequendam adjuvet, hoc est, licet operetur aliquid ad hoc quod perveniatur ad illam, ut docet 1. p. q. 98. art. 1. mox referendo.

Præterea juxta hanc S. Thomæ doctrinam, quando talis est ad gratiam habitualement præparatio, ut homo illi consequendæ aliquod impedimentum apponat, atque ita nondum illam consequatur, nondum sufficiens est ad gratiam consequendam: quia, ut docet idem sanctus, inter præparationem sufficientem ad gratiam & gratiæ consecutionem, nullum debet impedimentum intercedere. Cum verò impedimentum, quod homo gratiæ apponit, non removeatur, nisi per divinam misericordiam, & gratuitam ipsius gratiæ motionem, ut habet sanctus ille Doctor in 12. ad Hebr. lect. 3. Dicendum est, inquit, quòd hoc ipsum, quòd aliquis non ponit obstaculum, ex gratiâ procedit. Unde si aliquis ponat, & tamen moveatur cor ejus ad removendum illud, hoc est ex dono gratiæ Dei vocantis per misericordiam suam; & idem habet 1. 3. contra gentes c. 161. sicut Sect. 1. art. 1. & 2. fusè docuimus: cum, inquam, impedimentum non removeatur nisi per gratiam Dei cor hominis moventis.



tis ad removendum illud, hinc sequitur quòd ut sufficiens sit per actualem Dei gratiam & motionem ad gratiam habitualem consequendam præparatio, talis ac tanta esse debet, ut omne eidem gratiæ consequendæ impedimentum superet.

Quare cum S. Thomas de variâ ad gratiam præparatione loquitur, numquam illam partitur in sufficientem & efficacem: sed dicit esse majorem vel minorem, prout scilicet Deus plus vel minus voluntatem movet, diversimodè suæ gratiæ dona dispensans. *Quæcumque*, inquit 1. 2. q. 112. art. 2. *præparatio in homine esse potest, est ex auxilio Dei moventis animam ad bonum. Et hanc dispositionem*, inquit 2. 2. q. 24. art. 2. ad 1. *vel conatum ejus qui se ad gratiam præparat, prævenit Spiritus sanctus movens mentem hominis vel plus vel minus secundum suam voluntatem.* Et 1. 2. q. 112. art. 4. *Qui magis se ad gratiam præparat, plenior gratiam accipit: sed ex hac parte non potest accipi prima ratio hujus diversitatis; quia præparatio ad gratiam non est hominis, nisi in quantum liberum arbitrium ejus præparatur à Deo: unde prima causa hujus diversitatis accipienda est ex parte ipsius Dei, qui diversimodè suæ gratiæ dona dispensat.*

Dicit præterea, aliam esse præparationem ad bonum perfectum, quam statim consequitur gratia habitualis; aliam ad bonum non perfectum, quam nondum consequitur gratia habitualis. *Contingit autem quandoque* (inquit 1. 2. q.

112. art. 2. ad 2.) *quòd Deus movet hominem ad aliquod bonum, non tamen perfectum, & talis præparatio præcedit gratiam; sed quandoque statim perfectè movet ipsum ad bonum, & subito gratiam homo accipit, secundum illud Joan. 6. Omnis qui audit à Patre & didicit, venit ad me.*

Et 1. p. q. 98. art. 1. in c. sic explicat quid sit bonum perfectum, & imperfectum. *Est enim aliquod bonum perfectum, & aliquod imperfectum: perfecta quidem bonitas est in his quæ ad finem ordinantur, quando aliquid est tale quod per se est SUFFICIENS inducere ad finem; imperfectum autem bonum est, quod operatur aliquid ad hoc quòd perveniatur ad finem, non tamen SUFFICIAT ad hoc quòd ad finem perducatur: sicut medicina perfectè bona est, quæ hominem sanat; imperfecta autem est, quæ hominem adjuvat, sed tamen sanare non potest.* Itaque præparatio seu motio quæ talis est, ut perducatur hominem ad finem, seu ad gratiam habitualem, est præparatio seu motio ad bonum perfectum: quæ autem talis est, ut quidem adjuvet ac disponat, nondum tamen perducatur ad finem, seu gratiam habitualem, est præparatio seu motio ad bonum imperfectum.

*Conclusio hujus Articuli, in qua breviter de divisione gratiæ in sufficientem & efficacem.*

**H**IS de hujus vocis (*sufficiens*) significatione, sive in his quæ ad gratiam, tum habitualem, tum

tum actualem pertinent, siue in his quæ ad alia argumenta spectant, ex certâ S. Thomæ doctrinâ positâ, concludendum est, juxta S. Thomam, gratiam actua-lem ad aliquid volendum aut operandum sufficientem, eam propriè ac simpliciter dici, præterquam nulla alia ad illud volendum aut operandum requiritur. Ac proinde cum gratia effi-cax juxta eundem S. Thomam, ea sit quæ propriâ virtute consen-sum efficit, ac velle seu perficere operatur, atque hæc ad singulos pios actus necessaria sit, agnos-cendum est juxta S. Thomam gratiam sufficientem ad volen-dum, eam esse quæ est ad volen-dum efficax; similiter gratiam sufficientem ad operandum eam esse, quæ est ad operandum effi-cax; cum sola gratia quæ est ad volendum efficax, ea sit, præterquam alia ad volendum non re-quitur, & sola gratia quæ est ad operandum efficax, ea sit præ-terquam alia ad operandum non requiritur. Et hæc procul dubio ratio est, cur nunquam S. Tho-mas gratiam in sufficientem & ef-ficacem diuiserit, sed solum in operantem & cooperantem, in præuenientem & subsequenter, in excitantem & adiuuantem. Operans necessaria est ut incipia-mus bonum velle, & ad illud suf-ficiens est, quia nulla alia præter illam ad bonum velle requiritur: ad cooperandum autem, seu ad operandum efficaciter bonum quod volumus, eadem gratia ope-rans, juxta S. Thomam, suffi-

ciens dici non potest, quia alia præter illam, scilicet cooperans, ad cooperandum requiritur. Nam, ut ait S. Thomas ex S. Au-gustino 1. 2. q. 111. art. 2. *Deus ut velimus operatur; cum autem vo-lumus, ut perficiamus nobis coope-ratur.*

Id rectè à Doctoribus Lova-niensibus intellectum, qui SS. Augustini & Thomæ doctrinæ fir-missimè adhærentes, & in eâ ap-primè versati, sufficientis gratiæ nomen soli efficaci tribuunt, & quamcumque aliam sufficere ac sufficienter voluntatem præpara-re negant. *Dicimus* (inquiunt in Justificatione Censuræ c. 12.) *Et hoc qualecumque subsidium, quod ali-quando subministrari dicitur iis qui neque credunt, neque convertuntur ad Dominum, non fuisse SUFFICIENTES ad fidem aut conversionem: quippè gratia ad conversionem SUFFICIENTES ipsa convertit; quæ verò non conver-tit, NON SUFFICIT.* Et paulò post: *Aliud autem est posse in quo tam magna insunt vires per SUFFICIENTEM gratia præparationem, ut satis sit ad agendum, per quam quidem gratiam non solum ipsum posse, ve-rum etiam agere adjuvatur.*

Et cap. 13. *Dicimus non esse gratiam SUFFICIENTER præparan-tem voluntatem, nisi quæ faciat ut velimus & consentiamus. Quamdiu enim voluntas nondum sic affecta est ut velit, sed adhuc resistit & contra-dicit, nondum SUFFICIENTER est à Domino præparata.* Hæc doctrina à totâ hâc celeberrimâ Facultate nullo magistrorum ipsius contradi-cente, ut dicitur in confirmatione

eiusdem Censuræ, uniformiter hoc seculo tradita ac defensa est.

Est autem S. Thomas nunquam gratiæ divisionem in sufficientem & efficacem tradiderit, eam tamen non rejicimus, modò absit vocis abusus, nec gratia sufficiens, voluntati interna, vulgari ac Moliniano sensu sumatur pro eâ, quæ cum ex seipsâ efficax non sit, tamen sufficit ad piè volendum & operandum, & alterius gratiæ per se efficacis ad pios actus necessitatem excludit: sed sumatur, juxta Thomistarum sensum, pro gratiâ excitante ac præveniente, quæ quoad usum libero arbitrio relicta & subjecta non est; præter quam alia per se efficax ad operandum semper requiritur; quæ aliquam, parvam licet, voluntatem in nobis efficit; quæ aliquam voluntati sufficientiam tribuit, ac verum posse ad operandum confert, etsi non proximum, non completum, non expeditum; quæ nos ad operandum disponit, excitat, inclinât; cujus motibus aliquando resistimus ac dissentimus, illi non cooperando, quod provenit ex defectu voluntatis humanæ. Eam verò Thomistico sensu semper etiã

efficacem esse dicimus, quia semper habet eum effectum ad quem ex Dei intentione & absolutâ voluntate ordinatur, licet non semper habeat illum ad quem ex naturâ sua refertur, ut in hujus Sectionis præfatione diximus, & articulis sequentibus ampliùs exponemus. Si gratia sufficiens prout ab efficaci distinguitur, hoc Thomistico sensu accipiat, ut eadem sit ac gratia excitans, præveniens, & operans, sufficiensque dicatur in genere gratiæ excitantis, juxta sensum jam expositum, hanc Arnaldus, hanc ceteri omnes S. Augustini discipuli admittunt, sciētes, *cum vas ipsa intelligitur, minus laborandum esse*, ut ait S. Augustinus contra Cresconium l. 1. c. 13. *quid eam hominibus vocare placuerit*. Nec enim, cum nullam gratiam sufficientem hoc in naturæ corruptæ statu dari asserunt, aliam intelligunt quàm Molinianam, ut vulgò sumitur, libero arbitrio quoad usum relictam, quæ gratiæ per se efficacis ad singulos pios actus, aut ad aliquos necessitatem excludit. Vide id ab Arnaldo fusiùs expositum in Dissertatione, parte 3. art. 8. 9. 10. 11. & 12.

## A R T I C U L U S I I.

*In quo refertur & consutatur quod dicit P. Nicolai de gratiæ sufficientis & efficacis significatione: efficacis passionis Christi cum efficaciam gratiæ discrimen ostenditur; & Patrem Nicolai non solum à S. Thomâ, sed etiam ab omnibus Thomistarum, etiam recentium, sententiâ omnino recedere demonstratur.*

**R**eferenda jam sunt Patris Nicolai verba circa gratiæ suf-

ficientis & efficacis explicationem, ut agnoscat quantum,

non solum à S. Thomæ doctrinâ, sed etiam ab universâ illius Scholæ principiis aberret, & quàm funditus omnia illius circa gratiæ per se efficacis necessitatem dogmata ad stabiliendum Molinismum evertat, ut rectè ac meritò doctissimi ex ordine Dominicanorum Theologi hoc uno lecto in Collegam suum excanderint, ac totam suam Scholam per unum Joannem Nicolai corrumpere exclamarint.

*Verba Patris Nicolai n. 1.*

**H**inc exordior verò, quod caterorum fundamentum esse possit, & ad eorum sensum planiorem debeat præsupponi: nempe, utrumque sufficiens gratia distinguatur ab efficaci penes usum, quem necessitas contentionum introduxit, quasi sit sufficiens quæ ad actum disponit, cum posse dat; efficax, quæ inducit effectum; cum posse illud actum complet; non sit efficax tamen plano, expresso, certo sensu è S. Thomæ verbis, & ex modo loquendi quem usurpat, uniformiter colligitur, quod eo ipso ad effectum pertingens intelligi debeat actus semper ac re ipsa ponendum; sed interdum efficax, quod virtutem habeat per se independentem à virtute ipsâ humanâ, ex seipsâ potentem inducendi effectum & stercendi ad illam voluntatem; sic temperatam tamen conditioni voluntatis, ut eam non impellat si nolit, sed nolentem ac reluctantem aliquando relinquat sine actui: adeo ut efficax per internam efficaciam intelligatur illo etiam casu, quo non semper externa per effectus positionem consequitur; sicut & sufficiens aliquando intelligitur apud illum vel intelligi videtur posse, quæ totam

habet ex seipsâ sufficientiam ad actum requisitam; & eo ipso per internam efficaciam dici efficax per se potest; licet non efficiat actum quem efficere possit; quis obicem ponit ac dissentit voluntas; quantumcumque à voluntate non petatur sufficientia efficiendi cum consentit. Et ea fortè ratio est cur (quod Janseniani valde urgent) gratiam S. Thomas in illa duo membra non dividerit separatim; quia & efficaci sufficientia multò amplius inest; & sua quoque sufficienti efficacia quodammodo (id est vis interna) non deest; quamvis illa interim quæ inducit effectum actum, pleniorè vim quamdam secum quàm illa tantum ferat, quæ inducere posse dicitur nec inducit: ex quo scilicet est ut ad illam virtutis in utroque distinctionem explicandam efficax una, sufficiens altera (velut appropriatis vocabulis) vulgari usu Theologorum diceretur: quantumvis illa tantis litibus agitata vocabulorum distinctione, & multò minus tam diversa illorum apud Scholas inter se dissidentes explicatio, nihil ad fidem pertinere arbitrandum sit, modo sit unus apud omnes de sensu ipso ac de fundamentali veritate consensus; ut gratiæ omnia tribuantur, ut ejus virtus ac necessitas agnoscat, ut per illam voluntas ad agendum fieri potens asstruatur, ut voluntatis non agentis negligentia vel defectui ascribatur, quod habuerit unde agere posset, & non egit.

Nec aliter utique de gratiâ loquitur S. Thomas, vel cum sufficientem insinuat, vel cum indicat efficacem; sic eam sufficere indicans, ut id ad quod sufficit per seipsam, non efficiat aliquando, quia coëfficere negligimus, nec ei nos ad agendum aptanti assentimur; sic efficere insinuans, ut non minus efficax intrinsecè (id est efficiendi potens) per seipsam sit, cum ex nostro defectu non efficit. Tum sic pergit n. 2.

Intelligere potuistis ex illis quæ dicta sunt, cum sufficiens auxilium ex planissimo ejus testimonio astruerem, sic appellatum illud, sufficiens ad non peccandum, ut cum illo nihilominus quidam peccent. Intelligite sic alibi efficacem designatum, ut ex effectu non secuto efficaciam non amittat: ubi, nempe 3. part. Summa 9. 49. art. 2. ad 3. Deus (inquit) permittit diabolo posse decipere homines certis temporibus & locis, secundum occultam rationem judiciorum suorum: semper tamen per passionem Christi est paratum hominibus remedium se tuendi contra nequitias dæmonum, etiam tempore Antichristi: sed si aliqui hoc remedio uti negligant, nihil deperit efficaciz passionis Christi: Quid est nihil efficaciz deperire? nisi non minus eam efficacem (id est potentem) esse, ut sequatur effectus, qui ex illâ interim propter non utentium negligentiam non sequitur? An sic efficax ergo, quia effectum actû semper inducat? Vel de gratiâ diu suo modo non possit, quod hic de passione dictum, quasi gratiæ fontis, cujus nec usus nobis nisi gratiâ mediante prodesse possit quidquam, aut ad salutem nostram nisi per illam derivari? Utique dici possit eodem sensu, nihil ejus efficaciz deperire, si eâ uti quidam negligant ad illius effectum suâ negligentia impediant, & hoc omnino esse quod insinuat S. Thomas. Hactenus P. Nicolai.

#### CONFUTATIO.

**I**N his omnibus immorari necesse non est, quia ea exhibuisse sufficit ut confutentur. Quis enim S. Thomæ de gratiæ sufficientis voce & significatione

doctrinam articulo præcedente relatum legendo, non agnoscat, quàm adversa sit S. Thomæ principiis ista, quam tradit Joannes Nicolai, gratiæ sufficientis & efficacis explicatio?

Quis etiam non videat, quantum ab universæ S. Thomæ Scholæ principiis recedat ille, qui gratiam per se efficacem ita interdum intelligi asserit, non quia voluntatem ad volendum aut agendum vi suâ propriâ infallibiliter & indeclinabiliter determinat, sed quia virtutem habet per se independentem à virtute ipsâ humanâ, & ex se ipsâ potentem inducendi effectum, & flectendi voluntatem ad illum; seu quia per illam voluntas fit agendi potens, ita ut illam aliquando relinquat sine actu.

Nova hæc & hactenus inaudita apud Thomistas omnes gratiæ per se efficacis interpretatio; cum nullus hoc nomine aliam unquam intellexerit, quàm quæ propriâ suâ virtute voluntatem ad volendum aut agendum, infallibiliter & indeclinabiliter determinat, & quæ nunquam illam relinquit sine aliquo actu, seu perfecto, seu imperfecto, ad quem scilicet efficiendum ex Dei intentione & absolutâ voluntate ordinatur: adeo ut in Scholâ S. Thomæ gratia per se efficax idem omnino sit, cum gratiâ cujus effectus infallibilis est ob virtutem motionis, & pro eodem semper usurpetur. Imò Jesuitæ gratiæ per se efficacis nomine semper prædeterminantem adversus Thomistas im-

impugnarunt, nec in Controversiâ De Auxiliis litigatum nunquam fuit de hoc vocabulo. Nam Molinæ defensores confessi sunt gratiam efficacem dici non solum à virtute flexendi voluntatem, sed ab effectu & consensu voluntatis. Undenam verò effectum sortiretur, an scilicet ab omnipotentia Dei & propria ipsius gratiæ virtute, an verò à scientiâ mediâ & locorum ac temporum congruitate, disputabant.

Dixit Clemens VIII. in Scripto De doctrinâ S. Augustini c. 5. *Gratiam efficacem secundum S. Augustinum habere suam efficaciam ab omnipotentia Dei, & à domino quod summa divina Majestas habet in voluntates hominum.* Itane verò illud intellectum est, ut gratia vim quidem & virtutem suam haberet ab omnipotentia Dei, sed tamen effectum ab illâ infallibiliter non sortiretur? An S. Augustini testimonia, quæ idem summus Pontifex adducit, id significant? An cum Jesuitæ in Congregatione De Auxiliis declararunt, se communicato Scripto Patribus omnibus Societatis, Gallicis, Italicis, Hispanis, ex eorum sententia admittere omnia quæ in illo Scripto continerentur, esse de mente S. Augustini, excepto hoc uno tantum capite 5? An, inquam, id alio sensu intellexerunt, quam gratiam efficacem sortiri suum effectum ab omnipotentia divinâ, & efficere consensum voluntatis ex virtute Dei moventis & inclinantis voluntates quò vult? Certè nec illud

etiam caput excipere debuissent, si habuissent Nicolaium aliquem, quo consulto facillè admisissent, Molinâ illæso, gratiam efficacem habere suam efficaciam ab omnipotentia Dei, hoc est habere ab illâ vim & virtutem flexendi voluntatem, etsi aliquando ob voluntatis dissensum ac resistantiam effectum non fortiat, & actum non inducat.

Non poterat P. Nicolai ignavius gratificari Molinistis, qui gratiam libero arbitrio quoad usum relinquentes, seu ejus effectum à scientiâ mediâ suspendentes, eam per se efficacem eodem sensu facillè agnoscunt, quia virtutem habet à quocunque alio independentem, ac per illam voluntas fit agendi potens, ita ut illa adjuta aliquando agat, aliquando nihil agat. Sic enim jam simpliciores ludificari conantur Molinistæ, gratiam per se efficacem, ejusque ad singulos pios actus necessitatem se agnoscere profitentes: quia toto jam Orbe hoc dogma receptum vident. Sed cum sensu sua declarant, non aliam gratiam quam sufficientem Molinianam confiteri deprehenduntur, nec alio consilio ita loqui, quam ut Pelagii dolum imitantes, isto gratiæ per se efficacis vocabulo frangant invidiam, offensionemque declinent.

Sed dicet P. Nicolai se agnoscere, quòd illa gratia quæ effectum inducit, plenior vim quamdam secum quam illa tantum ferat, quæ inducere posse dicitur, nec in-

ducit, ac se his verbis à Moliniano sensu longissimè recedere: sed hæc dixisse non sufficit. Ab eo enim quæro, an illa vis interna semper per se actum inducat, velle aliquod generet, seu parvum, seu magnum, & aliquam voluntatis resistentiam superet; aded ut nunquam adsit vis illa interna, quin voluntas piè velit aut operetur, & nunquam voluntas piè velit aut operetur quin illa adsit? Et an necessaria sit ad singulos actus plæ voluntatis, seu perfectos, seu imperfectos, seu peccatoribus, seu iustis? Hæc si agnoscat Joannes Nicolai, cur toto Suffragio, cur totis Thesibus id apertè confiteri refugit, quod capitale est Scholæ Thomisticæ dogma? Imo cur toties impugnare vincitur? Cur hanc gratiæ per se efficacis notionem amplectitur, quam Thomistæ omnes rejiciunt, soli Molinistæ sequuntur ac probant? Si verò hæc non agnoscat, à Moliniano sensu non recedit.

Denique cum omnes norint, Thomistas sic semper gratiæ per se efficacis ac prædeterminantis dogma adversus Molinam defendisse, ut illud ad fidei Catholicæ, Pelagianæ & Semipelagianæ errori oppositæ, dogma pertinere arbitrati sint, sicut ex eorum libris & disputationibus constat; cum Joannes Nicolai dicit, sufficere ad catholicam de Christi gratiâ fidem, *ut gratia omnia tribuantur, ut ejus virtus ac necessitas agnoscat, ut per illam voluntas ad agendum fieri potens astringatur,*

*ut voluntatis non agentis negligentia vel defectui adscribatur, quod habuerit unde agere posset, & non egit: cum, inquam, hæc sufficere dicit, quæ Molinistæ admittunt, etsi gratiæ prædeterminantis necessitatem negent, Scholæ suæ circa capitale Christi gratiæ dogma adversari vincitur.*

Hæc omnia indicari satis est, ut confutentur. Sed unum est in quo immorandum diligentius ad S. Thomæ doctrinam elucidandam, & à perverso Patris Nicolai sensu vindicandam. Ut ille probet gratiam per se efficacem secundum S. Thomæ & verba & sensum eam dici posse, quæ ex seipsâ potens est inducendi effectum, etsi illum actu non inducat, & ex effectu non secuto efficaciam illius non amitti, unicum S. Thomæ testimonium profert ex 3. p. q. 49. art. 2. ad 3. ubi dicitur. *Si aliqui remedio per passionem Christi parato uti negligent, nihil deperire efficacia passionis Christi.* Ex quo concludit quod sicut passio dicitur efficax, id est potens inducendi effectum, etsi effectus ex illâ propter non utentium negligentiam non sequatur, sic gratiam rectè dici eodem sensu efficacem, etsi effectum actu non inducat, si eâ uti quidam negligent, ac illius effectum suâ negligentia impediant.

Sed frustra degener ille S. Thomæ alumnus constantem Patris sui de gratia doctrinam, clarissimis sententiis expressam, ex significatione hujus nominis, *efficax & efficacia*, evertere nititur.

Sancti



Sancti enim Thomæ doctrina de gratia effectum suum infallibiliter consequente, ob virtutem motionis, in istogratiz efficacis vocabulo posita ac fundata non est. Imò satis rarè S. Thomas eodem gratiz efficacis nomine utitur, ut ejus effectus certitudinem exprimat, sed eam declarat aliis verbis & phrasibus quæ nulla cavillatione obscurari possunt. Dicit scilicet q. disp. de malo q. 6. quæ est de electione humana, *Deum immutabiliter movere voluntatem propter efficaciam virtutis morientis quæ deficere non potest.* Dicit 1. 2. q. 10. art. 4. ad 3. *Quod si Deus movet voluntatem ad aliquid, impossibile est huic positioni, quod voluntas ad illud non moveatur; non tamen est impossibile simpliciter. Unde non sequitur quod voluntas à Deo ex necessitate moveatur.* Dicit 1. 2. q. 112. art. 3. in c. *preparationem gratiæ, secundum quod est à Deo moriente, habere necessitatem ad id ad quod ordinatur à Deo, non quidem coercionis, sed infallibilitatis, quia intentio Dei deficere non potest: sicut inferius exponemus.* Denique, ut cætera omittam, dicit 2. 2. q. 24. art. 11. *Quod charitas ex parte Spiritus sancti morientis animam ad diligendum Deum, impeccabilitatem habet ex virtute Spiritus sancti, qui infallibiliter operatur quodcumque voluerit.* Unde, inquit, *impossibile est hac duo simul esse vera, quod Spiritus sanctus velit aliquem movere ad actum charitatis, & quod ipse charitatem amittat peccando.* Num donum perseverantiæ computatur inter beneficia Dei, qui-

bui certissime liberantur quicumque liberantur, ut Augustinus dicit in lib. *De predestinatione sanctorum.*

Quocumque ergo modo S. Thomas has voces, *efficax & efficacia*, usurpet, nihil hinc concludi potest ad probandum gratiam non inducere infallibiliter effectum quem Deus vult ut habeat. Sed ne P. Nicolai de hoc ipso nomine contendendi locum habeat, ostendam manifestò quæ S. Thomas de efficacia passionis Christi loco citato docet, ad gratiam transferri non posse; nec ullo modo cum Thomistarum recentium principiis cohærere eam efficacis auxilii significationem, quam P. Nicolai ex S. Thoma confirmare nititur. Quod ut pateat, primò exponendum est, quid propriè hæc vox, *efficacia passionis Christi*, apud S. Thomam significet.

Agnosendum est, juxta S. Thomam, passionem Christi dici habere efficaciam ad merendum & ad delenda peccata, in quantum habet in se virtutem merendi & delendi peccata: & hoc sensu dicitur, quod etsi quidam remedio per eam hominibus parato uti negligant, nihil deperit ejus efficaciam, hoc est, ejus virtuti ac sufficientiæ.

Eodem sensu 3. p. q. 1. a. 2. ad 2. actus Christi satisfaciens dicitur habere efficaciam infinitam, hoc est, vim & virtutem infinitam ad recompensationem culpæ commissæ. Unde oportuit, inquit, ad condignam satisfactionem, ut actus satisfaciens haberet efficaciam infinitam, utpote Dei & hominis exist.

*existens. Item ead. 3. p. q. 22. art. 3. ad 1. Et idè, inquit, in quantum ejus humanitas operabatur in virtute divinitatis, illud sacrificium erat efficacissimum ad delenda peccata, hoc est, ut dicit in c. habebat plenam vim expiandi peccata. Et ad 2. eodem sensu hæc duo sumit, Esse efficax ad expianda peccata, & Sufficiens expiare peccata: Dicendum, inquit, quod peccata non commemorantur in nova lege, propter inefficaciam Sacerdotii Christi, quasi per ipsum non sufficienter expiantur peccata, sed commemorantur quantum ad illos, qui vel ejus sacrificii volunt esse participes, sicut sunt infideles, pro quorum peccatis oramus ut convertantur, vel etiam quantum ad illos qui post participationem hujus sacrificii ab eo deviant, qualitercumque peccando. Eodem etiam sensu in 3. dist. 19. q. 1. art. 1. in resp. ad 2. quæst. dicitur habere infinitam in merendo efficaciam: item, infinitam in satisfaciendo efficaciam, hoc est, vim & virtutem infinitam ad merendum & satisfaciendum. Dicendum, inquit, quod ad hoc quod aliquid in alterum, effectum inducere possit, duo requiruntur: unum ex parte agentis, scilicet quod habeat virtutem sufficientem ad inducendum illum effectum: alterum ex parte recipientis, ut scilicet dispositum sit ad suscipiendum actionem. Christi autem, qui in nobis meruit deletionem peccatorum, invenitur sufficientia ad delendum omnia peccata nostra ex duobus, scilicet ex actione, in qua meritum consistit, quæ agit vi divinæ, eo quod est actio*

*Dei & hominis, ut dictum est: & ex hoc habet infinitam in merendo efficaciam: & iterum ex eo quod passio abstulit, scilicet et animum Deo unitam, quæ etiam habebat infinitum valorem ex hoc quod est Deo unita: & ex hoc est infinita efficacia in satisfaciendo. Ex parte autem nostrâ requiritur ut nos præparemus ad meriti Christi effectum in nobis suscipiendum per fidem intellectus, & charitatem affectus, & per imitationem operis; quod quidem non contingit in omnibus: & idè quoad sufficientiam satisfactionis & meriti, omnia peccata per Christi passionem deleta sunt, non autem quantum ad efficientiam.*

Hoc loco infinita efficacia in merendo nihil aliud est, quàm infinita secundum se virtus ad merendum: sufficientia autem, seu virtus sufficiens ad delendum peccata, est tanta virtus, quanta ad ea delenda requiritur; atque ita hoc loco sufficientia plus aliquid dicit, quàm efficacia. Efficacia enim denotat solum virtutem; sufficientia autem denotat tantam virtutem, quanta requiritur, adeo ut possit dici efficacia sufficiens, hoc est, virtus sufficiens, præter quam alia non requiritur: sufficiens autem est virtus seu efficacia passionis Christi, quia infinita est. Cum enim est virtus seu efficacia infinita ad aliquid, tunc est tanta virtus & efficacia, quanta ad illud requiritur.

• Et ex hoc eodem loco colligitur efficaciam passionis distinguere ab efficientia passionis, cum efficacia sumatur solum pro virtute

tute in se; efficientia verò, pro ejusdem virtutis ad aliquod subiectum applicatione. Et ideò, inquit, quoad sufficientiam satisfactionis & meriti, omnia peccata per Christi passionem deleta sunt, non autem quantum ad efficientiam, hoc est, per illam actu omnia peccata non fuisse deleta, illam non habuisse effectum suum in omnibus, non fuisse applicatam omnibus per fidem & Sacramenta, per quæ solum effectum suum sortitur, etsi in se tantam virtutem habuerit, quanta ad delenda omnia omnium hominum peccata requiritur. Sic vulgò his locis in Sententias sufficientiam passionis opponit, non quidem efficaciam, sed efficientiam, ut patet ex aliis testimoniis Sect. 3. art. 5. relatis; aliis tamen in locis efficaciam sumit aliter, scilicet pro efficientia, seu pro applicatione, atque efficaciam opponit sufficientiam, & hanc vocem, efficaciter, opponit isti, sufficienter. Sic in 1. ad Tim. 2. lect. 1. *Ipse est, inquit, propitiatio pro peccatis nostris, pro aliquibus EFFICACITER, sed pro omnibus SUFFICIENTER: quia pretium sanguinis est SUFFICIENS ad salutem omnium, sed non habet EFFICACIAM* (hoc est non sortitur effectum, quantum ad consecutionem salutis) *nisi in electis, propter impedimentum.* Similiter qq. disp. de verit. q. 29. art. 7. ad 4. *Quantum AD SUFFICIENTIAM, equaliter se habet ad omnes, non autem quantum AD EFFICACIAM, hoc est, habet virtutem sanandi omnes, sed effe-*

*ctum in omnibus non sortitur, seu omnes actu non sanat.* Et ad 13. *Hoc ipsum gratis alicui nostrum à Deo confertur, quod efficaciam, (hoc est effectum) meriti Christi consequatur.* Et etiam 3. p. q. 48. art. 6. ad 2. efficaciam sumit pro effectum. *Passio Christi, inquit, per spiritalem contactum efficaciam (hoc est effectum) sortitur, scilicet per fidem & fidei Sacramenta.*

Queritur ergo, an sicut passio Christi, secundum S. Thomam, dicitur habere sufficientiam & efficaciam quantum est ex se, hoc est, habere virtutem, etsi in aliquibus non sortiatur effectum, propter impedimentum ac dissensum voluntatis, quæ remediis per illam hominibus paratis uti negligit; sic gratia actualis sufficiens, præter quam alia requiritur ad agendum, dici possit efficax, quantum est ex se, ad aliquem actum, etiam quando supponitur non inducere eundem actum, & non habere effectum propter dissensum ac resistantiam voluntatis.

Resp. 1. hanc gratiæ efficaciam cum efficaciam mortis Christi comparisonem nullum habere fundamentum in doctrinâ S. Thomæ. Etsi enim S. Thomas sumat aliquando efficaciam mortis Christi pro virtute mortis Christi in se, etiam quando effectum non sortitur: nusquam tamen efficaciam Christi gratiam voluntati internam pro ea sumit, quæ solum habet in se virtutem inducendi actum voluntatis, & quæ nullum omnino voluntatis actum indu-

inducit : imò docet semper aliquem actum per illam induci, ad quem scilicet ex absolutâ Dei voluntate ordinatur. Sic juxta S. Thomam, omnis Christi gratia voluntati interna, vel est operans, vel cooperans. Hæc divisio est adequata. Omnis verò gratia operans aliquod volendi initium operatur, & omnis cooperans facit voluntatem cooperari, hoc est, operari efficaciter quod vult, ut rectè probat Arnauldus in suo scripto De doctrinâ S. Thomæ art. 10. Dicit etiam expressè S. Thomas in 8. ad Rom. lect. 3. *Vocationem interiorē efficacem esse, quia illi voluntas assentitur. Hæc vocatio, inquit, est efficax in prædestinatis, quia hujusmodi vocationi assentiunt.* Joan. 6. *Omnis qui audit à Patre & didicit, venit ad me.* Eodem sensu efficaciam sumit in 6. Mart. lect. 7. pro virtute gratiæ effectum suum consequentis, & inducentis consensum. *Secundò, inquit, ponit attractionis efficaciam ibi, Omnis qui audit.*

Mirum ergo non est si passio Christi dicatur habere in se virtutem & efficaciam, etsi non fortietur effectum; & gratia Christi non dicatur habere in se virtutem & efficaciam, quando voluntatis actum non inducit: quia scilicet passionis virtus secundum se in hoc non consistit, ut fortietur effectum, sed in hoc ut sit potens delere peccata per modum efficientiæ in omnibus, quibus ex divinâ ordinatione applicatur, & qui ejus actionem in se susci-

piunt. Contra verò virtus & efficacia gratiæ Christi respectu voluntatis, cui interna est, seu quam interiùs adjuvat, in hoc consistit, non solum ut det illi posse, sed etiam ut in eâ aliquem bonum actum, seu perfectum seu imperfectum, operetur. Nec aliter, secundum S. Thomam, voluntatem intùs movet & adjuvat, nisi bonum aliquod velle in eâ operando. Siquidem juxta S. Thomam, voluntatem intùs per gratiam actualem adjuvari ad aliquid agendum, est voluntatem interiùs à Deo moveri ad illud agendum: Deus autem voluntatem intùs ad actum aliquem movet, illam ad eum actum applicando, ut docet 1. p. q. 105. art. 4. & 5. Porro voluntas eum actum agit ad quem à Deo applicatur. Omitto testimonia antea relata, quibus tam evidenter constar, auxilium Dei intùs moventis semper ob motionis virtutem habere eum effectum quem Deus vult ut habeat.

Resp. 2. Thomistis gratiam sufficientem admittentibus penitus repugnare, ut gratia sufficiens dicatur ex se efficax ad actum ad quem dat posse; & ad quem sufficiens dicitur. Nam juxta illos, auxilium sufficiens, quâ sufficiens, semper est inefficax, quia nunquam producit consensum ad quem est sufficiens. Ita Alvares in responsionibus l. 3. c. 4. n. 3. §. Tertia sententia. *Aliud est, inquit, auxilium excitantis gratia, seu sufficientis, aliud verò gratia adjuvantis seu efficax. Hæc autem*

*Uno auxilia non distinguuntur solum ab effectu, quia nimirum auxilium efficax habet conjunctum arbitris consensum à Deo prævisum aut præcognitum, AUXILIUM AUTEM SUFFICIENS VEL INEFFICAX NON PRODUCIT EUNDem CONSENSUM; sed etiam distinguuntur secundum aliquam realem virtutem intentionaliter existentem in uno, & non in alio. An auxilium quod ut sufficiens est, inefficax est, ex se efficax dici potest? Immo auxilium sufficiens nunquam est efficax, quando elicitur consensus; quia tunc, ut docet Alvares loco citato, non ponitur efficacia auxilii sufficientis, sed alterius ab eo realiter distincti. Nec etiam illud auxilium agit physice respectu actus & consensus ad quem est sufficiens, sed solum moraliter per modum suadentis, allicientis, & invitantis, ut ibidem dicit n. 6. §. Tertia Conclusio. Et de auxiliis disp. 88. concl. 3. n. 7. Causa autem moralis cum non sit causa proprie dicta, sed metaphoricè, ( ut Alvares ibid. c. 4. n. 11. ad 2. probat ex S. Thoma q. 3. de malo art. 3. in c. ) non potest habere propriam efficientiam: sicut passio Christi, quæ est causa physica, seu agens per modum efficientiæ ad delenda peccata, ut docet S. Thomas 3. p. q. 48. art. 6.*

*Alvares multis rationibus ibid. n. 6. confirmat, auxilium sufficiens non habere influxum physicum in consensum. 1. Quia non existit amplius quando elicitur consensus. 2. Quia est imperfectius*

*consensu. Quomodo ergo ex se efficax ad consensum esse potest, si non sit amplius quando consensus elicitur, & virtus ejus sit inferior & imperfectior consensu futuro, cum causa ex se efficax in esse causæ, saltem debeat esse æquè perfecta ac est effectus?*

*Dicimus ergo voluntatem Dei habere sufficientiam & efficaciam virtutis, quantum est ex se, ad operandum: quia etsi non semper operetur, tamen quando ex ordinatione suæ sapientiæ se ad operandum determinat, propriâ virtute operatur, & non alterius auxilio.*

*Dicimus gratiam prævenientem & operantem dare voluntati sufficientiam & efficaciam ad volendum; quia dat voluntati volendi virtutem, quanta ad volendum requiritur, & etiam facit suâ propriâ virtute illam velle. Sic dicimus gratiam subsequentem & cooperantem dare voluntati sufficientiam & efficaciam ad cooperandum, seu ad operandum quod vult; quia dat voluntati operandi virtutem, quanta ad operandum requiritur; & etiam facit suâ propriâ virtute illam operari.*

*Tandem dicimus passionem Christi habere sufficientiam & efficaciam, quantum est ex se, quia seipsa est potens ad operandum, & quando operatur & effectum sortitur, per seipsam operatur propriâ virtute, & non alterius; imò nunquam tollitur impedimentum quod ejus actioni ab aliquibus ponitur, quin ipsa virtute*

virtute propriâ efficiar, ut impedimentum removeatur, & vincatur resistantia, & subjectum disponatur ad recipiendam ejus actionem: siquidem hæc omnia sunt effectus passionis Christi, nec sunt nisi ex ejus virtute & operatione.

Gratia autem sufficiens Thomistarum, præter quam alia ad operandum requiritur, hoc sensu non potest dici efficax ad operandum; quia nunquam propriâ illius virtute, sed semper alterius gratiæ virtute & efficaciam impedimentum removetur, ac voluntatis resistantia vincitur. Imò etiam si subjectum dispositum supponatur ad plenè volendum & operandum, voluntas propriâ illius gratiæ sufficientis virtute ac efficaciam non operatur, sed virtute & efficaciam alterius gratiæ distinctæ quoad entitatem, quam Thomistæ efficacem vocant.

Jam si quærat aliquis, cur passio Christi, cum sit efficax quantum est ex se, tamen effectum non semper inducat, etsi infinitam habeat in merendo efficaciam, ut loquitur S. Thomas: Respondeo id oriri partim ex libero arbitrio, partim ex voluntate Christi, & ex ordinatione sapientiæ divinæ. Sicut enim voluntas Dei, etsi quantum est ex se, sit efficax ad operandum, tamen non semper producit suos effectus; quia est causa libera agens ex ordinatione sapientiæ, quæ non semper habet intentionem operandi: sic passio Christi habens ex se infinitam in meren-

do virtutem & efficaciam, perdet à determinatione voluntatis Christi, quæ propter diversa motiva, & ex ordinatione sapientiæ, non semper applicat suam passionem ad operandum, idè non semper operatur. Hanc rationem affert S. Thomas in 3. disp. 19. q. 1. art. 3. quæst. 1. ad 4. *Incausis*, inquit, *quæ agunt ex ordinatione sapientiæ, non est necessarium quod posita causâ statim ponatur effectus, sed tunc effectus ponitur, quando sapientiæ ordo requirit: & taliter agit passio Christi.* Et qq. disp. q. 29. art. 7. ad 4. *Dicendum, quod meritum Christi, quantum ad sufficientiam, æqualiter se habet ad omnes; non autem quantum ad efficaciam: quod accidit partim ex libero arbitrio, partim ex divinâ electione, per quam quibusdam misericorditer effectus meritorum Christi confertur, quibusdam verò justo judicio subtrahitur.* Et ad 13. *Dicendum quod hoc ipsum gratis alicui nostrum à Deo confertur, quod efficaciam meriti Christi consequatur.* Et 3. p. q. 8. art. 3. in c. *Christus*, inquit, *est caput eorum qui sibi uniuntur solum in potentiâ nondum reducenda ad actum; quæ tamen est ad actum reducenda secundum divinam predestinationem.*

Ex his patet quantum P. Nicolai in hac gratiæ per se efficacis interpretatione, & à S. Thomâ, & à recentibus Thomistis aberraverit, & in quam manifestam contradictionem inciderit, ponendo gratiam sufficientem, quæ aliâ gratiâ efficaci realiter distincta semper indigeat ad actum inducendum.

ducendum, & quæ tamen, quantum ex se est, efficax sit ad eundem actum inducendum. Sed obsecrum non est, quid intendat Thomistarum desertor ille & transfuga. Si ejus sententia inquiratur, abest ab ejus verbis contradictio, nec in explicando gratiæ per se efficacis nomine hallucinatur. Cum Thomistis recentibus non loquitur; quia idem cum iis non sentit. Gratiæ per se efficacis nomen aliter prorsus ab iis exponit, quia eam cum illis non proficitur. Molinistarum sensum sequitur, quia sententiam tenet. Molinistæ enim docent, gratiam sufficientem habere omnia ad agendum necessaria, ac propterea nullâ aliâ virtute indigere ut agat, seu ut voluntatis actum inducat, sed solo liberi arbitrii, eâ pro suo nutu utentis, consensu, quo deficiente non agit: à quo tamen, cum agit, non mutuatur agendi virtutem, quam à seipsâ habet à quacumque alia re independentem. Er quamvis hæc eorum positio falsa sit & erronea, tamen hoc posito rectè & consequenter loquuntur, cum dicunt hanc gratiam sufficientem, esse per se efficacem, hoc est, per se potentem inducendi actum & efficiendi consensum: qui cum ponitur, nullius alterius gratiæ ope & virtute ponitur, quàm istius sufficientis: siquidem ad consensum ponendum nulla alia gratia,

quàm ista sufficiens requiritur; seu ista gratia sufficiens completur quidquid ex parte gratiæ, quoad entitatem spectatæ, ac virtutis divinæ, ad consentiendum & operandum necessarium est.

Mirum ergo non est si P. Nicolai hunc Molinistarum de gratia per se efficace sensum, Thomistarum principiis tam adversum sectetur, quia scilicet sufficientis gratiæ Molinisticæ doctrinam reverà sequitur, ac toto Suffragio inculcat; & gratiæ Thomisticæ, per se efficacis ac suâ virtute infallibiliter ad agendum prædeterminantis, & ad singulos pios actus necessariæ, sententiam rejicit. Thomistarum tamen vocibus utitur, quia Thomistæ habitum gerit & cathedram occupat: sed eas uni Molinistarum doctrinæ accommodando se verum Molinistam prodat. Certè, Pater mi, quotquot te in Parisiensi Prædicatorum Studio primum Regentem à S. Thomæ Thomistarumque omnium doctrinâ tam graviter dissentire perspexerint, æquissimum de te judicium ferent, si vel tuam in hoc divinæ gratiæ argumento *infectam damnet*, quâ nulla manifestior; vel *dopravatam mentem* *corruptâ intentione*, ut ipse loqueris Suffrag. pag. 44. *servientem seculo* suspicentur, quâ nulla Doctore de fidei & fratris sui causâ sententiam dicere periculosior.



## ARTICULUS III

*In quo exponitur hoc S. Thomæ testimonium 1. 2. q. 112. art. 3. Preparatio hominis considerata secundum quod est à Deo movente, habet necessitatem ad id ad quod ordinatur à Deo, &c. Et Patris Nicolai in hunc locum responsiones omnes confutantur.*

**P**ost expositam S. Thomæ de gratiæ sufficientis & efficacis nomine & significatione doctrinam, & confutata nova Patris Nicolai hac de re signenta, nunc S. Thomæ testimonium quibus probatur, gratiam semper efficacem esse ad eum actum, ad quem ex Dei intentione ordinatur, referenda sunt, & proprius eorum sensus ab Arnaldo in Scripto De doctrinâ S. Thomæ luculenter expositus, adversus omnes Patris Nicolai responsiones & argutias vindicandus est.

Pater Nicolai 4. classe n. 6. hæc habet: *Atqui murum hic nobis alienum Janseniani objiciunt, quem transilire non possumus, & quo se ita tectos atque vallatos existimant, ut ad invictam defensionem sui, ac inconcussam securitatem efficaciter sufficere munimentum hoc velint, &c. Quale illud est porro tam ineluctabile vel indeclinabile telum, quale tam inaccessum nobis & nullo vallum superabile saltu? Nimirum illud 1. 2. q. 112. art. 3.*

*Preparatio hominis ad gratiam habitualem est à Deo sicut à movente, à libero autem arbitrio sicut à moto. Potest igitur preparatio ad gratiam dupliciter considerari: uno quidem, modo secundum quod est à*

*libero arbitrio, & secundum hoc nullam necessitatem habet ad gratiæ consecutionem, quia donum gratiæ (habitualis) excedit omnem preparationem virtutis humane. Alio modo potest considerari, secundum quod est à Deo movente, ET TUNC HABET NECESSITATEM AD ID AD QUOD ORDINATUR A DEO, non quidem coactionis, sed infallibilitatis: quia intentio Dei deficere non potest: secundum quod Augustinus dicit in libro De predestinatione Sanctorum, quod per beneficia Dei certissime liberantur quicumque liberantur. UNDE SI EX INTENTIONE DEI MOVENTIS EST, QUOD HOMO CUJUS COR MOVET, GRATIAM CONSEQUATUR, INFALLIBILITER IPSAM CONSEQUITUR, SECUNDUM ILLUD JOANNIS SEXTO; OMNIS QUI AUDIVIT A PATRE ET DIDICIT, VENIT AD ME.*

Hic certè murus ahencus est, quem transilire non possunt Molinistæ, & quo S. Augustinus Discipuli se ita tectos existimant, ut omnes Patris Nicolai minas & insultus despiciant: videamus enim quàm vani sint & inefficaces. Hæc ille subdit: *Quanto conatu nihil agunt, ut tam imbelles & insufficientes inesse sibi vires ostendant ad erroris defensionem ac tute-*  
lam,

lam, dum thraſonice tam efficaces jaſtant & tam firmas. Quid S. Thomæ ibi? Gratiamne non dari quæ non efficaciter agat? Nullum eſſe Dei moventis auxilium, quod non effectum ſortiatur? Nemini gratiam hanc, nemini dari hoc auxilium, niſi ei qui agit? Omnem gratiam prorsus & omne auxilium ei deeſſe qui non agit? *Revolvant & videant.*

En S. Thomæ doctrina ad ſingula de quibus, mi Pater, interrogas. Ibi docet Angelicus Doctor, gratiam non dari quæ non efficaciter id agat, ad quod ex Dei moventis intentione ordinatur; docet nullum eſſe Dei moventis auxilium, quod non effectum illum ſortiatur, ad quem ex Dei moventis intentione ordinatur; ac nemini dari hoc auxilium, quin velit, aut agat id ad quod ex Dei moventis intentione ordinatur. Nam, ut ait 1. 2. q. 112. art. 2. ad 2. aliquando hominem movet ad aliquod bonum, non tamen perfectum, & tunc homo vult bonum imperfectum, & nondum conſequitur gratiam habitualement; ſed quandoque perfectum movet ad bonum, & tunc, gratiam homo accipit ſecundum illud Joannis 6. Omnis qui audit à Patre & didicit, venit ad me. Er hoc totum à Dei moventis voluntate pendet: quia, ut ait 2. 2. q. 24. art. 3. ad 1. Spiritus ſanctus movet mentem hominis, vel plus, vel minus ſecundum ſuam voluntatem. Demum docet omnem gratiam actualem quæ voluntas præparatur & adjuvatur, ei deeſſe qui bonum nec

operatur, nec ullo modo vult; ei autem qui bonum non operatur, ſed tamen vult imperfectum, omnem gratiam prorsus, & omne auxilium non deeſſe: adest enim illi auxilium Dei moventis ad aliquod bonum, non tamen perfectum.

*Revolvant*, inquit idem P. Nicolai, & videant. Inquiris S. Thomæ, utrum neceſſario detur gratia ſe præparanti ad gratiam, vel ſuſcipienti quod in ſe eſt, ut inſcriptio ipſa notat, id eſt, utrum gratiam habitualement ſive juſtificantem neceſſario conſequatur, qui ſe ad illam conſequendam præparat quantis viribus poteſt: ac deinde reſpondet QUOD HOMINIS præparatio ad gratiam eſt à Deo, &c. Quid inde porro colligatur? niſi conſtat illud omnem liberi arbitrii, qui motionem Dei antecedit, nihil habere in ſe, unde gratiam habitualement aſſu infallibili conſequatur; habere autem, ſi ſubſequatur motionem, quia ſcilicet nihil ex parte Dei cujus motio ſupponitur, nihil ex parte noſtrâ, qui motionem ſequi & eidem obſequi ſupponimur, eo in caſu deeſt, quin Deo demum efficaciter adiuvante id aſſequamur quod intendit, hoc eſt quod ait, intentionem Dei deficere non poſſe, quia utique ad illius intentionem ſpectat, ut non niſi conſentienti det gratiam, tametsi eum auxilio ſuo moveat prius, ut conſentire poſſit, hoc eſt quod ait ex Joanne loquentem Chriſtum referente: Omnis qui audit à Patre & didicit.

Revolvimus & vidimus, mi Pater, ac te in omnibus à S. Thomæ ſenſu longiſſimè aberrare agnovimus.

vinus. Cum enim S. Thomas de liberi arbitrii conatu loquitur, secundum quem non est necessitas ad gratiæ consecutionem, non loquitur, ut fingis, de conatu qui Dei motionem antecedit, sed de eo qui Dei motionem sequitur. Nam juxta S. Thomam omnis conatus liberi arbitrii se præparatis ad gratiam, motionem Dei sequitur, quia conatum hunc semper Dei moventis auxilium prævenit: *Hanc*, inquit 2. 2. q. 24. art. 3. ad 1. *dispositionem vel conatum* (ejus scilicet qui se ad gratiam præparat) *prævenit Spiritus sanctus* MOVENS MENTEM HOMINIS, VEL PLUS, VEL MINUS SECUNDUM SUAM VOLUNTATEM. Sed hic liberi arbitrii conatus qui sequitur motionem, seu illa præparatio, potest considerari dupliciter, vel ut est à libero arbitrio, vel ut est à Deo movente. Perversè ergo ais S. Thomam loqui de conatu liberi arbitrii, qui motionem Dei antecedit, comparato cum eo qui Dei motionem subsequitur. Revolve & vide.

Dicis deinde, dari gratiam habitualement ei qui motionem sequi & ei obsequi supponitur, & hoc esse quod ait S. Thomas, intentionem Dei deficere non posse, quia utique ad illius intentionem spectat, ut non nisi consentienti det gratiam.

Id S. Thomæ penitus repugnat. Si enim idèd solùm dicit, intentionem Dei deficere non posse, quia intentio Dei est, ut non detur gratia habitualis nisi consentienti; ergo, cum consentire de-

notet actum ex parte liberi arbitrii, præparatio hominis necessitatem habebit ad gratiam habitualement, potiùs ut est à libero arbitrio, quàm ut est à Deo movente.

Verùm frustra æquivocis vocibus Molinismum occultas, cum, quod Molinistæ faciunt, à consensu potiùs, quàm à motionis virtute & efficaciam repetis, quod is cujus Deus cor movet ad gratiam consequendam, eam infallibiliter consequatur. Ut ergo à te vel invito veritatis confessionem extorqueam, nisi Molinismum apertè proferis, negare non potes, ab efficaciam virtutis moventis provenire, quod is cujus Deus cor movet, gratiam consequatur. Et præterea ex te, (quod verissimum est) cum liberum arbitrium consentit motioni, gratiam habitualement consequitur; eam autem cum dissentit, non consequitur. Quæro ergo à te, an cum consentit, consentiat propter vim & efficaciam motionis, adèd ut motio non sit efficax, cum dissentit; & insit aliqua à Deo virtus motioni cui consentit, quæ non inest motioni cui non consentit. Hoc si negas, Molinismum sequeris: ergo si Molinismum sequi nolis, necesse est ut juxta Thomistarum omnium sententiam fatearis, voluntatem consentire ob vim & efficaciam motionis, quæ non inest motioni cui non consentit.

Iterum te fateri oportet, secundum eosdem Thomistas, rationem motionem esse necessariam

ad consentiendum, ita ut qui eam non habet, nunquam consentiat, sicut qui eam habet semper consentit; nec solum motionem efficacem esse necessariam ad consentiendum, sed etiam ad omnem alium pieratis actum, quo se ad gratiam homo pręparat.

Si ergo is cujus Deus cor movet, sic se pręparet, ut tamen gratiam non consequatur, tunc Deus non tantum movet, quantum oportet ut consentiat; & tamen cum homo se pręparet, aliquem pium voluntatis actum exerceret. Nam, ut docet S. Thomas, nulla est liberi arbitrii ad gratiam pręparatio sine aliquo pio voluntatis actu, seu imperfecto, seu perfecto, quo se ad Deum convertit. Hic autem pius voluntatis actus, licet imperfectus, est à Deo movente. *Quia, ut ait 1. 2. q. 112. art. 2. quęcumque preparatio in homine esse potest, est ex auxilio Dei moventis animam ad bonum.* Et illa pręparatio vel major vel minor est, prout Deus plus vel minus movet. *Nam, ut ait 2. 2. q. 24. art. 2. ad 1. hanc dispositionem vel conatum ejus qui se ad gratiam pręparat, pręvenit Spiritus sanctus movens mentem hominis, vel plus, vel minus secundum suam voluntatem.* Et ut docet 1. 2. q. 112. art. 4. *Qui magni se ad gratiam pręparat, plenierem gratiam accipit: sed ex hac parte non potest accipi prima ratio hujus diversitatis, quia preparatio ad gratiam non est hominis, nisi in quantum liberum arbitrium ejus prępa-*

*ratur à Deo. Unde prima causa hujus diversitatis accipienda est ex parte ipsius Dei, qui diversimodè sue gratiæ dona dispensat.*

Hoc posito, homo ad gratiam perfectè se pręparat, ac perfectè consentit, & ita gratiam habitualement consequitur ob virtutem motionis ad consensum perfectum efficacis: pariter ad gratiam se pręparat imperfectè per pios voluntatis actus, non tamen perfectos, ob virtutem ejusdem motionis ad hos actus imperfectos efficacis, nondum tamen efficacis ad actus perfectos. Motio autem Dei est perfecta vel imperfecta, seu potius ad bonum non perfectum, major est vel minor secundum voluntatem Dei, *quia Spiritus sanctus, voluntatis dispositionem vel conatum pręveniens, movet mentem hominis vel plus vel minus secundum suam voluntatem.* Ergo motio Dei voluntatem pręparantis ad gratiam, semper est efficax ad aliquem pium voluntatis actum, seu perfectum, seu imperfectum, ad eum scilicet ad quem ex Dei, vel plus vel minus secundum suam voluntatem moventis, intentione ordinatur. Hoc unum est quod tenemus, quodque ex hoc S. Thomę testimonio certissimè colligimus, & quod, Pater mi, negare non potes, nisi gratiæ per se efficacis ad singulos pios actus, seu perfectos, seu imperfectos necessitatem rejicias, & S. Thomę desertor & transfuga à Thomistis omnibus haberi velis.

Atque ex his intelligitur, id  
O o 2 quod

quod S. Thomas de gratiæ habitualis consecutione docet, pariter verum esse de singulis pietatis actibus, juxta hoc generale pronuntiatum: *Preparatio ad gratiam secundum quod est à Deo movente, habet necessitatem ad id ad quod ordinatur à Deo, non quidem coactionis, sed infallibilitatis; quia intentio Dei deficere non potest.* Unde sequitur quod quemadmodum si ex intentione Dei moventis est, ut homo cujus cor movet, consentiat, & gratiam habitualement consequatur, consentit & gratiam habitualement consequitur; ita etiam si ex intentione Dei moventis est, ut homo, cujus cor movet, velle incipiat, credat, oret, poenitentiam agat, mandatum aliquod servet sicut oportet, aliquam tentationem vincat, in oratione & justitiâ perseveret, infallibiliter velle incipiet, credet, orabit, poenitentiam agat, mandatum

servabit sicut oportet, tentationem vincet, in oratione & justitiâ perseverabit. Quare etiam S. Thomas expressè dicit, quod ille infallibiliter in justitiâ perseverat, quem Deus ad actum charitatis movet; ut hinc evidenter pateat S. Thomam de ordine motionis divinæ, non solum quantum ad gratiam habitualement infallibiliter consequendam, sed etiam quantum ad actus charitatis infallibiliter eliciendos & ad tentationes peccati mortalis certissimè vincendas loqui. Unde, inquit 2. 2. quæst. 24. art. 11. impossibile est hæc duo simul esse vera, quòd Spiritus sanctus velit aliquem movere ad actum charitatis, & quòd ipse charitatem amittat peccando. Nam donum perseverantiae computatur inter beneficia Dei, quibus certissimè liberantur quicumque liberantur, ut Augustinus dicit in libro *De predestinatione Sanctorum*.

#### A R T I C U L U S I V.

*In quo exponuntur quinque S. Thomæ testimonia, quibus P. Nicolai pravam suam interpretationem confirmare nititur.*

**M**ulta postea ex variis S. Thomæ locis testimonia refert P. Nicolai ad suæ expositionis confirmationem, sed ita aliena à proposito, ut vel ad hanc rem nullo modo pertineant, vel sensum à nobis positum etiam confirmant.

Primum est in hæc verba: *Omnis qui audit, &c.* scilicet lect. 5. in 6. caput Joannis, ubi S.

Thomas sic loquitur: *Duo ponit: unum scilicet quod pertinet ad donum Dei, cum dicit, Audivit, scilicet Deo revelante: aliud quod pertinet ad liberum arbitrium, cum dicit, Et didicit, scilicet per assensum: & ista duo necessaria sunt in omni doctrinâ fidei.* Sed quorsum hoc testimonium? Quis enim dubitat in omni actu libero, quo homo se præparat, duo esse neces-

necessaria, unum quod pertinet ad gratiam, aliud quod pertinet ad liberum arbitrium, & neminem gratiam habituales consequi, nisi qui Deo moventi consenserit? Sed dicimus, in eo qui consentit, talem & tam efficacem esse motionem, ut ipsa vi suâ faciat illum consentire. Nam hæc verba, inquit: *Omnis qui audit à Patre; attractionis efficaciam significant.* Quoties ergo Deus intendit aliquem gratiam habituales consequi, cum sic movet efficaciter & perfectè, ut consentiat ac plenè velit, atque ita gratiam habituales consequatur. An S. Thomas in hunc locum Joannis quid contrarium statuit?

Deinde P. Nicolai observat hæc Christi verba, *Omnis qui audit à Patre, &c.* à S. Thomâ in Quodlibetis, scilicet Quodlibeto 3. art. 6. intellecta esse de vocatione internâ cui dissensimus. Falsum illud est. Ibi enim S. Thomas nihil aliud agit, quàm ut probet in genere nos à Deo adjuvari per interiorem vocationem, atque id confirmat ex his Christi verbis, *Omnis qui audit à Patre, &c.* & ex his Apostoli Rom. 8. quæ de vocatione efficaci, quæ est secundum propositum, semper intelligit, *Quos predestinavit & vocavit.* Alibi verò illa verba, *Omnis qui audit,* semper expressè exponit de vocatione interiori efficaci cui consentimus, ut patet ex ipso ejus commentario in hunc locum, Et 1. p. q. 43. art. 5. ad 2. Et 1. 2. q.

112. art. 2. ad 2. & art. 3. Et in c. 8. ad Rom. lect. 6.

3. Pater Nicolai id citat ex Quodlib. 1. art. 7. ad 2. *Deus movet omnia secundum modum eorum, & ideò divina motio à quibusdams participatur cum necessitate, à naturâ rationali cum libertate, propter hoc quòd virtus rationalis se habet ad opposita, & ideò sic Deus movet mentem humanam ad bonum, quòd potest huic motioni resistere. Ac ita quidem potest (subjungit P. Nicolai) ut ei resistat aliquando, non imminuens ejus efficaciam vel virtutem, sed obstaculum effectui per dissensum opponens.*

Quid aliud vel Molina ipse ad gratiam per se efficacem S. Thomæ auctoritate evertendam scriberet? Nam juxta Patris Nicolai commentarium, motio de qua hic loquitur S. Thomas, & cui potest homo resistere, talis est ut ei resistat aliquando, obstaculum effectui per dissensum apponens; & in ejusdem sententiâ, hic sensus est secundum quem S. Thomas dicit quòd potest huic homo resistere. Ergo, si Pater Nicolai credimus, in doctrinâ S. Thomæ nulla datur gratia per se efficax, seu quæ vi suâ effectum inferat & consensum operetur; qualem intelligunt Thomistæ omnes. Id evidenter patet hoc argumento.

Juxta S. Thomam, quia motio divina participatur cum libertate à naturâ rationali, quæ se habet ad opposita, sic Deus hominem ad bonum movet, quòd potest huic motioni resistere: er-

go si S. Thomas intelligat per hæc verba, ita hominem posse resistere motioni, ut ei resistat aliquando, obstaculum effectui per dissensum apponens, sicut exponit P. Nicolai, sequitur motionem divinam, cui nunquam resistitur, & cujus effectui obstaculum per dissensum non apponitur, non participari à naturâ rationali cum libertate. Atqui motio per se efficax, ut à gratia sufficiente distat distinguitur, secundum omnes Thomistas, ea est cui nunquam resistitur, & cujus effectui obstaculum per dissensum non apponitur. Ergo in doctrinâ S. Thomæ, ut à Patre Nicolai exponitur, motio per se efficax non participatur à naturâ rationali cum libertate, hoc est libertatem evertit, ac proinde non datur.

Quare Petrus à S. Joseph, famosus Molinista, in libro quem pro S. Thomæ defensione inscripsit, hoc idem testimonium eodem quo P. Nicolai sensu, ad prædeterminationem physicam S. Thomæ auctoritate evertendam, laudat. Illo enim relato disp. 1. Sect. 10. §. 1. p. 189. sic concludit: *Motio ergo divina non prædeterminat physicè voluntatem nostram ad opus bonum, quia repugnat talem motionem carere effectui, seu quod voluntas illi resistat: & perpende rationem, quia virtus rationalis se habet ad appositam, idèò motio divina debet participari ab illâ cum libertate, seu cum indifferentiâ ad utrumque.* Et P. Nicolai Molinistis tam ignaviter gratifi-

cans (Suffragii Censorii pag. 46.) S. Thomæ desertor, transfuga & corruptor non vocabitur? Proditor non audiet ille, qui Thomistæ Scholæ, adeoque totius Instituti Prædicatorum, cujus observantiam est professus, prærogativam præcipuam & singularem, quantum in se est, exponit comtemtui, ac dedecore afficit?

Neque verò hic nos in exponendo S. Thomæ testimonio laborabimus, cum S. Thomas in eo de motione efficaci loquatur, cui potest homo resistere; quia, cum sit liber, se habet ad opposita; sed cui nunquam resistit, seu quam nunquam respuit, scilicet quantum ad hunc effectum ad quem ex Dei intentione ordinatur.

Quantum autem ad argumentum quod ex eo loco contra prædeterminationem physicam, seu gratiam per se efficacem petitur, illud non solvimus, quia hoc opere istam de gratiâ efficaci doctrinam à S. Thomâ assertam esse non probamus, sed supponimus.

4. P. Nicolai refert hoc testimonium è quæst. disputatis de malo q. 6. quæ est de electione humanâ art. unico ad 3. in tertio arg. sic concludit. *Si ergo voluntas hominis immobiliter movetur à Deo, sequitur quod homo non habeat liberam electionem suorum actuum.* Sic verò respondet: *Deus movet quidem voluntatem immutabiliter propter efficaciam virtutis moventis, quæ deficere non potest; sed propter naturam voluntatis move,*

quæ



*quæ indifferenter se habet ad diversa, non inducitur necessitas, sed manet libertas.* Tum subiungit P. Nicolai: Quid est enim necessitatem non induci, nisi talem non esse motionem quæ ad effectum necessariò determinet? Quid est manere libertatem & hujus causam reddi conditionem voluntatis, quæ se habeat indifferenter ad diversa, nisi ad eam in diversa, post motionem licet, indifferenter ferri posse?

Hoc testimonium de motione efficaci, sicut & præcedens, intelligitur: ergo si illud adducis, Pater mi, ad ostendendum motionem Dei ob libertatem, talem debere esse, ut illi aliquando resistatur, obstaculo ejus effectui per dissensum opposito, confirmas pariter gratiam efficacem seu prædeterminantem à S. Thomâ negari, quia libertatem evertit. Ea enim gratia cui quandoque resistitur, non est efficax & prædeterminans. Si verò illud adducis solùm ad ostendendum posse motioni Dei resisti, non probas quod in questione est. Quæritur enim, an motio Dei semper habeat effectum ad quem ex Dei intentione ordinatur, & an nunquam illi, quantum ad hunc effectum, resistatur. Hoc unum est quod asserimus, & quod allatum à te testimonium luculenter confirmat: elige ergo, mi Pater, an Molinianam, an verò nostram sententiam velis hoc testimonio confirmare.

Dicimus enim talem non esse motionem, quæ ad effectum ne-

cessariò determinet; sed talem esse, quæ ad effectum infallibiliter & indeclinabiliter determinet propter efficaciam virtutis moventis: ergo illi motioni non resistitur quantum ad hunc effectum, ad quem ex Dei intentione ordinatur. Nonne testimonium à te allatum id evidenter probat? Dicimus manere libertatem, quia voluntas se habet ad diversa: atque ita voluntatem, etiam post motionem, in diversa ferri posse, sed immobiliter ferri ad unum, ad quod scilicet determinatur, & ex Dei intentione ordinatur; idque non propter aliquam scientiam mediam, non propter aliquam temporis, aut loci, aut temperamenti congruitatem; sed propter efficaciam virtutis moventis, quæ deficere non potest, & cui, ut ait S. Prosper, *tempus agendi semper adest, quæ gesta velit.* Quid aliud hæc S. Thomæ verba significant? Hoc si dicas, noster es, & Thomista; si secus, tu ipse es, & Molinista.

5. P. Nicolai citat hoc testimonium ex ipso articulo 3. 1. 2. q. 112. quem expendimus. In 1. argumento hæc habet S. Thomas, *Videtur quòd ex necessitate detur gratia se præparanti ad gratiam, vel facienti quod in se est: quia super illud Rom. 5. Justificati ex fide pacem habeamus, &c. dicit glossa, Deus recipit eum qui ad se confugit, aliter esset in eo iniquitas: sed impossibile est in Deo iniquitatem esse: ergo est impossibile quod Deus non recipiat eum qui ad se confugit: ex necessitate igitur gratiam assequi-*

tur. Sic respondet.

*Ad 1. ergo dicendum*, quòd glossa illa loquitur de illo qui confugit ad Deum per actum meritòrium liberi arbitrii jam per gratiam informati, quem si non reciperet, esset contra justitiam quam ipse statuit: vel si referatur ad motum liberi arbitrii ante gratiam (habitualem nempe, de quâ priùs) loquitur secundum quod ipsum confugium hominis ad Deum est per motionem divinam, quam justum est non deficere.

Quid hinc sequitur? nisi eum cujus Deus cor movet, ut ad Deum confugiat, eâ intentione ut à Deo recipiatur, & gratiam consequatur, infallibiliter ad Deum confugere, à Deo recipi, & gratiam consequi: quia justum

est motionem divinam non deficere, hoc est, cum habere effectum ad quem ex Dei intentione ordinatur. Si ergo à Deo moveatur, & tamen ad Deum non confugiat, quantum oportet ad gratiæ consecutionem, signum est eum non fuisse perfectè motum à Deo, & eâ intentione ut ad Deum, quantum oportet ad gratiæ consecutionem, confugeret; quanquam fuerit à Deo motus ad aliquod bonum, non tamen perfectum: unde sequitur eum ex eâ motione se preparavisse imperfectè, quia justum est motionem divinam non deficere, hoc est, habere eum effectum ad quem ex Dei intentione ordinatur.

## A R T I C U L U S V.

*In quo ostenditur quàm temerè P. Nicolai Conradi Koëllin testimonium ad suam expositionem confirmandam referat, cùm è contrario nostram confirmet.*

**D**Enum P. Nicolai Conradi Koëllin ex Ordine Prædicatorum, S. Thomæ interpretis celeberrimi commentarium nobis opponit. Sic loquitur P. Nicolai. Sit efficax motio quæ hominem perducit ad gratiam, quia talem esse vult intentio quæ deficere nunquam potest; numquid non est alia quam contingat idèò deficere, quia homo dissentit, quia ejus effectum per dissensum excludit? Nota (inquit Conradus Koëllin super hunc ipsum locum quo tam effusè Janseniani gloriantur) quòd conclu-

sio S. Thomæ notanter dicit: *Istò modo preparatio ad gratiam habet necessitatem ad id ad quod ordinatur à Deo: quia contingit ut Deus moveat hominem sufficienter, qui tamen non consequitur gratiam propter dissensum ejus ad gratiam; sed tunc non est intentio Dei quòd ipsam gratiam consequatur, nec illum motionem ad gratiam ordinat.* (Hæc sequuntur apud Conradum quæ P. Nicolai non retulit) Quare Doctor sanctus dicit, quòd ex preparatione ut est à Deo, homo quidem consequitur quod Deus intendit; sed

*Sed nisi intendat efficaciter movere & conferre gratiam, tunc ipsam non consequitur. Et ideo Doctor sanctus, quasi statim hoc notando dicit in consequente: Unde si ex intentione Dei moventis est, quod homo cuius cor movet, consequatur gratiam, infallibiliter ipsam consequitur, quia non stant simul propositum divine voluntatis, & frustratio effectus, ut habet Doctor sanctus.*

*Neotericus porro Thomista non est, inquit P. Nicolai, qui Concilium Tridentinum præcessit; non ex eorum turba unus, quos Jesuita corruerint, qui Jesuitas nunquam vidit, nondum suo tempore institutos; non calumniis obnoxius, quas tam audaciter, etsi tam ridiculas & insulas Janseniani deblaterant; non tam obscura fama, ut illius repudiare testimonium possint, &c. Sic P. Nicolai veterem & insignem Thomistam laudat ipsius sententia in omnibus repugnantem.*

*P. Nicolai se quæstionis statum non intelligere, vel non intelligere velle declarat. Quid enim toto hoc Conradi Koëllin testimonio, quod sententia nostræ penitus conforme non sit? Sit efficax motio, inquit P. Nicolai, quæ hominem perducatur ad gratiam, quia talem esse vult intentio quæ deficere nunquam potest, numquid non est alia, quam contingat ideo deficere, quia homo dissentit, quia ejus effectum per dissensum excludit? Equivoca sunt verba, quorum sensus si distinguatur, res plana fiet. Dum enim quæritur, numquid non sit motio quæ ideo deficiat, quia homo*

*dissentit, & ejus effectum per dissensum excludit, vel sermo est de effectum motionis ad quem ex naturâ suâ refertur, vel de effectum motionis ad quem ex Dei intentione ordinatur.*

*Hoc posito dicimus, nullam esse Dei motionem, quæ quoad effectum ad quem ex Dei intentione ordinatur, deficiat, seu quæ hunc effectum non obineat, ac nunquam hominem motioni quoad hunc effectum dissentire, & impedimentum ponere. Dicimus autem esse aliquam motionem, quæ quoad effectum ad quem ex naturâ sua refertur, aliquando deficit, quia homo dissentit, & hunc ejus effectum per dissensum excludit. Et hic sensus est Conradi Koëllin, cum hæc habet: Contingit ut Deus moveat hominem sufficienter ( hoc est per motionem quæ non est efficax ad consensum, & ad gratiæ consecutionem, nec à Deo ad illa ordinata ) quæ tamen non consequitur gratiam, propter dissensum ejus ad gratiam. Quid ex his verbis sequitur, nisi quod dissensus liberi arbitrii est causa cur is qui à Deo movetur, non consequitur gratiam habitualement? Id faciemur: hoc unum illo testimonio probatur. Sed quæritur an consequi gratiam reducatur in liberi arbitrii consensum, velut in causam: & an ordo infallibilis motionis divinæ ad gratiam consequendam, pendeat ex liberi arbitrii consensu & usu; an vero ex Dei intentione & ordinatione, & ex ipsius motionis virtute & efficaciam? A-*  

*scrimus*

serimus illum pendere ex Dei intentione & ordinatione, & ex ipsius motionis virtute & efficacia: hinc rectè concludimus motionem Dei nunquam frustrari eo effectu ad quem ex Dei intentione ordinatur: ex S. Thomà id probavimus. Conradus Koëllin in testimonio allato non solum id non negat, sed confirmat: *Quare*, inquit, *Doctor sanctus dicit, quod ex preparatione ut est à Deo, homo quidem consequitur quod Deus intendit; sed nisi intendat efficaciter movere & conferre gratiam; tunc ipsam non consequitur, & idè Doctor quasi statim hoc notando dicit in consequente: Unde si ex intentione Dei morientis est, quod homo cujus cormoret, consequatur gratiam, infallibiliter ipsam consequitur, quia non stant simul propositum divine voluntati, & frustratio effectus. Et ibidem: Preparatio & facere quod in se est, consideratur secundum quod est à Deo moriente, quia scilicet Deus facit voluntatem velle & desiderare gratiam & justificationem. Ibidem: Voluntas & liberum arbitrium non possunt cogi etiam à Deo, potest tamen infallibiliter moveri, quia immutatio voluntatis est in potestate Dei, & secundum ejus immutationem potest imprimere habitum & gratiam, & perfecte vel minus perfecte movet.*

Postea autem in responsione ad 2. argumentum: *Dico*, inquit, *quod non accipere gratiam (scilicet habitualement) reducit in causam, in liberum arbitrium posens obicem gratia. Sed accipere gratiam, non*

*est ex libero arbitrio, sed ex Deo. Denique in responsione ad 1. dicit: Quod sicut in naturalibus dispositio, quæ est necessitas, est ex efficacia agentis; ita preparatio ad gratiam est necessitas ad gratiam ut est à Deo, & cum hoc ordinata ad gratiam consequendam. Unde sequitur quod juxta hunc S. Thomæ interpretem, sicut & juxta S. Thomam; omnis Dei motio semper habet cum effectu ad quem ex Dei intentione ordinatur: quia intentio Dei deficere non potest, licet aliquando propter impedimentum quod homo ponit per dissentium, non habeat eum effectum ad quem ex natura suâ refertur.*

Obiter nota circa hanc vocem, *sufficienter*, quâ utitur Conradus Koëllin: *Contingit*, inquit, *ut Deus moveat hominem sufficienter, qui tamen non consequitur gratiam propter dissentium ejus ad gratiam, quod etsi interpret ille his in verbis cum S. Thomà quoad rem omnino contentiat, ut probavimus, tamen in loquendi modo ab eo dissentit, cum sufficienter movere, distinguit ab eo quod est efficaciter movere; siquidem antea ostendimus arr. 1. sufficienter, & efficaciter movere apud S. Thomam idem esse, & idem significare: ostendimus gratiam actualement sufficientem ad aliquid agendum, semper ab eodem Sancto sumi pro ea, præter quam ad id agendum alia non requiritur: ostendimus etiam juxta eundem Sanctum præparationem sufficientem ad gratiam habitua-*

len

lem eam esse, quæ tanta est, quanta ad gratiam habitualem habendam requiritur, & quam statim sequitur gratia habitualis. Quoad rem autem cum S. Thomâ omnino consentit Conradus, quia per motionem sufficientem nihil aliud intellexit quàm gratiam excitantem ac præparantem, quæ dat parvam & invalidam voluntatem, quæque inefficax est ad plenam voluntatem, & ad eum consensum quem gratia habitualis infallibiliter sequitur. Contingit ergo aliquando aliquem sic à Deo moveri, qui tamen non consequitur gratiam habitualem propter dissensum ejus. Id nos cum isto auctore profiteamur, ut antea exposuimus.

Et ex eodem auctore facillè confirmari potest, nullam esse gratiæ divinæ motionem quæ ad aliquem pium voluntatis actum, imperfectum vel perfectum, semper efficacem non sit, prout ex Dei, vel plùs, vel minùs moventis intentione ordinatur. Docet enim juxta S. Thomam gratiam convenienter dividi in operantem & cooperantem: quæ divisio adæquata cum sit, omnem gratiam actualem seu motionem complectitur. Docet insuper juxta eundem Sanctum, voluntatem per gratiam operantem semper bonum velle: *Quia*, ut ait S. Thomas, *secundum quod Deus movet humanam mentem ad actum interiorum voluntatis, scilicet ad bonum velle, dicitur gratia operans.* Docet hoc bonum velle esse a-

ctum liberum: *Quia*, ut ait S. Thomas, *homo sic agitur à Spiritu sancto, quòd etiam agit, in quantum est liberi arbitrii; dici ergo à S. Thomâ, quòd per gratiam operantem voluntas est mota & non movens; non quia, inquit, voluntas non concurrat ad actum suum, sed quia gratia prævenit & inclinât & facit voluntatem velle.* Sicut autem per gratiam operantem semper homo bonum vult actu libero, ita etiam per cooperantem semper efficaciter operatur bonum quod vult, vel in eo perseverat, seu semper cooperatur gratiæ; aliàs non esset gratia cooperans. *Gratia cooperans, inquit idem Koëllin, est divinum auxilium, quo Deus cum voluntate concurrat ad opus meritorium faciendum, & quo ipsum in bono conservat, & à lapsu præservat.* Ergo eum nulla sit actualis Dei in voluntate morio, nisi per gratiam operantem, vel per gratiam cooperantem, nulla est Dei motio ex quâ non sequatur bonum velle, vel bonum operari, seu in bono perseverare, & quæ proinde non sit efficacem ad aliquem pie voluntatis actum, ad quem scilicet ex Dei, vel hoc vel isto modo, vel plus vel minùs moventis, intentione ordinatur. Hæc genuina est S. Thomæ doctrina, cum gratiam actualem convenienter per operantem & cooperantem dividi docet, ut Arnaldus amplius ostendit in Scripto De doctrina S. Thomæ art. 10. Hæc etiam est Conradi Koëllin in hunc S. Thomæ Articulum doctrina;

ctrina : hoc unum est quod asserimus.

En ergo fractæ dissolutæque machinæ omnes, en repulsi conatus quibus P. Nicolai hunc murum ahencum expugnare frustra tentavit : quanquam vel so-

lùm vociferante illo, & clangente tubâ murus hic velut Jerichontinus illicò ruiturus videretur. Impugnemus jam munimenta omnia, quæ ille ad sui defensionem posuit.

## A R T I C U L U S VI.

*In quo exponuntur omnia testimonia quibus P. Nicolai probare nititur, gratiam Dei non esse semper efficacem; ac primò circa illud, Vos semper Spiritui sancto resistitis.*

**P**ater Nicolai octo S. Thomæ testimonia hinc inde colligit, ut gratiam Dei non esse semper efficacem ostendat. Singula referenda sunt.

Primum ostendit n. 3. illud Act. 7. *Vos semper Spiritui sancto resistitis*, à S. Thomà de Spiritu sancto non solum exteriùs loquente, sed etiam interiùs movente expositum. Illud fatemur; sed juxta sensum supra allatum: resistimus scilicet gratiæ interiori quoad effectum ad quem ex naturâ suâ refertur, non verò quoad effectum ad quem ex Dei moventis intentione ordinatur: nec aliud probat testimonium quod citat ex Quodlibeto 2. art. 6.

P. Nicolai addit, *Ad conviciationem resistentium non sufficere, si Spiritus sanctus solum exteriùs per Prophetas, & non interiùs loqueretur*: sed illud ex hoc eodem loco falsum esse convincitur. Nam ut ostendimus Sect. 2. art. 3. sanctus Thomas hic docet homines tene-ri ad credendum, si à Deo per

aliquem ex his modis adjuventur, seu per interiorem vocationem quâ quosdam attraxit; seu per doctrinam & prædicationem exteriorem; seu per exteriora miracula: ullum verò ex his modum solitariè sumtum necessarium esse nequaquam dicit.

P. Nicolai idem confirmat alio testimonio 1. ad cor. 12. lect. 1. hæc habet S. Thomas: *Nemo ergo in Spiritu Dei loquens dicit anathema Jesu, quia nullus per Spiritum Dei peccat mortaliter; quia, ut dicitur Sap. 1. Spiritus sanctus disciplina effugiet fictum. Sed secundum hoc videtur, quod quicumque habet Spiritum sanctum non possit peccare mortaliter; quia etiam dicitur Joannis 3. Omnis qui natus est ex Deo, peccatum non facit, quoniam semen ipsius in eo manet. Sed dicendum est, quòd quantum est ex Spiritu Dei, homo non facit peccatum, sed magis retrahitur à peccato: potest tamen peccatum facere ex defectu voluntatis humane, quæ Spiritui sancto resistit, secundum illud Act. 7. Vos autem semper Spiritui sancto resistitis.* (Hæc verba

Verba sequentia P. Nicolai reii-  
cuit ) *Non enim per Spiritum san-  
ctum inhabitantem tollitur facultas  
peccandi à libero arbitrio totaliter in  
vitâ presenti, & idè signanter A-  
postolus non dixit: Nemo Spiritum  
Dei habens; sed, Nemo in Spiritu  
Dei loquens.* Hic propriè sermo  
est de Spiritu sancto inhabitante,  
hoc est, de gratiâ habituali, ut  
patet ex his verbis: *Videtur quòd  
quicumque habet Spiritum sanctum  
( scilicet inhabitantem ) non possit  
peccare mortaliter; & ex his aliis:  
Non enim per Spiritum sanctum in-  
habitantem tollitur facultas peccandi.*  
Fraudulenter ergo P. Nicolai hu-  
jus testimonii caput & calcem  
truncavit, ne S. Thomam de gra-  
tiâ habituali loqui innotesceret.  
Itaque S. Thomas hic docet, quòd  
per Spiritum sanctum inhabitan-  
tem nemo peccat mortaliter, sed  
potius retrahitur à peccato: ve-  
rùm, quia per illum facultas pec-  
candi non tollitur, idè homo  
defectu voluntatis humanæ, Spiri-  
tui sancto inhabitanti resistentis,  
aliquando peccat. Licet autem  
hæc verba, *Vos semper Spiritui san-  
cto resistitis*, vulgò de Spiritu san-  
cto vel exteriori per doctrinam,  
vel interiori per illuminationem

aut etiam inspirationem loquente  
intelligantur, manifestum tamen  
est hic à S. Thomâ accommodari  
Spiritui sancto inhabitanti, & de  
eo intelligi.

Sed esto, sermo sit de Spiritu  
sancto interiori movente, seu de  
gratiâ actuali: illi resistimus quo-  
ties defectu voluntatis humanæ  
ea ad quæ suis motibus nos ex-  
citât & inclinat, non perficimus.  
Et idem est sensus verborum quæ  
sequuntur in 1. ad Thesal. c. 5.  
lect. 2. super illud: *Spiritum noli-  
te extinguere. Sed tamen dicitur quis  
extinguere Spiritum uno modo, fer-  
vorem ejus extinguendo, vel in se, vel  
in alio, Rom. 12. Spiritu ferventes.*  
Cum enim aliquis aliquid boni ex fer-  
vore Spiritus sancti vult facere: vel  
etiam cum aliquis bonus motus sur-  
git & ipse impedit, exstinguit Spi-  
ritum sanctum; Act. 7. *Vos sem-  
per Spiritui sancto resistitis.* Tunc  
scilicet impedimus bonum mo-  
tum voluntatis qui in nobis sur-  
git, quoties non operamur nec  
perficimus bonum quod velle in-  
cepimus: & hoc est gratiæ Dei  
non cooperari, divinis inspiratio-  
nibus non correspondere, extin-  
guere Spiritum sanctum, Spiri-  
tui sancto resistere.

## A R T I C U L U S VII.

*In quo exponuntur testimonia n. 4. relata.*

*Quid sit, Esse in naturâ humanâ ut mens non repugnet inte-  
riori instinctui & exteriori prædicationi veritatis; & quid  
sit interior instinctus.*

**S**ed audiamus ( inquit P. Nico-  
lai n. 4. ) hoc ipsum dogmatice

in Summâ inculcantem, & pari sen-  
su antedictum testimonium explican-  
tem.



tem. Audiamus; sed ut meliùs intelligamus, totus articulus expendendus est.

S. Thomas 2. 2. quæst. 10. art. 1. quærit, utrùm infidelitas sit peccatum. Argumentum 1. sic proponit. *Videtur quòd infidelitas non sit peccatum. Omne enim peccatum est contra naturam, ut patet per Damascenum in 2. libro: sed infidelitas non videtur esse contra naturam. Dicit enim Augustinus in libro De predestinatione Sanctorum, quòd possibile habere fidem, sicut posse habere charitatem, naturæ est omnium hominum: habere autem fidem, quemadmodum habere charitatem, gratiæ est fidelium. Ergo non habere fidem, quod est infidelium, non est contra naturam, & ita non est peccatum.* Sic respondet.

*Ad 1. ergo dicendum, quòd habere fidem non est in naturâ humanâ: sed in naturâ humanâ est, ut mens hominis non repugnet insinclui, & exteriori veritatis prædicationi: unde infidelitas secundum hoc est contra naturam.*

Horum verborum sensus est, in animâ non esse potentiam naturalem ad fidem, ut docet S. Augustinus, sed obedientialem, quæ à Theologis vocatur non repugnantiâ, quæ est, ut ait S. Thomas 3. p. q. 11. art. 1. per comparationem ad agens primum, quod potest quamlibet creaturam reducere in actum aliquem altiore actû, in quem reducitur per agens naturale. Licet ergo non sit in naturâ humanâ, ut est potentia naturalis, consentire fidei, est tamen in illa ut est potentia, obedientiæ illi non re-

pugnare, hoc est fidei auditum & instinctum recipere, seu, ut docet in quæst. disp. de verit. quæst. 2. de peccatis art. 11. *Gratia quidem est supra naturam animæ, & tamen in naturâ animæ vel cuiuscumque creaturæ rationalis est aptitudo quædam ad gratiæ susceptionem.* Et art. 10. *Impossibile est quòd per peccatum tollatur totaliter bonum naturæ, quod est aptitudo vel habilitas ad gratiam.* Hæc autem duo coniungit S. Thomas, instinctum & exteriorem veritatis prædicationem, non quòd ea semper simul adesse necesse sit, sed quia duobus his modis homines à Deo adiuvantur ad credendum, ut docet S. Doctor Quodlibeto 2. art. 6. primò quidem per interiorem vocationem, quàm postea vocat instinctum interiorem; secundò per doctrinam & prædicationem exteriorem, & his modis, inquit ibidem, tenentur homines acquiescere.

Nec verò S. Thomas hoc in argumento (ut falsò supponit P. Nicolai) quærit, An reus sit qui non credit, nec, An possibilis sit fides; sed, An infidelitas, cum non sit contra naturam, sit peccatum. Verùm P. Nicolai argumentum secundum S. Thomæ cum primo confudit. Nam S. Thomas in secundo solùm argumento de possibilitate fidei agit. 2. Præterea, inquit, nullus peccat in eo quod vitare non potest, &c. quod solvendo, nullam omninò vocationis interioris, seu gratiæ mentionem facit.

Sed quando P. Nicolai contendit, nunquam homines teneri acquies-

quiescere fidei, nisi simul cum prædicatione exteriori adsit interior vocatio, rogandus est ut vel articulum legat quem laudat, ut in eo suum errorem agnoscat. Nam S. Thomas hoc art. 1. quaerit, *An infidelitas sit peccatum*, respondetque infidelitatem negativam non esse peccatum; eam autem esse peccatum, cum quis repugnat auditui fidei, hoc est exteriori prædicationi veritatis, de qua scilicet dicit Isaias, *Quis credidit auditui nostro?* & de qua dicit Apostolus ad Rom. 10. *Quomodo credent ei quem non audierunt? Quomodo autem audient sine prædicatione?*

Respondeo dicendum, inquit, quod infidelitas dupliciter accipi potest: uno modo secundum puram negationem, ut dicatur infidelis ex hoc solo quod non habet fidem: alio modo potest intelligi infidelitas secundum contrarietatem ad fidem, quia scilicet aliquis repugnat auditui fidei, & etiam contemnit ipsam, secundum illud Isaiæ 53. *Quis credidit auditui nostro?* Et in hoc proprie perscitur ratio infidelitatis, & secundum hoc infidelitas est peccatum. Si autem accipiat secundum negationem puram, sicut in illis qui nihil audierunt de fide, non habet rationem peccati, sed magis pœnæ; quia talis ignorantia divinarum ex peccato primi parentis consecuta est: qui autem sic sunt infideles, damnantur quidem propter alia peccata, quæ sine fide remitti non possunt, non autem damnantur propter infidelitatis peccatum.

Quæ doctrina si cum eâ conse-

ratur, quam præcedente q. 2. art. 5. in resp. ad 1. tradit, constabit evidentissimè, ad rationem peccati non requiri, ut gratia, seu vocatio interior, simul cum prædicatione exteriori adsit. Ibi enim docet aliquos teneri ad credendum articulos fidei, quibus non datur gratia, sine quâ credere non possunt. Si tenentur credere, peccant non credendo: si peccant, audierunt; nec tamen data est illis Dei gratia, sine quâ credere non possunt.

Similiter cum S. Thomas hæc Apostoli verba Rom. 10. *Quomodo credent ei quem non audierunt?* Sed non omnes obediunt Evangelio, exponit in suo Commentario in 10. ad Rom. lect. 2. docet aliud ad infidelitatis peccatum non requiri, quam auditum verbi; & gratiam interiorem, quæ ad fidem necessaria est, à Deo non dari omnibus quibus Evangelium prædicatur. Deinde, inquit, cum dicit, SED NON OMNES OBEDIUNT EVANGELIO, &c. ostendit ex prioribus non semper sequi posteriora. Licet enim non possit esse, quod quis credat, nisi audiat à predicante; non tamen quicumque audit à predicante, credit. Et hoc est quod subdit: Sed non omnes obediunt Evangelio, 2. Thess. 3. Non enim omnium est fides. Hoc autem dicit idèò, ut ostendatur quod verbum exterius loquentis non est causa sufficiens fidei, nisi cor hominis attrahatur interiori virtute Dei loquentis, Joan. 6. Omnis qui audivit à Patre & didicit, venit ad me: & sic quod homines credunt, non est attrahendum prædicatoris industria.

Per hoc etiam ostenditur, quòd omnes increduli non excusantur à peccato, sed illi qui non audiunt, & non credunt, Joan. 10. Si non venissem & locutus eis non fuisset, peccatum non haberent: nunc autem excusationem non habent de peccato suo.

Juxta hæc verba S. Thomas, ut quis ab infidelitatis peccato non excusetur, hoc solum requirit, ut audiat verbum fidei: & eos solum à peccato excusari dicit, qui non audiunt & non credunt. Docet etiam idèd dici ab Apostolo, Non omnes obediunt Evangelio: & Non omnium est fides, ut ostendatur, quòd verbum exterius loquentis non est causa sufficiens salutis, nisi cor interius trahatur. Ergo indicat omnium qui audiunt cor interius non trahi; quod tamen requiritur ut credant: indicat ex hoc quòd non omnes qui audiunt, Evangelio obediunt, signum esse, quod cor omnium qui audiunt, intus non trahitur. Quomodo enim per hæc verba: Sed non omnes obediunt Evangelio, ostenderetur verbum exterius loquentis non esse causam sufficientem fidei, sed præterea requiri, ut cor interius à Deo attrahatur, si cor eorum omnium qui non obediunt Evangelio sibi annuntiato, intus à Deo traheretur: & tamen illi omnes qui audiunt, juxta S. Thomam, tenentur credere, & ab incredulitatis peccato non excusantur, licet illis per Evangelii prædicationem non adsit causa sufficiens fidei.

Idem docet in quæst. disp. de verit. quæst. 27. quæ est de gratiâ

art. 3. ad 12. Dicendum, inquit, quòd auditus non est causa sufficiens fidei: quod patet ex hoc quod multi audiunt qui non credunt. Sed causa fidei est ille qui facit credentem assentire his quæ dicuntur: non autem ad assentiendum cogitur aliquâ necessitate rationis, sed voluntate. Et idèd homo exterius annuntians non causat fidem, sed Deus, qui solus voluntatem potest mutare. Causat autem fidem in credente, inclinando voluntatem, & illustrando intellectum fidei, ut non repugnet his quæ à predicatore proponuntur; predicator autem se habet sicut disponens exterius ad fidem.

Item 2. 2. q. 6. art. 1. in c. Quantum verò ad 2. (inquit) scilicet ad assensum hominis in ea quæ sunt fidei, potest considerari duplex causa; una quidem exterius inducens, sicut miraculum visum, vel persuasio hominis inducentis ad fidem: quorum neutrum est sufficiens causa. Videntium enim unum & idem miraculum, & audientium eandem prædicationem, quidam credunt, & quidam non credunt; & idèd oportet ponere aliam causam interiorem quæ movet hominem interius ad assentiendum his quæ sunt fidei.

Ergo constans est S. Thomæ doctrina ubique ab eo tradita, gratiam interiorem ad credendum, omnibus qui audiunt semper non dari: si quidem eam ad credendum necessariam esse inde colligit, quòd eorum qui audiunt eandem prædicationem, quidam credunt, & quidam non credunt; & tamen juxta eundem omnes qui

qui audiunt, credere tenentur; & non credendo, contra fidem peccant.

Quia verò P. Nicolai multa ex S. Thomâ testimonia laudar, in quibus de interiori instinctu loquitur, operæ pretium est annotare, quid sit apud S. Thomam interior instinctus. Id explicat præsertim ad Rom. 8. lect. 3. Considerandum est, inquit, quomodo aliqui aguntur à Spiritu Dei, & potest sic intelligi: Quicumque Spiritu Dei aguntur, id est, reguntur sicut à quodam ductore & directore; quod quidem in nobis facit Spiritus, scilicet in quantum illuminat nos interius quid facere debeamus. ... Homo autem spiritualis non tantum instruitur à Spiritu sancto quid agere debeat, sed etiam cor ejus à Spiritu sancto movetur: idè plus intelligendum est in hoc quod dicitur, Quicumque Spiritu Dei aguntur. Illa enim agi dicuntur, quæ quodam superiori instinctu moventur: unde de brutis dicimus, quod non agunt, sed aguntur; quia à naturâ moventur, & non ex proprio motu. Similiter autem homo spiritualis, non quasi ex motu propria voluntatis principaliter, sed ex instinctu Spiritus sancti inclinatur ad aliquid agendum; non tamen per hoc concluditur, quin viri spirituales per voluntatem & liberum arbitrium operentur, quia ipsum motum voluntatis & liberi arbitrii Spiritus sanctus in eis causat, secundum illud Phil. 2. Deus est qui operatur in vobis velle & perficere.

Idem quodlib. 2. art. 6. ad 3. Interior instinctus quo Christus po-

terat se manifestare sine miraculis exterioribus, pertinet ad virtutem primæ Veritatis, quæ interius hominem illuminat & docet. Et ad 2. Christus poterat se ostendere esse legistorem, non solum faciendo visibilia miracula, sed etiam per auctoritatem Scripturæ, & per interiorum instinctum. Et in 6. Matt. lect. 5. Sed quia non solum revelatio exterior vel objectum virtutem attrahendi habet, sed etiam interior instinctus impellens & movens ad credendum, idè trahit & multos Patet ad filium per instinctum divinæ operationis moventis interius cor hominis ad credendum: Philip. 2. Deus est qui operatur in vobis velle & perficere.

Itaque interior instinctus, secundum S. Thomam, est illuminatio intellectus, quâ homo à Deo interius docetur quid credere seu facere debeat: atque sæpius significat inspirationem etiam interiorum, quâ cor à Spiritu sancto movetur & inclinatur ad aliquid agendum. Vocatur autem instinctus, in quantum mens hominis non ex proprio motu, sed à superiori quodam movente agitur. Atque ita apud S. Thomam interior instinctus, idem omnino est ac vocatio interior, seu gratia mentem intus illuminans ac docens, aut etiam voluntatem intus movens & inclinans, & operans in eâ velle aut perficere. Eodem ergo sensu homo interiori instinctui resistit, sicut interiori gratiæ ac vocationi. S. Augustinus instinctum sumit pro interiori & efficaci gra-

tiâ. Cur ergo (inquit Julianum alloquens, Oper. perf. lib. 3. c. 168.) non confiteris sine ullâ forinsecus sonante iussione, Deum occulto instinctu ad quod voluerit efficacissimè implendum præparare, atque excitare hominum voluntates, qui liberum non defendis intelligendum, sed præcipitandum extollis arbitrium.

P. Nicolai eodem n. 4. hoc sequens testimonium addit, quod integrum referemus.

S. Thomas 2. 2. quæst. 189. art. 1. arg. 4. ex glossâ super illud Psal. Sicut ablatus est, hæc refert: Quia nuper baptisati in Sublato sancto quasi manibus Ecclesiæ gestantur, & lacte nutriuntur usque ad Pentecosten; quo tempore nulla difficultas indicuntur, non jejunatur, non mediâ nocte surgitur: postea Spiritu Paraclito confirmati quasi ablatus incipiunt jejunare, & alia difficultas servare. Id exponens in resp. ad 4. hæc habet: Exemplum autem quod in medio interponitur, quod noviter baptisatis non indicitur jejunium usque ad Pentecosten, ostendit quod non sunt ex necessitate ad difficultas cogendi, antequam per Spiritum sanctum interius ad hoc instigentur, ut difficultas propriâ voluntate assument: unde & post Pen-

tecosten, post receptionem Spiritus sancti, jejunium celebrat Ecclesia. Spiritus autem sanctus, sicut Ambrosius dicit super Lucam, non coercetur aetatibus, non obitu exstinguitur, non excluditur alio matris. Et Gregorius dicit in Hom. Pentecostes: Implet Citharæ dum puerum, & Psalmistam facit; implet puerum abstinentem, & judicem senem facit. Et postea subdit: Nulla ad descendendum mora agitur in omne quod voluerit; mox enim ut tetigerit, mentem docet. Et sicut dicitur Eccles. 8. Non est in hominis potestate prohibere Spiritum. Et Apost. 1. ad Thes. sal. 5. monet: Spiritum nolite extinguere. Et Act. 7. contra quosdam dicitur: Vos semper Spiritui sancto resistitis. Hæc omnia, quibus Sancti Spiritus vis semper efficax exprimitur, P. Nicolai non retulit; quia ex his patet, Spiritui sancto nunquam resisti, quoad effectum ad quem ex Dei momentis intentione ordinatur, seu quem Deus vult ut habeat. Itaque non alio sensu, quam supra posito, Spiritum extinguere, ac Spiritui sancto, etiam interiori instiganti, resistere aliquis dicitur, cum scilicet id ad quod Spiritus sanctus eum excitat & inclinat, voluntatis defectu non perficit.

## A R T I C U L U S V I I I.

In quo exponuntur duo alia testimonia n. 5. relata in cap. 1. ad Rom. ubi justificatio in aliquibus frustrari dicitur; & è questione 24. de libero arbitrio, ubi peccans in Spiritum sanctum dicitur operari contra gratiam Spiritus sancti.

**S**uperest expositio duorum testimoniorum quæ n. 5. refe-

runtur. Nihil opus, inquit P. Nicolai, addere quæ aliunde addiposint,

sint: non illud quod ad Rom. lect. 6. super caput 8. dicit, Vocationem interiorem, quæ nihil aliud est &c. Sed referendum est quod præcedit, ut illius sensus melius percipiatur. Hæc itaque habet S. Thomas in illud: Quos prædestinavit, hos & vocavit.

Prædestinatio autem ejus irrita esse non potest, secundum illud Isaïæ 14. Juravit Dominus exercituum dicens: Si non ut putari ita erit, & quomodo mente trahari, sic eveniet. Primum autem in quo incipit prædestinatio impleri, est vocatio hominis: quæ quidem est duplex, una exterior quæ fit ore predicatoris, Proverb. 9. Misit ancillas suas ut vocarent ad artem; hoc modo Deus vocavit Petrum & Andream, ut dicitur Matth. 4. Alia verò vocatio est interior, quæ nihil aliud est quàm quidam mentis instinctus, quo cor hominis movetur à Deo ad assentiendum his quæ sunt fidei vel virtutis. Isaïa 41. Quis suscitavit ab Oriente justum, & vocavit eum ut sequeretur se. Et hæc vocatio necessaria est; quia cor nostrum non se ad Deum converteret, nisi ipse Deus nos ad se traheret. Joan. 6. Nemo potest venire ad me, nisi Pater qui misit me traxerit eum. Thren. 5. Convertite nos, Domine, ad te, & convertemur. Et etiam hæc vocatio est efficax in prædestinatis; quia hujusmodi vocationi assentiunt. Joan. 6. Omnis qui audit à Patre meo, & didicit, venit ad me. Unde secundo ponit justificationem, cum dicit, Quos vocavit, hos & justificavit, scilicet gratiam infundendo, supra tercio: Justificati gratis per gratiam

ipsius. Hæc autem justificatio, & si in aliquibus frustratur, quia non perseverant usque ad finem, in prædestinatis tamen nunquam frustratur.

Certè hoc testimonium addere nihil opus erat. Quid enim hinc sequitur, nisi esse multas vocationes inefficaces, scilicet quoad assensum perfectum. Multi enim vocantur, etiam interiori; nec tamen ad Christum veniunt, quia venire nolunt: sed sunt efficaces quoad aliquod pix voluntatis initium. Sunt enim ex gratia operante, per quam semper voluntas movetur à Deo, ut bonum velit: & hoc solùm sensu asserimus gratiam semper esse efficacem, scilicet ad eum effectum, ad quem ex Dei intentione ordinatur. Justificatio etiam in aliquibus frustrari dicitur, in iis scilicet qui peccando mortaliter post justiciam acceptam, impediunt ne ipsi, qui filii erant, ad Patris hæreditatem perveniant. Nec vim ullam habet Patris Nicolai argumentatio. Justificationem in aliquibus frustrari (inquit) est in iis qui non usque ad finem perseverant, esse gratiam quandam quæ ad effectum perseverandi ordinatur: quia frustrari tantum causa illa dicitur, quæ ad effectum non pertingit. Certè frustrari tantum causa illa dicitur, quæ ad effectum non pertingit: sed ut frustrari dicatur, satis est si non pertingat ad effectum ad quem ex sua naturâ refertur: justificatio autem de se & ex natura sua ad vitam æternam refertur, &

ordinem habet, sicut æqualis illi in virtute. Nam filii jus habent ad hæreditatem, & gratia pignus est hæreditatis.

*Dicendum, inquit S. Thomas 1. 2. q. 114. art. 3. ad 3. quod gratia Spiritus sancti, quam in presenti habemus, etsi non sit æqualis glorie in actu, est tamen æqualis in virtute: sicut semen arborum, in quo est virtus ad totam arborem. Et similiter per gratiam inhabitat hominem Spiritus sanctus, qui est sufficiens causa vite æternæ: unde & dicitur esse pignus hæreditatis nostræ 2. ad Cor. 1. Quare, ut ait idem Sanctus quæst. disp. de verit. q. 6. art. 4. ad 3. Non est neque ex defectu gratiæ, neque ex defectu dantis gloriam, quod habens gratiam gloriæ privetur; sed ex defectu recipientis, in quo impedimentum intervenit. In illis ergo justificatio frustrari rectè dicitur, in quibus ad vitam æternam non pertingit.*

Sed justificatio, sicut & vocatio, semper illum effectum consequitur, ad quem ex Dei proposito & intentione ordinatur: quia, ut ait S. Thomas, *intentio Dei deficere non potest, nec stant simul propositum divinæ voluntatis & frustratio effectus, ut docet idem sanctus in 4. dist. 17. q. 1. art. 2. Sic cum gratia habitualis nunquam frustratur hoc suo effectu, qui est vita æterna, nisi ex defectu recipientis in quo impedimentum intervenit, ut ex S. Thomâ supradiximus, quando Deus aliquem justificat, ex proposito & intentione speciali*

*perducendi illum ad vitam æternam, cor ejus ita movet per gratiæ suæ auxilium, ut ex gratiæ suæ misericordia, quæ omnibus justis non datur, faciat illum non ponere impedimentum gratiæ habitualis conservationi, dando illi singulare & speciale donum in ea perseverandi usque in finem. Hujus enim doni pars & effectus ille est, ut homo gratiæ habitualis conservationi impedimentum per peccatum mortale non apponat, seu ut Deus non permittat illum cadere in peccatum, sicut docet S. Thomas 1. 2. q. 114. in arg. sed contra, ut dicemus Sectione 5. art. 4. arg. 3. atque, ut ait 2. 2. q. 24. art. 11. Impossibile est hæc duo simul esse vera, quod Spiritus sanctus velit aliquem movere ad actum charitatis, & quod ipse charitatem amittat peccando. Nam donum perseverantiæ computatur inter beneficia Dei, quibus certissimè liberantur, quicumque liberantur, ut Augustinus dicit in libro De predestinatione sanctorum. Itaque vocatio & justificatio quæ sunt secundum propositum, hoc est, secundum intentionem quam habet Deus perducendi usque ad vitam æternam, semper implentur ac nunquam frustrantur. Hoc est quod isto loco docet, cum dicit: Prædestinatio autem ejus irrita esse non potest: Justificatio in prædestinatis nunquam frustratur. Hæc constans est S. Thomæ doctrina, hanc sequimur, hanc unam impugnet P. Nicolai, & à S. Thomâ alienam aprioribus testimoniiis*



Testimoniis ostendat, si quid adversum nos moliri vult.

Nec etiam opus erat hoc aliud esse quæst. disp. testimonium addere, quia ad quæstionem propositam nihil omnino confert, ut ex sequentibus patet. S. Thomas sic loquitur q. 24 de lib. arb. art. 11. *Ad 6. dicendum, quod quamvis ille qui peccat in Spiritum sanctum ex inclinatione peccati, contra gratiam Spiritus sancti operetur; quia tamen per hoc peccatum totaliter non est corruptus animus, remanet aliquis motus, licet debilis, propter quem potest aliquantulum gratia cooperari. Non enim semper actu gratia resistit.*

Hic S. Thomas ostendit, hoc discrimen esse inter damnatum & peccatorem quamdiu in via est, quod hic potest habere aliquos bonos motus, cum semper actu non resistat gratiæ, hoc est, cum semper actu non peccet; atque ita datur illi via redeundi ad gratiam: damnatus autem nullos bonos motus habere potest; quia omnis motus ejus liberi arbitrii peccatum est, atque ita nullo modo se præparare potest ad gratiam habendam. Alio modo, inquit, habet aliquis firmitatem in peccato, ita quod nec cooperari potest ad hoc quod à peccato resurgat. Sed dupliciter est hoc: uno modo, ita quod nullo modo possit cooperari; & hæc est perfecta obstinatio, quam demones sunt obstinati. Ad eum enim eorum mens est firmata in malo, quod omnis motus liberi arbitrii ipsorum, est inordinatus & peccatum, & ideo nullo modo se possunt ad gra-

tiam habendam preparare, per quam peccatum amittitur. Alio modo, ita quod non de facili possit cooperari ad hoc quod exeat de peccato; & hæc est obstinatio imperfecta, quam aliquis potest esse obstinatus in statu via, dum scilicet habet aliquis ita firmatam voluntatem in peccato, quod non surgunt motus ad bonum, nisi debiles: quia tamen aliqui surgunt ex eis, datur via ut præparentur ad gratiam. Quod aliquis homo in statu via non possit esse ita obstinatus in malo, quin ad suam liberationem cooperari possit, ratio patet ex dictis, quia & passio solvitur & reprimitur, & habitus non totaliter animam corrumpit, & ratio non ita pertinaciter falso adheret, quin per contrariam rationem possit adduci. Igitur non est sensus, quod semper adsit aliqua gratia actualis in peccatore.

Sed P. Nicolai aliud ex hoc testimonio concludere videtur, scilicet esse aliquam gratiam interioriorem quæ aliquando suo fine & effectu frustretur; quia ex S. Thomâ, qui peccat in Spiritum sanctum, dicitur operari contra gratiam Spiritus sancti, dicitur contrariam operari suæ curationi, hoc est, divine gratiæ per quam aliquis liberatur a peccato. Ergo ut P. Nicolai aliquid ex his verbis concludat, hic horum sensus esse debet, ut qui peccat in Spiritum sanctum, tunc moveatur à Spiritu sancto per gratiam actualem interioriorem ad non peccandum, cui resistit, ejus effectum per peccatum impediendo. Sed quantum hic sensus à S. Thomâ alienum

sit, satis ex ipso S. Thomâ patet. Idem enim qui peccat in Spiritum sanctum operatur contra gratiam Spiritus sancti, seu operatur contraria suæ curationi, hoc est, 3. divinæ gratiæ per quam liberatur à peccato: quia, ut ait 2. 2. q. 14. art. 3. *excludit ea per quæ fit remissio peccatorum*, seu quia, ut docet art. 1. *per contemptum abjicitur & remouetur id quod electionem peccati poterat impedire*; sicut spes per desperationem, & timor per presumptionem: hæc autem omnia quæ peccati electionem impediunt, sunt effectus Spiritus sancti in nobis. Et q. 21. art. 1. *Presumptio*, inquit, *quâ aliquis sperat se veniam obtinere sine penitentia, vel gloriam sine meritis*, est propriè species peccati in Spiritum sanctum, quia scilicet per hujusmodi presumptionem tollitur vel contemnitur adiutorium Spiritus sancti, per quod homo revocatur à peccato. Et juxta hunc sensum exponendum est quod objicit P. Nicolai ex q. 14. art. 3. ad 3. *Liberum arbitrium*, inquit S. Thomas, *remanet quidem semper in hac vitâ vertibile*; tamen quandoque abjicit à se id per quod

verti potest ad bonum, quantum in ipso est: unde ex parte suâ peccatum est irremissibile, licet Deus remittere possit. Non quod qui peccat in Spiritum sanctum, puta qui desperat de veniâ, vel de eâ præsumit, inrûs moveatur à Spiritu sancto ad implorandam Dei misericordiam, & motionem hanc abjiciat, ut finxit P. Nicolai; sed quia per desperationem, vel presumptionem de veniâ, avocatur animus, & pravâ istâ dispositione non tantum negativè, ut ita dicam, sed etiam positivè prohibetur ne recurrat ad Dei misericordiam, & ad ejus adiutorium per quod solum potest à peccato revocari & liberari. Per hoc tamen, ut inquit ibid. S. Thomas, non præcluditur via remittendi & sanandi omnipotentia & misericordia Dei, per quam aliquando tales quasi miraculosè spiritualiter sanantur. Quare cum id non fit, signum est à posteriori gratiam illorum curationi necessariam, à Deo ipsis non fuisse collatam; tantum abest ut concludi possit, nunquam illam iis de-fuisse, ut perperam contendit Joannes Nicolai.

## A R T I C U L U S IX.

*In quo duo alia testimonia ex S. Thomæ commentariis in Scripturam, ad præsentem questionem pertinentia, à P. Nicolai 5. classe relata explicantur.*

*Quæ sit gratia quâ utimur, vel non utimur.*

**A** Djungam hæc duorum testimoniorum explicationem, quæ P. Nicolai in 5. classe posuit,

& quibus confirmat, gratiam interioriorem aliquando ab homine non applicari ad illos effectus, ad quos

à Deo datur; quæque proinde ad præsentem quæstionem pertinent.

1. Est in Job 24. *Parum jam erit retulisse* (inquit P. Nicolai) quod idem S. Thomas ad illa verba Job 24. *Dedit illi Deus locum pœnitentiæ, & ille abutitur eo in superbiam; sic in Commentario suo subdit: [Causam, quare absque misericordiâ sit puniendus, assignat ex hoc, quia MISERICORDIA UTI NOLUIT dum potuit, &c.]* Sed P. Nicolai sequentia suppressit, quia præcedentium sensum continent. Sic enim subjungit S. Thomas: *Unde subdit, Dedit ei Deus locum pœnitentiæ, scilicet differens pœnam: & hæc est ratio, quare permissus est in prosperitate aliquis diu vivere; sed hoc quòd Deus exhibuit ei in bonum, ipse pervertit in malum, unde subditur: Et ille abutitur eo in superbiam; non attribuens divinæ misericordiæ, quòd post peccatum non statim punitur; sed ex hoc sumit peccati audaciam usque ad Dei contemptum: & quamvis peccator tenebras querat ad peccandum; non tamen potest facere quin videatur. Unde subdit, &c.*

Ex his patet S. Thomam nihil aliud per hæc verba, *Misericordiâ uti noluit dum potuit*, significare, quàm Deum ex misericordiâ non statim punire, ut peccatori detur pœnitentiæ locus, & cum qui ex hoc quòd non punitur, sumit peccati audaciam, uti nolle, dum potest, misericordiâ Dei pœnam ad emendationem differentis.

Aliud testimonium sic refert P. Nicolai. *Parum erit retulisse quod in 2. ad Cor. 6. lect. 1. ad illa*

verba: *Hortamur vos, ne in vacuum gratiam Dei recipiatis; addit hoc dici, quasi sit sensus; Ne receptio gratiæ sit vobis inutilis & vana, contingereque illud notat, quando ex perceptione gratiæ aliquis non sentit fructum, hoc est, quando gratiâ perceptâ non utitur ad vitanda peccata, &c.* Ac eandem gratiam inferiùs explicans, eam appellat, *Adjuvantem ut perficiamus quod operamur, prævenientem ut à peccatis liberemur, cooperantem vel subsequenter per quam nobis virtus vel perseverantia in bono conferatur. Quam ergo, nisi propriè actualem? Et eam tamen in vacuum recipi dicit, hoc est, non ad illos effectus applicari. Ex quo sequitur, ut etiam habitualis amittatur, adeoque homo sit prima causa cur amittatur, & non Deus.* P. Nicolai hoc uno fundamento niritur, quod hæc S. Thomæ verba de gratia actuali intelligantur: si ergo illa de gratiâ habituali intelligi ostendero, omnis ejus ratiocinatio corruet.

Habitualement ergo intelligi gratiam, quâ fuerant à Deo reconciliati per baptismum & pœnitentiam, patet ex his verbis S. Thomæ: *Hoc scilicet exhortamur, ne in vacuum gratiam Dei recipiatis; quasi dicat, Ne receptio gratiæ sit vobis inutilis & vacua. Quod tunc contingit, quando ex perceptione gratiæ quis non sentit fructum, qui quidem duplex est, scilicet remissio peccatorum Isaïæ 27. Hic est omnis fructus, &c. & ut homo justè vivendo perveniat ad gloriam cælestem. Rom. 6. Habetis fructum vestrum. Quicumque ergo gra-*

riâ perceptâ non utitur ad vitandum peccata, & consequendam vitam æternam, hic gratiam Dei in vanum recipit: gratia autem, cujus fructus est remissio peccatorum & vitæ æternæ consecutio, est gratia habitualis. Deinde de eâ gratiâ loquitur quâ utimur & non utimur: *Quicumque*, inquit, *gratiâ perceptâ non utitur*. Et infra: *Consequenter cum dicit, Nemini dantes, docet modum utendi gratiâ eis celatâ*. Sed secundum S. Thomam gratia quâ utimur, est gratia habitualis: gratiâ vero actuali seu motione diviâ propriè non utimur, sed per eam utimur habitibus & potentiis. *Usus enim rei alicujus*, inquit S. Thomas 1. 2. q. 16. art. 1. *importat applicationem rei alicujus ad aliquam operationem*. . . *Ad operationem autem applicamus & principia interiora egendi, scilicet ipsas potentias animæ, vel membra corporis*. Et art. 2. *Uti, est applicare aliquod principium actionis ad alienum; sicut consentire, est applicare motum appetitivum ad aliquid appetendum*. Jam videndum quid sit, secundum S. Thomam, actualis Dei motio. *Deus*, inquit 1. p. q. 105. art. 1. *moveret res ad operandum, quasi applicando formas & virtutes rerum ad operationem; sicut etiam artifex applicat securum ad sciendum*.

Itaque secundum hanc S. Thomæ doctrinam, propriè utimur habituali gratiâ; quia eam applicamus ad operationem: actuali autem gratiâ non utimur; quia

eam non applicamus ad actionem, sed potiùs per eam applicamur ad actionem, cum per eam à Deo ad agendum moveamur; ac moveri à Deo nihil aliud sit, quàm à Deo ad agendum applicari. Unde S. Thomas expressè docet, nos per gratiam actuale, seu per auxilium Dei moventis, uti gratia justificante; atque ita Deum non solum esse causam gratiæ justificantis eam infundendo, sed etiam esse causam usus illius, movendo ad bonè utendum illâ, hoc est, ad bonè vivendum. *Deus enim* (inquit in 1. ad Cor. 15. lect. 1.) *non solum infundit gratiam, quâ nostra opera grata fiunt & meritoria; sed etiam movet ad bonè utendum gratiâ infusâ: & hæc vocatur gratia cooperans*. Et in caput 9. ad Rom. lect. 3. *Divinum autem beneficium* (inquit) *non solum extendit se ad infusionem gratiæ, quâ homo justificatur, sed etiam ad gratiæ usum: sicut etiam in rebus naturalibus, non solum Deus causat ipsas formas in rebus; sed etiam ipsos motus & operationes formarum, eo quod Deus est principium omnis motus, cujus operatione cessante à movendo, ex formis nullus motus vel operatio sequitur*. . . Sic igitur ipse usus gratiæ est à Deo, nec propter hoc superfluit habitus gratiæ. Itaque ex S. Thomæ doctrinâ manifestum est, gratiam habitualem ab eo intelligi cum dicit, *Quicumque ergo gratiâ perceptâ non utitur ad vitandum peccata, & consequendam vitam æternam, hic gratiam Dei* (scilicet habitualem)

in vanum recipit. Et hic sensus omnem Patris Nicolai, de gratia actuali id exponentis, rationationem evertit.

Verum (inquit P. Nicolai) eandem gratiam inferius explicans, eam appellat adiuvantem ut perficiamus quod operamur, praevenientem ut à peccatis liberemur, cooperantem vel subsequenter per quam nobis virtus vel perseverantia in bono conferatur. Quam ergo, nisi propriè actualem?

Respondendo necesse non esse ut S. Thomas in his verbis de eadem gratia loqui dicatur de qua supra. Dici enim potest illum modò loqui de habituali, modò de actuali: de actuali autem loqui cum hæc verba exponit, *Tempore accepto exaudire te, & in die salutis adjuvi*, quia circa illa refert quomodo Deus nos exaudiat, & quot modis adjuvet ad obtinendum quod petimus, scilicet per gratiam praevenientem, & per cooperantem vel subsequenter.

Præterea ignoratne P. Nicolai, quæcumque hic velut de gratia actuali dicta refert, etiam gratiæ habituali in S. Thomæ doctrinâ attribui posse. Ubi enim I. 2. q. 111. art. 2. & 3. gratiæ in operantem & cooperantem, in praevenientem & subsequenter divisiones tradit, id tum de actuali, tum de habituali gratia exponit. Sic igitur, inquit art. 2. *habitualis gratia, in quantum animam sanat vel iustificat, sive gratiam Deo facit, dicitur gratia operans: in quantum vero est princi-*

*pium operis meritorii, quod ex libero arbitrio procedit, dicitur cooperans.* Et art. 2. *Sicut gratia, inquit, dividitur in operantem & cooperantem, secundum diversos effectus, ita etiam in praevenientem & subsequenter, & qualitercumque gratia accipitur, hoc est sive sit actualis sive habitualis.* Sunt autem quinque effectus gratiæ in nobis, scilicet sive sit habitualis, sive actualis, quorum primus est, ut anima sanetur; secundus, ut bonum velit; tertius est, ut bonum quod vult efficaciter operetur; quartus est, ut in bono perseveret; quintus est, ut ad gloriam perveniat. Idem docet quæst. disp. de veritate q. 27. quæ est de gratia art. 5. ad 1. Ergo hæc omnia quæ P. Nicolai de gratia actuali Dei dici contendit, etiam gratiæ habituali, juxta S. Thomam, convenire possunt, & de ea intelligi: imò cum S. Thomas dicit (*gratiam praevenientem, quam opere debemus ut simus accepti Deo,*) nonne potius habitualement designare dicendus est, per quam propriè grati Deo efficimur? Sicut & cum dicit, *hoc modo gratia praeveniens dicitur illa, per quam liberamur à peccatis*, siquidem hic proprius est gratiæ habitualis effectus.

Denique quanquam S. Thomas diceret nos gratiâ actuali uti & non uti (quod tamen nunquam dicit, quia ejus principus id repugnat) nihil adversum nos P. Nicolai obtineret; quia tunc responderemus, Gratia actuali nos non uti, & etiam abuti, quan-

quando id ad quod nos excitat & inclinat, non perficimus; eâ autem nos uti, quando id perficimus: ita tamen ut eâ nunquam utamur ad perficiendum, nisi gratiâ cooperante vel subsequente adjuti; nunquàm verò abutamur, nisi defectu voluntatis, & eadem gratiâ cooperante vel subsequente non adjuti. Sed an propterea gratia actualis desinet esse efficax ad effectum ad quem ex Dei intentione & absolutâ voluntate ordinatur? Minimè verò: quia, ut docet S. Thomas, nunquam adest gratia operans seu præveniens, quin per illam bonum velimus, & nunquam adest cooperans seu subsequens, quin cooperemur, seu quin efficaciter operemur bonum quod volumus, vel in eo perseveremus.

Agnoscat verò P. Nicolai quàm

apertè Molinistam se declarer, cùm gratiâ etiam cooperante & subsequente uti vel non uti, humanæ tribuit voluntati ejus effectum pro nutu suo impediendi. Quid enim hoc est, nisi cum Molinæ Scholâ, gratiæ divinæ, quantumlibet efficacis, usum humanæ subijcere voluntati, totamque ejus efficaciam in hoc solum constituere, quod vim habeat in se voluntatem ad operandum determinandi, non verò quod illam actu ad operandum propria sua virtute determinet? Illud verò ut gratiæ prædeterminantis doctrinæ penitus contrarium refellit Alvares disp. 86. ut in titulo notatur, ubi ostendit, *Auxilium efficax actuale non subjacere nostri arbitrii potestati, quantum ad usum, sicut subjacent habitus quibus utimur cùm volumus.*

## S E C T I O Q U I N T A.

*De causa defectus gratiæ: ubi præsertim de justis.*

*Exponuntur S. Thomæ testimonia à Patre Nicolai 5. Classe relata.*

**P**ater Nicolai pro S. Thomæ auctoritatem coronide affert, quod ubique idem Sanctus tam studiosè notat, *Esse homini non Deo adscribendum, cur ille ab hoc per defectum gratiæ deferatur: id, inquit, notare Janseniani præcaverint, quia tam iis adversum sit, tam eorum Arnaldo contrarium.* Sed ubi unquam Arnaldus, aut alius ex sancti Augustini discipulis, ullam

hominis post peccatum culpam in gratiæ defectum referendam docuit? Quis non annotavit sedulò, homini semper, non Deo adscribendum, cur ille à Deo per defectum gratiæ deferatur, ut ubique in eorum scriptis hæc sancti Augustini sententia ex lib. 2. de peccat. merit. cap. 17. personet, *Quod homines gratiâ non adjurantur, in ipsis causa est non*

*in Deo.* Itaque cum constanter doceant juxta S. Augustinum, nemini unquam gratiam deesse spontanea ex parte Dei abdicatione; quid illis S. Thomæ id docentis testimonia P. Nicolai opponit, nisi calumniandi libi-

dine? Quid verò ex eisdem testimoniis gratiam sufficientem astruere nititur, nisi ut prædeterminantem necessariam esse neget, saltem ad actus pietatis imperfectos; & sufficientem Molinianam inducat?

# ARTICULUS PRIMUS.

*In quo referuntur S. Thomæ testimonia, in quibus de causâ defectus gratiæ agitur.*

**P**rimum testimonium ex 1. 2. q. 112. art. 3. desumptum est, ex quo perpetuam gratiæ Christi, ad actus, ad quos ex Dei intentione ordinatur, efficaciam probavimus. Hæc habet arg. 2. *Præterea Anselmus dicit in lib. de casu diaboli, quod ista est causa quare Deus non concedit diabolo gratiam; quia ipse non voluit accipere, nec paratus fuit: sed remotâ causâ necesse est removeri effectum.* Ergo si aliquis vult accipere gratiam, necesse est quod ei deus. Sic respondet.

*Ad secundum dicendum, quod defectus gratiæ prima causa est ex nobis, sed collationis gratiæ prima causa est à Deo, secundum illud Osæ 13. Perditio tua ex te, Israël, tantummodò in me auxilium tuum.*

S. Thomas idem ferè dicit quotlib. 1. art. 7. ad 2. *Et sic ex Deo est, ut homo se ad gratiam præparet; sed quod gratiâ careat, non habet causam à Deo, sed ab homine, secundum illud Osæ 13. Perditio tua ex te, Israël, tantummodò ex me auxilium tuum.*

Quia P. Nicolai Conradum Koëllin in hunc S. Thomæ articulum ex 1. 2. q. 112. laudavit, primò referemus quid doctissimus il-

le interpres ad hujus loci expositionem doceat. Hæc ejus verba sunt.

*Major conceditur: & dico, quod non accipere gratiam, reducitur in causam, in liberum arbitrium ponens obicem gratiæ: sed accipere gratiam, non est ex libero arbitrio, sed ex Deo. Ad minus rem, vera est; sed dico quod non velle accipere, est causa benè non acceptionis; sed velle, non est causa acceptionis: quare negatur consequentia, quia non sequitur: Si non volo, non fit: ergo si volo, fiet. Nam aliquis potest effectum impedire, quem tamen non potest facere: sicut aliquis potest impedire munus & donum Principis, nec tamen potest ipsum dare, vel ex se habere. Ita in proposito: Si aliquis non cooperetur divinæ motioni, non consequitur gratiam; non tamen sequitur: Ergo si cooperatur, consequitur virtutis sue cooperationis: quia negatio est causa negationis, sed affirmatio non est causa affirmationis. Et habetur simile 1. Poster. Quia non esse animal, est causa non respirationis; sed esse animal, non est causa respirationis: quia affirmatio non est causa propinqua, ut illudem declaratur. Sic in proposito, non consentire est causa adequata & propinqua non consecutionis gratiæ; sed consentire, non est causa propinqua & adequata*



14. Ita Conradus Koëllin.

P. Nicolai hoc aliud testimonium refert in 1. Sent. dist. 40. q. 4. art. 2. *Utrum Deus sit causa obdurationis.* En testimonium integrum, cuius P. Nicolai partem tantum reculit. *Respondeo dicendum, quod obduratio dicitur quandoque actus voluntatis obstinata in malum cui pertinaciter adheret: & sic constat quod obdurationis causa non est Deus, sed homo, sicut nec alius actus peccati, in quantum deformis. Quandoque vero obduratio dicitur ipsa privatio gratiæ, quæ etiam excoꝛatio dicitur; quia gratiæ est quoddam lumen anime, & perfectio quadam habilitans ipsam ad bonum: istum autem carere gratiâ ex duobus contingit; tum quia ipse non vult recipere; tum quia Deus non sibi infundit, vel non vult sibi infundere. Horum autem duorum talis est ordo, ut secundum non sit nisi ex suppositione primi. Cum enim Deus non velit nisi bonum, non vult istum carere gratiâ, nisi secundum quod bonum est: sed quod iste careat gratiâ, non est bonum simpliciter: unde hoc absolute consideratum non est volitum à Deo; est tamen bonum ut careat gratiâ, si eam habere non vult, vel si ad eam habendam negligenter se preparat; quia iustum est: & hoc modo est volitum à Deo. Patet ergo quod huius defectus absolute causa prima est ex parte hominis qui gratiâ caret; sed ex parte Dei non est causa huius defectus, nisi ex suppositione illius quod est causa ex parte hominis; & per hunc modum invenitur dici Deus quandoque causa excoꝛationis vel obdurationis, non quia immittendo malitiam, sed non impartiendo gratiam, quod in ipso est. Si enim non necessario impartitur gratiæ, in ipso est & non impartiri: Unde ejus quod est non impartiri, ali-*

quo modo causa est. Iste autem defectus potest dupliciter considerari, sicut etiam quilibet alius. Cum enim defectus incidat ex defectu cause, unde, & non ex defectu cause prime, quem tamen defectum Deus non impedit; tamen impedire posset, ne impedimentum natura cedat: si iste defectus gratiæ comparatur ad voluntatem, quæ est si ut causa proxima, invenitur voluntas habere causalitatem ad ipsum, quæ bonum propositum non accipit, cum accipere possit: & ex hoc est culpabilis & vituperabilis, quia malum cuius principium est voluntas, est huiusmodi; si autem comparatur ad ipsum Deum, non invenitur causatum ab ipso, sed tantum permissus & ordinatus, ut scilicet sit in pœnem ipsius voluntatis dare. Unde dicit Augustinus in 1. Confess. Iussisti, Domine, & sic est, ut omnis inordinatus animus sibi ipse sit pœna; & talis ordinatio à Deo est: unde respectu ipsius defectus nullam causalitatem habet, sed respectu ordinationis tantum; & hoc significatur cum obdurare dicitur.

Ad maiorem huius doctrinæ S. Thomæ illustrationem referendum est, quod de eodem argumento dicit 1. 2. q. 79. a. 3. ubi similiter quærit, *Utrum Deus sit causa excoꝛationis & obdurationis.* Respondeo dicendum, inquit, quod excoꝛatio & obduratio duo important, quorum unum est motus animi luminis subarentis male & averti à divino lumine; & quantum ad hoc Deus non est causa excoꝛationis & obdurationis, sicut non est causa peccati. Aliud autem est subtractio gratiæ, ex quâ sequitur quod mens divinitus non illuminetur, ad recte videndum, & cor hominis non emolliatur ad recte vivendum: & quantum ad hoc, Deus est causa excoꝛationis & obdurationis. Est autem

autem considerandum, quod Deus est causa universalis illuminationis animarum, secundum illud Joan. 1. Erat lux vera quæ illuminat omnem hominem venientem in hunc mundum: sicut sol est universalis causa illuminationis corporum, aliter tamen & aliter. Nam sol agit illuminando per necessitatem nature; Deus autem agit voluntarie per ordinem suæ sapientiæ. Sol autem licet, quantum est de se, omnia corpora illuminet, si quod tamen impedimentum inveniat in aliquo corpore, relinquit illud tenebrosum, sicut patet de dono cujus fenestra sunt clausæ; sed tamen illius obscuracionis nullo modo causa est sol. Non enim suo iudicio agit ut lumen interius non immittat, sed causa ejus est solum ille qui claudit fenestram: Deus autem proprio iudicio lumen gratiæ non immittit illis in quibus obstaculum invenit. Unde causa

solaracionis gratiæ est non solum ille qui ponit obstaculum gratiæ, sed etiam Deus qui suo iudicio gratiam non apponit: & per hunc modum, Deus est causa excitationis & aggravationis aurium, & obduracionis cordis.

Ad plenam omnium quæ P. Nicolai in suo de Arnaldi propositione Suffragio è S. Thomâ retulit confutationem, superest hujus S. Thomæ doctrinæ elucidatio, in quâ eum nihil Arnaldi & cæterorum sancti Augustini Discipulorum sententiæ contrarium esse, nihil nisi omnino conforme ostendero, Patri Nicolai nova S. Thomæ testimonia cudenda erunt, quibus se fidelem ejus assecclam & interpretem, non desertorem, non transfugam, non insidum corruptorem probet.

## A R T I C U L U S I I.

*In quo ostenditur ex hæc testimoniis sequi necessariò, gratiam sufficientem omnibus non dari, nec posse ullam hac in re questionem moveri, nisi circa justos, eamque circa peccata mortalia facillimè solvi, & ad sola venialia revocari, nec ad Arnaldi Propositionem ullo modo pertinere.*

**O**bservandum est 1. Molinistas his S. Thomæ testimoniis præsertim uti, ut ejus auctoritate physicam prædeterminationem impugnent, & gratiam sufficientem Molinæ libero arbitrio subjectam stabiliant. In hunc finem Petrus à S. Joseph in defensione S. Thomæ disp. 1. Sect. 8. §. 2. & 3. refert hæc testimonia ex Summâ. Defectus gratiæ prima causa est ex nobis, &c. In 1. Sent. Istum carere gratiâ ex duobus contingit, &c. Hoc aliud à P. Nicolai

pariter objectum l. 3. contragentes c. 159. Deus quantum est ex se, &c. Istud denique 1. 2. q. 109. art. 8. ad 1. Quia ex ejus defectu est, quod homo se ad gratiam habendam non præparet, &c. Multis argumentis contendit hæc coherere non posse cum sententiâ quæ prædeterminationem physicam ad omnes actus requirit, atque ita concludit pag. 151. Certè ut ista locum habeant, amovenda sunt à Deo decreta illa absoluta, ante quamcunque notitiam futura nostra coop-

rationis fabricata, & prædeterminationes physica tam ad bonum, quam ad malum ex iis profluentes. Ista enim cum sincerâ & genuinâ S. Thomæ doctrinâ nullo modo coherere possunt, ut ex hæcenus dictis satis superque intelligitur. Id quidem tam apertè P. Nicolai non concludit, quia tam publicè & apertè Molinismum tueri non audet: sed ostendam eandem esse mentem ejus, quæ Fulienfis; & gratiæ per se efficacis ad singulos pios actus necessitatem coherere non posse cum doctrinâ quam ex his S. Thomæ testimoniis adversum nos falsò colligit.

2. Observandum est nos supponere juxta certam S. Thomæ doctrinam, gratiam per se efficacem ac prædeterminantem ad singulos pios voluntatis actus, seu perfectos, seu imperfectos esse necessariam, sicut omnes Thomistæ fatentur. Hic itaque nonnisi ex hujus doctrinæ principiis rationamur.

3. Observandum est, juxta doctrinam his S. Thomæ testimoniis contentam, constans esse & indubitatum, gratiam actualem interiorem, ad peccata vitanda necessariam, omnibus hominibus non dari, insque à Deo justè negari qui in peccato mortali sunt. Cum enim peccatum mortale sic causa defectus gratiæ, & impedimentum illius receptioni per hominem positum, Deus non vult illos catere gratiâ, nisi ex suppositione defectus ex parte hominis: atque ita justum est & hoc modo volitum à Deo, ut isti ca-

reant gratiâ. Itaque ex his testimoniis nulla de gratia sufficiente quæstio moveri potest circa peccatores, sed solùm circa justos. P. Nicolai id satis intelligens hæc omnia S. Thomæ de causa defectus gratiæ ad justos præsertim refert. *Quomodo enim, inquit, prima causa hujusmodi defectus gratia est à nobis, & non à Deo esse dici debet, si justo sponte deest; si tunc defuit Petro, cum justus esset?*

Sic autem ista quæstio de causa defectus gratiæ circa justos moveri potest. Certum est justos, cum à justitiâ excidunt, gratiam per se efficacem ad standum necessariam non habuisse. Si enim eam habuissent, sine dubio sterissent. Quæritur ergo quæ sit causa ex eorum parte, eorum gratiam standi, & in justitiâ perseverandi non habuerint, cum tunc ab omni peccato mortali immunes esse supponantur?

Verùm hæc de justorum casu quæstio solvi etiam potest, doctrinæ quam P. Nicolai ex his S. Thomæ testimoniis deducit, inherendo; si scilicet dicatur, Deum justis in peccati mortalis tentatione positis, gratiam actualem interiorem ad hoc vitandum necessariam non negare, nisi ob alicujus actualis peccati præcedentis, nempe venialis meritum. Sic Deum Petro in tentatione posito non defuisse, seu non negasse gratiam quâ ad Christum confutandum indigebat, nisi præsumptionis ejus præcedentis, quæ venialis solùm erat, merito: atque id

ex sancti Thomæ doctrinâ confiteri P. Nicolai compulsus est. *Ubi ergo* (inquit 1. classe pag. 33.) *peccatum non præcedit, qualecunque tandem sit* (hoc est, seu mortale sit, seu solum veniale) *numquid intelligitur id prælere quo quis deinceps prohibeatur à peccando.* Et parte 1. n. 5. *Quòd enim Chrysostomus Petrum nullo fruitum auxilio astruit, ne caderet, ad hoc momentum spectat quo negavit, quia illo se privaverat, cum præsumsit.* Et hac confessione P. Nicolai Arnaldi propositionem absolvit, & S. Thomæ doctrinæ consentaneam declaravit; cum Arnaldus, Deum Petro in tentatione nonnisi præsumptionis merito defuisse, tam aperte dixerit; ac secundum hoc Patris Nicolai iudicium, ista propositio, Deus Petro justo in tentatione defuit, reprehendenda non sit, sed solum ista, Deus Petro justo in tentatione sine ullius præcedentis præsumptionis, aut alterius peccati saltem venialis, merito defuit. Quare hanc ubique Arnaldo calumniam affingit, quasi dixerit Deum Petro justo sponte, seu spontaneâ abdicatione, & sine ullâ præcedente ex parte Petri causâ in tentatione defuisse.

Facile autem probatur illud (Deum scilicet aliquibus iustis in tentatione peccati mortalis aliquando deesse ob venialis peccati meritum) juxta gratiæ per se efficacis ad singulos actus necessarii principia, tenendum confitendumque esse. Cum enim aliquis iustus in peccatum mortale cadit, Deus non dedit illi gratiam

per se efficacem, quæ ad illud, ut oportet vitandum necessaria erat: seu illum per auxilium gratiæ suæ non prohibuit, ne caderet. Causa autem hujusmodi gratiæ defectus non potest esse peccatum mortale præcedens, quia nulum esse supponitur. Ergo si causa ex alicujus peccati actualis præcedentis merito repetenda est, illud peccatum actuale aliud esse non potest, quàm veniale.

Itaque ad peccatum veniale omnis quæstio & controversia revocatur, quænam scilicet causa sit ex parte hominis, cur Deus justo alicui gratiam ad primum peccatum veniale quod committit, & cujus merito postea in peccati mortalis tentatione deferitur, evitandum necessariam non tribuat. Hic est lapis ad quem Patrem Nicolai offendere necesse est. Huic enim quæstioni respondere non potest, quin ad gratiam Molinæ libero arbitrio, saltem ad orandum & præparandum se, seu ad non ponendum impedimentum, subjectam confugiat, & prædeterminantis gratiæ ad pios actus, saltem imperfectos, necessitatem neget.

Notandum autem est hanc quæstionem ad Arnaldi propositionem nullo modo pertinere. Illud enim unum dixit: Deum Petro justo in tentatione ob præsumptionis culpam defuisse: illud verò ex Patris Nicolai confessione verum est & Catholicum. An autem ad non præsumendum gratiam actualem habuerit, necne; & quæ causa sit, cur Deus gratiam illi

ad non præsumendum necessariam, non dederit, Arnaldus nequaesivit, nec expendit; nec, si expendisset, aliud dixisset, quam quod credit ac proficitur, scilicet causam homini adscribendam esse, non Deo, sicut mox exponemus.

Atque hinc omnibus obvium est, quam malevolo animo P. Nicolai adversus Arnaldum se gesserit, & quam dolosa mendaxque fuerit hæc pacis, lenitatis, ac sinceritatis professio, quam se in Quæstione juris discutiendâ adhibiturum in sui Suffragii exordio sanctissimè, ipsa teste conscientia, pollicitus est. Ubi enim pacis studium, ubi animi lenitas, ubi sinceritas in eo Doctore, qui cum probè noverit, quænam sit unius è suis fratribus sententia, cui examinandæ delectus est, cum eam catholicam & irreprehensibilem esse suis argumentis ac rationibus prober; tamen ejusdem sui fratris sententiam hæreseos, impietatis, & blasphemiz notis afficiendam esse concludit. Sic se gerit in Suffragio suo P. Nicolai: declarat ac probat catholicam esse illius sententiam, qui Deum Petro nonnisi ex Petri merito ac defectu defuisse dixerit, qui Deum nunquam spontè & spontaneâ abdicatione justos auxilio necessario privare censuerit, qui nullius unquam hominis seu peccatoris, seu justî derelictionem à Deo fieri, nisi causâ ex parte hominis suppositâ, confessus fuerit. Sed P. Nicolai vel scivit vel ignoravit nihil aliud Arnaldum crede-

re ac profiteri. Illud autem ignorare non potuit, tum quia nec in Arnaldi Epistolâ, nec in quovis alio ejus Opere, ullus suspicioni locus est, quòd aliter teneat: tum præsertim quia in altero Apologetico ad Facultatem misso, quem Pater Nicolai à se lectum fuisse testatur sui Suffragii parte 1. n. 1. p. 7. idem Arnaldus expressè declarat, *Petrum à Deo derelictum non fuisse, nisi in presumptionis suæ pœnam.* Ubi-que verò cum cæteris S. Augustini discipulis constanter docuit ex S. Augustini sententiâ, quòd homines, seu peccatores, seu justî, à Deo non adjuventur, in ipsis semper causam esse, non in Deo; cum quibusdam justis non datur auxilium Dei, sine quo perseverare non possunt, pœnam peccati semper esse; denique Deum nulli unquam homini, si-ve in hoc naturæ corruptæ statu, si-ve in statu naturæ integræ, nullique Angelo, spontaneâ abdicatione defuisse, ac nulli unquam sponte suâ auxilium necessarium denegare. Hæc sunt Arnaldi verba in Apologetico altero Sect. 3. demonstratione 8. p. 17. (hæc 76.)

*Respondet Inquisitor ille, scio, Petrum revera à Deo derelictum temptationem superare non potuisse: verum id ei accidisse in presumptionis suæ pœnam, ut ipsi à me laudati testantur Patres. Fateor id quidem; sed quid ad Epistolam? Contendit auctor Epistolæ, post Chrysostomum & Augustinum, Petro gratiam sine quâ nihil possumus, id est sine quâ temptationem superare non*  
pote-

poterat, defuisse. Queritur, an hac propositio hæretica sit, an verò orthodoxa. Quis verò ita mente captus est, ut non videat, propositionis hujus veritatem non infirmare, sed contra magis statuere, qui non modo Petro gratiam defuisse agnoscit, sed quare defuerit exponit? Eo enim verius est & certius illam Petro defuisse, quo magis ostenditur non sine causâ eam illi defuisse. Ut si quis multos etiam baptisatos damnatum iri contenderet, nonne ineptiret propterea, qui hoc argueret erroris, eo quod nemo baptisatus damnandus sit, nisi qui ob peccata damnari meruerit? Neque enim tum baptisatos multos damnari negaret, sed causam cur damnarentur afferret.

Itaque P. Nicolai, qui Apologeticum hunc legit, ignorare non potuit sic Arnaldum sentire, quod scilicet Deus Petro justo non spontaneâ abdicatione, sed in præsumptionis pœnam defuit. Atqui P. Nicolai hanc sententiam catholicam & irreprehensibilem esse toto suo Suffragio declarat. Ergo Arnaldi propositionem, eo Arnaldi sensu sumtam & intellectam, catholicam esse judicat; concludit tamen illam hæreseos, impietatis, & blasphemix notis afficiendam esse; postquam scilicet toto Suffragio falsissimè, ac reclamante conscientia supposuit, hanc esse Arnaldi mentem, hunc illius propositionis sensum, ut Deus Petro justo, ac quibusdam aliis justis quos aliquando similiter deserit, sponte ac spontaneâ abdicatione, nullâ causâ ex parte ho-

minis suppositâ, defuerit.

Quis ergo jam his perspectis non agnoscat, Censor iniquissimè, quod aliqui Doctores tibi & quibusdam aliis ex Inquisitoribus, non ex intemperatâ, ut criminaris, & imprudente cavillatione, sed ex certissimis ac verissimis, ut patet argumentis, palam exprobrare veriri non sunt, vel invidia, vel odio, vel vindicandi libidine, vel inflammata bilis ac in iram effusa, vel averso animo & adversari gestienti, vel pravis affectibus ac præposteris, aut similibus quibuscumque inuitamentis tribuenda esse, ut tua tibi verba regeramus (Suffrag. pag. 5.) quæ in Arnaldi propositionem ac sententiam dixisti. Expone, rogo te, quid his respondeas? Ubi in Arnaldi propositione, Epistolâ, Apologeticis, aliisve Scriptis legeris, quod illi de hac spontaneâ Dei abdicatione affingis? Et quomodo tuum judicium Censorium cum eâ sententiâ quam tu probas, & quam ille apertissimè, vel te conscio profiteatur, concilies? Nisi id facias, quod præstare nunquam poteris, ne dubites quin is habearis, quem dicere non auisim, apud probos omnes, eruditos, ac veritatis, fidei, & æquitatis amatores.

Itaque cum in Arnaldi propositione non agatur nisi de relictione Petri, cum Christum negando cecidit, quam idem Arnaldus in ejus præsumptionis pœnam accidisse profiteatur, illam de causâ defectus gratiæ, circa peccata ycnialia, quæstionem tractamus,

mus, non præcisè quidem ad Arnaldi propositionem defendendam, utpotè ab eadem quæstione penitus sejunctam, sed ad S.

Thomæ doctrinam, quam Pater Nicolai objicit, exponendam, & à perverso sensu illi per eum affecto vindicandam.

### A R T I C U L U S I I I.

*In quo ostenditur, Patrem Nicolai huic quæstioni, de causa defectus gratiæ circa peccata venialia, respondere non posse, quin gratiæ per se efficaciæ ad singulos pios actus necessitatem rejiciat. Ei enim qui illam de gratiâ efficace doctrinam admittat, ad peccatum originale recurrendum esse.*

**P**Rimum igitur quæro à P. Nicolai, cum aliquis justus in primum peccatum veniale cadit, puta in præsumptionem, seu in orandi negligentiam, seu in aliud quod aliud, cujus merito postea à Deo in peccati mortalis tentatione describitur; sicut Petro justo contigit, cum de se nimium præsumsit; An gratiam habuit quâ illud peccatum veniale non committeret, quâ non præsumeret, & quâ ad Deum, orando ut oportet, confugeret? Si respondeat: Habuit gratiam actualem sufficientem, per quam poterat illud peccatum vitare, non præsumere, & ad Deum orando confugere; iterum quæro: An ut eâ gratiâ actuali sufficiente benè uteretur, ut illi per dissensum impedimentum non poneret, ut actu non præsumeret, ut vigilaret & oraret, gratia alia per se efficax requirebatur, necne?

Si respondeat: Non requirebatur; reponam statim: Ergo hæc gratia sufficiens quoad usum libero arbitrio relicta est: ergo gratia per se efficax ad singulos

pios actus non requiritur; siquidem illa in justis ad bonum gratiæ sufficientis usum, qui pius actus est, non requiritur; sicut nec ad orandum, & ad non præsumendum: atque ita non requiritur ad imperfectos pietatis actus, quibus ad gratiam habitualement seu habendam, seu servandam, homo disponitur; & hæc est gratia sufficiens Molinæ, saltem ad orandum libero arbitrio relicta, quam M. Alphonsus Le Moine amplectitur, & Thomistæ omnes velut Semipelagianum errorem rejiciunt.

Si verò respondeat: Requirebatur gratia per se efficax, quâ voluntas non solum sit agendi potens, sed quâ etiam vult aut agit infallibiliter & indeclinabiliter; mox subjiciam: Ergo justus ille non habuit gratiam ad illud peccatum veniale vitandum, seu ad pium hunc actum exercendum necessariam. Hoc verò posito jam à P. Nicolai quæro, quæ causa est ex parte hominis illius, scilicet justi, cur Deus illi hanc gratiam necessariam non dedit?

Non



Non est quòd P. Nicolai recurrat ad aliquod peccatum veniale præcedens, quia nullum est; siquidem agitur de gratiâ ad primum peccatum veniale vitandum necessariâ. Præterea ulterius quærerem, cur Deus gratiam non dedit ad istud aliud peccatum veniale vitandum necessariâ? Atque ita deveniam tandem ad primum peccatum veniale. Quòd si, fatente P. Nicolai, Deus gratiam ad aliquod peccatum vitandum necessariâ aliquando denegat, sine ullius peccati actualis præcedentis nequidem venialis merito; jam quæram à P. Nicolai, ut exponat quo sensu S. Thomas dicat, primam causam defectus gratiæ esse ex nobis, Deum sua auxilia aliquibus subtrahere pro merito suæ actionis, secundum quod ejus justitia exigit: quòd Deus non prohibeat ne aliqui peccent, contingere ex merito præcedentis peccati: denique Deum nunquam velle aliquem carere gratiâ, nisi ex suppositione illius quod est ex parte hominis; & hanc Patris Nicolai expositionem amplectemur.

Sed illius ad hæc responsionem frustra quærimus, satis illius mens explorata perspectaque nobis est. Hoc enim unum ex his S. Thomæ testimoniis colligere inrendit; Deum numquam gratiam actualem ad aliquod peccatum, seu veniale, seu mortale sit, vitandum necessariâ denegare, nisi ex parte hominis aliquod peccatum actuale præcesserit, quod sit causa defectus gra-

tiæ: atque ita secundam responsionem sequi & probare non potest, juxta quam Deus gratiam ad primum peccatum veniale, propter quod justus postea à Deo deseritur, vitandum necessariâ denegat, sine ullo præcedentis peccati, saltem venialis, merito: sed alteri responsioni cum adhærere necesse est, juxta quam S. Thomæ auctoritate gratia sufficiens Molinæ libero arbitrio, saltem in justis, non quidem ad operandum, sed saltem ad orandum & ad vigilandum relicta asseritur ac stabilitur, & gratiæ prædeterminantis ad singulos pios actus, saltem ad imperfectos, idque in justis, necessitas negatur & impugnatur: atque ita Patri Nicolai larvam detraximus, & Molinistam sub Dominicanis vestibus latentem deteximus.

Nobis ergo gratiæ per se efficacis ad singulos pios actus, seu in peccatoribus, seu in justis, necessariæ doctrinam à S. Thomâ certissimè doceri cum universâ ejus Scholâ supponentibus, & ab eâ nunquam in exponendis sancti Doctoris testimoniis deflecentibus, juxta secundam responsionem dicendum est Deum justo, qui in primum peccatum veniale cadit, cujus merito postea à Deo in tentatione peccati mortalis deseritur, gratiam actualem ad illud vitandum necessariâ denegare sine merito peccati actualis præcedentis. Ex quo sequitur quòd cum S. Thomas dicit primam causam defectus gra-

tix semper esse à nobis, semper esse ex merito præcedentis peccati, ac semper supponere illud quod est ex parte hominis, intelligendum esse non de solo actuali peccato, sed de actuali vel originali, etiam remisso; eum in modum quem mox exponemus art. 5. arg. 6. nec solum de homine ut est in peccato actuali, seu mortale, seu veniale sit, sed etiam ut subjacet corruptioni & vitio ad peccatum inclinanti, quæ ex præcedenti culpa proveniunt.

Observabit fortè aliquis, S. Thomam in his omnibus testimoniis gratiam habitualement potius intelligere, quàm actualement, ac quærere quæ sit causa, non cur gratia actualis, quâ homo se ad gratiam habitualement præparat, sed cur habitualis, ad quam habendam homo præparatione indiget, aliquibus non detur; atque id probabit singula percurriendo.

Dicit hoc testimonium 1. 2. q. 112. art. 3. *Defectus gratiæ primæ causæ est ex nobis*, &c. de gratia habituali intelligi, quia in hoc articulo quæstio est de gratia habituali, an necessariò detur se ad illam præparanti? Id confirmabit ex argumento, ad quod respondetur, quod tale est. Cum gratia non detur alicui, quia non vult eam accipere, sequitur eam dari alicui, quia vult eam accipere; quod de gratia habituali intelligitur, quam non habet qui eam accipere non vult; quare Conradus Koëllin de gratia

habituali id exponit.

Dicit S. Thomam pariter in alio testimonio in 1. Sent. dist. 40. q. 4. art. 2. de gratia habituali loqui; quia loquitur de gratia, ad quam habendam homo se præparat. *Est tamen bonum*, inquit, *ut careat gratiâ, si eam habere non vult, vel si ad eam habendam negligenter se præparat*. Ergo, inquit, non loquitur de gratiâ per quam homo se præparat, quæ est actualis; sed de ea ad quam se præparat, quæ est habitualis; & de hac quærit, quæ sit causa cur homo illa carcat? Præterea eam gratiam de qua agit sic describit. *Gratia est quoddam lumen animæ, & perfectio quadam habilitans ipsam ad bonum*; quibus verbis gratia habitualis, potius quàm actualis designatur.

Addet hæc verba ex 3. contra gentes cap. 159. *Deus quantum in se est, parat est omnibus gratiam dare*. Hæc similia in 12. ad Hebr. lect. 3. *Gratia nulli deest, sed omnibus quantum in se est se communicat*, de gratia habituali etiam intelligi, quia in utroque loco de eâ gratiâ loquitur, quam Deus dat homini se ad illam præparanti; seu, quod idem est, illi impedimentum non ponenti: talis autem gratia est habitualis. Sic sentit P. Nicolai. *Nec interest*, inquit 1. classe pag. 32. *gratiam ibi habitualement indicari, quæ se ad illam præparanti non desit*. An verò gratiam actualement quâ homo se præparat, seu quâ removet impedimentum, Deus omnibus det, his verbis S. Thomas

non definit, imò in sequentibus eam omnibus non dari pronuntiat. Atque ita concludet, quòd cum in his omnibus locis S. Thomas de gratiâ habituali loquatur, quam Deus semper dat homini se ad illam præparanti, & quam nunquam negat, & etiam nunquam subtrahit, nisi homini se ad illam, seu habendam, seu servandam non præparanti, & illi seu recipiendæ, seu servandæ, impedimentum ponenti: & cum se ad gratiam non præparare, seu illi impedimentum ponere, non sit nisi ex peccato aliquo actuali; concludet, inquam, causam privationis gratiæ, de quâ ibi S. Thomas loquitur, semper ad peccatum aliquod actuale referendam esse, non verò ad originalem.

P. Nicolai hanc expositionem sequi & approbare non potest; quia si in his omnibus locis de solius gratiæ habitualis carentiâ S. Thomas loqueretur, ex his concludi non posset, gratiam actuale omnibus, & præcipuè justis, semper dari, ac proinde P. Nicolai illa omnia ad id unum probandum frustra omninò proferret.

Præterea licet ista testimonia per gratiam habitualement rectè exponi possent, eadem quæstio semper recurreret, cur scilicet Deus aliquibus non det gratiam actualem necessariam ut non peccent, & ut ad gratiam habitualement seu habendam, seu non amittendam se præparent, ac illi impedimentum non ponant; & cur aliqui-

bus justis aliquando non detur, causa autem defectus hujusmodi gratiæ ex parte justis, quoad primum peccatum veniale, assignari non potest, gratiæ per se efficacis ad singulos pios actus necessariæ principiis inhærendo, quin ad peccatum originale referatur.

Denique hæc quidem expositio omnem difficultatem absolvit, omnesque Molinistarum objectiones præcludit. Verùm licet aliqua S. Thomæ verba de gratiâ habituali rectè intelligantur; in aliis tamen de gratiâ actuali loquitur, sicut cum dicit 1. 2. q. 79. art. 1. (in quo quærit, *Utrum Deus sit causa peccati.*) Neque indirectè Deus potest esse causa peccati. Contingit enim quòd Deus aliquibus non præbet auxilium ad evitanda peccata, quod si præberet, non peccarent; sed hoc totum facit secundum ordinem suæ sapientiæ & justitiæ. Et ad 1. In malum autem inclinat voluntatem, in quantum non prohibet, sicut dictum est; & tamen hoc etiam contingit ex merito præcedentis peccati. Hæc de auxilio actuali intelligi negari non potest. Hoc idem dicit qq. disp. de malo, q. 3. de causa peccati, art. 1. ad 1. Deus, inquit, dicitur tradere aliquos in reprobum sensum, vel inclinare voluntates in malum, non quidem agendo vel movendo, sed potius deserendo, vel non impediendo: sicut si aliquis non daret manum cadenti, diceretur esse causa illius. Hoc autem Deus ex justo judicio facit, quòd aliquibus auxilium non præstat ne cadant. Atque ita juxta S. Thom-

mam causa defectus gratiæ, non solum habitualis, sed etiam actualis, semper ex parte hominis, & ex præcedentis peccati merito repetenda est.

Præterea rationes quibus gratiam non negari dicit, nisi propter aliquam causam ex parte hominis, pariter demonstrant, etiam actualem, nisi propter aliquam causam ex parte hominis non negari. Nam carentia gratiæ actualis, sicut & habitualis, pœna est quam Deus nisi ex aliquâ causâ justâ non infligit. Item quod aliquis careat gratiâ actuali, est volitum à Deo: ergo cum Deus non velit nisi bonum, non vult istum carere gratiâ actuali, nisi secundum quod bonum est:

illud autem cum simpliciter bonum non sit, non est bonum, nisi ut justum est; porro nec justum est, nisi in quantum est aliqua causa ex parte hominis. Atque ita juxta S. Thomæ doctrinam semper carentia gratiæ, seu habitualis, seu actualis, ad hominem ut ad causam referenda est, nec Deo unquam attribuenda, nisi ex suppositione ejus quod est ex parte hominis. Probandum ergo nobis est, eam causam defectus gratiæ quæ est ex parte hominis, juxta S. Thomam, non solum de peccato actuali, sed etiam de originali, etsi per baptismum remissio, intelligi oportere.

#### A R T I C U L U S I V.

*Ex sancto Thomâ causam defectus gratiæ aliquando ad peccatum originale, etsi in baptismo remissum, referri: nec aliter ejus de Gratiâ & Prædestinatione doctrinam exponi posse octo argumentis ostenditur, quorum quinque priora hic proponuntur.*

##### PRIMUM ARGUMENTUM.

1. **S**upposito quod S. Thomas gratiam per se efficacem ad singulos actus necessariam esse docuerit, aliâ ex parte hominis causâ inveniri non potest, cur justo alicui gratiam ad primum peccatum, cujus merito postea deferitur, vitandum necessariam non det, quàm peccatum originale, ut antea art. 3. probavimus. Ergo vel id S. Thomam tenere dicendum est, vel contra communem ejus Scholæ consensum

fatendum est, eum gratiæ Molinianæ libero arbitrio, saltem ad orandum, in justis relictæ doctrinam sequi, atque ita prædeterminantis ad singulos actus necessitatem impugnare.

Itaque nescio quid fieri possit, ut nonnulli qui gratiæ prædeterminantis ad singulos actus necessitatem firmissimè propugnant, eorum sententiam velut duram & S. Thomæ contrariam improbent, qui defectum gratiæ ad peccatum originale, ut causam, aliquando referendam esse docent,

cent, puta in iustorum casu; quia tunc vel ad meram Dei voluntatem confugiendum est, nulla causa ex parte hominis supposita, vel si aliqua causa ex parte hominis assignanda sit, alia esse non potest, quam peccatum originale, seu vitium ex eo relictum. Sed nonne durius longè est, defectum gratiæ hoc in statu meræ Dei voluntati, quam peccato originali tribuere? Nonne etiam id S. Thomæ doctrinæ repugnat, qui defectum gratiæ seu habitualis, seu actualis semper in præcedentis peccati meritum refert, & nunquam Deo attribui vult, nisi supposita causâ ex parte hominis, sicut allata testimonia evidentissimè probant? Et hanc tamen sententiam plures Molinistæ in aliquibus Thomistis eam tenentibus non reprehendunt, aliam verò longè mitiorem, quæ S. Augustini & S. Thomæ est, & quam nos sequimur, crudelitatis in Deum, impietatis, hæreseos accusant, adeò illorum in S. Augustini discipulos odium, omnem æquitatem & omne iudicium in eis pervertit.

## II. ARGUMENTUM.

**Q**UOTIES aliquis, seu peccator, seu iustus in aliquod peccatum cadit, tunc Deus illum non prohibet, non impedit, permittit illum cadere in peccatum, ac illi auxilium non præstat ne cadat. Hoc in S. Thomæ doctrinâ certissimum est, nec contraverti potest. *Contingit enim*, (in-

quit 1. 2. q. 79. art. 1.) quòd Deus aliquibus non prebet auxilium ad evitandum peccata, quod si præberet, non peccarent. Quod tam verum est de iustis qui cadunt in aliquod peccatum, quàm de peccatoribus. Sed cum Deus non prohibet ne aliquis peccet, *Hoc contingit*, (inquit ibidem 1. 2. q. 79. art. 1. ad 1.) ex merito præcedentis peccati. Hoc (inquit in quest. disp. de malo q. 3. de causa peccati art. 1. ad 1.) Deus ex iusto iudicio facit, quòd aliquibus auxilium non præstat ne cadant. Supponamus ergo esse primum peccatum alicujus iusti: quodnam est præcedens peccatum ex cuius merito Deus non prohibet ne hic iustus in illud peccatum cadat, nisi peccatum originale?

## III. ARGUMENTUM.

**I**UXTA S. Thomam 1. 2. q. 114. art. 9. *Perseverantia usque in finem dependet solum ex motione divina, quæ est principium omnis meriti: sed Deus gratiâ perseverantia bonum largitur.* Idem docet q. 109. art. 10. *Multis*, inquit, datur gratia, quibus non datur perseverare in gratia. Idem docet in 2. ad Tim. 2. lect. 3. *Si quæras in singulari, quare dat huic donum perseverantia, & non illi, non habet rationem nisi solam Dei voluntatem.* Augustinus: *Quare hunc trahat & illum non trahat, noli velle judicare, si non vis errare.* Idem docet 2. 2. q. 137. Et lib. 3. contra gentes c. 155. & quodlib. 3. art. 11. ad 7. Itaque eos iustos, quibus

non dat donum perseverantiæ, desinui movere, deserit auxilium suum non præstando, quod si præberet à justitiâ non deficerent, ac permittit illos cadere in peccatum, per quod à justitiâ deficiunt. Quæro ergo cur permittit illos cadere, & cur auxilium motionis divinæ non præstat ne cadant?

Si quis dicat, etsi habeant opera meritoria, tamen non consequuntur perseverantiâ, quia illi impedimentum ponunt per peccatum; respondebit S. Thomas, ut habetur 1. 2. q. 114. art. 9. *Sed contra non potest dici quòd hoc fiat* (hoc est quòd perseverantiâ non consequantur) *propter impedimentum peccati; quia hoc ipsum quod est peccare, opponitur perseverantiæ, ita quòd si aliqui perseverantiâ mereretur, Deus non permitteret illum cadere in peccatum.* Atque ita juxta S. Thomam, ratio propter quam justii qui non perseverant, non accipiunt à Deo donum perseverandi in gratiâ acceptâ, non est quia illi perseverantiæ dono per peccatum impedimentum ponunt, cum non ponere impedimentum gratiæ, sit pars & effectus doni perseverantiæ; ac Deus faciat illos justos non ponere impedimentum gratiæ conservandæ, seu non permittat illos justos in peccatum cadere, quibus donum perseverandi in gratiâ præparavit ac dare constituit. Ut enim iterum dicit 2. 2. q. 24. art. 11. loquens de perseverantiâ in charitate & gratiâ acceptâ, *Impossibile*

*est hoc duo simul esse vera, quòd Spiritus sanctus velit aliquem movere ad actum charitatis, & quòd ipse charitatem amittat peccando. Nam donum perseverantiæ computatur inter beneficia Dei, quibus certissime liberantur, quicumque liberantur, ut Augustinus dicit in libro De prædestinatione Sanctorum.*

Præterea verò si diceretur, justos qui non perseverant, non accipere à Deo donum perseverandi, quia illi dono impedimentum ponunt per peccatum, eadem semper quaestio recurreret, quare scilicet, cum habeant opera meritoria, non accipiunt à Deo donum gratiæ actualis ad non ponendum impedimentum dono perseverantiæ. Nam, ut docet S. Thomas in 12. ad Hebr. lect. 3. *Diendum est, quòd hoc ipsum, quòd aliquis non ponit obstaculum, ex gratiâ procedit. Quòd ergo à quibusdam removetur istud obstaculum, hoc est ex misericordia Dei; quòd autem non removetur, hoc est ex justitia ejus.* Idem docet l. 3. contra gentiles c. 160. 161. & 162. ut ostensum est Sect. 1. art. 1. & 2.

Quæro ergo cur Deus illis justis perseverantiâ non dat, & cur permittit illos cadere in peccatum & peccando ponere impedimentum gratiæ, cur auxilium motionis suæ non præstat ne cadant? Hoc certè juxta S. Thomam fit justo judicio & ex merito præcedentis peccati. Sed quodnam est illud peccatum præcedens? Non mortale; quia supponuntur nondum à justitiâ defecisse; si dicatur illud peccatum esse

esse veniale aliquod præcedens, quale est negligentia orandi, aut aliquod aliud per quod posuerunt impedimentum dono perseverantiæ; quia si orassent, ab hoc perseverantiæ dono deserti non fuissent. Sed iterum quæro, quod est peccatum præcedens, cuius merito Deus permittit eos in illud negligentia orandi peccatum, aut aliquod aliud, cuius merito postea in peccati mortalis tentatione deserti sunt, incidere, nec auxilium suum præstitit, ut orarent ac vigilarent? Hoc enim etiam fit iusto iudicio, & ex merito præcedentis peccati. Certè juxta indubitatam S. Thomæ de dono perseverantiæ doctrinam, in iustorum casu, cum peccatum aliquod admittunt, cuius postea merito in peccati mortalis tentatione iusto Dei iudicio deseruntur, ad peccatum originale recurrendum est. Et quicumque aliter sentiunt, quicumque ex S. Thomæ doctrinâ causam desertionis iustorum, seu causam negationis doni perseverantiæ ad peccatum originale, quia illud remissum est, non esse referendam contendunt, hi S. Thomæ imponunt, vel quòd gratiam prædeterminantem ad singulos pios actus non esse necessariam, ac prædestinationem gratuitam non esse tenuerit, vel quòd defectum gratiæ actualis in nobis ad meram Dei voluntatem, nullâ causâ ex parte hominis suppositâ, ac sine ullius peccati præcedentis merito aliquando referri docuerit.

IV. ARGUMENTUM.

**S**anctus Thomas 1. 3. contra gent. c. 160. hæc habet; *Quod autem dictum est in potestate liberi arbitrii esse, ne impedimentum gratia præstet, competit his in quibus naturalis potentia integra fuerit, hoc est, ut ostendimus Sect. 1. art. 2. his qui sunt in statu naturæ integræ, qualis fuit in primo parente ante peccatum.*

Ubi observandum est, non repeti ex gratiâ sanantem & iustificante, sed ex integritate naturæ, quòd sit in potestate liberi arbitrii, ne impedimentum gratiæ præstet. Quare docet 1. p. q. 62. art. 2. ad 2. quòd homo habet impedimentum ex corruptione corporis & infectione peccati, ne convertatur ad Deum: corruptio autem corporis & infectio peccati in iustis cum gratiâ mentem sanante remanet, ut docet 1. 2. quæst. 109. art. 9. in c. *Secundo*, inquit, *ratione speciali, propter conditionem status humana natura, qua quidem licet per gratiam sanetur quantum ad mentem, remanet tamen in ea corruptio & infectio quantum ad carnem, per quam servit legi peccati, ut dicitur ad Rom. 7.* Et art. 10. ad 3. *Et tamen facilius homo per gratia donum perseverare poterat in statu innocentie, in quo nulla erat rebellio carnis ad spiritum, quam nunc possumus, quando reparatio gratia Christi, etsi sit inchoata quantum ad mentem, nondum tamen est consummata quantum ad carnem.* Et quæst. disp. de veritate quæst. 26. art.



art. 5. ad 3. *Dicendum, quòd quantumcumque homo habeat habitum gratia, semper tamen indiget divina operatione quâ in nobis operatur modis prædictis, & hoc propter infirmitatem nostra nature, & multitudinem impedimentorum, quæ quidem non erant in statu nature condite; unde magis tunc poterat homo stare per seipsum, quàm nunc possint habentes gratiam, non quidem propter defectum gratia, sed propter infirmitatem nature. Ergo juxta hanc doctrinam non est in potestate liberi arbitrii hominum justorum, in quibus naturalis potentia integra non est, sicut erat in potestate primi hominis ante peccatum, ne impedimentum gratiæ, scilicet conservandæ præsent. Ac proinde postea S. Thomas explicans quid sit, non esse in potestate liberi arbitrii impedimentum gratiæ non præstare, licet de iis qui in peccato sunt loquatur, etiam intelligendus est de aliis in quibus natura non est integra, scilicet de justis: dicit autem, quòd quamvis vitare non possint per propriam potestatem, quin impedimentum gratiæ præsent vel ponant, nisi auxilio gratiæ præveniantur, nihilominus tamen (cum scilicet eodem auxilio non præventi impedimentum gratiæ ponunt) hoc eis imputatur ad culpam, quia hic defectus ex culpa præcedente in eis relinquitur. Sed circa justos quæ præcedens culpa intelligi potest, in cujus pœnam Dei auxilio non præveniuntur, ut impedimentum gratiæ non ponant, nisi originalis?*

## V. ARGUMENTUM.

SANCTUS THOMAS 2. 2. quæst. 2. art. 5. ad 2. dicit, *Quòd auxilium gratia, cum quo homo potest Deum & proximum diligere & credere, quibuscumque divinitus datur, misericorditer datur; quibus autem non datur, ex justitiâ non datur in pœnam præcedentis, aut saltem originalis peccati, ut Augustinus dicit in lib. de corrept. & grat.*

Scio statim responsuros adversarios, intelligi originale peccatum nondum remissum, quod est causa cur aliquibus non detur auxilium ad credendum & diligendum Deum; itaque ex hoc non probari, peccatum originale quod est remissum, esse causam cur Deus aliquibus gratiam non det, de quo solo quæstio est.

Verùm hæc responsio nullius momenti est: quia S. Thomas generaliter dicit, quòd quibuscumque datur auxilium gratiæ ad diligendum Deum, misericorditer datur; quibus autem non datur, ex justitiâ non datur. Ergo hoc verum esse debet de omnibus quibus non datur auxilium ad diligendum Deum: aliquibus autem justis, iis scilicet qui non perseverant, qui in tentatione cadunt, & charitatem amittunt peccando, auxilium ad diligendum Deum, seu ad perseverandum in Dei dilectione non datur, juxta S. Thomam docentem eis non dari perseverare in gratiâ, & Spiritum sanctum non velle eos movere ad actum charitatis, ut antè arg. 3. ostendimus. Ergo verum est illis hoc

hoc auxilium denegari ex iustitiâ, in pœnam præcedentis, saltem originalis, peccati: nullum autem est in illis peccatum actuale mortale præcedens; originale in iis remissum est: ergo hoc auxilium illis negatur in pœnam originalis peccati etiam remissi.

Confirmatur hanc S. Thomæ sententiam etiam de iustis intelligi debere: quia scilicet illam S. Augustini auctoritate lib. de corrept. & grat. probat. Ergo id docere intendit, quod ibi S. Augustinus: tale est autem S. Augustini testimonium lib. de corrept. & grat. c. 11. quod hic S. Thomas designat: *Nunc autem quibus deest tale adjutorium* (per quod scilicet possumus, & sine quo non possumus perseveranter bonum tenere, & per quod perseveramus, jam pœna peccati est, scilicet originalis de quo hic sermo est, *quibus autem datur secundum gratiam datur*. Ergo juxta hanc S. Augustini doctrinam, cum aliquibus iustis non datur gratia sine quâ perseverare non possunt, pœna est peccati originalis, quod tamen in illis remissum est, veluti mox explicabimus art. 5. arg. 6. atqui S. Thomas hanc S. Augustini doctrinam hic sequitur: ergo S. Thomas hoc loco cum S. Augustino docet, aliquibus iustis auxilium gratiæ, sine quo in dilectione Dei perseverare non possunt, ex iustitiâ denegari in pœnam saltem originalis peccati, licet hoc in illis per baptismum remissum fuerit.

Ad hujus argumenti confirma-

tionem, addi etiam potest istud aliud ferè simile deductum ex 1. 2. q. 98. art. 4. ad 2.

Juxta S. Thomam, ut 3. argumento ostensum est, Deus è duobus iustis quorum unus perseverat & alius non perseverat, uni dat gratiam per quam in oratione & in acceptâ iustitiâ perseverat, & alteri non dat, atque eâ desertus ab oratione & à iustitiâ deficit. Jam si ex S. Thomâ quæzratur, unde Deus non sit personarum acceptor, sua dona inæqualiter dispensans duobus iustis, in quibus eadem est iustitia, eadem merita; respondebit, Deum non esse acceptatorem personarum, quia cui gratia datur, gratuitâ voluntate datur, & non ex debito, & cui non datur, iudicio iusto non datur. Hoc enim venit ex damnatione humani generis pro peccato primi parentis.

Hæc est S. Thomæ doctrina 1. 2. q. 98. art. 4. ad 2. Sic enim argumentum 2. proponit: *Sicut dicitur Act. 10. Non est acceptor personarum Deus, sed in omni genere qui timet Deum, & facit iustitiam acceptus est illi: non ergo magis uni populo, quàm aliis viam salutis debuit aperire. Similiter de iustis concludi posset: non ergo magis uni iusto, quàm alteri ultimam salutis viam per donum perseverantiæ aperire debuit: huic argumento sic respondet.*

*Ad 2. dicendum, quòd acceptio personarum locum habet in his quæ ex debito dantur; in his verò quæ ex gratuitâ voluntate conferuntur, acceptio personarum locum non habet.*

Non

*Non enim est personarum acceptor, qui ex liberalitate de suo dat uni & non alteri; sed si esset dispensator bonorum communium, & non distribueret aequaliter secundum merita personarum, esset personarum acceptor: salutaria autem beneficia Deus humano generi confert ex sua gratiâ, unde non est personarum acceptor, si quibusdam præ aliis conferat. Unde Augustinus dicit in lib. De prædestinatione Sanctorum, Omnes quos Deus docet, misericordiâ docet; quos autem non docet, judicio non docet. Hoc enim venit ex damnatione generis humani pro peccato primi parentis.*

Hoc pariter circa justos, quorum uni dat perseverandigratiam, & alteri non dat, verum esse debet: eâdem ex causâ nulla est circa illos personarum acceptio, ac proinde oportet ut quod alteri ex gratiâ & sine debito confertur, alteri justo judicio, seu ex justitiâ

non conferatur. Ac præterea S. Thomas generaliter, juxta S. Augustinum, pronuntiat, Quos autem non docet, judicio non docet. Et alibi etiam gratiam nunquam hominibus, nisi ex justo judicio negari allerit, quod proinde etiam circa justos verum esse debet. Deus enim eos justos quibus perseverantiam non dat, quantum ad hoc, non docet, ac eis gratiam ad perseverandum necessariam denegat. Quod autem justo Dei judicio seu ex justitiâ non confertur, procul dubio aliquam ex parte hominis causam supponit. Atque ita juxta S. Thomam causa negationis gratiæ ad perseverandum in Dei dilectione necessariæ, in justis quibus non datur, ad peccatum originale, quanquam per baptismum remissum, seu ad damnationem humani generis pro peccato primi parentis, referenda est.

## A R T I C U L U S V.

*In quo demonstratur juxta S. Thomam primam causam reprobationis hominum esse peccatum originale, seu massam perditionis.*

### VI. ARGUMENTUM.

**J**uxta doctrinam S. Thomæ prima causa reprobationis hominum, est peccatum originale. Id multis testimoniis confirmari potest.

1. Illud clarissimè docet in cap. 9. ad Rom. tota lect. 3. Cum enim omnes homines, inquit, propter peccatum primi parentis damnationi nascantur obnoxii, quos Deus per suam

gratiam liberat, sola misericordiâ liberat: & sic quibusdam est misericors, quos liberat; quibusdam autem justus, quos non liberat: neutris autem iniquus. Atque hic S. Thomas, ut ex præcedentibus & sequentibus patet, loquitur de liberatione à miseriâ æternâ, seu de prædestinatione ad vitam æternam; subdit enim: Et ideo Apostolus questionem solvit per auctoritatem, quæ omnia divina misericordiâ ad-

scribit:

scribit : sciendum est tamen quod Dei misericordia secundum tria ostenditur, primò quidem secundum prædestinationem quâ ab æterno proposuit aliquos liberare. Et paulò antè : Sic igitur, inquit, non potest esse quòd merita consequentia gratiam sint ratio miserendi aut prædestinandi, sed sola Dei voluntas, secundum quam misericorditer aliquos liberat. Ergo juxta S. Thomam causa reprobationis seu non liberationis à miseriâ æternâ, in iis qui non sunt prædestinati, inter quos sunt aliqui per baptismum regenerati, alia non est quàm peccatum originale, propter quod omnes homines damnationi obnoxii nascuntur.

Et lect. 4. exponens cur homo luto comparetur, & quæ sint vasa in contumeliam : *Humana autem natura*, inquit, *vilitatem habet ex suâ materiâ*, quia ut dicitur Genes. 2. *Fecit Deus hominem de limo terræ. Sed majorem vilitatem habet ex corruptione peccati, quæ per unum hominem in hunc mundum intravit : & idè homo luto merito comparatur*. Et infra : *Si verò Deus hominem ad meliora non promoveas, sed in suâ infirmitate eum dimittens, deputat eum ad infimum usum, nullam ei facit injuriam, ut possit justè de Deo conqueri*. Et infra : *Similiter Deus liberam potestatem habet facere ex eadem corruptâ materiâ humani generis, sicut ex quodam luto, nulli faciendo injuriam, quosdam homines preparados in gloriam, quosdam autem in miseriâ derelictos*. Hierem. 18. *Sicut lutum in manu figuli, ita in manu*

*mea vos, domus Israël*. Deinde cum dicit, *Quòd si volens Deus, &c.* solvit primam questionem, scilicet quare Deus velit quibusdam miseriari, & quosdam in miseriâ derelinquere, sive quosdam eligere, & quosdam reprobare. Ergo ex hoc loco, prima causa, ob quam Deus quosdam in miseriâ derelinquit, reprobatur, & ad gloriam æternam non præparatur, est peccatum originale, ex quo tota humani generis materia corrupta est : nec reprobi vasa in contumeliam dicuntur, nisi ob corruptionem & massam peccati, quæ per unum hominem in hunc mundum intravit, in quâ Deus eos justè, & sine injuriâ derelinquit, sicut ab eâ quos vult misericorditer liberat.

2. Idem docet 1. p. q. 23. art. 1. ad 3. cum dicit ex S. Augustino de prædestinatione sanctorum cap. 10. prædestinationem esse propositum miserendi, ex quo infert, quòd prædestinatio hominum in vitam æternam est à statu miseriæ, non verò Angelorum. Hinc enim evidenter sequitur, reprobationem hominum esse eorum relictionem in miseriâ, in quam per peccatum originale inciderunt, proindeque causam reprobationis hominum esse peccatum originale.

3. Eandem doctrinam expressè tradit, & S. Augustini auctoritate confirmat in quæst. disp. de verit. q. 6. quæ est de prædestinatione art. 2. ad 9. & ad 11. scilicet, argumentum 9. sic proponit. *Præterea prædestinatio præ-*

*supra*

supponit electionem, ut supra dictum est. Sed electio non potest esse rationabilis, nisi sit aliqua ratio, propter quam unus ab altero discernatur; nec in electione, de quâ loquimur, potest aliqua ratio discretionis assignari, nisi ex meritis. Ergo cum electio Dei irrationabilis esse non possit, ex prævisione meritorum procedit, & per consequens prædestinatio: ergo, &c. Sic respondet.

Ad 9. dicendum, quod electio Dei quâ unum eligit & alium reprobatur, rationabilis est, nec tamen oportet quod ratio electionis sit meritum: sed in ipsâ electione ratio est divina bonitas; ratio autem reprobationis est in hominibus PECCATUM ORIGINALE, ut dicit Augustinus (quid expressius?) vel in futuro per hoc ipsum quod est non habere debitum ad hoc quod eis gratia conferatur, rationabiliter possum velle denegare aliquid alicui quod sibi non debetur. Et aliquis hæc legens de S. Thomæ sententiâ, quam propugnamus, dubitare poterit?

Hic obiter nota juxta S. Thomam hoc esse discrimen inter hæc duo, Non habere debitum quod gratia conferatur, & habere debitum quod gratia non conferatur, quia unum dicit tantum defectum, alterum verò includit rationem pœnæ. Illud docet quæst. disp. de malo q. 5. art. 5. ad 15. Aliud est, (inquit) non debere habere, quod non habet rationem pœnæ, sed defectus tantum; & aliud debere non habere, quod habet rationem pœnæ. Jam autem in hoc naturæ corruptæ statu, secundum S. Thomam, sicut secundum S. Augustinum, non

habere gratiam, seu habitualement, seu actualement, quâ homo indiget, non solum habet rationem defectus, sed etiam pœnæ, proindeque homo eadem gratiâ non privatur, nisi ex merito præcedentis peccati, vel actualis, vel saltem originalis.

11. verò argumentum sic proponit art. 2. mox citato è quæst. disp. de veritate quæst. 6. Præterea sicut se habet abusus gratiæ ad effectum reprobationis, ita bonus usus gratiæ ad effectum prædestinationis. Sed abusus gratiæ, (scilicet habitualis in Judâ) fuit ratio reprobationis ejus: secundum hoc enim reprobatus effectus est, quod sine gratiâ decessit. Quod autem tunc gratiam non habuit, non fuit quia Deus ei dare noluerit, sed quia ipse accipere noluit, ut dicit Augustinus, & Dionysius. Ergo & bonus gratiæ usus in Petro & alio quolibet, causa est, quare ipse est electus vel prædestinatus. Sic respondet.

Ad 11. dicendum, quod præscientia abusus gratiæ non fuit causa reprobationis in Judâ (nisi fortè ex parte effectus;) quamvis Deus nulli volenti accipere gratiam eam denegaret: sed hoc ipsum quod est velle accipere gratiam, est nobis ex prædestinatione divina: unde non potest esse causa prædestinationis. Ergo juxta S. Thomam causa reprobationis, quantum ad id quod est in perditionis massâ relinqui, & ad vitam æternam non eligi, etiam in justis, qualis erat Judas antecafum, & habitualis gratiæ abusus, non est præscientia abusus gratiæ, sed peccatum originale.

Nam

Nam juxta præcedentem respon-  
sionem & universam S. Thomæ  
doctrinam, dici non potest quod  
ejusdem reprobationis causa sit  
mera Dei voluntas, nullâ causâ  
ex parte hominis suppositâ.

Quamquam autem ex parte hu-  
jus effectus, qui est inferre dam-  
nationis pœnam pro culpâ, cau-  
sa reprobationis Judæ non sit ni-  
si præscientia abusus gratiæ habi-  
tualis, hoc est præscientia peccati  
actualis; tamen ex parte hujus  
prioris effectus, qui est permittere  
aliquem, puta Judam justum,  
cadere in culpam, illum derelin-  
quere, deferere, suo libero arbi-  
trio dimittere, seu illi auxilium  
non præstare ne cadat, causa re-  
probationis Judæ est peccatum  
originale. Hic est, ut patet, S.  
Thomæ sensus.

Nullum est in S. Thomæ Ope-  
ribus principium, quod cum hac  
doctrinâ non concordet, nullum  
quod illi repugnet. Qui hanc  
sententiam impugnant velut S.  
Thomæ contrariam, hoc maxi-  
me fundamento nituntur, quòd  
sanctus ille Doctor sæpè homi-  
num reprobationem, seu aliquo-  
rum non electionem ad vitam  
æternam, solo Dei beneplacito ac  
meræ voluntati attribuat, & ad  
universi complementum & sua-  
vem rerum dispositionem alios  
à Deo eligi, alios reprobari do-  
ceat. Ex quo concludunt causam  
reprobationis, seu non electionis  
aliquorum ad vitam æternam, es-  
se meram Dei voluntatem, non  
verò peccatum originale. Itaque  
exponendum est quis sit S. Tho-

mæ hæc in re sensus, & quomo-  
do sententiæ à nobis positæ non  
repugnet.

Ut S. Thomæ hæc in re sen-  
sus intelligatur, animadverten-  
dum est, reprobationem dupli-  
ci modo spectari posse, Absolutè  
& Comparativè. Absolutè, cum  
queritur simpliciter, seu ut lo-  
quitur S. Thomas, *in generali*,  
cur aliqui à Deo reprobentur,  
& quæ sit aliquorum reprobatio-  
nis causa, nullâ comparatione  
factâ cum eis qui eliguntur: tunc  
respondetur, causam esse pecca-  
tum originale, per quod omnes  
homines damnationi obnoxii na-  
scentur, & propter quod Deus  
justè & sine ullâ iniquitate non  
vult aliquibus hoc bonum, quod  
est vita æterna. Reprobatio verò  
spectatur comparativè, cum qua-  
ritur in speciali, ut ait idem san-  
ctus, cur Deus hunc potius quam  
istum reprobet; cur cum omnes  
homines per peccatum primi pa-  
rentis eidem damnationi obnoxii  
nascentur, aliquos ab hac massâ  
& conspersione liberet, & ad vi-  
tam æternam eligat, alios verò  
in eadem massâ derelinquat; &  
ad vitam æternam non eligat.  
Tunc respondetur, hoc esse ex  
solo Dei beneplacito & merâ vo-  
luntate. Cum enim eadem sit om-  
nium causa, idem meritum, hujus  
discretionis unius ab altero nul-  
la alia ratio reddi potest, quàm  
Dei voluntas: hæc est altitudo  
sapientiæ, hoc profundum judi-  
ciorum Dei. Omnes homines ob  
peccatum originale similiter me-  
tentur non liberari ac relinqui,

ex iis multi à Deo non liberantur, sed relinquuntur. Nulla ergo est iniquitas, & in hoc iudicium Dei iustum est: aliqui verò in causa istâ communi præ aliis liberantur, & ad vitam æternam assumuntur. Ergo sola est misere-  
rentis voluntas, & in hoc iudicium Dei occultum est & inscrutabile. Talibus documentis pleni sunt S. Augustini contra gratiæ hostes libri, maximè Ep. 105. ad Sixtum, Enchiridium, libri ad Bonifacium, De corrept. & grat. De prædestinatione sanctorum & De dono perseverantiæ.

Hoc posito, facilis est S. Thomæ sensus: cum scilicet causam reprobationis aliquorum ad solum Dei beneplacitum & meram voluntatem refert, de eâ loquitur comparativè & in speciali; absolutè verò & in generali de eâ loquendo, cam non soli Dei voluntati, sed iustitiæ, aliquam ex parte hominis causam semper supponenti, attribuit. Ac ne id à me temerè dictum quis putet, legat responsionem ad 3. 1. p. q. 23. art. 5. sic enim loquitur.

Ad 3. dicendum, quòd ex ipsâ bonitate divinâ, ratio sumi potest prædestinationis aliquorum, & reprobationis aliorum. Sic enim Deus dicitur omnia propter suam bonitatem fecisse, ut in rebus divina bonitas representetur. Necessè est autem quòd divina bonitas (quæ in se est una & simplex) multiformiter representetur in rebus, propter hoc quòd res create ad simplicitatem divinam attingere non possunt. Et inde est quòd ad completionem universi

requirantur diversi gradus rerum, quarum quedam altum, & quedam infimum locum teneant in universo, & ut multiformitas graduum conservetur in rebus, Deus permittit aliqua mala fieri, ne multa bona impedian-  
tur, ut supra dictum est. Sic igitur consideremus totum genus humanum, sicut totam rerum universitatem. Voluit igitur Deus in hominibus, quantum ad aliquos quos prædestinat, suam representare bonitatem per modum misericordiæ, PARCENDO; & quantum ad aliquos quos reprobat, per modum iustitiæ, puniendo. Et hæc est ratio quare DEUS QUOSDAM ELIGIT ET QUOSDAM REPROBAT Et hanc causam assignat Apostolus ad Rom. 9. dicens: Volens Deus ostendere iram, id est vindictam iustitiæ, & naturam facere potentiam suam, sustinuit, id est permisit, in multâ patientia vasa ira apta in interitum, ut ostenderet divitiæ gloriae suæ in vasa misericordiæ quæ preparavit in gloriam. Et 2. ad Tim. 2. dicit; In magna domo non solum sunt vasa aurea & argentea, sed etiam lignea & fictilia, & quedam quidem in honorem, quedam in contumeliam. Sed quare hos eligit in gloriam & illos reprobat, non habet rationem nisi divinam VOLUNTATEM. Unde Augustinus dicit super Joannem, Quare hunc trahat, & illum non trahat, noli velle iudicare, si non vis errare.

Ex hac S. Thomæ doctrinâ, Apostoli auctoritate confirmatâ, evidenter patet quòd Deus homines non reprobat, nisi ex iustitiâ, iramque seu vindictam iustitiæ



nitix ostendere volens, quodque non reprobatur nisi vasa iræ apta in interitum. Ergo juxta S. Thomam reprobatio absolute sumpta semper causam aliquam ex parte hominis supponit, scilicet peccatum originale, per quod omnes homines facti sunt vasa iræ apta in interitum. Atque ita quanquam nullus homo, nisi Deo volente, reprobetur ac relinquatur, tamen Deus nullum hominem reprobari vult nisi ex justitiâ, & propter causam ex parte hominis suppositam, scilicet peccatum originale. Et hæc est ratio, inquit, quare Deus quosdam eligit, & quosdam reprobatur. Homines etiam prædestinat parcendo, secundum hæc verba: *Voluit igitur Deus in hominibus, quantum ad aliquos quos prædestinat, suam representare bonitatem per modum misericordie, PARCENDO.* Parcere autem significat alicujus debiti condonationem, ex quo sequitur, quod aliquos reprobat non parcendo, hoc est, eis aliquod debitum per peccatum originale contractum non condonando.

Cum autem reprobatio à S. Thomâ comparative considerata, hoc est, cum quaeritur in speciali, quare Deus hos reprobat, istos verò eligit, tunc nullam rationem nec causam assignat, nisi divinam voluntatem. Sed quare, inquit, hos elegit in gloriam, & illos reprobavit, non habet rationem, nisi divinam voluntatem.

Idem docet lib. 3. contra gentes c. 161. *Non omnes, inquit, qui*

*gratiam impediunt, auxilio suo prævenit, ut avertantur à malo, & convertantur ad bonum; sed aliquos, in quibus vult suam misericordiam apparere, ita quod in aliis justitia ordo manifestetur. Hinc est quod Apostolus dicit ad Rom. 9. Volens Deus ostendere iram, & notam facere potentiam suam, sustinuit in multis patientia vasa ire apta in interitum, ut ostenderet divitias glorie sue in vasa misericordie quæ preparavit in gloriam. Cum autem Deus hominum qui in eisdem peccatis detinentur, hos quidem præveniens convertat, illos autem sustineat, sive permittat secundum ordinem rerum procedere, non est ratio inquirenda, quare hos convertat, & non illos. Hoc enim ex simplici ejus voluntate dependet. Ergo S. Thomas ad simplicem quidem Dei voluntatem refert, cur convertat hos & non illos; sed simul docet in iis quos non trahit & non convertit, justitiæ ordinem servari, secundum illud Apostoli, Deus volens ostendere iram, &c. hoc est, rationem eorum derelictionis semper hominum peccatis assignari, nec Deum velle illos non trahere ac derelinquere, nisi causâ ex parte hominis suppositâ.*

Idem omnino habet in cap. 9. ad Rom. lect. 4. *Deinde, inquit, cum dicit: O homo tu quis es, &c. Respondet præmissæ questioni. Ad cujus responsionis intellectum, considerandum est, quod circa electionem bonorum & reprobationem malorum duplex questio moveri potest: Una quidem IN GENERALI, Quare Deus velit quosdam indurare, & quorundam misereri: Alia verò IN SPECIA-*

21. Quare velit hujus misereri, & hunc vel illum indurare; & potest quidem ratio hujus questionis assignari: secunda autem questionis non potest assignari ratio, nisi simplex Dei voluntas, cujus exemplum patet in rebus humanis. Deinde ostendit, rationem cur vult quosdam reprobare & indurare esse justitiam, quæ meritum ex parte hominis supponit, quod ad peccatum originale refert. Cum dicit, inquit, Quod si volens Deus, &c. Solvit primam questionem, scilicet quare Deus velit quibusdam misereri, & quosdam in miseriam derelinquere, sive quosdam eligere & quosdam reprobare. ... Finis autem reprobationis vel obdurationis malorum, est manifestatio divina justitiæ & virtutis. ... Melius verò quem Deus erga eos exercet, non est quod disponat eos ad malum, quia ipsi de se habent dispositionem ad malum ex corruptione primi peccati. ... Hoc autem solum Deus circa eos agit, quod eos permittit agere quæ concupiscunt. Et sup. lect. 3. Sic ergo intelligendum est, Cui vult miseretur, scilicet per suam misericordiam; & Quem vult indurat, per suam justitiam: quia illi quos indurat hoc merentur ut indurentur ab ipso, ut supra 1. cap. dictum est.

Denique idem docet in 6. Joannis: Quare autem, inquit, non omnes aversos trahit, sed aliquos, licet sint omnes equaliter aversi, ratio quidem IN GENERALI potest assignari, ut scilicet in illis qui non trahuntur appareat & resurget, ORDO DIVINÆ JUSTITIÆ; in illis autem qui trahuntur, immensitas divinæ sapientiæ. Quare autem IN

SPECIALI trahat hunc, & illum non trahat, non est ratio aliqua, nisi beneplacitum voluntatis divinæ. Unde dicit Augustinus: Quem trahit & quem non trahit, quare illum trahat & illum non trahat, noli velle judicare, si non vis errare. Et infra: Sic ergo Deus ad complementum universi quosdam quidem trahit, ut in eis appareat sua misericordia, quosdam verò non trahit, ut ostendatur in eis sua justitia; sed hos trahit, illos non trahit secundum suum beneplacitum voluntatis.

Ex his verbis manifestum est quod licet Deus ad complementum universi, quod requirit ut multiformitas graduum conservetur in rebus, quosdam eligat, & quosdam relinquat, seu reprobet; quosdam trahat & quosdam non trahat; tamen cum quosdam relinquit, & quosdam non trahit, hoc facit ex justitiâ, proindeque causa est ex parte hominis cur hoc faciat, licet ad complementum universi hoc faciat. Sic ergo, inquit, Deus ad complementum universi quosdam quidem trahit, ut in eis appareat sua misericordia; quosdam verò non trahit, ut ostendatur in eis sua justitia. Idem omnino docet in loco ex prima parte citato.

Jam verò posito quod juxta S. Thomam causa ob quam homines à Deo reprobantur, seu ad vitam æternam non prædestinantur, sit peccatum originale, necessario sequitur causam negationis gratiæ in justis, qui à justitiâ excidunt, ad peccatum originale referri oportere. Ut hoc clarius demonstretur, primò exponendum est

est quomodo, juxta S. Thomam, reprobatio sit causa derelictionis à Deo, quid ex illâ proveniat, & quis sit ordo in executione reprobationis hominum.

Reprobatio verò, inquit S. Thomas 1. p. q. 23. art. 3. ad 2. non est causa ejus quod est in presenti, scilicet culpe, sed est causa derelictionis à Deo: est tamen causa ejus quod redditur in futuro, scilicet pena eterna; sed culpa provenit ex libero arbitrio ejus qui reprobat, & à gratia deseritur: & secundum hoc verificatur dictum Propheta, scilicet, Perditio tua, Israël, ex te. Item in c. Sicut predestinatio includit voluntatem conferendi gratiam & gloriam, ita reprobatio includit voluntatem permittendi aliquem cadere in culpam, & inferendi damnationis poenam pro culpa. Ubi nota, juxta S. Thomam, idem hoc esse, Deus permittit aliquem eadere in peccatum, ac, Deus aliquem derelinquit, & gratiam suam non dando deserit. Denique ibidem ad 1. In quantum igitur, inquit, quibusdam non vult hoc bonum, quod est vita eterna, dicitur eos odio habere, vel reprobare. Cum ergo reprobatio hominum primum includat derelictionem à Deo, & causa prima reprobationis sit peccatum originale, ut antea ostendimus, oportet ut causa prima derelictionis à Deo sit peccatum originale.

Juxta hanc S. Thomæ doctrinam, hic est ordo in hominum reprobatione. Primum Deus videt omnes homines per peccatum originale æternæ damnationi ob-

noxios factos esse, ac in quadam perditionis & corruptionis massa esse positos. Deinde aliquos ex hae massa liberare ac discernere statuit, & ad vitam æternam misericorditer eligit, ac iis beneficia præparat, quibus certissime liberentur ac salventur. Cæteros verò in hac massa relinquere statuit, nec vult eis hoc bonum, quod est vita æterna. Inter eos autem quos ita reprobat, aliquos ad baptismi gratiam & ad præsentem iustitiam vocare decernit. Hi sunt qui cum aliquo tempore bene pieque vivant: Sic, ut ait S. August. de corrept. & gratia cap. 7. à fide & Christiana conversatione lapsi sunt, ut tales eos vite hujus finis inveniat, qualis fuit Judas Apostolus Christi traditor. Deus ergo eos, per baptismum renatos ac libero suo arbitrio utentes, primum permittit secundum eorum inclinationem eadere in peccatum, seu eos libero arbitrio dimittit, & gratiam suam non dando deserit. Deinde illi libero suo arbitrio, de se habente dispositionem ad malum, ex corruptione primi peccati, in hoc vel illud peccatum mortale liberè labuntur, à quo postea non resurgunt. Licet enim, inquit ibidem ad 3. aliquis non possit adipisci gratiam, qui reprobat à Deo; tamen quod in hoc peccatum vel illud labatur, ex ejus libero arbitrio contingit: unde & merito sibi imputatur ad culpam. Et in caput 9. ad Rom. lect. 4. Alius quem Deus erga eos, reprobos scilicet, exercet; non est quod disponat eos ad malum, quia ipsi de se habent dispo-

sitionem ad malum ex corruptione primi peccati.... Hoc autem solum Deus circa eos agit, quod eos permittit agere quæ concupiscunt. Et infra: Non enim sic quos vult indurat, ut eos peccare compellat, sed sustinet eos ut secundum suam inclinationem tendant in malum. Denique Deus his in peccato suo morientibus infert damnationis pœnam pro culpa. Et hanc pœnam pro peccatorum meritis disparem iis inferre non statuit, nisi post actualis eorum culpæ, in qua vitam finiunt, prævisionem. Et hæc est reprobatio positiva ex parte, tum Dei, tum objecti. Ex hac doctrinâ, quam juxta testimonia prius allata à S. Thomâ traditam esse contraverti non potest, causam primam derelictionis à Deo in iustis peccato originali assignandam esse, hoc argumento facillimè evincitur.

Causa derelictionis à Deo iustorum cadentium, qui ad vitam æternam prædestinati non sunt, eadem est ac eorum reprobationis; siquidem, juxta S. Thomæ doctrinam antea positam, aliquorum reprobatio, derelictionem eorum à Deo primò includit: *Reprobatio, inquit, est causa derelictionis à Deo.* Atqui prima causa reprobationis est peccatum originale, ut antea multis testimoniis evidenter probavimus. Ergo causa denegationis gratiæ seu derelictionis iustorum cadentium, qui ad vitam æternam prædestinati non sunt, est peccatum originale.

Sed nec alia causa istorum à

Deo derelictionis, seu negationis gratiæ illis ad perseverandum in iustitiâ necessariæ, juxta certam S. Thomæ doctrinam inveniri potest. Non quidem peccatum actuale mortale, quia nullum in illis esse supponitur; aliàs non essent iusti. Si dicatur veniale peccatum præcedens, esse causam cur permittantur cadere in mortale, esto. Sed quæro causam, cur permitti sint cadere in istud veniale, cujus merito postea deseruntur. Non aliquod peccatum actuale veniale, quia loquimur de primo quod committunt. Ergo si juxta S. Thomæ doctrinam, allatis antea testimoniis contentam, ad aliquod peccatum, cujus merito sibi relinquantur, recurrendum est, ad peccatum originale recurrendum est.

Equidem illud in iustis per baptismum remissum est, sed debitum carenti gratiis actualibus, quibus homo etiam iustus ob corruptionem ex peccato relictam, ad vitandum peccatum, & operandum bonum semper indiget, per baptismum penitus remissum non est: Sicut per baptismum, ut ait Augustinus De verbis Apostoli Serm. 2. non est ablata infirmitas, quanquam per illum deleta sit iniquitas: & hanc peccati pœnam, hoc debitum, Deus in renatis cum vult, quantum vult, & in quibus vult misericorditer condonat; alios suæ infirmitati ad malum impellenti aliquando relinquens, & ut cadant permittens, iudicio semper iusto, etsi occulto, alios secundum misericordiam

diam gratuitam & indebitam per gratiam adjuvans, ac retinens ne ex suâ infirmitate à justitiâ excident.

Equidem peccatum originale, & quantum ad culpam, & quantum ad pœnz æternæ reatum, per baptismum penitus ablatum est, nec Deus unquam postea illud in renatis ad culpam aut pœnam æternam imputat: sed à corruptionis & perditionis malsâ per peccatum originale factâ non baptizamus, ac sola Dei ad vitam æternam eligentis prædestinatio liberat ac discernit. Non est autem dubium eos omnes qui non sunt sic discreti, nunquam perventuros ad vitam æternam: ergo si sint regenerati & justificati, nunquam ex hac vitâ auferentur, antequam à justitiâ excident; à justitiâ verò nunquam excident, nisi Deo permittente, dimittente, & auxilium gratiæ suæ non præstante ne cadant. Nam, ut ait S. Augustinus De dono perseverantiæ cap. 8. *non mentitur qui dicit, Ex nobis exierunt, sed non erant ex nobis: nam si fuissent ex nobis, mansissent utique nobiscum.* Ergo in justis non salvandis, ex hoc quod non sunt à malsâ perditionis per prædestinationem discreti, profuit divinz gratiæ ad perseverandum in oratione & in justitiâ necessariæ negatio, ac proinde ad peccatum originale, etsi per baptismum remissum, velut ad causam primam illorum derelictionis à Deo, recurrendum est. Causa enim ob quam aliqui justè non discernuntur, seu non liberantur, est quia omnes

per peccatum originale nascuntur damnationi obnoxii, in cujus malsâ & corruptione Deus quem vult, justè & sine injuriâ derelinquit, ut post S. Augustinum S. Thomas docet in c. 9. ad Rom. lect. 3.

Denique quia in renatis ac justificatis nullum est peccatum, nec actuale mortale, nec originale in ratione veri & proprii peccati, idcò non est ulla causa cur damnarentur, si in eo statu morerentur. Nam, ut ait Apostolus Rom. 8. *Nihil nunc damnationis est iis qui sunt in Christo Jesu, qui non secundum carnem ambulant.* Ac, ut Tridentinum definit Sess. 5. c. 5. *in renatis nihil odit Deus*, quod scilicet, ut exponit idem Concilium, veram & propriam rationem peccati habeat, cum totum id per baptismum tollatur, quod damnatione dignum sit, & quod eos remoretur ab ingressu regni cœlestis. Nec etiam in illis concupiscentia carnis veram peccati rationem ullo modo habet, nec iis nocere valet, quandiu illi propriâ actione non consentiunt, sed viriliter per Christi Jesu gratiam repugnant. Hic germanus Apostoli sensus est, hic Tridentini, hic S. Augustini, hic S. Thomæ. Hæc est doctrina Calvinianæ hæresi per Tridentinum damnatæ opposita. Sed est causa cur baptizati ac justificati, ad gloriam non electi, sibi ipsis in peccatum de se tendentibus à Deo cum vult, justè relinquantur, scilicet peccatum originale etsi remissum, & non discretio à

massâ perditionis. Cum etiam aliqui iusti ab hac massa discreti & ad vitam æternam electi sibi aliquando à Deo deserantur, & cadere permittantur, licet hoc mirabili Dei misericordiâ ad eorum humiliationem & correptionem ordinetur, ut S. Augustinus docet De peccat. meritis l. 2. & S. Thomas 1. 2. q. 79. art. 4. causa etiam esse debet cur Deus aliquo tempore suam illis ad standum in iusticiâ gratiam denegat, hoc scilicet in peccati etiam originalis pœnam iusto Dei iudicio fit. *Nunc enim*, ut ait S. August. de corrept. & gratiâ cap. 11. *quibus deest tale adjutorium* (sine quo scilicet iusti perseverare non possunt) *jam pœna peccati est*, ex cuius merito corruptio & infectio peccati secundum carnem cum gratiâ iustificante iustè à Deo in eis relinquitur, nec sanatur, ac Deus iustè permittit aliquos iustificatos secundum hanc corruptionem aliquando agere quæ concupiscunt

Alia, juxta S. Thomam, causa reprobationis, defectus gratiæ, & derelictionis à Deo in hoc naturæ corruptæ statu, semper ex hominis merito repentem, doctrina teneri non potest: ac si alia teneatur, vel negatio gratiæ efficacis in iustis ad meram Dei voluntatem, sicut ad

primam causam, nulla causâ ex parte hominis suppositâ, referenda erit, quod durissimum est, & à S. Thomâ, sicut à S. Augustino alienissimum; vel rejicienda erit gratiæ per se efficacis necessitas ad singulos pios actus, saltem in iustis, quod à S. Thomæ, sicut à S. Augustini doctrinâ, non minùs abhorret, & gratiæ quâ Christiani sumus mysterium penitus evacuat.

Quisquis ergo ne hanc doctrinam profiteri compellatur, docet saltem iustos omnes semper gratiâ sufficiente, saltem ad vigilandum & orandum, libero eorum arbitrio relictâ adjuvari, cuius usu sine ope auxilii per se efficacis, gratiam in tentatione necessariam pro nutu suo consequuntur, sicut illius abusu eadem gratiâ iustè privantur; quisquis, inquam, hoc docet, & qui insuper, quod audent nonnulli, id ad fidem pertinere contendit, velut ab Innocentio X. definitum, is totam S. Thomæ de gratiâ Christi, de prædestinatione gratuitâ, ac de reprobatione, sicut S. Augustini ac Patrum omnium qui secuti sunt, doctrinam funditus evertit, eamque velut impiam, hæreticam, ac blasphemam à sancta Sede damnatam esse, damnanda temeritate pronuntiat.

ARTICULUS VI.

*Postrema duo argumenta quibus item concluditur, lapsum iustorum ad corruptionem naturæ & damnationem originalem ex S. Thomæ doctrinâ meritò referri.*

*Omnimoda S. Thomæ cum S. Augustino in hoc capite concordia.*

VII. ARGUMENTUM.

**S**ANCTUS THOMAS illud ipsum quod præcedenti argumento ex ejus circa reprobationem doctrinâ collegimus, expressè etiam asserit & exponit quæst. disp. de malo q. 3. de causa peccati art. 1. in quo quærit, *Utrum Deus sit causa peccati*: tale est argumentum 9. Præterea Augustinus dicit 2. Confess. Gratia tua deputo quæcumque mala non feci: non esset autem imputandum gratiæ quòd homo mala non faceret, si carens gratiâ posset non peccare: non ergo peccatum est causa quòd aliquis privetur gratiâ: sed magis privatio gratiæ est causa peccandi, & sic sequitur ut prius, quòd Deus sit causa peccandi. Sic responderet.

Ad 9. dicendum, quòd aliter loquendum est de homine secundum statum naturæ condita, & aliter secundum naturæ corruptæ: quia secundum statum naturæ condita homo nihil habebat impellens ad malum, licet bonum naturæ non sufficeret ad gloriæ consecutionem; & idè indigebat auxilio gratiæ ad merendum, non autem indigebat ad peccata vitandum: quia per hoc quòd naturaliter acceperat, poterat stare. Sed in statu naturæ corruptæ habet im-

pellens ad malum, & idè indiget auxilio gratiæ ne cadat: & secundum hunc statum Augustinus divini gratiæ deputat quæcumque mala non fecit. Sed hic status ex præcedenti culpâ provenit, scilicet originali.

Juxta doctrinam hinc à S. Thomâ positam, idè in statu naturæ corruptæ homo indiget auxilio gratiæ ne cadat, quia habet impellens ad malum, & hoc impellens ad malum est irascibilis & concupiscibilis, ut ibid. ad 5. docet. Nisi ergo Deus per auxilium gratiæ suæ prohibeat quòd impellit ad malum, quasi dans manum, homo cadit; & quoties cadit, cadit ex impellente ad malum. Quia, inquit ad 5. peccata proveniunt ex inclinatione irascibilis aut concupiscibilis. Item quoties cadit, Deus non impedit, non dat manum, auxilium non præstat ne cadat: atque id non solum de peccatoribus, sed etiam de justis verum est. Cum enim corruptio naturæ, quæ est ex peccato in eis, per gratiam habitualement non tollatur, remanet in eis impellens ad peccatum; unde semper egent auxilio gratiæ ne cadant. Et hoc expressè docet S. Thomas 1. 2. q. 109. art. 9.



*Homo*, inquit, in gratia existens indiget auxilio gratiæ secundum alium modum, ut scilicet à Deo moveatur ad rectè agendum, & hoc propter duo; primò quidem ratione generali, &c. secundò ratione speciali, propter conditionem status humane nature, quæ quidem licet per gratiam sanetur quantum ad mentem, remanet tamen in eà corruptio & infectio quantum ad carnem, per quam servit legi peccati, ut dicitur ad Rom. 7. Remanet etiam quedam ignorantia obscuritas in intellectu, &c. & idèò necesse est nobis ut à Deo dirigamur & protegamur, qui omnia novit, & omnia potest, & propter hoc etiam venatis in filios Dei per gratiam convenit dicere: *Et ne nos inducas in tentationem*. Itaque quoties aliquis iustus cadit, cadit ex impellente ad malum, ex irascibili scilicet aut concupiscibili ad peccatum inclinantibus, quæ in eo cum gratiâ justificante remanent; & tunc Deus non prohibet impellens, non dat manum, non adjuvat, non præstat illi iusto auxilium ne cadat, Sed quare Deus non adjuvat ne cadat, cur aut non tollit penitus, aut saltem per auxilium suum non prohibet id quod iustum impellit ad malum? *Hoc enim*, inquit ibid. ad 1. ex iusto iudicio facit, quod aliquibus auxilium non præstat, ne cadant; & cur etiam Deus, iustum ex concupiscibili vel irascibili peccantem non adjuvans, seu cur non prohibens ne peccet, cum id possit, non dicitur causa peccati? *Quia*, inquit S. Thomas,

hic status ex præcedenti culpâ provenit; & ut dicit l. 3. contra gentiles c. 159. *Quia hic defectus ex culpâ præcedente in eis relinquitur*. Et ibid. ad 1. *Peccata*, inquit, non proveniunt ex inclinatione irascibilis aut concupiscibilis, secundum quod sunt à Deo institute, sed secundum quod deficiunt ab ordine institutionis ipsius. Sic enim sunt institute in homine, quod rationi subjaceant: unde quando præter ordinem rationis ad peccatum inclinant, hoc non est à Deo. Atque ita S. Thomas in originale peccatum tandem refert, & quòd sit in homine appetitus in peccatum inclinans, & quòd homo huic suo appetitui ac vitio ex quo peccata proveniunt, à Deo auxilium gratiæ non præstante aliquando relinquitur.

#### VIII. ARGUMENTUM.

**P**ER peccatum originale contractum est debitum carenti omni gratiâ ad salutem, & hoc debitum à Deo, indebitam misericordiam præstante, non remittitur nisi per Christum; quia, juxta S. Thomam, hominibus post lapsum nulla gratia gratis à Deo, nisi ex Christi merito, confertur: ergo ex peccato originali remanet debitum carenti iis gratiis quas Christus per mortem suam efficienter non meruit & non contulit. Atqui Christus iis iustis qui sunt reprobi non meruit efficienter, nec contulit gratiam perseverandi in iustitiâ usque in finem; siquidem hæc gra-

tia iis non confertur, & ut docet S. Thomas quæst. disp. de veritate q. 29. art. 7. ad 4. meritum Christi frustrari non potest quantum ad efficaciam seu efficientiam: ergo in iis iustis remanet ex peccato originali debitum carenti hoc perseverandi dono: proindeque juxta S. Thomam causa ob quam hæc gratia perseverandi quibusdam iustis iustè à Deo negatur, ad peccatum originale referenda est.

Et hæc certè explicatio reprobationis & denegationis auxiliorum actualium, pietati divinæ multò conformior est, & longè suavior, quàm illa quæ reprobationem hominum, & denegationem gratiarum actualium, quibus aliqui iusti aliquando carent, soli voluntati divinæ adscribit, nullà causâ ex parte hominis supposita. In hoc verò hujus sententiæ assertores nobiscum conveniunt, quòd denegationem gratiæ actualis efficacis in iustis ad primum peccatum, quod admittunt vitandum, non alicui peccato actuali, sed Dei voluntati adscribant, ita & nos. Illi verò aiunt, hanc Dei voluntatem nullam penitus causam ex parte hominum supponere, nos aliquam in S. Thomæ sicut & S. Augustini doctrina supponere contendimus; id Deum in peccati originalis poenam velle asserimus: atque ita eandem utrique causam agnoscimus, voluntatem Dei: nos aliquod ejus in hominibus motivum statuimus, hi nullum. Ergo si hi Theologi credunt me-

ram Dei voluntatem istius carentiæ gratiæ in iustis causam esse posse sine ulla iniquitate, reprehendere non possunt, quòd causa dicatur, cum aliquo motivo illi adjuncto. Quòd enim Deus sola ac mera sua voluntate iustè ac piè facere creditur, potiori jure id sua voluntate aliquod motivum ex parte hominum supponente, iustissimè, piissimèque facere credendus est.

HIS OMNIBUS argumentis ex S. Thomæ doctrina petitis evidens est, eo sensu defectum gratiæ in hominem semper esse referendum, nec Deo tribuendum, nisi ex suppositione ejus quod est ex parte hominis; quia semper est causa in homine, cur à Deo non adjuvetur, ac sibi ex inclinatione irascibilis & concupiscibilis ad peccatum propendenti relinquatur, scilicet meritum præcedentis peccati, vel actualis, vel saltem originalis.

Et in hoc S. Thomas, sicut & in cæteris Christi gratiæ capitibus cum S. Augustino, cujus semper auctoritate nixitur, plenissimè concordat. Similiter enim, juxta S. Augustinum de correct. & grat. c. 13. *Deserunt & deseruntur. Dimissi enim sunt libero arbitrio, non accepto perseverantia dono, judicio Dei iusto & occulto: sed quodnam est istud judicium occultum? Ipsemet jam exposuerat cap. 11. his verbis: Si autem hoc adiutorium (sine quo bonum perseveranter tenere non possumus) vel Angelo, vel primo homini, cum primum facti sunt,*  
de

desuisset, non utique suâ culpâ cecidissent; adjutorium quippe desuisset sine quo manere non possent: nunc autem quibus deest tale adjutorium, jam pœna peccati est; quibus autem datur, secundum gratiam datur, non secundum debitum. Atque ut cætera hujus generis aliis in libris fusè exposita prætermittam l. 2. de peccat. merit. & remiss. c. 17. ita eam quam mox ex S. Thomâ referebamus doctrinam omnem exhibet. Ignorantia & infirmitas vitia sunt, quæ impediunt voluntatem, ne moveatur ad faciendum opus bonum, vel ab opere malo abstinendum: ut autem innotescat quod latebat, & suare fiat quod non delectabat, gratiæ Dei est, quæ hominum adjuvat voluntates, quæ ut non adjuvantur in ipsis causa est, non in Deo, sive damnandi prædestinati sint propter iniquitatem superbia, sive contra ipsam suam superbiam judicandi & erudiendi, si filii sint misericordiæ. Nullius proinde culpæ humane in Deum referas causam, vitiorum namque omnium humanorum causa superbia est. Et infra: Scitum est autem ex debitâ justâ pœnâ tale vitium, ut jam molestum esset obedire justitiæ, quod vitium (scilicet superbia) nisi adjuvante gratiâ superetur, ad justitiam nemo convertitur (quod ad peccatores spectat) nisi operante gratiâ sanetur, justitiæ pace nemo perfruitur. (quod ad justos pertinet) Cujus autem gratiâ vincitur, & sanatur, nisi illius cui dicitur: Convertite nos Deus sanitatum nostrarum? Quod & si facit, misericordiâ facit, quibus autem non facit, iudicio non facit.

Pariter etiam S. Augustinus docet causam reprobationis esse peccatum originale, per quod quædam perditionis massa facta est, à quâ non liberantur nisi electi, & in quâ relinquuntur illi iusti qui non sunt ad vitam æternam prædestinati, licet in illis per baptismum totus peccati originalis reatus remissus fuerit. *Qui vero perseveraturi non sunt* (inquit de corrept. & grat. c. 7.) *ac sic à fide & Christiana conversatione lapsuri sunt, ut tales eos finis hujus vite inveniat, procul dubio non illo tempore quo benè piæque vivunt, in isto numero computandi sunt, à massa illa perditionis præscientiâ Dei & prædestinatione discreti, & idè nec secundum propositum vocati.* Et similiter eodem capite docet iis qui ab hac perditionis massâ discreti sunt, Dei beneficia quibus ad vitam æternam certissimè perveniant, sine dubio à Deo procurari & conferri. Quicumque ergo, inquit, ab illa originali damnatione, istâ divinæ gratiæ largitate discreti sunt, non est dubium quod & procuratur eis audiendum Evangelium, & cum audiunt credunt, & in fide quæ per dilectionem operatur, usque in finem perseverant; & si quando exorbitant, correpti emendantur, & quidam eorum etsi ab hominibus non corripiantur, in viam quam reliquerant redeunt, & nonnulli acceptâ gratiâ in qualibet etate periculis hujus vite, mortis celoritute subtrahuntur. Hæc enim omnia operatur in eis, qui vasa misericordiæ operatus est eos. Rectè ergo S. Thomas: Ratio autem repro-

bationis,

*lationis, inquit, est in hominibus peccatum originale, ut dicit Augustinus.*

In libro verò De dono perseverantiæ cap. 8. quia in duobus iustis, quorum uni perseverantia non datur, peccatum originale similiter remissum est, quia in illis eadem sunt merita, eadem iustitia, quia utrique Deo accepti, Dei filii & vitæ æternæ digni; ideo cùm S. Augustinus circa cæteros seu parvulos, seu impios ætate jam grandes, judicia Dei inscrutabilia esse doceat, circa illos duos iustos inscrutabiliora esse pronuntiat, atque huius iudicii æquitatem ad solam discretionem à massâ refert. *Ex duobus itaque parvulis, inquit, originali peccato pariter adstrictis, cur iste assumatur, ille relinquatur; & ex duobus ætate jam grandibus impiis, cur iste ita vocetur ut vocantem sequatur, ille autem aut non vocetur, aut non ita vocetur, ut vocantem sequatur, inscrutabilia sunt judicia Dei. Ex duobus autem piis cur huic donetur perseverantia usque in finem, illi autem non donetur, inscrutabiliora sunt judicia Dei. Unde ait S. Prosper ad 14. object. Vincentianam, Cur autem illum retineat, illum non retineat, nec possibile est comprehendere, nec licitum vestigare, cùm scire sufficiat, & ab illo esse quod statur, & non ab illo esse quod ruitur. Sed quodnam est istud Dei iudicium, & unde iustum? Respondet S. Thomas, ut argumento sexto retulimus: Quia hoc venit ex damnatione humani generis pro peccato primi parentis. Respondet S. Augustinus, quod omnino idem*

est, quia hic iustus non erat à massâ per primi parentis peccatum factâ discretus; hinc fluxit quod hic iustus non accepto perseverantiæ dono, libero suo arbitrio à Deo dimissus fuerit. Subdit enim S. Augustinus: *Illud tamen fidelissimum debet esse certissimum, hunc esse ex predestinatus, illum non esse. Nam si fuissent ex nobis, ait unus predestinatorum qui de populo Domini biberat hoc secretum, mansissent utrique nobiscum. Nonne utrique à Deo creati, utrique ex Adam nati, utrique de terra facti erant, & ab eo qui dixit: Omnes statum ego feci, unius ejusdemque nature animas acceperant? Nonne postremò utrique vocati fuerant, & vocantem secuti, utrique ex impiis iustificati, & per lavacrum regenerationis utrique renovati? Sed si hæc audiret ille qui sciebat procul dubio quod dicebat, respondere posset & dicere: Vera sunt hæc, secundum hæc omnia ex nobis erant; verum tamen secundum aliam quamdam discretionem non erant ex nobis: Nam si fuissent ex nobis, mansissent utique nobiscum. Quenam tandem est illa discretio? Patent libri Dei, non avertamus aspectum. Clamat Scriptura divina, adhibeamus auditum: Non erant ex eis, quia non erant secundum propositum vocati, non erant in Christo electi ante constitutionem mundi, non erant in eo sortem consecuti, non erant predestinati secundum propositum ejus qui universa operatur. Nam si hoc essent, ex illis essent, & cum illis sine dubitatione mansissent. Ut enim non diuam quàm sit possibile Deo*

*aversas & adversas in fidem suam hominum convertere voluntates, & in eorum cordibus operari, ut nullis adversitatibus cedant, nec ab ipso aliqua superati tentatione discedant, cum possit, & quod ait Apostolus, facere, ut non eos permittat tentari supra id quod possunt. Et paulò antè: Adhuc pergat & dicat, cur quilibet qui eum coluerunt bonâ fide, perseverare usque in finem non dedit? Cur putas, nisi quia non mentitur qui dicit, Ex nobis exierunt, sed non erant ex nobis: nam si fuissent ex nobis, mansissent utique nobiscum. Hominibus autem videtur, omnes qui boni apparent fideles perseverantiam usque in finem accipere debuisse; Deus autem melius esse judicavit miscere quosdam non perseveraturos certo numero sanctorum, ut quibus non expedit in hujus vita tentatione securitas, non possint esse securi. Multos enim à pernicioſa elatione reprimit, quod ait Apostolus: Quapropter qui videtur stare, videat ne cadat, Voluntate autem sua cadit, & voluntate Dei stat qui stat.*

Id verò observatione dignissimum, quòd sicut nunc iis qui hanc S. Augustini & S. Thomæ doctrinam sequuntur, à quibusdam Molinistis objici solet, quòd credant per baptismi gratiam, peccatum originale ab iis qui non sunt prædestinati ad vitam, non auferri; sic S. Augustinus ejusque discipuli post illius obitum eadem calumniâ à quibusdam Presbyteris Massiliensibus infamati fuerint. Cum enim in hujus sancti libris De corrept. & gratia,

& De prædestinatione sanctorum ac De dono perseverantiæ, doctrinam à nobis antea relatam legerent, eos scilicet qui baptisati erant, nec in acceptâ gratiâ perseverabant, ab originali damnatione, seu à perditionis massâ, per peccatum originale factâ, non fuisse discretos, nec in discretorum numero, etiam eo tempore quo benè pièque vivunt, computandos esse, & quibus non datur perseverandi auxilium, jam peccati, originalis scilicet, pœnam esse; hinc S. Augustini scripta reprehenderunt, quasi doceret, ut aiunt object. 2. apud S. Prosperum in responsionibus ad capitula Gallorum, quòd ab eis qui non sunt prædestinati ad vitam, non auferat, perceptâ baptismi gratiâ, originale peccatum, quod sanè non nisi ineptissimè, stolidissimè, insanissimèque oppositum esset, si aliud nihil hac de re S. Augustinus, ejusque discipuli docuissent, quàm quod Molina, ejusque sectatores ab annis aliquot docere cœperunt. Huic verò objectioni S. Prosper sic respondet.

*Omnis homo, qui credens in Patrem & Filium & Spiritum sanctum, regeneratur in baptismo, tam à propriis peccatis, que mala voluntate & actione contraxit; quàm ab originali, quod à parentibus traxit, absolvitur: sed relapsus post baptismum ad infidelitatem & impios mores, qui negat originali peccato fuisse purgatum, tam falsa opinatur, quàm qui eundem asserit, non æterna morte esse damnandum. Qui enim recedit à Christo, & alie-*

pus

nus à gratia finit hanc vitam, quid nisi in perditionem cadit? Sed non in quod remissum est, recidit; nec in originali peccato damnabitur, qui tamen propter postrema crimina ea morte afficietur, quæ ei propter illa quæ remissa sunt debetur. Quod quia Dei præsentiam nec latuit, nec fefellit, sine dubio talem nunquam elegit, nunquam prædestinavit, & perituum nunquam ab æter-

na perditione discrevit.

Ex quo patet non esse novam hanc in S. Augustini discipulos circa peccatum originale reprehensionem, ac Molinistas sincerissimis Dei gratia defensoribus hoc tempore, sicut olim Massilienses, obloqui, & pacem victricis Ecclesiæ, resumptis de damnatorum schola questionibus, inquietare S. Prosper cont. Collat. c. 29.

## ARTICULUS VII.

*In quo ostenditur Conradum Koëllin à P. Nicolai laudatum, eodem modo S. Thomam interpretatum esse circa causam defectus gratiæ.*

**Q**uanquam hic puram S. Thomæ doctrinam ex puris ejus operum fontibus, non verò ex illius interpretum sensu exquiramus: quia tamen P. Nicolai nobis Conradum Koëllin, velut à doctrinâ quam sequimur alienissimum objicit, nec repudiare potest ejus testimonium, cujus auctoritate sic se jactavit, hunc eodem omnino sensu quoniam S. Thomam exponentem, & auxilii divini subtractione in originali saltem peccati meritum referentem audiamus in 1. 2. q. 79. art. 1. in quo quaeritur, Utrum Deus sit causa peccati, in hæc S. Thomæ verba, à nobis antea citata, similiter etiam neque indirec- (Deus potest esse causa peccati) contingit enim quod Deus aliquibus non præbet auxilium ad evitandum peccata, &c. Sic loquitur.

Probat (nempe S. Thomas) secundam partem antecedentis, scilicet

quod non indirec- dicitur autem indirec- causa, sicut dicitur indirec- voluntarium, quod videlicet quis potest prohibere, vel impedire, & non impedit, ut patuit supra. Et arguitur sic. Ille est causa indirec- peccati, qui potest impedire & debet: si autem possit impedire, non autem debeat, nec tenetur, non est causa etiam indirec-, & præsertim si ipse non sit prima ratio deficiendi, vel non subtrahit auxilium suum, nisi ex demerito peccati præcedentis. Sed Deus non debet; esto, possit: nec tamen subtrahit nisi propter demeritum peccati præcedentis. Major patet exemplariter de gubernatore, qui non dicitur causa submersionis navis, etiam indirec-, scilicet ex hoc quod non gubernat navem, nisi quando subtrahit gubernationem, potens & debens gubernare. Minor patet, & quod possit clarum est; sed quod non debeat, patet, quia ordo suæ sapientiæ non requirit quod præbeat auxilium & impediantur peccata, ut arbitrium liberum

liberum creatum, quod ex natura suâ deficere potest, suaviter disponatur: & quod subtrahat auxilium suum propter demeritum peccati præcedentis, saltem originalis, patet ad primum & 1. p. q. 23. art. 7. ad 3. Quæ autem sit ratio, quod divina sapientia & iustitia voluerit aliquos dimittere peccare, & non impedire, habes rationem, ubi jam in 1. p. art. 5. ad 3. rationem videlicet in generali & non præcisam, ut ibidem patebit, ut manifestetur divina bonitas per misericordiam & iustitiam, & suavis dispositio rationalium creaturarum.

Nota ex dictis ante articulum, ex quibus habetur, quod Deus non est causa deficiendi prima: & ergo non imputatur sibi peccatum alterius. Si enim non fuisset peccatum, præsertim originale, Deus nullum hominem deseruisset.

Nota circa 2. partem antecedentis & ejus probationem, quod Deus non est debitor alicui creatura, nec tenetur hominem conservare ne peccet, maxime postquam se peccando fecerit indignum, debet autem velle quod impleat in rebus id quod sua sapientia & voluntas habet: quia ergo ordo sue sapientia non habet, quod hominibus auxilium ferat omnibus, ne peccent: ideo Doctor sanctus dicit hic, quod hoc totum, scilicet non præbere auxilium, ne peccet, facit secundum ordinem sue sapientia quem debet implere. Deus enim non est debitor creatura, sed sibi ipsi; quare non debet, nec tenetur hominem à peccato conservare, & præsertim cum conditio naturalis creatura exigit, ne à peccato cohi-

beat: & per consequens non imputatur sibi. Vide de hoc 1. p. q. 21. art. 1. ad 3. quomodo Deus nihil debeat creaturis, sed sibi.

In his Conradi verbis animadvertendum est obiter, Deum non debere sibi ac suæ sapientiæ, quod hominibus auxilium ferat omnibus, & quod hominem à peccato conservet, maxime postquam peccando se fecerit indignum, peccato scilicet originali vel actuali, ut antea docet, ut hinc pateat quàm falsò P. Nicolai 1. classe dixerit, Deum etsi non debet nobis quod ab illo juramur, debere sibi nihilominus quod nos jurat. Id juxta S. Thomam, ut Conradus hic rectè notat, nec sibi nec nobis debet, nec tamen sponte deficit: quia nunquam nobis auxilium necessarium denegat, nisi propter demeritum peccati præcedentis, saltem originalis.

Deinde idem interpretes in illud: Et sic patet quod Deus nullomodo potest esse causa peccati, hæc habet.

Voluntas humana potest & tenetur relictudinem dare alicui, & tamen non dat: divina autem licet non teneatur dare, eam tamen, quantum ex se esset, daret, si voluntas creata cooperaretur. Quidquid enim Deus dat antecedenter, dat etiam consequenter, quantum est ex parte sui, nisi adsit impedimentum: causando autem voluntatem creatam, dedit antecedenter in sui principio opera bona & recta, quæ sunt in hominis potestate; quare & quantum ex parte sui est, dat relictudinem omni alicui voluntatis, & voluntati ex



consequenti daret. Est igitur defectus in effectu illarum duarum causarum, non propter defectum cuius prima ratio sit Deus, sed cuius ratio & causa est voluntas creata; non quia Deus causat reſtitutionem, & voluntas obliquitatem; sed quia Deus, quantum de se est, causaret, si voluntas suam causalitatem causaret. Et ergo quod non adsit reſtitutio, est quia voluntas non causat, quantum ad se pertinet: ante autem primum peccatum non est quare Deus subtraheret reſtitutionem actualem ipsius actus. Quare ex parte sui non oportet quod illa reſtitutio non insit.

Denique in hæc verba: *In malum autem inclinat, in quantum non prohibet, sicut dictum est, & tamen hoc etiam contingit ex merito præcedentis peccati*, hæc habet. Sed ad malum dicitur inclinare, improprie loquendo de peccato & malo formaliter, quia videlicet ipsam inordinationem non prohibet: sed hoc non tenetur, nec est prima ratio deficiendi, sed illud provenit, scilicet non prohibere, propter demeritum peccati præcedentis, saltem originalis, ut dictum fuit.

Itaque juxta hunc interpretem celeberrimum, à P. Nicolai multum ac merito laudatum, quoties Deus non juvat, & non dat auxilium suum homini ne peccet, & cum à peccato non conservat, id semper contingit ex merito præcedentis peccati. Certum autem est quod Deus justum, cum peccat, non servat à peccato, & non prohibet ne peccet: ergo si sit primum justum peccatum, qua-

lecumque sit, dici non potest, quod Deus permittit eum cadere in hoc peccatum, ei auxilium suæ gratiæ non præstando ob meritum peccati actualis præcedentis, quia nullum esse supponitur: ergo ex merito peccati originalis, quanquam jam remissi. Hæc vera est S. Thomæ doctrinæ expositio.

### CONCLUSIO.

EX his intelligitur, cujusmodi esse debuerit Joannis Nicolai & aliorum Examinatorum de Augustinianâ Antonii Arnaldi Doctoris & Socii Sorbonici propositione sententia, si perspecto ejus sensu S. Thomæ doctrinam melius calluissent, expendissentque diligentius; cum, ut ait Joannes Nicolai parte 2. n. 1. *Anticipatâ ferè conclusionem decretum sit, hoc ratum ac fixum fore, quod S. Thomas esse, quod ab eo traditum, quod ei non adversum ac inimicum plenâ fide constaret.*

Plenissimâ verò fide jam constat, sancto Thomæ adversum ac inimicum esse, quidquid P. Nicolai suo in Suffragio asseruit; conforme verò & consentiens, quidquid Antonius Arnaldus de Augustinianâ propositione ad examen vocatâ, & de gratiâ sufficiente scripsit ac docuit. Sed, egregie Cenſor, quomodo in Arnaldi causæ examine ac judicio plenâ fide constare poterat quid S. Thomæ esset, quid ab eo traditum, cum illud nec tibi, nec cæteris Inquisitoribus perspectum fuerit, ut

tuo Suffragio comprobasti? Nec in Sorbonæ Comitibus per semihoræ angustias ad sententiam dicendam, contra morem & æquitatem omnem, Inquisitorum arte ac potestate constitutas, expendi potuerit? Aded ut tu ipse cui, ut loqueris (a) à cæteris Examinatoribus, quasi propriè ex industriâ reservatum erat de S. Thomæ doctrinâ dicere, illam, dum Suffragium pronuntiares, ne attingere quidem potueris: & Doctores multo numero in eâ maximè versati, cum tam exiguo tempore sententiam suam de tam gravi fidei causâ dicere ac stabilire non possent, à Facultatis Comitibus recedere coacti sint. Talem tu scilicet, talem vos Examinatores cæteri, ad illius tam iusti de S. Thomæ doctrinâ inquirendâ & sequendâ consilii perficiendum institutum, sinceritatem attulisti. (b)

Cum ergo Augustinianam Arnaldi propositionem tam horrendâ hæreseos, impietatis, & blasphemiz labe inuris, vel Arnaldi sententiam nullo modo attingis,

calumniosusque es; vel sanctissimam & maximè catholicam S. Thomæ doctrinam hæreseos, impietatis, & blasphemiz damnas, prævaricatorque es. Eò autem gravius peccasti, quòd pluribus Censoribus autor fueris, ut cum re totum in Angelici Doctoris disciplinâ innutritum crederent, simularâ, quam publicè professus es, erga sanctum Doctorem reverentiâ, & falsâ tuæ in hoc argumento eruditionis opinione delusi, eandem injuriam eidem S. Thomæ doctrinæ intulerint, si tamen ipsam Arnaldi sententiam damnaverunt. Utinam autor sis infelici exemplo tuo, ut salubriter respiscant, ac fervore defervescente, depositoque partium studio, agnoscant tandem purissimam S. Thomæ doctrinam Augustinianâ Arnaldi propositione contineri; & ab iis Doctoribus numero septuaginta & amplius defendi, qui eandem propositionem, vel suo iudicio, vel suâ à Comitibus discessione approbarunt.

(a) Ibi loquendi finem horâ urgente feci, ubi omnium præcipuus ad loquendum se finis offerebat, quasi propriè mihi ex industriâ reservatus, & irritum ac noleus prætermisi quod potissimum expectabatur, ut dicerem, quia specialius me spectabat. Præmonit. pag. 3.

(b) Suffragiæ part. 2. n. 2.

# ANTONII ARNALDI

## DOCTORIS SORBONICI EPISTOLA,

Ad Illustrissimum & Reverendissimum HENRICUM ARNALDUM Andegavensium Episcopum, Fratrem suum.

*Quâ accusationem è judicio Sorbonico petitam depellit, & fidem suam circa quinque Propositiones exponit, in gratiam Romani cujusdam Theologi.*

*Reverendissimo & Illustrissimo Andegavensium Episcopo  
HENRICO ARNALDO, ANTONIUS ARNALDUS.*

**I**Terato jussus imperio ea ad te scribere, quibus optimi Viri, sed de me iniquiùs sentientis, suspiciones dilui possent, pareo tantem, ILLUSTRISSIMIS ANTISTES, nec ultrâ mihi Autoritati tue refragari licere existimo. Quod verò tardius paruerim, nec penitus excuso, nec tu, credo, si causæ meæ rationem attendas, penitus accusabis. Ego, Præsul Illustrissime, ejusmodi purgationes apud peregrinos & externos toties jam infrugiferas expertus sum, ut planè veniâ sim dignus, si ad ista remedia cunctatius accedam, quæ tam parum spei & utilitatis ostendant. Habet hoc humanum genus, ut suspicionum suarum plus æquo amans sit. Sed his si adjunctæ fuerint circumfusæ multitudinis voces, sunt ex suspicionibus rata jam fixæque judicia, quibus qui obluetur, contumax potius habeatur, quàm justus innocentiae suæ defensor. Hinc vidēs

quàm difficile sit, homini Romæ degenti, adversariorum meorum sermonibus jam occupato; inter illorum calumnias assiduè versanti, quicquid adversum me finistræ opinionis impressum sit, brevi Epistolâ revellere.

Quamobrem mihi tantam hanc defendendæ adversus tam potentes tamque numerosos inimicos innocentiae difficultatem cogitanti, sæpè melius visum omnia divinæ providentiæ permittere, & ad illud potiùs judicium me parare, in quo nil gratia, nil potentia, nil numerus, nil præjudicia, nil calumniæ valituræ sunt, ubi nec justitia cadere, nec vincere possit iniquitas. Quem in sensum eo procliviùs adducor, quod per viginti jam annos tam multis adversariorum meorum iniquitatibus exercitus, & sub calumniarum mole penè oppressus, plus tamen ex illorum injuriâ fructus cepisse mihi videor, quàm ex ullis

hominum favore ac benignitate capere potuissem. Itaque nulla me fortis meæ habet impatientia, nulla fortunæ, in quâ hoc etiam inest commodi, quod satis adversus inimicorum meorum potentiam tuta est. Homini enim nihil aliud nisi latere volenti, quis eripere latebras potest?

Sed quamvis, ut dixi, Præful Illustrissime, ad defendendam apud hominem exterum causam meam meâ parum utilitas stimulat, & exigua spes affulgeat alienæ; Tu tamen & benignius & religiosius sentire mihi visus es, qui illud Officium hoc loco non omitterendum esse putavisti. Bono enim illi & erudito Romano Theologo fortasse injuria fietet, si de eo ex vulgari hominum ingenio judicaretur, quem tu singularis æquitatis esse prædicas. Et præterea cavendum semper est, quod sanctè prudenterque monet S. Gregorius, ne dum præmia laudesque ab hominibus non expectamus, quod virtutis est; mens in sui fiduciam erecta, his à quibus nihil expetit, placere contemnat, eorum judicia despiciat, seque malè liberam per abrupta clarificationis rapiat. Id metuens, Illustrissime Antistes, non tuâ jam autoritate, sed meâ etiam voluntate libens quod præcipere dignaris aggrediar, ut Viro Clarissimo meæ fidei rationem quàm maximâ possim sinceritate reddam: quod quidem eorum quæ mihi obijciuntur inanitatem separatim expendenti facile per se & expeditum.

Duo enim tantum crimini mihi dari video, quorum alterum mihi proprium, alterum commune cum multis, sed utrumque juxta frivolum & injustum. Primum est Judicium illud Sorbonicum, quod duæ ex Epistola quadam mea propositiones damnatæ sunt, altera temeritatis, altera etiam erroris & hæresis. Secundum est fictitium Jansenistæ nomen, quo me & quemvis alium, utcumque sua postulat utilitas, Jesuitæ tradunt. Sed priorem quidem accusationem, è Judicio Sorbonico petitam, pluribus ita scriptis depuli, ut si ea, quæ non difficile apud suorum aliquos inveniet, legere dignetur, nullum ipsi credam de ea re scrupulum fore superstitem. Et certè apud nostros ita fracta est illius Censuræ autoritas, ut quamvis pluribus scriptis exagitata, obtrita, omnibusque modis confissa fuerit, nulli tamen, quod unquam vel fando auditum erat, verbum pro illa proloqui aut mutire ausi sint. Quod autem non ausi sint, causa in aperto est, tam manifesta scilicet illius Judicii iniquitas, ut nullâ ratione dissimulari, nullo verborum furo obtegi possit. Nec hoc à me Vir Clarissimus confidentius quàm verius dictum putet, solitoque litigantium ingenio, quibus suam causam extollere, adversariorum deprimere, moris est. Non alium enim quàm ipsum judicem fero, an huic rationi, quâ præcipuè Censoribus illis ac sæpius insititi, quicquam vel in speciem responderi potuerit. Damnata hæreseos pro-

propositio hæc erat : *Petro iusto gratiam defuisse sine qua nihil poterat* : cuius verba ex Augustino & Chrysostomo syllabarim descripta sunt. Hinc ergo & ante Censuram & post Censuram interrogare non destiti, sensum an verba illius propositionis reprehenderent; nihil enim est medium. Neutrum autem reprehendi posse, ita facile demonstravi. Verba, vel ipsis factentibus, utpotè ex Patribus descripta, extra erimen sunt. Sensus autem huic propositioni, ut sæpius testatus sum, is à me subiectus est : *Petro iusto non affuit gratia efficax agendi, id est, consistendi Christum* (nam de gratia orandi nullus hic sermo) *sine qua nihil poterat, quod vel ad vincendam temptationem attinet, eâ potestate quæ complectatur omnia ad agendum necessaria.* Hic autem sensus ita, vel ipsis adversariis testibus, orthodoxus est, ut nuper etiam præcipuus Censorum CORNETUS, à Viro Clarissimo Domino DESLYONS Doctore Sorbonico, Ecclesiæ Sylvanectensis Decano, interrogatus, An quicquam in illo improbandum videretur, vi veritatis evictus responderit, in postremis meis scriptis, præsertimque in Dissertatione, nihil reprehendendum; sed alium quemdam sensum in mente mea reconditum esse, quem tamen nec ipse, nec ullus alius unquam exprimere ausus est.

Non jam, credo, mirabitur Vir Clarissimus cur Sorbonicæ Censuræ patrociniū nemo suscipere ausus est. Quid enim pro illa quisquam causari potest, quæ

eam propositionem hærescos damnat, cuius verba ex Patribus sumpta, sensum verò ab Autore expositum, reluctantes videlicet ac inviti Censores orthodoxum & catholicum fateri coguntur? Quid enim eâ doctrinâ, quam unam in mente habuisse professus sum, in scholis Catholicis tritius ac vulgatius, Non affuisse Petro iusto gratiam illam victricem & efficacem, sine quâ tentationes numquam superantur, & quæ Patrum verbis dicitur, Gratia sine qua nihil possumus, quia sine ea nihil actu & effectivè benè fit? Etsi alio sensu eidem Petro non defuerit potestas benè agendi, ac vincendæ temptationis in actu primo; per gratiam supernaturalem constituto, quam proximam, completam, sufficientem dici nihil verat, dummodò has ita voces interpreteris, ut gratiæ efficacis necessitas ad agendum actu non negetur. Ergò eum hanc doctrinam ne lacerare quidem possent, silere compulsi sunt, æternumque silebunt. Nam reconditos illos sensus clandestinis susurris jactare facile est; at palàm in scriptorum luce ad Censuræ defensionem obtendere, quàm parùm plausibile sit, vel ipsi sentiunt.

Alterum temeritatis erimen, quod in me iidem Censores conferunt, quia eum Jansenismi accusatione cohæret, hæc repulsa pariter diluetur. Illam verò sic à me amoliri facile est, ut hanc causant apud nullum Ecclesiæ Judicem, qui me modò patienter audire vellet, agere formidarem. Duo-

bis enim tantum capitibus hæc criminatio continetur; quorum aliud fidem attingit, aliud ad meritam facti quæstionem pertinet. Ad fidem attingit illa quæstio, An meritis damnatæ quinque Propositiones? an damnatus in Propositionibus sensus hæreticus sit? Ad factum pertinet, An istæ propositiones damnatæ, iste sensus damnatus in Jansenio sit, nec ne? Quamobrem qui propositiones ipsas hæreticas negaret, & damnata in iis dogmata quocunque nomine defenderet, in fidei utrique materia peccaret, & jure hæreseos reus peragi posset. At qui de facto ab omni Juris quæstione sejuncto vel dubius, vel falsus esset, hunc in ipsa fide cum Summo Pontifice ac tota Ecclesia consentientem hæreseos accusari non posse, planissimum est.

His positis, nescio an ullus tam iniquus arbitri fingi possit, cui non ego fidei meæ integritatem facile probem. Non enim modò proscripserat à Summis Pontificibus propositiones cum ipsis proscribo ac rejicio, sed speciatim quoque testor, ita me cum illorum ac totius Ecclesiæ fide in quinque illis capitibus, ut in cæteris omnibus, consentire, ut quoscunque sensus, quæcumque dogmata in istis propositionibus damnare paratus sim. Nulla enim mihi super illis opinio est, quæ tantillum à Summi Pontificis & communi Ecclesiæ sensu discreper. Imò, quò magis miretur prospiciatque Vir Clarissimus collatæ in me suspicionis iniquitatem, hoc etiam san-

ctè religioſeque confirmo, nihil me super istis propositionibus sentire, quod non in modò omnis S. Thomæ schola, quæ maxima Theologorum Catholicorum pars est, non modò omnes Academiæ, sed omnes omnino adversarii mei, etiam Jesuitæ, licet fortè à placitis suis dissèraneum, tamen orthodoxum, & omnis erroris expertus, non unanimi consensu fateantur.

Atque ut hoc suis ipse oculis Vir Clarissimus teneat ac judicer, visum est brevibus hinc conclusionibus exponere quidquid de quinque Propositionum materia sentio: in quo non vereor ne quisquis aliquid in Theologicis rebus intelligit, quicquam quod reprehendere aut desiderare possit, inveniat. Quod si hæc expositio Scholasticis verbis, præter Patrum & Ecclesiæ morem, concepta sit, dabis credo veniam, Illustrissime Anilites. Ejusmodi enim controverſiæ è Schola natæ, & inter Scholasticos adultæ, apud Scholasticæ Theologiæ assuetos vix satis distinctè & enucleatè explicari sine scholasticis vocibus possunt.

*De prima ergo Propositione ita sentio.*

Omnibus justis volentibus & conantibus mandata Dei sunt possibilia per vim interiorem & supernaturalem in ipsis existentem: nec illis sic volentibus & conantibus deest gratia tum habitualis, tum actualis quæ possibilia siant in actu primo, licet nunquam in actum secundum proditura sint sine actuali auxilio actum illum secundum conferente.

*De secunda Propositione ita sentio.*

Datur in statu naturæ lapsæ aliqua gratia actualis interior quæ propter resistantiam voluntatis liberè agentis caret effectu ad quem ex se potestatem confert, & ad quem ordinatur in eodem subiecto per voluntatem Dei antecedentem. Nulla tamen datur gratia actualis interior, quæ non habeat cum effectu ad quem ordinatur per voluntatem Dei absolutam seu consequentem.

*De tertia Propositione ita sentio.*

Ad merendum & demerendum non sufficit in statu naturæ lapsæ libertas sola à coactione, sed requiritur libertas à necessitate naturali, sive à determinatione absoluta ad unum; proindeque requiritur indifferentia activa ad utrumlibet, non illa quam Molinistæ commenti sunt, sed illa quam D. Thomæ schola defendit.

*De quarta Propositione ita sentio.*

Semi-Pelagiani non idèò hæretici quòd dicerent, voluntatem gratiæ supernaturali internæ resistere, vel obtemperari posse. Quinimò omni gratiæ resisti & obtemperari potest, quamvis illi quæ vocatur sufficiens, cum sola est, semper resistatur, efficaci nunquam.

*De quinta Propositione ita sentio.*

Non est Semi-Pelagianum dicere, Christum pro omnibus omninò mortuum. Asserere verò, pro salute dumtaxat Prædestinatorum Christum sanguinem fudisse, verè hæreticum est, quia licet so-

lis electis efficaci & absolutà voluntate salutem morre suā promereri voluerit, pro quibusdam tamen reprobis sanguinem suum fudit, illisque promeruit gratias, quibus ad salutem æternam pervenire possent.

Habet Vir Clarissimus omnem meum de istis propositionibus sensum, in quo si nihil à vulgarissimis Scholæ placitis abest, colligit indè manifestæ iniquitatis esse meam fidem malignis suspicionibus aspergere. Sed inde illud etiam statuat necesse est, reliquam controversiam, An scilicet quinque propositiones sint in Jansenio, meram facti quæstionem esse, à fide prorsus distinctam & alienam. Qui enim traditam in Summorum Pontificum Constitutionibus fidem sine exceptione amplectuntur; qui quidquid illi damnarunt, damnant; qui nihil de quinque propositionibus sentiunt, quod non modò à Summi Pontificis, sed à Scholarum Catholicarum vulgari doctrina abhorreat, hi certè si in facto Jansenii errare convincuntur, nullo modo in fide errare dici possunt. Quamvis enim quædam facta ad fidem pertineant, quia Verbo divino, & Traditione comprehenduntur, ut Christum natum & mortuum esse, scripta ab Evangelistis Evangelia; id tamen de facto Jansenii dici non potest, quòd Traditione non continetur. Unde qui ejusmodi non revelata divinitus facta inter fidei articulos referret, & propter illa quemquam hæreseos ageret reum, ipsa fidei



fundamenta convelleret, quam Verbo divino, seu scripto, seu non scripto, totam inniti primarium Fidei caput est: *Fides enim ex auditu, auditus autem per Verbum Christi*. Unde omnes omnino quotquot unquam fuere Theologi, nemine prorsus dissentiente, conclaferunt, nulli omnino in terris, ne Concilium Oecumenicum quidem, in factis ejusmodi infallibilitatem adesse.

Quamobrem sui juris Ecclesia conscia, interiorem quidem in fidei dogmatibus assentionem à filiis suis semper postulavit; ac facta vel in illorum prorsus reliquit arbitrio, aut externam tantum obedientiam, quæ silentio continetur, contenta fuit. Theodoretum & Origenis fidem quam multi nunc Theologi impunè vendicant, præsertim eruditiores Jesuitæ. Quam multi Honorium à tot Pontificum, tot Conciliorum Oecumenicorum anathematis defendunt, piùmque putant ad illius fidem purgandam, facti errorem, non intellectum scilicet Honorii sensus, & Summis Pontificibus, & Oecumenicis Conciliis adscribere. Ego quantum religiosior, qui nec Jansenium apertè defendi, nec errorem facti Pontificis Constitutionibus imputavi, denique eis semper eam venerationem præstiti, etiam in facto, quæ nulla major à Catholicis Theologis exigitur. Nihil ergo attinet in illam facti quæstionem ingredi, cum generatim ex ipsa quæstionis natura profiteri satis sit, quod ex animo profiteor, Constitutionibus Sum-

morum Pontificum eam quam par est venerationem semper à me redditum iri.

Post tam claram candidamque purgationem non video quid cuiquam omnino justæ dubitationis possit oboriri. Habetque sanè Vir Clarissimus, cur deposito illo, quo se angere significat, dolore, me cum Summo Pastore & Grege Catholico & sentire & semper sensitse lætetur. Quod si tamen aliquid adhuc ipsi difficultatis residuum est, nunquam defugiam, & Tuâ, Præsul Illustrissime, & ipsius causâ, quacumque potero ratione ipsi satisfacere, & quoscumque proponere dignabitur scrupulos evellere. Sin autem, quod omnino nolum, ita præjudiciis suis tenetur astrictus, ut se ab iis nullâ ratione velit abduci, malitque adversariorum meorum calumniis credere, quam mihi de fide mea testificanti, equidem id molestè & graviter feram propter ipsum, quem pro suo in Ecclesiæ Hierarchiam amore, his suspicionibus, ejus saluti plus quam putet facile periculosis, liberatum optarem: me tamen eâ consolatione sustentabo, quod te monente nihil omiserim, quo possit ad æquiora judicia revocari, ut jam de cætero confidentius possim Bernardi exemplo ab injustis hominum judiciis ad summum illud Christi Tribunal appellare, in quo patentibus conscientiarum arcanis, judicante Veritate, nec erunt fraudibus latebræ, nec erroribus locus, nec conscientiarum periculum.

vj. Calend. Sept. 1659.

EJUS.

# EJUSDEM AD EUNDEM

## EPISTOLA ALTERA.

*Reverendissimo & Illustrissimo Andegavensium Episcopo*

HENRICO ARNALDO ANTONIUS ARNALDUS S. D.

**M**agno mihi solatio fuit, PRÆSUL ILLUSTRIS-  
SIME, quod ex Scriptis ad te à Do-  
mino CREVÆO litteris intellexi, pro-  
baram ipsi fuisse sinceram illam  
fidei meæ expositionem, quam  
ad ipsum mittendam putavisti.  
Nec mediocre indè pondus ac-  
cessit ad eam opinionem quam  
dudum, Te autore, de ipsius  
æquitate conceperam. Non enim  
aliud rectæ incorruptæque men-  
tis certius indicium, quam infi-  
ra sibi adversus quempiam præ-  
judicia deponere, quàm primùm  
idoneis argumentis ejus innocen-  
tia perspecta est. Hoc interest  
inter suspensiones illas, quas æ-  
quissimis nonnunquam animis  
vel incerti rumores vel malevo-  
lorum sermones instillant, & il-  
las offensiones quas exulcerati  
cordis malignitas gignit. Non  
verecor porro, Illustrissime An-  
tistes, ne aliter sentiant illi Theo-  
logi quibuscum se litteras meas  
communicaturum ostendit, cum  
in illis nihil esse certò sciam,  
quod non passim totâ Ecclesiâ  
tanquam orthodoxum, nemine  
reclamante, doceatur. Illud ve-  
rò multò minùs verendum, ne  
quid ipsi Summo Pontifici, si

quâ fortè ad ipsum pervenerint,  
parum probetur, quem latere  
non potest hæc, ut longè anti-  
quissima notissimaque, ita vul-  
gatissima esse Catholicorum pla-  
cita, quæ non modo privati  
Theologi multò plurimi gravissi-  
miq; sed integri etiam Ordine-  
s suo obstricti Sacramento de-  
fendant. Quamobrem quod tuus  
jam olim, nunc etiam suo me-  
rito noster CREVÆUS, amantissi-  
mè suadet, ut Sanctitati Sux  
indices fidei & obsequii mei Lit-  
teras mittam, id ego sic accepi,  
ut nihil mihi per se vel utilius  
vel optabilius judicarem. Quam-  
quam enim Catholico sufficit ad  
Unitatis Sedem charitatis & obe-  
dientiæ vinctis adhærescere, nec  
quicquam ipsi obesse potest apud  
Judicem Deum quicquid ulli de  
ipso sinistræ opinionis impressum  
sit, haud scio tamen an ulli quic-  
quam durius in vita possit acci-  
dere, quàm tantâ premi calum-  
niarum mole, ut etiam commu-  
ni omnium Christianorum Pa-  
renti ipsius fides & religio in du-  
bium venire videatur. Degener  
omnino sit Filius, qui hanc ca-  
lamitatem lentè ferat, mihiq; in  
summo, quem ex illa capio,

dolore illud solatio est, quod mihi semper fuit acerbissima. Sed tamen, quod in exteris malis divinitus immixtis teneri par est, ut non quælibet avidè arripiamus remedia, sed ea demum quæ pietas ac prudentia adhiberi pariantur, idem mihi statui in hac quâ me jactari voluit Deus tempestate servandum, ut ad illam placandam nihil tentarem, quod à modestia vel religione tantillum abhorreret. Itaque quævis vehementer mihi blandiretur Domini Crevæ consilium, cœpit tamen attentius circumspicere, an illud, ut amorî certè ipsius ac fidei, ita nostro quoque officio congrueret: statimque oborti sunt nonnulli scrupuli, quos tibi, Illustrissime Antistes, simpliciter à me exponi boni consulas rogo. Primum veritus sum ut satis humilitati nostræ consentaneum, satis in Summum Christi Vicarium religiosum foret, litteris ipsum compellere sine nova quadam scribendi ratione ac materia, quam mihi nullam subesse sentiebam. Quamvis enim gravis est, semper tamen vetus est nostra calamitas, nec ullo novo vulnere recruduit. Accedebat, quod magis id timerem, quod cum hoc semel jam alio tempore ausus essem, nullum vel ab ipso summo Pontifice, vel à quoquam ipsius jussu responsum ferre promerui. Ex quo mihi vereri subibat, ne nimia libertate ante peccassem.

Sed illas tamen formidines potuissem utcumque superare, &

maximè eâ quam mihi affert Dominus Crevæ fiducia, ni gravior quædam me causa consilii ambiguum faceret, in qua explicanda, Præsul Illustrissime, totum me tibi libenter aperiam.

Ego, cum ab ineunte ætate remotam ferè ab hominum commercio & frequentia vitam egerim, tritas illas in sæculo dissimulandi artes prorsus ignoro, fraude ac mendacio adversus neminem uti possum, omnium minimè adversus Petri Successorem, cui qui mentiar, eum non hominibus, sed Deo mentiri ex Scriptura didici. Itaque Sanctitati Sux aliter quàm Deo loqui, nefas putem. Atque adeò nihil apud Illam asseverare aut loqui ausim, quod non verè & ex animo sentiam; nihil polliceri, quod non integerrimâ fide præstare paratus sim. Quamobrem, quia certus omninò sum, me nihil nec de quinque propositionibus, nec de ullo alio doctrinæ capite quicquam sentire, quod à Romanæ & Universalis Ecclesiæ Fide dissideat, idèò fidem meam Sanctitati Sux quacumque ratione probare, quascumque super ea difficultates expedire, nunquam fugiam. Omninò in fide mea restitanda nihil deprecor, quia nihil timeo. Quamquam vix quicquam plenius aut clarius reor desiderari posse nostrâ illâ expositione, quam ad Dominum Crevæ transmissisti.

Nec minori portò studio & alacritate profitebor, quàm semper ex animo Ecclesiæ Unitari & Apo

Apostolicæ Sedi, Ecclesiasticæ Unjctis centro, addictus fuerim, utinamque in mea adversus illam pietate testando sanguinem omnem meum profunderè contingeret. Denique si id unum à me postuletur, ut postremis Innocentii X. & Alexandri VII. Constitutionibus habeam, quod ejusmodi Constitutionibus à Catholicis Theologis haberi solet, ut earum fidem amplectantur & honorificè illas semper appellent, ut de iis, quas fortè in facti quæstionibus pari possunt, difficultatibus siscent, id quoque libenter spondebo, quia semper in illas sic animo ac voluntate affectus fui. Unum est quod omninò facere non possum, ut quinque illas, meritò proscriptas, mihi-que detestatas propositiones, in Jansenii libro verè reperiri, nominatim profitear, idque mihi esse persuasum, subscriptione meâ contester. Nam cum me quo minùs huic Facti quæstioni minimè assentiar, multæ ac graves difficultates impedian, quo minùs assentiri me profitear; una vel gravissima difficultas impedit, quod nefas omninò existimo profiteri, me credere quod non credam. Neque enim in illorum sensum unquam adduci potui, qui subscriptiones illas, quas pauci quidam è nostratibus Episcopis exigere tentarunt, quasi meras ceremonias spectant, quibus necesse non sit congruere interiorem mentis assensum. Atque adèò hac persuasione imbuti, licet quinque propositiones in

Jansenio exstare non credant, tamen id subscriptione suâ confirmare nihil verentur. Notum est magnam eruditorum partem, à quibus ejusmodi subscriptiones extortæ sunt, hoc animo quod postulabatur præstitisse. Non ignoras, Præsul Illustrissime, res à me tota Galliâ pervulgatas narrari. Ipsi illi iltarum subscriptionum incentores Jesuitæ, quàm sæpè in libellis suis quæsti sunt, neminem subscribendo mutasse sententiam. Mihi verò nunquam probari potuisse fateor novum illud, quo utuntur isti, morum decretum, subscriptionem interioris fidei testem non esse. Semper mihi ita persuasum fuit, nusquam & nuspiam mentiri fas esse: nunquam autem à mendacio potui sejungere ejusmodi subscriptionem, quâ quis sentire se quod non sentiat, profitetur. Jam credo, Illustrissime Antistes, facile perspicis, quid me in illo Domini Crevæi consilio moretur, quid sollicitè, quid dubitationem afferat, ex qua non alius quàm ipse me meliùs ac certius eximat. Nam si pro sua prudentia præsentiat, ea demùm à me postulatum iri, ad quæ cum fide præstanda paratissimum me superius ostendi, hac frerus fiduciâ pudorem meum possem fortasse pervincere, & ad supremum illum Ecclesiasticæ potestatis Apicem causam meam quæstusque deferre. Sin autem prævideat, fore ut illud ipsum à me flagitetur, quod me falsâ conscientiâ facere non possè testatus sum, sa-  
tis

tis intelligis, tacere me, & consultius, & in sanctam Sedem reverentius esse. Nec suadebit unquam, sat scio, Dominus Crevus, ut in eum locum me dimittam, ubi vel negandum sit summo Pontifici, quod à me postularit, vel faciendum quod improbet internum conscientie lumen. Non ignorat ille quanta vis sit conscientie ad obstringendas hominum mentes, nec id modò recte convenire, sed etiam erranti, à qua nefas esse discedere, communis & recta est omnium Theologorum sententia. Itaque, licet in illa Facti questione prorsus erratem, tamen donec tenebras meas novo lumine depulerim, error ille me non secus ac veritas alligaret, nec licet mihi in quamlibet levi questione damnare verbis, quod corde non damnem. Quod si eò me vel timiditas, vel infractio animi, vel propriæ quietis amor adduceret, tunc sanè esset mihi quod jure succenseret summus Pontifex, & illatam sibi injuriam crederet. Ecclesiasticæ enim & humanæ potestatis ut diversa ratio, ita diversa judicia sunt. Externis honoris simulacris, ac fictis professionibus ab interiori affectu discrepantibus nonnunquam humana superbia contenta est, quia propriè tantum gloriæ & amplitudini studet, ad quam hoc quoque pertinere putat, quod homines sui causa mentiri & simulare cogantur. Alius est omninò sensus Dei, id est veritatis, Ministris. Ut honorem sibi à sub-

ditis habitum ad veritatis honorem referunt, ira veritatis honore metiuntur, nec honorificum in se existimare possunt, quod in veritatem contumeliosum sit. Fictas ergò & mendaces professiones aspernentur, respiciantque necesse est, iisque violari se putent, cum Deus ipse violetur. Ita de summi Pontificis animo sentire semper pium duxi, nec dubito quin si satis illum, quem exposui, pernosceret meæ mentis habitum, longè satius duceret innoxio ut multum errori, & qui nec mores, nec fidem attingat, indulgere, quàm me ad prodendam conscientiam meam impellere.

Audiret ille certè ac sequeretur Apostoli voces, quibus divinitus in Epistola ad Romanos præcipit, quâ mansuetudine ferendi, quâ moderatione tractandi, quibus monitis & consiliis hortandi sint, qui tolerabilibus erroribus implicantur. Erant illis temporibus qui novæ Legis & Evangelicæ libertatis spiritum minùs intelligentes prohibitis in lege cibus vesci nefas esse ducebant. Erant etiam alii, qui minorem, quàm par erat, fraternæ infirmitatis rationem habentes, eos aut verbis aut exemplis ad cibos quos pollutos ducerent, edendos impellerent. Errabant certè qui hunc ciborum delectum habebant, & longè gravius errabant, quàm qui in alicujus Scriptoris intelligentia falleretur. Contrà qui hunc delectum aspernabantur, rectè ac verè sentiebant.

tiebant. Ergò illi infirmi errore veritatis; isti fortes cognita veritate. Et tamen infirmorum adversus fortes causam suscipit Paulus. Dicit quidem nihil in Christo commune; sed ei qui existimat esse aliquid commune, ei commune esse declarat; & qui discernit, si manducaret, damnatum esse pronuntiat. Non urget infirmos ut errantem conscientiam corrigant, sed severe præcipit ne adversus errantem conscientiam agant. Postremò fortes illos, imò verè infirmos, qui fratrum errorem ferre non possent, objurgat & comprimit: *Tu quare spernis fratrem tuum?* Usque aded promiscua illa edendi libertate, quam Lex Evangelica concedit, uti nefas, ut fratribus scandalo & offensionis sint. *Omnia quidem sunt munda, sed malum est homini qui per offendiculum manducat. Noli cibo tuo illum perdere pro quo Christus mortuus est.* Hanc normam, hoc exemplar Summo Pontifici semper fuisse propositum, hinc etiam intelligi datur, quòd nec Romæ, nec in Italia tale quicquam factum audimus, quale quibusdam Galliæ locis tentatum est. Nulla ibi subscriptionum mentio, nullus in facti quæstiuncula alienæ conscientie scrutator acerbus. Ipse Sæ, Mæ. Innocentius, apud quem tota hæc causa pertractata est, cum non ignoraret aliquos ex iis qui Romæ erant Doctoribus ab adversariis sæpè eo nomine in crimen vocari, quod benigniùs de Jansenio sentirent, de ejus-

modi subscriptione ab iis exigenda nunquam cogitavit. Alienum enim hoc ab Ecclesiæ utilitate, consuetudine & spiritu noverrat.

Frustrà verò his subscriptionibus speciosum pacis & concordie nomen obrenditur. Amanda, optanda, concilianda, sancienda Christianorum concordia est; sed non ejusmodi viâ quæ alios proditæ conscientie, alios oblatæ fratribus offensionis reos faciat. Nil necesse est ad ista remedia confugere, cum usitata & trita longè tutiora & utiliora sint. Fruantur jure communi Theologi. Liceat ipsis suum erga Constitutiones Apostolicas obsequium eo modo testari, quo adhucque Theologi testati sunt, & omnes illicò turbæ conticescent.

*Tacere liceat; nulla libertas minor  
A Rege petitur;*

Nec minoris Ecclesiæ tranquillitas constare potest, quàm quæ concessa silendi libertate paratur. Hæc stabilis pacis constituendæ certa, legitima, expedita via est, ad quam ineundam Ecclesiæ Principes, non Apostoli modò præcepta & Summorum Pontificum exempla, sed humana etiam prudentia hortatur & invitat. Ejusmodi enim dissensiones contentionibus gliscunt & augentur, silencio restringuntur & exolescunt. Itaque nisi essent qui invidiosis clamoribus has turbas quotidie suscitarent, jamdiu eorum vel

vel memoria sepulta esset. Habes, Illustrissime Antistes, omnes sensus meos liberè & simpliciter, ut apud amantissimum Fratrem, expositos & effusos. Cautior apud alios fortassè fuerim; sed apud Te quicquam, non dico dissimulare, quod adversus nēminem possem, sed reticere, mihi religioni foret. Ex his, quid ad Dominum Crevæum scribendum sit, pro tuâ prudentia constitues. Illud breviter & verè confirma-

re potes, me & benevolentia ipsius summas gratias agere, & in fide omnia ponere. In summum verò Pontificem, sic affectum esse, ut excepto illo, quod me conscientia teneritudo, vel illo iudice, vetat adduci, quoddam à Catholicis Theologis nec exigi, nec præstari solet, nihil esse quod ad meam in Apostolicam Sedem reverentiam & obsequium testificandum facere defugiam. Datum 7. Cal. Februarii 1660.



# ANTONII ARNALDI THESES THEOLOGICÆ PRIMÆ IN SORBONA

## PRO TENTATIVÆ ACTU

Coram Illustrissimis Ecclesiæ Gallicanæ Patribus defensæ.

## ECCLESIAE GALLICANÆ PATRIBUS CONGREGATIS.

**C**ælestis Sponsæ delicias, invisibilem Angelorum naturam, & ipsum ineffabilem effari cogitanti, Amicos Sponsi, visibiles Angelos, Synagoga Deorum liceat appellare. Vestri munus est (Reverendissimi in Christo Patres) humanâ plusquam munificentia divina scientiæ thesauros populû aperire: vestra sollicitudinis, incorruptum Christi verbum sicut à majoribus accepistis, ita posteris tradere: vestri Ordinis, orta ex abyssi tenebris errorum monstra invicto Spiritu gladio debellare. Confugiunt igitur ad Dispensatores Mysteriorum Musæ sanctiores, viva Dei viventis Oracula Theologia consolat, & præliatura Veritas in auxilium invocat Duces militiæ Domini exercituum. Fidei consummator Jesus sanctificandis vos Fidelibus præposuit ad consummationem Sanctorum; qui venit ministrare, præfecit vos Gregi suo in opus ministerii; adificans Jerusalem Dominus constituit vos spirituales Architectos in adificationem Corporis sui. Quid plura? Quos adoptat Pater, pascit Filius, ungit Spiritus, ita cælesti vestrae legationi subiecti sunt, ut miro prius divinorum munerum consortio Patres filiorum Dei, Pastores ovium Christi, Doctores discipulorum Unctionis, mereamini nuncupari. Addne potest aliquid tam singularibus ornamentis? Vos Reipublicæ Christianæ in ea terrarum portione Principes, quæ totius orbis consensu Christianissimæ nomen obtinuit. Vos ejus Ecclesiæ dignissimi Moderatores, quæ tot Hæresum facibus exstinctâ, tot impiorum oppressis conatibus, errorum victrix, exterminatrix scelerum, antiquam simul doctrinam & pietatem Cælo conspirante semper retinuit, & gloriosissima fecunditate terram toties Fidelibus, & Cælum Electis implevit. Rapit itaque vel invitum ipsa clarissimi Conventus Dignitas in admirationem sui, & quamvis nefas videri possit, publicis Regni rebus invigilantes oculos aliò avocare, fas sit tamen sacræ sapientiæ in augusto Confessu Ecclesiæ Majestatem, in Gallicis Comitibus Galliarum splendorem, in Præsulibus Illustrissimis Sacerdotii Regalis amplitudinem, in spectatissimis viris suscipiendam virtutem quanta potest honoris testificatione venerari.

QUÆ

## QUÆSTIO THEOLOGICA.

*Quænam est Sponsa Uxor Agni? Apoc. 21.*

**C**ivitas sancta Jerusalem, descendens de Cælo à Deo, habens claritatem Dei : Societas Sanctorum, quam Agnus suo sanguine sibi acquisivit in sponsam : Ecclesia Primitivorum, qui conscripti sunt in Cælis, quos non ex operibus, sed in laudem gloriæ Gratiæ suæ elegit Dominus in hæreditatem sibi. De his solis intelligi quod ait Apostolus, *Deus vult omnes homines salvos fieri*, existimasse videtur Augustinus, & cum eo Synodus Afrorum Episcoporum in Sardinia exultantium, & Ecclesia Lugdunensis eo tempore, quo suo Præsule Remigio præsidente, Concilium VALENTINUM adversus eos habitum est, qui sub fictitiæ Prædestinationum hæreseos nomine Augustinum ipsum damnasse videbantur. Illi sunt secundum propositum vocati, quorum nullus non venit, quia ipsa vocatio (quæ non actus vitalis, sed ejus causa est, nec addicta scientiæ mediæ, sed Omnipotentis Voluntati subnixa) dat aures audientes & spiritum novum. In illis Deus operatur, & illos prævenit, primum salutis desiderium etiam liberum inspirando: cum illis cooperatur & illos subsequitur, primam illam voluntatem ulterius promovendo. Absit verò ut libertatem auferat Liberatorem. Tantò illa major est, quantò minùs peccato servit, nullisque vinculis violatur, cum rebus omnibus inferioribus soluta, immobiliter adhæret Domino Deo suo.

**D**escendit de Cælo à Deo Civitas Justa, Urbs fidelis; quia fides, oratio, charitas, perseverantia, quibus illa ædificatio constructa creseit in Templum sanctum in Domino, desursum sunt descendit à Patre luminum, & nemo habet de suo, id est sine Dei Gratiâ, nisi mendacium & peccatum. Liberi præcipitricem arbitrii, & adversus Dei dona superbè se efferentem pestilentissimam Hæresin, à Rufino conceptam, à Pelagio Cælestiisque formatam, à Juliano pertinacissimè defensam, tribus potissimè de causis execrandam censuit Ecclesia. Primò, quòd originale peccatum; Secundò, quòd Gratiâ & ad singulos actus necessariam & gratuitam; Tertiò, quòd quemvis hominum in hac vitâ peccatorem aunderet inficiari. Alia etiam huic Hydræ minutiora capita: Adamum, sive peccasset, sive non peccasset, moriturum fuisse: naturale bonum esse libidinem: legem mittere ad regnum, ut Evangelium: ignorantiam non subjacere peccato: divites salvari non posse, nisi bonis

bonis omnibus in pauperes simul erogatis. In hac sananda peste multum ECCLESIAE GALLICANA debet Catholicus Orbis, tum propter Herorem & Lazarum delatores Pelagii; tum propter Hilarium & Prosperum acerrimos Augustini defensores; tum denique propter Germanum Altiſiodorenſem, Lupum & Severum Trecaſſenſes Episcopos, renaſcentis in Britannia luis hujus expurgatores, celeberrimamque Synodum ARAUSICANAM erroris illius radicibus extirpatricem.

**I**nduere veſtimentis gloriæ tuæ, Jeruſalem Civitas Sancti, quia non adjiciet ultra ut pertranſeat per te incircumciſus & immundus, ſed omnis qui non eſt inventus in Libro Vitæ ſcriptus, miſſus eſt in ſtagnum ignis. Hic infantes Sacramenti regenerationis expertes, quorum licet multi ne ſalvi quidem eſſe potuerint, amiſſæ tamen felicitatis vero dolore afficiuntur. Hic Gentiles, qui commutaverunt veritatem Dei in mendacium, & Creaturæ potiùs quàm Creatori ſervierunt, quorum tota vita peccatum eſſe viſa eſt Auguſtino & falſa virtus, etiam in optimis moribus. Hic quos vetus Teſtamentum in ſervitutem genuit, occidente litterâ, non vivificante Spiritu. Hic quicumque ſine expreſſa fide Incarnationis Chriſti, Creatoris adoratores ſibi viſi ſunt: quântò magis qui vocatus ad Agni nuptias factuſque Chriſtianus, in vitæ veſperâ, cùm ventum fucriſſet ad Cœnam, non habuerit veſtem nuptialem, illud ſcilicet Spiritus donum, quod non imputatio alienæ juſtitie, ſed ſemen quoddam incorruptibile eſt, à charitate indiſtinctum, quò facti in Chriſto nova Creatura, divinæ recipimus naturæ conſortium. Illi omnes ſupremi Judicis, peccatorum vindicis, non authoris, inſcrutabili ſeveritate dimittuntur ingredi vias ſuas, quia vaſa ſunt iræ apta in interitum, ſemen nequam, filii ſclerati.

**Q**uid eſt Iſraël quod deputatus eſ cum deſcendentibus in infernum? Dereliquiſti fontem ſapientie, & in prævaricante capite meritò prævaricatrix origo damnata eſt. Fecit enim Deus hominem ad imaginem & ſimilitudinem ſuam: ad imaginem per naturam, ad ſimilitudinem per gratiam; nec cum condere videtur potuiſſe ſolius naturæ donis ornatum, vel ad alium quam ad quem creatus eſt finem. Conſtituit eum in Paradifo voluptatis, circa Meſopotamiam, ut veriſimile eſt, conſtituto, ubi nuptiæ ſine libidine, nuditas ſine pudore, pax animi ſine diſſidio, vita ſine exitio, donec per antiquum ſerpentem ſeductâ muliere, non ſeductus ipſe, ſed excæcatus ſuperbiâ primus Parens, ſponſionem fecit cum morte, & in terrâ poſuit regnum Inferorum. Inde totus ſecundùm corpus & animam in deterius homo commutatus. A plantâ pedis uſque  
ad

ad verticem non est in eo sanitas, vulnus & livor & plaga tumens, peccatum, mortalitas, concupiscentia. Abeant Manichæi & Pelagiani, utrique ab ægroto medicum arcentes, hi dum sanum profitentur, illi dum insanabilem. Adsit inſericors Samaritanus, qui ob hoc ſolùm venit, ut alligaret vulnera ſemivivi, utque factus in Caput Anguli, ex electis lapidibus Judæi Gentiliſque parietis ædificaret muros Jeruſalem.

**J**eruſalem quæ ædificatur ut civitas, cujus participatio ejus in idipſum, per intuitum & fruſtionem; ſumma quippe felicitas, Deum amantem redamare, proximè videre quem diligas, inacceſſibilem nativis cujuſcumque Creaturæ viribus, & inviſibilem oculis corporis etiam ſpiritualis Majeſtatem, lumine Gloriæ tanquam impreſſâ ſpecie conſpicuam exhibente. Utrùm hæc qualitate deſtitutus intellectus, cum majori cœlitus auxilio viſionem Dei profundere poſſit, neutrà ex parte ſatis certum ducimus: non inſiciamur tamen, à ſolo Deo productâ viſione divinam Eſſentiam videri poſſe; poſſibilem hanc eſſe feliciffimam humanæ mentis contemplationem ratio demonſtrat. Inæqualis pro luminis inæqualitate Sanctorum cognitio, ſed incomprehenſibilem nulla comprehendit. Qui videt Filium; videt & Patrem: qui videt Unum, videt & Trinum: an id tamen neceſſe ſit, probabiliter utrumque diſputatur. Conſpiciuntur in Verbo res creabiles & creatæ, quod, ſi lubet, & omnes re præſentat, & nullas. Nec aliter ipſe Deus, quàm in fonte totius eſſe, derivatos à ſe rivulos contempletur, cujus oculi aperti ſunt ſuper omnes vias filiorum Adam, ſcientiâ potiùs præſentium, quàm præſcientiâ futurorum; quia ejus æternitas nihil futurum. Immutabilis, mutans omnia, eo quo ſeipſum amat affectu, ita Creaturas decernens, ut omni decreto carere potuerit, aded ſui ſolius eſt, & hoc omne quod ſunt omnia.

**M**agnus Dominus & laudabilis nimis in Civitate Dei noſtri, in Monte ſancto ejus, quia videbuntur bona Domini in Terrâ viventium, & ab humanis abſcondita ratiociniis Trinitatis arcana revelatâ facie conſpiciuntur in Sion. Deus Unitas, ſed Ter ſubſiſtens; nec à ſubſiſtentium Trinitate deſtructa, ſed adminiſtrata. Una in hoc Myſterio Eſſentia, duæ Proceſſiones, tres Proprietates, quatuor Relationes, quinque Notiones. Antiquus dierum, totiùſque Deitatis fons Pater divinus, ex ſecundâ rerum omnium ſcientiâ tam contingenti quàm neceſſariâ profert Verbum, exprimit Imaginem, parit Filium, quem Unigenitum in ſinu Patris, Fides exhibet, ratio non demonſtrat. An fortè quia procedit ut natus, Spiritus ſanctus ut datus? An quia Filius nullus amborum niſi Patris & Matris? An quia

quia Verbum Principium de Principio, & Autoris sui fecunditatem referens? An denique quia ratio constitutiva Divinitatis sapientia est, ac proinde origine similior Patri Filius, quam Spiritus, cum Deus de Deo sit, & Sapientia genita de Sapientia generante? Hæc sufficiant non nimium curiosis, donec intremus in Sanctuarium Dei, & appareat Gloria Domini cunctis filiis Israël.

**F**luminis impetus lætificat Civitatem Dei, perfecta scilicet Spiritus inhabitatio, qui fluvijs est aquæ Viræ, procedens de sede Dei & Agni. Hunc concors Patris & Filii dilectio, quæ creata simul & increata complectitur, ita producit, ut si à Patre solo procederet, à Patre etiam solo distingueretur. Principium personæ productivum, putà Filii, mens Paterna, id est Essentia Relationi juncta, productio verò sola Relatio. Ea est hujus Mysteriorum inscrutabilis altitudo, ut nec de vocibus ipsis conveniat inter prudentes Eloquii Mystici. Hypostasis veteribus modò unica, modò triplex, sed hoc posterius Ecclesiæ usus tandem obrinuit. Subsistere, modò absolutum, modò relativum, quibusdam recentioribus utrumque; probabilius tamen relativum solum est. Personam nunc Relationem præcipue significat; Beato tamen Augustino secundum substantiam dicitur, ita ut Pater eo persona sit, non quo Pater est, sed quo est, & idem omnino sit, esse personam & esse Deum. Æternam Personarum Processionem subsequitur Missio temporalis, ubi vel visibiliter in specie aut indutâ aut assumptâ, mortalium oculis manifestantur, vel invisibiliter in mentibus nostris incipit inhabitare virtus Christi secundum Spiritum sanctificationis.

**C**oelestis Jerusalem Civitas Regis Magni, non solum est Tabernaculum Dei cum hominibus, sed & multorum millium Angelorum frequentia coronata: quos tot in viâ salutis naturæ Gratiæque munera discreverant, eos in patriâ pacis felicissimâ societate conjungit. Conditor universorum simul cum Mundo visibili fecit Angelos suos spiritus, immortalis substantiâ æternumque duraturâ, cum quadam licet successione loco non additos, sed pro nutu corporibus affixos, ferri faciles, vel in momento & ad distans intervallum, movendis, induendis, & obsidendis corporibus apprimere idoneos, licet nec pulcherrimum Mundi ordinem violare, nec accuratum tactus judicium fallere, nec opera vitæ exercere possint: eâ denique sapientiâ præditos, ut ingenuis sibi rerum imaginibus omnia naturæ arcana, quæ statas habent causas, penitissimè perscrutentur; quamvis fatendum sit, futurorum contingentium & cogitationum cordis notitiam soli Deo revelanti Mysteriorum, & scrutanti renes, esse reservatam

**M**ultiformis Sapiëntia Dei dispari longè fortè super homines & Angelos, abundantes Gratia suæ divitias effudit. Dedit namque Deus Angelis omnibus (sicut & primo homini) creatis in iustitiâ & sanctificare veritatis, posse perseverare si vellent; ut autem vellent, in eorum libero reliquit arbitrio; dedit Christus Electis suis etiam ut vellent, nec modò perseverantes esse possent, sed & nonnisi perseverantes essent. Unde ad vitam Prædestinatio his donum Gratia, illis meriti merces. Supremus Angelorum plenus sapientiâ & perfectus decore, per elationem quâ ipse sibi ad beatam vitam sufficere veller, dedit cor suum quasi cor Dei, factusque rex super omnes filios superbiæ, projectus est cum sociis suis, tum in aeris hujus caliginem, tum in stagnum sulphuris, etiam ante judicii diem devorante flammâ cruciandus. Beatorum verò Spirituum, qui stantes in veritate, cum Dracone pugnaverunt, præstantissimus Michaël: unde, sicut quondam Populo Judaico, ita nunc Ecclesiæ Christi præpositus creditur, ut quemadmodum singulorum hominum custodes singuli, sic ille Domus Dei, Congregationisque Sanctorum in his diebus afflictionis protector assistat, donec in consummatione sæculi, devictis Inferis, Orbe subdito, novissimâ morte destructâ, triumphantem deducat ad Sponsum suum *Sponsam uxorem Agni.*

*Hæc Conclusiones, Deo duce, & Præside S. M. N. STEPHANO TONNELIER sacrae Theologiæ Doctore Navarrico, & sancti Eustachii Pastore vigilantissimo, propugnare conabitur ANTONIUS ARNAULD Parisinus, die 14 Novembris anno 1635. à meridie ad vesperam, in exterioribus Sorbonæ Scholis.*

# THESES THEOLOGICÆ DE GRATIA

Parisiis in Regia Navarra pro Tentativa propugnatae  
Die 8. Februarii 1640.

## QUÆSTIO THEOLOGICA.

*Quis est ille in quo omnes peccaverunt? Roman. 5.*

**P**rimus Adam, qui in statu justitiæ originalis ita creatus est, ut cum alio modo creari non decuerit. Ea est enim hominis conditio, ut cum donis supernaturalibus produci convenientissimum fuerit. Rectus ab initio constitutus est, nullo libidinis motu animi ejus perturbante, nullâ membrorum lege legi spiritus resistente. Deum nosse & illi cum voluptate servire, vera ejus vita, & egregium fuit ejus nativitatæ ornamentum. Sed quantò plura fuerunt in eo per gratiam Dei justitiæ dona, tantò brevior fuit per crimen ejus illorum duratio; Non quod adjutorium non haberet, in quo posset perseverare si vellet, sed quia tale non obtinuit, quo in illo Deus operaretur ut vellet. Cùm ex origine sua voluntatem haberet fortem & sanam, innatis concupiscentiæ libidinumque moribus nullatenus agitatam, quæ non peccare posset & non mori; libero tamen hujus voluntatis arbitrio ita per inobedientiam superbiamque peccavit, ut immortalitatem & innocentiam cum insuperabili naturaliter mortis & peccati necessitate commutaret.

**N**on sibi solum peccavit Adam, sed illis omnibus qui ex ipso procreati sunt: cùm potentissimus rerum Arbiter ita voluit cum totius humani generis personam gerere, ut in ejus voluntate, nostras omnium voluntates inculpato fœdere concluderet: ex quo sicut obedire laudabiliter per obedientiam tutoris nostri potuimus; ita damnabiliter ejus peccato cecidimus. Ex illo ruere & in miseriæ nativitate antiquiorem referri spes hominum, fractæ vires, aversa Dei mens. Non idèd nobis nocuit peccatum originale, quodd ad justitiam supernaturalem ex gratuità Dei ordinatione destinatos ad statum merè naturalem dejecerit: sed quia inde tanta nos pervasit naturæ depravatæ corruptio, ut malè dicatur miseria, per



quam indebitis spoliatur, sed vera dicenda sit culpa, per quam spoliari meremur; per quam ignorantiae, infirmitati, libidinique subijcitur; per quam mitissimae quidem, sed verissimae ac aeternae damnationi addicimur.

**I**N illa peccati originalis massa potuit Deus omnes homines iustissime relinquere, nec haberet propterea unde conquereretur genus humanum: misericordia tamen ita iustitiae praevaluit, ut inde aliquos liberalissimam voluntate secreverit; & illi sunt quos omnino nec plures nec pauciores ad vitam praedestinavit aeternam. Praedestinationem illam nulla praecessit meritum praevisionis, nulla adjuvit conditionatorum scientia; sed Deus unica voluntate sua fretus electae gentis numerum potentissime definivit, nec libertatem liberalitate sua nobis abstulit; sed concessit. Apage ergo consensus nostri praevisionem. Apage cognitionis mediae speculam, sine qua Deus aut salutem nostram, aut salutis meritum destinare non possit. Apage hominis voluntatem, quae Divinae voluntati resistat. Ex illis quos Pater Filio dedit, nullus auferet ei quemquam. Praedestinatio enim est praescientia & praeparatio beneficiorum Dei, quibus certissime liberantur quicumque liberantur.

**Q**UOS Deus praedestinavit, hos & vocavit, non qualicumque vocatione, sed ea quae est secundum propositum voluntatis suae, à qua nullus est, quantumvis motus & excitatus, qui non possit dissentire, si velit: sed ita in manu Dei sunt hominum & corda & voluntates, ut misericordissime faciat ne suorum quisquam dissentire velit. Falsum est ex duobus aequaliter vocatis alium consentire, alium dissentire: gratia enim actualis, quae vocatio recte nuncupatur, non ita diversis hominibus eadem cum indifferentia tribuitur, ut quam ille rejecerit, iste recipiat. Multò minùs se habet ut causa partialis, quam unus coagendo reddat efficacem, alter negligendo sufficientem: Sed internum est Dei adjuvantis & excitantis auxilium, in omnibus quibus conceditur semper efficax, non arbitrio nostro subiectum, sed arbitrium nostrum Deo subiciens. Quid ergo? Nunquid efficax est gratia, quia voluntati nostrae contemperata? Absit. Vera gratia, semper temperamento veteri contraria, novum potius temperamentum est: quid enim, nisi corruptio & improbitas, peccatoris ingenio contemperatum?

**I**LLA gratiae Christi vocatio nihil est aliud, quam beneficium Dei, quo bonum occurrit quod delectet, & delectat cum occurrerit. Quae duo, ita simul conjunguntur, ut nihil voluntatem delectet, nisi quod intellectu per cogitationem occurrerit, & si quid per cogitationem.

gitationem sine delectatione occurrat, non sit vera Christi gratia, sed vel manifestatio legis, vel doctrinæ revelario, gratiam ostendens, non exhibens; prævaricationem præcepti, non obedientiam mentis, inducens. Hæc gratia modò solùm est Operans, modò etiam Cooperans: Operans, quando dat ut velimus; Cooperans, quando dat ut tantum velimus, quantum sufficit ut agamus; Præveniens, quæ nos prævenit ut velimus; Subsequens, quæ subsequitur, ne frustra velimus. Alia item gratia dici potest Efficax, alia Inefficax: non quòd illa suum sortiatur effectum, ista nequaquam; sed quia gratia Efficax ad opus destinatur, secùs Inefficax. Distingui etiam posset in internam & externam; sed illa divisio beneficià quidem distinguit indebita, non autem gratiam Christi propriè dictam.

**Q**uanta fuit peccati corruptio, tanta est gratiæ actualis necessitas. Sine illa nihil habemus, nisi peccatum & mendacium: intellectus errori, voluntas infirmitati obnoxia: sine illà nullam possumus tentationem vincere, sine illà nihil possumus benè agere, imò nullatenus in bono perseverare, nedum à peccato resurgere. Omnis enim actio voluntaria nescio quid peccati redolet, nisi fidem habeat pro radice, & pro principio veram Dei dilectionem in paucissimis perfectam, in pluribus provectam, in omnibus benè agentibus inchoatam. Ne Camillos ergo, ne Scipiones aut Regulos frustra aggeras, aut nominibus illorum, tanquam in antiqua Romana Curia loqueremur, me putes esse terrendum: ne ad scholam Pythagoræ provocas vel Platonis. Nec in istis est iustitia, quia iustus ex fide vivit. Sed quamvis ab infidelibus nihil undequaque possit benè fieri; tamen ab impiis & peccatoribus non rarò bona opera exercentur, cùm in illis lex Spiritus, quamvis infirmior, legi membrorum aliquantùm resistit, & quibusdam voluntatis imperfectæ conatibus concupiscentiam effusæ grassantisque libidinis moderatur.

**Q**uos Deus secundùm propositum vocavit, hos & iustificavit: Etenim ad sui amorem, qui vera est hominum iustitia, illos vocavit. Non tamen tanta est, aut tam efficax quælibet electorum vocatio, ut ad justificationem usque perducatur. Interdum fidem mortuam operatur in nobis, interdum tenuem voluntatis affectum, interdum opera sanctitatis impetratoria, non condigna. Sed si perfecta est vocatio, cor nostrum perfecto Dei amore, qui solus perfecta est iustitia, perfectoque ardore dilectionis accendit. Timor divinæ iustitiæ, dolor de peccato, pudor quo reus salubriter ingemiscit, tantùm abest ut naturalia sint, & prava conscientiae terribilissima; quin veræ sunt gratiæ, cognitionis, & amoris Dei supernaturalis effectus, à principiis eorum rudibus exorti, & ad per-

fectionem eorumdem disponentes. Non solum ad acquirendam, sed ad conservandam iustitiam requiritur gratiæ excitantis & adjuvantis auxilium; sed sicut indebita est peccatoribus pœnitentia quâ resurgant, sic etiam indebita est iustis gratia quâ perseverent. Ad singulos enim actus requiritur gratia Dei à peccatorum remissione distincta.

**D**istinguitur etiam gratia Dei à libero corrupti hominis arbitrio, quamvis à verâ hominis libertate non distinguatur. Liberum enim hominis arbitrium ad mala quidem ex se sufficiens est, sed nihil valet ad bonum, nisi fuerit per gratiam liberatum: Imò cum gratiâ sanctificante, secluso actuali auxilio, nihil potest bonum exsequi. Triplex est libertatis status: primus est libertatis integræ, secundus libertatis vulneratæ, ultimus denique libertatis consummatæ. Libertate integrâ potiebatur Adamus: Naturam enim habuit verè liberam, & facultates nullâ servitute impeditas, quamvis adhuc ex sua conditione defectibiles. Libertate consummatâ fruuntur in cœlo Beati, per naturam in boni possessione confirmatam, & facultates à quocumque deficiendi periculo remotas. Libertatem vulneratam obtinent, quorum natura per gratiam habitualement reparata est, ita tamen ut in eorum facultatibus ignorantia & infirmitatis vulnera assidue sananda permaneant.

**L**ibertas illa, Justificatio, gratiæ actualis Auxilia, non Prædestinati tantum, sed multis etiam Reprobis indulgentur. Sola discretio à malsâ peccati originalis reprobis omnibus cum dono perseverantiæ denegata est. Hos enim non vult Deus salvos fieri. Et manifestum est eos, qui huic resistunt veritati, non intelligere quâ locutione sit dictum, quod Deus omnes homines vult salvos fieri; cum tam multi salvi non fiant, non quia ipsi, sed quia Deus ob demerita non vult. Idèd namque hoc dictum est, quia omnes qui salvi fiunt, nisi ipso volente non fiunt. Porro quæcumque beneficia, sive per vocationem, sive per gratiam remissionis peccatorum Reprobis Deus impendit, non ipsorum causâ, sed eorum quos elegit, ipsis conferuntur. Reprobis aliquos si Deus indurat, si aliquos ad agnitionem veritatis non perducit, si à criminibus efficaciter non revocat, non aliundè procedit, quàm ex iustissimo illius iudicio, qui ex eadem luti conspersione, alios vasa fecit in honorem, alios vasa in contumeliam, ex quo *In Adam omnes peccaverunt.*

*Hæ Conclusiones, Deodante, & Præsidente S. M. N. PETRO BEDACIER, Doctore Theologo, & magno Majoris-Monasterii Priore, tuebitur PETRUS DARBO Burdigalensis, die Mercurii 8. Februarii 1640. A Meridie ad Vesperam.*

# I N D E X

## *Contentorum in hoc CAUSÆ ARNALDINÆ Volumine.*

- I. **A**ntonii Arnaldi Doctoris Sorbonici ad Alexandrum VII. Pontificem Maximum Epistola, Quâ suæ Sanctitati obtulit ejusque Judicio subjecit suam ad quemdam Ducem & Franciæ Parem Epistolam II. ex qua notatæ propositiones duæ decerptæ sunt. *Pag. 1*
- II. Animadversiones in ea quæ Acta sunt in Comitibus Facultatis Theologiæ Parisiensis, habitis apud Sorbonam die 4. Novembris an. 1655. super eadem Epistola Antonii Arnaldi Doctoris Sorbonici ad quemdam Ducem & Franciæ Parem. 5
- III. Antonii Arnaldi Epistola ad Sacram Facultatem Parisiensem in Sorbona Congregandam 1. Decembris anni 1655. 26
- IV. Epistola & Scriptum Antonii Arnaldi Doctoris & Socii Sorbonici, ad sacram Facultatem Parisiensem in Sorbona Congregatam, die 7. Decembris an. 1655. 28
- SECTIO I. Propositionem illam auctori Epistolæ adscribi non debere, cum Patrum sit; & quidem ipsorum verbis expressam. 31
- SECTIO II. Explanatur Propositio, & omnis offendiculi expers ostenditur. 32
- SECTIO III. Nihil videri in propositione probè intellecta, quod hæreseos vel etiam erroris notari mereatur. 35
- SECTIO IV. Propositionem Epistolæ à prima Propositione damnatâ toto cælo differre. 43
- V. Scripti Pars altera: De Quæstione Facti. 48
- VI. Epistola & alter Apologeticus Antonii Arnaldi Doctoris & Socii Sorbonici, ad Sacram Facultatem Parisiensem in Sorbonâ Congregatam, die 17. Jan. an. 1656. 56
- SECTIO I. Quæ à Disquisitoribus vel de industria prætermittasunt, vel leviter perstricta, vel ultro concessa, recensentur. 58
- SECTIO II. Propositio in Indiculo notata, omnis erroris ac hæreseos expers demonstratur. 66
- SECTIO III. De vero Tridentini Anathematis in primæ propositionis damnatione memorati sensu, ex Cardinalis Bellarmini sententiâ. 79
- VII. Propositiones Theologiæ duæ, de quibus hodie maxime disputatur, clarissimè demonstratæ. 94
- VIII. Vera S. Thomæ de Gratia sufficiente & efficaci Do-

# I N D E X.

Etina dilucidè explanata. Autore Antonio Arnaldo Do-	
ctore & Socio Sorbonico.	107
ARTICULUS I. Duplex auxilium gratiæ: Habituale donum, &	
Auxilium Dei moventis.	108
ART. II. Vox gratiæ apud S. Thomam pro habituali dono sumi	
solita.	ibid.
ART. III. Quid sit Gratia habitualis.	109.
ART. IV. Gratia habitualis naturam sanat, elevat, dat posse	
mandata implere, & peccata vitare.	110
ART. V. Cujusmodi sit ea potestus mandata implendi & peccata	
vitandi, quam dat gratia habitualis.	112
ART. VI. Non potest justus operari bonum & vitare peccatum	
sine novo auxilio Dei moventis.	113
ART. VII. Indiget justus ad perseverandum, ut perseverantia ei	
à Deo detur.	114
ART. VIII. Potest semper justus, & aliquando non potest, diverso	
sensu. Aptissima in eam rem Augustini comparatio.	115
ART. IX. Quid sit auxilium Dei moventis. Numquam est sine	
actu vel intellectus vel voluntatis.	116
ART. X. In quo consistat auxilium Dei moventis, ex divisione	
gratiæ in operantem & cooperantem maximè illustratur.	117
ART. XI. Auxilium Dei moventis semper efficax illius effectus	
ad quem à Deo ordinatur.	119
ART. XII. Ex dilectione Dei, quæ semper in homine efficit id quod	
ei vult Deus, eadem divinæ motionis efficacia demonstratur.	120
ART. XIII. Habet illud auxilium necessitatem ad id ad quod ordi-	
natur à Deo, non quidem coactionis, sed infallibilitatis.	121
ART. XIV. Infallibiliter Deum diligit, quem movet Spiritus san-	
ctus ad diligendum Deum.	122
ART. XV. Prima diversitas, cur ampliorem alter altera gratiam	
consequatur ex Deo rarsè movente.	123
ART. XVI. Quod ad gratiam alter perfectè se præparet, alter mi-	
nus perfectè, ex vario Dei moventis auxilio repetendum.	125
ART. XVII. Quanam ratione auxilio Dei aliquando resistatur,	
et si semper efficax sit ex S. Thoma.	126
ART. XVIII. Auxilium Dei moventis ad omne prorsus bonum	
necessarium est; nullaquæ sine illo ad gratiam quantumvis im-	
perfecta præparatio.	129
ART. XIX. Sine motione Dei non potest homo aliquid velle. Illa	
verò duplex. Altera universalis, altera specialis per gratiam.	130
ART. XX. De auxilio Dei moventis intelligendum quod ait Chri-	
stus: Sine me nihil potestis facere.	131
ART. XXI. Sine auxilio Dei moventis non modò homo non agit,	
sed nequidem agere potest.	132

# I N D E X.

- ART. XXII. *Cur justis interdum gratia efficax non detur, in ipsis causa est, non in Deo.* 133
- ART. XXIII. *Universa S. Thomæ de gratiâ doctrina ad septem capita revocatur.* 140
- ART. XXIV. *Explicatur propositio secundum doctrinam S. Thomæ.* 142
- IX. Instrumentum seu Libellus Contestatorius 27. Januarii anni 1656. denuntiatus Sapientissimis Viris Decano, Syndico & Scribæ Facultatis Theologiæ Parisiensis, nomine Sapientissimi D. Antonii Arnaldi Doctoris Sorbonici. 145
- X. Censura Sacræ Facultatis Theologiæ Parisiensis, lata in Libellum, cui titulus est: *Seconde Lettre de Mr. Arnauld &c.* 150
- XI. Joannis Launoii Constantiensis, Parisiensis Theologi, Notationes in Censuram duarum Antonii Arnaldi Propositionum, quarum una Facti, altera Juris, appellatur. 154
- XII. Antonii Arnaldi Doctoris & Socii Sorbonici Epistola Apologetica ad quemdam Episcopum prima, quâ omnium à se actorum ab ipso Comitiorum Sacræ Facultatis Theologiæ exordio usque post discussam Facti quæstionem, rationem reddit. 196
- XIII. Antonii Arnaldi Doctoris & Socii Sorbonici Epistola secunda Apologetica ad quemdam Episcopum, quâ suam agendi rationem, circa Quæstionem Juris, ab omni probro vindicat, & iniquas Adversariorum molitiones arguit. 216
- XIV. Antonii Arnaldi Doctoris Sorbonici ad quemdam Episcopum Epistola Apologetica Tertia, quâ Propositionis, à Theologiæ Facultatis parte damnatæ, veritatem asserit. 235
- XV. Ad Henricum Holdenum Sacræ Facultatis Parisiensis Doctorem, Ant. Arnaldi Doctoris Sorbonici Epistola. 254
- XVI. DISSERTATIO THEOLOGICA Antonii Arnaldi Doctoris Sorbonici, Super illa Propositione SS. Chrysostomi & Augustini: Desuit Petro tentato Gratia sine qua nihil poterat, Quadripartita, in qua exhibetur NORMA tum loquendi, tum sentiendi, circa possibilitatem Præceptorum, & Gratiæ efficacis necessitatem. 261
- Præfatio. In qua descriptionis occasio, consilium, & partitio, declarantur.* 266
- DISSERTATIONIS PARS PRIMA.
- In qua Augustinianæ Propositionis veritas totius Traditionis auctoritate roboratur.
- ART. I. *Status quæstionis exponitur, & quedam præmittuntur ad illam rectè intelligendam necessaria.* 269
- ART.

# I N D E X.

- ART. II. *Vernus & præcisus Propositionis sensus ostenditur.* 272  
 ART. III. *Sensum catholicum superius expositum controversæ propositionis verbis rectè exprimi potuisse, ostenditur primum ex Scripturis.* 273  
 ART. IV. *Eadem locutio ex Summi Pontificibus asseritur.* 276  
 ART. V. *Quod à Conciliis definitum est, Sine gratiâ nihil boni fieri posse, ab iisdem Conciliis de gratia efficaci intellectum esse.* 279  
 ART. VI. *Augustini auctoritate confirmatur, quod fide tenemus, Sine gratiâ nihil fieri posse, de gratiâ efficaci esse intelligendum.* 286  
 ART. VII. *Idem fidei dogma; Sine gratiâ nihil fieri posse, ab iis Patribus, qui post Augustinum adversus Semipelagianos scripserunt, de gratia efficaci semper intellectum esse.* 293  
 ART. VIII. *Sancti Thomæ aliorumque tum veterum tum recentiorum scholæ Doctorum auctoritate eadem veritas confirmatur.* 298  
 ART. IX. *Eadem locutio recentiorum Thomistarum auctoritate asseritur, qui falsò ipsius insectatores habentur.* 301  
 ART. X. *Ecclesiam in suis precibus id tantum petere quod non possit; neque tamen aliam à Deo gratiam petere quàm efficacem.* 305  
 ART. XI. *Primæ Partis Conclusio.* 307

## DISSERTATIONIS SECUNDA PARS.

Quâ conciliatur illa Sanctorum Patrum locutio: *Sine gratiâ efficaci nihil fieri potest; cum illorum Thomistarum doctrinâ, qui gratiam efficacem non ad posse, sed ad velle necessariam statuunt.* 311

ART. I. *Scopus & consilium Secunde illius partis aperitur.* ibid.

ART. II. *Consensio & dissensio Thomistarum inter se breviter aperitur.* 312

ART. III. *Exponitur & solvitur questio, ex duplici acceptione vocis posse ab Alvarez traditâ.* 314

ART. IV. *Usitatiùs de eo cui deest aliquid necessarium dici non posse, quàm posse; etiamsi illud quod deest ad potentiam non pertineat. Variæ observationes circa illorum verborum usum.* 317

ART. V. *Idem probatur ex præclaro Sancti Anselmi loco.* 320

ART. VI. *Usitatiùs dici, Non posse videre qui lumine carere supponitur, quàm, Posse, probatur ex variis locis Patrum: Justus autem sine gratiâ efficaci est sicut oculus sine luce, ex omnibus Thomistis.* 321

ART. VII. *Idem ostenditur ex adjutoriorum divisione ab Augustino traditâ libro De gestis Pelagii.* 323

ART. VIII. *Explicatur alia adjutoriorum divisio ab eodem Augustino tradita, & ostenditur omne adjutorium sine quo aliquid non*



# I N D E X.

- fit, esse adiutorium sine quo non potest fieri.* 325
- ART. IX. *Afferitur necessarii definitio ex S. Thomâ, & demonstratur ex illa, sine gratiâ efficaci nihil fieri posse: quam demonstrationem non convelli responsione clarissimi Theologi, quamvis subtilissimâ, declaratur.* 327
- ART. X. *Colliguntur in summam quæ hac secunda parte confecta sunt, & suppositâ gratiæ efficacis necessitate reliquas de propositione meâ contentiones planè absurdas & ridiculas esse ostenditur.* 329
- DISSERTATIONIS TERTIA PARS.
- In quâ incidentes quæstiones, & à propositionis veritate disjunctæ breviter explicantur.
- ART. I. *Prima quæstio: Utrum gratia efficax det actum primum, an secundum; posse, an tantum velle & agere; explanatur quæstio & dividitur.* 332
- ART. II. *Gratiam efficacem, quatenus est principium bonæ voluntatis, ab aliâ in misericordia Dei & formâ inbarente constitui, ab aliâ in solâ misericordia Dei, quæ interiùs motum mentis operatur.* 333
- ART. III. *Quæ gratiam efficacem formam inbarentem esse volunt, quæ sit principium bonæ voluntatis, consequenter dicere debere, Gratiâ efficaci non dari tantum actum secundum, sed etiam primum; sive, quod idem est, complementum actus primi.* 336
- ART. IV. *Gratiam efficacem non pertinere ad actum primum, sed ad secundum, in eorum sententia, qui illam, quatenus est principium bonæ voluntatis, in misericordia Dei, non in forma inbarente constituunt.* 337
- ART. V. *Gratiam efficacem respectu bonorum operum dare posse, etsi non ab ipso velle distinctum.* 339
- ART. VI. *Superioris Doctrinæ quædam maximi momenti confessionaria.* 341
- ART. VII. *Secunda quæstio: An potentia quæ iustis inest ante gratiam efficacem, debeat dici proxima, completa, & expedita?* 343
- ART. VIII. *Tertia quæstio de gratiâ sufficiente; sufficientis nomen variè usurpari posso.* 345
- ART. IX. *Sufficientis nomen in alio sensu à Patribus acceptum, quàm à recentioribus Thomistis vulgò usurpetur.* 347
- ART. X. *Cavendum esse ne gratiæ sufficientis voce ad gratiæ efficacis necessitatem avertendum abutantur Molinistæ.* 349
- ART. XI. *Sufficientis gratiæ nomen Thomistico sensu usurpatum habituali gratiæ rectius tribui quàm aâuali.* 352
- ART. XII. *Bono etiam sensu gratiam excitantem dici posse sufficientem.* 357
- ART. XIII. *Quarta quæstio: Utrum semper adsit gratia excitans, quam*

# I N D E X.

<i>quam Thomisticè sufficientem vocant. Accuratiùs explicatur illius gratiæ natura.</i>	358
ART. XIV. <i>Quando admittenda sit excitans illa gratia.</i>	359
ART. XV. <i>Utrum adsit in omnibus generatim peccatù gratia excitans, sive sufficiens Thomistico sensu.</i>	361
ART. XVI. <i>De peccatis mortalibus accuratiùs.</i>	367
ART. XVII. <i>Nullam gratiam necessariam esse ut homini peccatum imputetur.</i>	368
DISSERTATIONIS QUARTA PARS.	
In quâ variæ quæstiones de mandatorum possibilitate explicantur.	
ART. I. <i>Quam gratiam intellexerit Augustinus, sufficientem an efficacem, cum in lib. 2 de pecc. mer. &amp; rem. dicit, Voluntate humanâ, gratiâ adjuvante divinâ, posse homines in hac vitâ esse sine peccato?</i>	372
ART. II. <i>Augustinum hic agere de vitando per totam vitam omni peccato, etiam veniali, quod justum omnem posse per gratiam sufficientem sibi collatam, Tridentina Synodus dici vetat.</i>	373
ART. III. <i>Gratiam, quâ adjuvante ait Augustinus hominem esse posse sine peccato, efficacem esse, &amp; quâ non semper homines adjuvantur.</i>	375
ART. IV. <i>Idem esse Augustino, Posse hominem esse sine peccato, &amp; Fieri posse ut homo sit sine peccato; quod postremum ad gratiam efficacem sine dubio pertinet.</i>	377
ART. V. <i>Hominem vivere sine peccato, opus esse divinum, ideoque possibile, quia omnia possible sunt Deo.</i>	378
ART. VI. <i>Illustrantur varia Augustini loca de possibilitate præceptorum.</i>	383
ART. VII. <i>DE GRATIA ORANDI. Explicatur nuperam Alphonsi le Moynes super illâ commentum: &amp; ad Propositionem controversam minimè pertinere ostenditur.</i>	385
ART. VIII. <i>Gratiam orandi omnibus semper præsentem malè elici ex illis Augustini verbis: Deus jubendo monet &amp; facere quod possis, &amp; petere quod non possis.</i>	388
ART. IX. <i>Absurda quedam Molinianæ istius orandi gratiæ consectoria.</i>	389
ART. X. <i>Inferuntur alia quedam non minùs absurda.</i>	392
ART. XI. <i>De Concilii Tridentini circa præceptorum possibilitatem mente, non una, sed triplex Catholicorum Theologorum opinio.</i>	393
ART. XII. <i>Alvaresianus sensus nihil officit controversæ propositioni: rejicitur tamen ut alienus; Molinisticus autem, ut falsus.</i>	396
ART. XIII. <i>Bellarmini &amp; Estii interpretatio quatuor rationibus confirmatur.</i>	398

# I N D E X.

- ART. XIV. *Totius operis conclusio, in qua barbarum istarum origo, & intoleranda Censuræ iniquitas paucis aperitur.* 403
- XVII. *Fratri Joannis Nicolai Doctoris Theologi Parisiensis, & apud Prædicatores-Primarii Regentis, Molinisticæ Theses Thomisticis notis expunctæ.* 1656. 407
- Appendix, seu F. Joannis Nicolai calumniarum specimen ex Libello cui titulus, *Censurium Suffragium.* 438
- CALUMNIA I. *In præsumptione Petri nullum ab Arnaldo peccatum, ne veniale quidem admitti.* ibid.
- CAL. II. *Desertionis causam ex Arnaldi sententiâ non Petro, sed Deo adscribendam.* 439
- CAL. III. *Non propter præsumptionem Petrum à Deo desertum esse.* 440
- CAL. IV. *Petro impossibile fuisse ne non caderet: nullam habuisse potestatem ad vitandum peccatum.* 441
- CAL. V. *Petri casum ex infirmitate, ex vitio, ex timore non accidisse.* 442
- XVIII. *Vindiciæ Sancti Thomæ circa gratiam sufficientem. Adversus P. Joannem Nicolai Ordinis Fr. Prædicatorum & Doctorem Parisiensem.* 443
- Præfatio. *In qua quædam generaliter de toto P. Joannis Nicolai scripto præmonentur: atque hujus Operis argumentum & partitio exponuntur.* 445
- SECTIO I. *In quâ ex in locis in quibus S. Thomas docet, Deum, quantum in se est, omnibus gratiam dare, gratiam actualem, sufficientem dictam, omnibus non dari ostenditur; & omnia ejusdem Sancti testimonia à P. Nicolai 1. & 2. Classe relata exponuntur, & à pravo sensu illis per eum afflicto vindicantur.* 461
- ART. I. *In quo exponitur illud S. Thomæ testimonium in 12. ad Hebræos à Patre Nicolai 1. Classe relatum: Gratia nulli deest; sed omnibus, quantum in se est, se communicat, &c. Ostenditurque eo in loco S. Thomam expressè docere, gratiam actualem sufficientem omnibus non dari.* 462
- ART. II. *In quo exponitur illud testimonium I. 3. contra gentes c. 159. Deus, quantum in se est, paratus est omnibus gratiam dare, &c. Pariterque ostenditur, S. Thomam hoc loco expressè docere, gratiam sufficientem omnibus non dari.* 465
- ART. III. *In quo solvuntur argumenta, quibus P. Nicolai probare nititur S. Thomæ testimoniis supra allatis gratiam sufficientem astrui.* 468
- ART. IV. *In quo plenius exponitur & confirmatur bonum verborum sensus, Gratia, quantum in se est, omnibus se communicat; sicut nec sol deest oculis cæcis; ac, Deus, quantum*

- tum in se est, paratus est omnibus gratiam dare. 470
- ART. V. *In quo exponitur illud testimonium, Deus non deficit ab agendo quod est necessarium ad salutem; Et ostenditur ex S. Thomæ circa id doctrina, gratiam sufficientem omnibus non dari.* 476
- ART. VI. *In quo exponuntur tria S. Thomæ in Scripturam testimonia, Et à perverso Patrî Nicolai sensu vindicantur.* 481
- ART. VII. *In quò exponitur hoc testimonium: Lex nova, quantum est de se, sufficiens auxilium dat ad non peccandum; ac satisfit argumentis omnibus, quibus P. Nicolai probare nititur his verbis auxilium actuale, non verò habituale designari.* 484
- SECTIO II. *In quâ ostenditur ex iis quæ S. Thomas de possibilitate præceptorum docet, gratiam sufficientem omnibus communem non solum non astrui, sed etiam rejici; ac testimonia à Patre Nicolai tertiâ Classe allata exponuntur.* 489
- ART. I. *In quo ostenditur S. Thomam ad possibilitatem præceptorum exponendam nunquam ad aliquam gratiam actualem sufficientem communem recurrere.* 490
- ART. II. *In quo ostenditur, cur juxta S. Thomam nunquam dici debeat, præceptum esse impossibile; etsi gratia sufficiens omnibus semper non detur. S. Thomæ cum S. Augustino, in explicandâ præceptorum possibilitate, concordia.* 494
- ART. III. *In quo omnia S. Thomæ testimonia à Patre Nicolai circa possibilitatem præceptorum 3. Classe relata exponuntur, Et à perverso sensu illis per eum affecto vindicantur.* 497
- SECTIO III. *In quâ ex iis quæ S. Thomas docet de imputatione peccati, de Voluntate Dei antecedente Et consequente, Et de morte Christi pro omnibus, quantum ad sufficientiam pretii, gratiam actualem sufficientem omnibus communem non solum non astrui, sed etiam negari ostenditur.* 504
- ART. I. *In quo ostenditur S. Thomam nunquam peccati imputationem per gratiam sufficientem, in qui peccant semper datam, exposuisse.* 505
- ART. II. *In quo idem confirmatur ex iis quæ de lege docet 1. 2. q. 98. Et 106. Et in Epist. ad Rom. ac Patris Nicolai responsio refellitur.* 509
- ART. III. *In quo referuntur sensus omnes secundum quos S. Thomas exponit, quomodo Deus velit omnes homines salvos fieri, Et ex nullo gratiam sufficientem communem colligi posse ostenditur.* 519
- ART. IV. *In quo exponitur, quid sit apud S. Thomam voluntas antecedens Et consequens, atque ex voluntate antecedente gratiam sufficientem omnibus communem astrui non posse ostenditur.* 521

# I N D E X.

- ART. V. *In quo ostenditur ex iis quæ S. Thomas docet de morte Christi pro omnibus, quantum ad sufficientiam, gratiam sufficientem communem astrui non posse.* 529
- ART. VI. *In quo ostenditur juxta S. Thomam Christum nullam voluntatem habuisse salvandi omnes homines, ex quâ auxilium actuale sufficiens omnibus commune astrui possit.* 543
- SECTIO IV. *In quâ refertur propria causæ sufficientis, & gratiæ sufficientis apud S. Thomam significatio; ac ostenditur, omnem actualem Christi gratiam semper esse efficacem, quantum ad effectum ad quem ex Dei intentione ordinatur; & exponuntur omnia S. Thomæ testimonia à P. Nicolai 4. classe relata.* 548
- ART. I. *In quo refertur propria apud S. Thomam hujus vocis sufficientis significatio, sive de gratiâ, sive de quacumque aliare sermo sit.* 549
- ART. II. *In quo refertur & consutatur quod dicit P. Nicolai de gratiæ sufficientis & efficaci significatione: efficaciæ passionis Christi cum efficaciâ gratiæ discrimen ostenditur; & Patrem Nicolai non solum à S. Thomâ, sed etiam ab omnium Thomistarum, etiam recentium, sententiâ omnino recedere demonstratur.* 562
- ART. III. *In quo exponitur hoc S. Thomæ testimonium 1. 2. q. 112. art. 3. Præparatio hominis considerata secundum quod est à Deo movente, habet necessitatem ad id ad quod ordinatur à Deo, &c. Et Patris Nicolai in hunc locum responsiones omnes consutantur.* 574
- ART. IV. *In quo exponuntur quinque S. Thomæ testimonia, quibus P. Nicolai pravam suam interpretationem confirmare nititur.* 578
- ART. V. *In quo ostenditur quàm temerè P. Nicolai Conradi Koellin testimonium ad suam expositionem confirmandam referat, cùm è contrario nostram confirmet.* 582
- ART. VI. *In quo exponuntur omnia testimonia quibus P. Nicolai probare nititur, gratiam Dei non esse semper efficacem; ac primò circa illud, Vos semper Spiritui sancto resistitis.* 586
- ART. VII. *In quo exponuntur testimonia n. 4. relata. Quid sit, Esse in naturâ humanâ ut mens non repugnet interiori instinctui & exteriori prædicationi veritatis; & quid sit interior instinctus.* 587
- ART. VIII. *In quo exponuntur duo alia testimonia n. 5. relata in cap. 1. ad Rom. ubi justificatio in aliquibus frustrari dicitur; & è questione 24. de libero arbitrio, ubi peccans in Spiritum sanctum dicitur operari contra gratiam Spiritus sancti.* 592
- ART. IX. *In quo duo alia testimonia ex S. Thomæ Commentariis in Scripturam, ad præsentem questionem pertinentia, à P. Nicolai 5. classe relata explicantur. Quæ sit gratia quâ utimur, vel non utimur.* 596

# I N D E X.

- SECTIO V. De causa defectus gratiæ: ubi præsertim de justis.  
Exponuntur S. Thomæ testimonia à Patre Nicolai 5. Classe re-  
lata. 600
- ART. I. In quo referuntur S. Thomæ testimonia, in quibus de cau-  
sâ defectus gratiæ agitur. 601
- ART. II. In quo ostenditur ex hiis testimoniis sequi necessariò, gra-  
tiam sufficientem omnibus non dari, nec posse ullam hac in re  
questionem moveri, nisi circa justos, eamque circa peccata mor-  
talia facillimè solvi, & ad sola venialia revocari, nec ad Ar-  
naldi Propositionem ullo modo pertinere. 603
- ART. III. In quo ostenditur, Patrem Nicolai huic quæstioni, de  
causa defectus gratiæ circa peccata venialia, respondere non posse,  
quin gratiæ per se efficacis ad singulos pios actus necessitatem resi-  
ciat. Ei enim qui illam de gratiâ efficace doctrinam admittat, ad  
peccatum originale recurrendum esse. 608
- ART. IV. Ex sancto Thomâ causam defectus gratiæ aliquando ad  
peccatum originale, etsi in baptismo remissum, referri: nec aliter  
ejus de Gratiâ & Prædestinatione doctrinam exponi posse octo ar-  
gumentis ostenditur, quorum quinque priora hic proponuntur. 612
- ART. V. In quo demonstratur juxta S. Thomam primam causam  
reprobationis hominum esse peccatum originale, seu massam per-  
ditionis. 618
- ART. VI. Postrema duo argumenta quibus item concluditur, lap-  
sum justorum ad corruptionem naturæ & damnationem origina-  
lem ex S. Thomæ doctrinâ meritò referri. Omnimoda S. Thomæ  
cum S. Augustino in hoc capite concordia. 629
- ART. VII. In quo ostenditur Conradum Koëllin, à P. Nicolai  
laudatum, eodem modo S. Thomam interpretatum esse circa causam  
defectus gratiæ. 635
- XIX. Antonii Arnaldi Doctoris Sorbonici Epistola, ad Il-  
lustrissimum & Reverendissimum Henricum Arnaldum An-  
degavensium Episcopum, Fratrem suum. Quâ accusatio-  
nem è judicio Sorbonico petitam depellit, & fidem suam  
circa quinque Propositiones exponit, in gratiam Romani  
cujusdam Theologi. 639
- XX. Ejusdem ad eundem Epistola altera. 645
- Antonii Arnaldi Theses Theologicæ primæ in Sorbona pro  
Tentativæ Actû, coram Illustrissimis Ecclesiæ Gallicanæ  
Patribus defensæ. 651
- Theses Theologicæ de Gratiâ, Parisiis in Regia Navarra pro  
Tentativa propugnata. Dic 8. Februarii 1640. 657









